

NDUUDU N'DÁÍ CHÍ DÍNGUŪⁿ APÓSTOL MATEO

*Yeⁿ'é 'iiⁿyāⁿ chi ndaata yeⁿ'ē Jesucristo chí vm-
nááⁿ vmnaaⁿ
(Lc. 3.23-38)*

¹ Chuū chí lista yeⁿ'e ndaata yeⁿ'e Jesucristo, ndíí na ndaata Abraham ndíí na ndaata David ndíí tiempo chí ch'iindiyááⁿ Jesucristo.

² Abraham miiⁿ ch'iīndī daiya sa chi nguuvi Isaac. Isaac miiⁿ ní ch'iīndī daiya sa chi nguuvi Jacob. Jacob miiⁿ ní ch'iīndī daiya sa Judá ndúúcū tanáⁿ'ā 'díínu yā. ³ Judá miiⁿ ní ndúúcū Tamar chí n'daataá yeⁿ'ē sa ch'iīndī daiyá yā chí cuates chí nguuvi Fares ndúúcū Zara. Fares miiⁿ ní ch'iīndī daiya sa Esrom. Esrom miiⁿ ní ch'iīndī daiya sa Aram. ⁴ Aram miiⁿ ní ch'iīndī daiya sa Aminadab. Aminadab miiⁿ ní ch'iīndī daiya sa Naasón. Naasón miiⁿ ní ch'iīndī daiya sa Salmón. ⁵ Salmón ndúúcū Rahab chí n'daataá yeⁿ'ē sa ní ch'iīndī daiyá yā Booz. Booz miiⁿ ndúúcū Rut chí n'daataá yeⁿ'ē sa ní ch'iīndī daiyá yā Obed. Obed miiⁿ ní ch'iīndī daiya sa Isaí. ⁶ Isaí miiⁿ ní ch'iīndī daiya sa rey David. Rey David miiⁿ ní ch'iīndī daiyá yā Salomón taachi caneé yā ndúúcū n'daataá chí vmnááⁿ vmnaaⁿ ní n'daataá yeⁿ'e saⁿ'ā Urías.

⁷ Salomón miiⁿ ní ch'iīndī daiya sa Roboam. Roboam miiⁿ ní ch'iīndī daiya sa Abías. Abías miiⁿ ní ch'iīndī daiya sa Asa. ⁸ Asa miiⁿ ní ch'iīndī daiya sa Josafat. Josafat miiⁿ ní ch'iīndī daiya

sa Joram. Joram miiⁿ ní ch'iindī daiya sa Uzías. ⁹ Uzías miiⁿ ní ch'iindī daiya sa Jotam. Jotam miiⁿ ní ch'iindī daiya sa Acaz. Acaz miiⁿ ní ch'iindī daiya sa Ezequías. ¹⁰ Ezequías miiⁿ ní ch'iindī daiya sa Manasés. Manasés miiⁿ ní ch'iindī daiya sa Amón. Amón miiⁿ ní ch'iindī daiya sa Josías. ¹¹ Josías miiⁿ ní ch'iindī daiya sa Jeconías. Jeconías miiⁿ ndúúcū tanáⁿā vi'i yā ch'iindiyáaⁿ yā taachi chiidá yā ndúúcū chεεcú yā ní preso yā ndúúcū tanáⁿā 'iiⁿyāⁿ yeⁿe ndaata Israel ní taachi cueⁿé yā na cyúúní na yáⁿāa Babilonia.

¹² Cuayivi chi cho'ó yā na yáⁿāa Babilonia, Jeconías miiⁿ ní ch'iindī daiya sa Salatiel. Salatiel miiⁿ ní ch'iindī daiya sa Zorobabel. ¹³ Zorobabel miiⁿ ní ch'iindī daiya sa Abiud. Abiud miiⁿ ní ch'iindī daiya sa Eliaquim. Eliaquim miiⁿ ní ch'iindī daiya sa Azor. ¹⁴ Azor miiⁿ ní ch'iindī daiya sa Sadoc. Sadoc miiⁿ ní ch'iindī daiya sa Aquim. Aquim miiⁿ ní ch'iindī daiya sa Eliud. ¹⁵ Eliud miiⁿ ní ch'iindī daiya sa Eleazar. Eleazar miiⁿ ní ch'iindī daiya sa Matán. Matán miiⁿ ní ch'iindī daiya sa Jacob. ¹⁶ Jacob miiⁿ ní ch'iindī daiya sa José, 'iiⁿyāⁿ chi isáⁿā yeⁿe María. Ní daiya ta ní Jesús chi nguuvi Cristo.

¹⁷ 'Tíicā nducuéⁿē ndaata yeⁿe Abraham ndíí rey David ní ndiichicúūⁿ ndaata yeⁿé yā o generaciones. Ní ndíí rey David miiⁿ ndíí taachi cueⁿe nducyáácá 'iiⁿyāⁿ ndaata yeⁿe yā na país Babilonia ní ndiichicúūⁿ ndaata yeⁿé yā. Ní ndíí taachi cheⁿe yā na yáⁿāa Babilonia ndíí taachi ndaā Cristo iⁿyéⁿdi 'cūū ní ndiichicúūⁿ ndaata yeⁿé yā.

Túúcā ch'iindiyáān Jesucristo
(Lc. 2.1-7)

¹⁸ 'Túúcā ch'iindiyáān Jesucristo. Taachí María miiⁿ chí chεεcu Jesús miiⁿ caⁿ'a yā chí 'caandavaacú yā ndúúcū José níícú taachi 'āā cuéé 'caandavaacú yā ndúúcū vi'ī, véé 'áámá daiya yā chεεtí yā cucáávā Espíritu N'dai yeⁿ'é Ndyuūs. ¹⁹ José miiⁿ ní neⁿ'é yā 'caandavaacu yā ndúúcū María miiⁿ. Ní José miiⁿ ní nééné n'dai yā. Ní cuayivi nguéé neⁿ'é yā 'caandavaacú yā ndúúcū táⁿ'ā cucáávā chí véé dacua'a chεεtí yā. Ní nguéé neⁿ'é yā yaa'vi yā 'iiⁿ'yāⁿ yeⁿ'e yāāⁿ miiⁿya yeⁿ'e María chí nguéé n'daācā ti nguéé neⁿ'é yā chí María cuuvi 'cuinaaⁿ yā. ²⁰ Ní taachí José miiⁿ nacadínuuⁿ yā chí cu'neeⁿ yā María miiⁿ, cuayivi ní taachí cyaadu yā, 'áámá ángel yeⁿ'e Señor Ndyuūs che'enaáⁿ yā yeⁿ'é yā ní caⁿ'a yā chí yā José miiⁿ: Díí, José, saⁿ'ā yeⁿ'e ndaata rey David, nguéé 'va'a di cuuvi n'daataá yeⁿ'e di María, ti dacuá'ā yeⁿ'ē tá chí véé chεεti tá nguéé yeⁿ'e 'iiⁿ'yāⁿ ti yeⁿ'ē Espíritu N'dai yeⁿ'e Ndyuūs. ²¹ Ní táⁿ'ā miiⁿ ní 'cuundiyáāⁿ daiya tá 'áámá saⁿ'ā 'líⁿ. Díí ní cu'neeⁿ di chí nguúví sá JESÚS caati cucáávā Jesús miiⁿ ní nadanguáⁿ'ai 'iiⁿ'yāⁿ yeⁿ'ē íⁿ'yeeⁿdí 'cūū ní nadich'εεcú yā nuuⁿndi yeⁿ'e nducyaaca 'iiⁿ'yāⁿ.

²² Tanducuéⁿ'ē chuū ní 'túícā chí ndúúcū María ní 'íícú cuuvi cuaacu chí caⁿ'ā profeta yeⁿ'e nduudu yeⁿ'é Ndyuūs ndíí cuaaⁿ vmaaaⁿ, nduudu chí canéé nguūⁿ na libro yeⁿ'é Ndyuūs 'túícā:

²³ Níícú n'diichí nī. Tá 'cūū 'áámá chí cuiinuū tá 'cuūndī daiya tá. Taachí 'cuundiyáāⁿ 'áámá daiya tá ní cu'neeⁿ chí duuchi Emanuel chí neⁿ'e caaⁿ'maⁿ Ndyuūs ndúúcū s'uúúⁿ.

24 Cuayivi miiⁿ ní taachi José miiⁿ nanduuchi yā, tuu'mi ní diiⁿ yā tan'dúúcā chi ngaⁿ'ā ángel yeⁿ'e Señor Ndyuūs níicú ch'iindivaacú yā ndúúcū María miiⁿ. 25 Naati José miiⁿ nguéé n'diichi sá María miiⁿ ndíi ch'iindiyāⁿ daiya tá, ní José s'neeⁿ sá chi nguúví dacua'āa miiⁿ dúúchí JESÚS.

2

Yeⁿ'é 'iiⁿ'yāⁿ magos chi cheⁿ'e sa n'diichi sa Jesús

1 Taachi Jesús ch'iindiyáⁿ yā na yāⁿ Belén yeⁿ'e yáⁿ'āa Judea, tiempo miiⁿ ní saⁿ'a Herodes miiⁿ ní rey yeⁿ'e yáⁿ'āa Judea. Ní n'duuví magos, 'iiⁿ'yāⁿ chí déenu ca yā yeⁿ'e 'íiⁿ'nyúⁿ ndiicá yaⁿ'ái yā ndíi cuaaⁿ ná ícan'daā 'yáⁿ'ā. Ní magos ndaa yā na yāⁿ Jerusalén. 2 Magos ní ndaa yā nanááⁿ rey Herodes miiⁿ ní ntiinguuneeⁿ yā rey: ¿Tíi cánéé 'iiⁿ'yāⁿ chí rey yeⁿ'e 'iiⁿ'yāⁿ Israel chí 'niindiyáⁿ yā? Nús'uū ní n'diichi 'nū 'áámá 'íiⁿ'nyúⁿ ch'εετε cuááⁿ ná ícan'dáá 'yáⁿ'ā 'íicú chíiⁿ chí cuchíi 'nū. Níicú ndaa 'nū chí cu'téénú 'nū saⁿ'ā 'líiⁿ rey miiⁿ.

3 Taachí rey Herodes miiⁿ ch'iindiveéⁿ yā chuū, chistaⁿ'ā vaanicadíinūⁿ yeⁿ'e yā. 'Tiicá ntúūⁿ nducyaaca 'iiⁿ'yāⁿ yeⁿ'e yāⁿ Jerusalén taachi ch'iindiveéⁿ yā. 4 Ní rey Herodes miiⁿ ní nádaamá yā nducyaaca chiidūu n'gεεté chí ngaⁿ'a ntiinnyúⁿ yā yeⁿ'e yaácū Israel ndúúcū 'iiⁿ'yāⁿ chí ngi'cuééⁿ ley 'iiⁿ'yāⁿ yeⁿ'e Israel. Ní itiinguuneeⁿ yā 'iiⁿ'yāⁿ s'eeⁿ: ¿Tíi 'niindiyáⁿ Cristo? 5 'Iiⁿ'yāⁿ s'eeⁿ ní caⁿ'a yā chii yā rey miiⁿ: 'Cuundiyáⁿ yā na yāⁿ Belén yeⁿ'e yáⁿ'āa Judea caati 'tíicā canéé nguūⁿ na libro yeⁿ'e Ndyuūs cucáávā saⁿ'a profeta:

6 Ndís'tiī 'iiⁿyāⁿ yeⁿ'e yāāⁿ Belén yeⁿ'e yáⁿ'āa Judá, ¿'áá nguéé yāāⁿ yeⁿ'e nī chi 'lííⁿ cá nguaaⁿ nducuéⁿ'ē yāāⁿ yeⁿ'e yáⁿ'āa Judá naachi 'iiⁿyāⁿ ndíí tīíⁿ ngaⁿ'a ntiiⁿnyúⁿ yā? Nguéé chi 'tíicā, caati nguaaⁿ ndís'tiī chi yeⁿ'ē yāāⁿ Belén can'dāā 'áámá sáⁿ'ā chi ngaⁿ'ā ntiiⁿnyuⁿ sá yeⁿ'e nducyáácá 'iiⁿyāⁿ Israel chi judíos chi 'iiⁿyāⁿ s'eeⁿ chi Ndyuūs nndεενε yā.

7 Tuu'mi ní rey Herodes yaa'vi n'dé'éi yā saⁿ'ā magos ní ntiinguuneeⁿ cá yā saⁿ'a s'eeⁿ: ¿Dε'ē tiempo n'diichi nī 'ííⁿnyúⁿ miiⁿ? 8 Ní rey miiⁿ ní caⁿ'a yā chii yā saⁿ'a s'eeⁿ: Ndís'tiī magos, cueⁿ'e nī na yāāⁿ Belén ní in'nuūⁿ n'daāca nī dacua'a 'lííⁿ miiⁿ. Ní taachí ndaaca nī dacua'a mííⁿ, nanguεεcuné^en nī ní caaⁿ'maⁿ nī yeⁿ'é. Maaⁿ níicú 'úú ntúūⁿ ní cuuvi caⁿ'á cu'teenú dacua'a 'lííⁿ miiⁿ.

9 Magos ní ch'iindiveéⁿ yā nduudu yeⁿ'e rey miiⁿ ní cúnaⁿ'a yā. Cuin'diichí nī. 'Ííⁿnyúⁿ chi 'iiⁿyāⁿ magos n'diichi yā cuaaⁿ na ican'daa 'yáⁿ'ā, 'ííⁿnyúⁿ mííⁿ cueⁿ'é nanááⁿ yeⁿ'e magos taanduvéé ndaā ní cānee lugar naachi canéé dacua'a 'lííⁿ. 10 Ní taachi magos 'āā n'diichí yā 'ííⁿnyúⁿ miiⁿ, yéénú taaví yā. 11 Ní taachi sndaá yā va'āi miiⁿ, n'diichí yā saⁿ'ā 'lííⁿ dacua'ā miiⁿ ndúúcū chεεcu sá María. Ní chíntii'yá yā nanááⁿ dacua'ā miiⁿ ní s'téenu yā. Taachi n'guaaⁿ yā caja naachi snéé regalos yeⁿ'e yā, tuu'mi ní ca'á yā yeⁿ'ē dacua'ā miiⁿ. Regalos ní 'dííⁿnguaāⁿ ndúúcū yáⁿ'ā chi n'dεενε ngééⁿ ndúúcū mirra chí diitū taavi n'dai ngééⁿ. 12 Cuayivi miiⁿ ní Ndyuūs yaa'vi yā magos na 'yúúdúyaaⁿ yeⁿ'e yā chí 'āā ntéé naⁿ'a yā nanááⁿ rey Herodes miiⁿ. Níicú magos cunaⁿ'a yā na vaacu yā na taama yúúni.

Cueⁿe yā ngéenu yā na yáⁿāa Egipto

¹³ Taachi magos cunaⁿa yā, tuuⁿmi ní Ndyuūs dicho^o yā 'áámá ángel níícú ángel miiⁿ ní ndaá yā nanááⁿ José miiⁿ taachi cyaadú yā ní caⁿa yā chii yā José: Díí José, nducueeⁿ di ní cuta'a di saⁿā 'lííⁿ ní cueⁿe di cáanū di ndúú^cū chεεcu sa ndíí yáⁿāa Egipto. Ní 'cuεetinée nī miiⁿ ndíí taachi 'úú caaⁿmánⁿ caati canéé chí rey Herodes miiⁿ ní nanⁿnuúⁿ yā saⁿā 'lííⁿ chí 'caaⁿnúⁿ yā saⁿā.

¹⁴ José miiⁿ ní nanduuchí yā. 'Tiicá ntúūⁿ chεεcu sa. Ní sta'a yā saⁿā 'lííⁿ miiⁿ ní nguiinū mííⁿ nūuⁿ cueⁿe yā ndúú^cū chεεcu sa na yáⁿāa Egipto. ¹⁵ Níícú miiⁿ ch'εetinée yā ndíí chí ch'ií rey Herodes. Níícú cúúnú ca'a chííⁿ chí Señor Ndyuūs caⁿa yā na libro yeⁿe yā ndii cuááⁿ vmnaaⁿ cucáávā saⁿa profeta miiⁿ taachi caⁿa yā 'tíicā: Ná yáⁿāa Egipto 'caí daiyá.

Rey Herodes caⁿa ntiinyúⁿ yā chí 'caaⁿnúⁿ yā dacua'āa ngaiyā

¹⁶ Taachí rey Herodes miiⁿ tuumicadíinuuⁿ yā chí 'iiⁿyāⁿ magos chinnche'éí yā 'iiⁿyāⁿ, tuuⁿmi ní nduuvi taáⁿ n'dai yā. Ní rey miiⁿ ní caⁿa ntiinyuⁿ yā ní dichó^o yā soldados chí ch'iiⁿnuⁿ yā nducyáácá dacua'āa chí saⁿā ndíí cuaacu 'uūví nduūyū chí véé na yáāⁿ Belén ndúú^cū tanáⁿā yáāⁿ chí na niiⁿnuúⁿ. 'Tíicā rey miiⁿ diiⁿ cuenta yā ti cho'ōo 'uuvi nduūyū chí magos n'diichí yā 'íínyúⁿ ch'εεte miiⁿ yeⁿe nanguuvi. ¹⁷ Tuuⁿmi ní cho'ōo chuū chí cuuvi cuaacu tan'dúú^cā chí canéé nguūⁿ na libro yeⁿe Ndyuūs cucáávā chí caⁿa saⁿā profeta Jeremías cuááⁿ vmnaaⁿ 'túú^cā:

18 Na yáān Ramá ch'iindiveéⁿ 'iiⁿyāⁿ chi ngεεcu yā ní n'gái yā ndúúcu 'áámá vaadī ya'ai ch'εεté cucáávā daiya yā chí ch'īi. N'daataá yeⁿē Israel s'eeⁿ ngεεcu yā cucáávā daiya yā chi ch'īiⁿnūⁿ rey tan'dúúcā chi táⁿā Raquel ngεεcu yā cucáávā daiya yā chí ch'īi. Ní nguéé chiī ndaacā n'daataa s'eeⁿ 'viich'εεtíínūⁿ miiⁿ.

19 Cuayivi taachí ch'īi rey Herodes miiⁿ, José miiⁿ ní 'āā canee yā na yáⁿāa Egipto. Tuu'mi ní Señor Ndyuūs dicho'o yā 'áámá ángel ní ángel che'enaáⁿ yā yeⁿé José taachi cyaadú yā. 20 Ní ángel miiⁿ caⁿ'a yā chii yā José: Díí José, nducueeⁿ di ní cuta'a di saⁿ'ā 'lííⁿ dacuá'āa ní cuinaⁿ'a di ndúúcū chεεcu sa na yáⁿāa Israel caati ch'īi 'iiⁿyāⁿ chí neⁿe yā 'caaⁿ'nuⁿ yā saⁿ'ā 'lííⁿ.

21 Tuu'mi ní José ncueeⁿ yā. 'Tiicá ntúūⁿ chεεcu sa. Ní sta'a yā saⁿ'ā 'lííⁿ miiⁿ ní cueⁿ'e yā ndúúcū chεεcu sa na yáⁿāa yeⁿ'e 'iiⁿyāⁿ Israel. 22 Taachí José miiⁿ ch'iindiveeⁿ yā chi saⁿ'ā Arquelao canéé lado yeⁿ'e rey Herodes chi chiida sa, tuu'mi ní José miiⁿ ní 'va'á yā chí caⁿ'a yā na yáⁿāa Judea chi yáⁿāa yeⁿ'e 'iiⁿyāⁿ Israel. Naati tan'dúúcā chi ángel che'enaáⁿ yeⁿ'e yā na 'yuudiyaaⁿ yeⁿ'e yā, cueⁿ'e yā yáⁿāa Galilea chi yáⁿāa yeⁿ'e 'iiⁿyāⁿ Israel ntúūⁿ.

23 Ní ndaá yā na yáⁿāa mííⁿ ní cueⁿ'e yā ch'εεtinee yā na yáān Nazaret yeⁿ'e yáⁿāa Galilea. Ní 'iicu cuuvi cuaacu chí caⁿ'a profetas vmnááⁿ vmaaaⁿ yeⁿ'e Jesús chi 'túúcā: Canéé chí cuuvi ngúúví yā 'iiⁿyāⁿ nazareno yā cucáávā chi cueⁿ'e yā na yáān Nazaret.

Yeⁿ'e chi Juan cuεēdínuūⁿniⁿ yā ní ngaⁿ'a yā nduudu cuaacu

(Mr. 1.1-8; Lc. 3.1-9, 15-17; Jn. 1.19-28)

¹ Tiempo miiⁿ chiicá Juan chí cuεēdínuūⁿniⁿ yā na lugar naachi nguée ch'εetinée 'iiⁿ'yāⁿ. Lugar miiⁿ chi yeⁿ'e yáⁿ'āa Judea ní míⁿ ngaⁿ'a Juan nduudu cuaacu. ² Juan miiⁿ ní ngaⁿ'a yā chi 'túúcā: Ndís'tiī, ndaacadaamí nī yeⁿ'e chí díⁿ nī chí nguée n'dai caati 'āā ndaā niiⁿnuúⁿ nguuví miiⁿ naachi Ndyuūs ngaⁿ'a ntiiⁿnyúⁿ yā na va'ai chεeti nguuvi. ³ Níicú yeⁿ'e Juan 'cūū ní saⁿ'a profeta Isaías caⁿ'a yā yeⁿ'e yā vmnááⁿ vmnaaⁿ taachí caⁿ'a yā 'túúcā:

'Caandiveéⁿ nī. 'Áámá saⁿ'ā ngaⁿ'ā yuudu sa 'túúcā na yáⁿ'āa cuūⁿmáⁿ naachi nguée ch'εetinée 'iiⁿ'yāⁿ: 'Cuundiyaáⁿ nī yúúⁿí yeⁿ'ē Señor Ndyuūs caati cúchii yā. Nan'guáaⁿ nī yúúⁿí cuaacu caavá yā. Dídeεvéⁿ nī staava yeⁿ'é nī ní cuuvi cuaáⁿ nī 'iiⁿ'yāⁿ miiⁿ taachi ndaa yā.

⁴ Catecai Juan miiⁿ ní nin'dai ndúúcū yuūdū yeⁿ'ē 'iiti camello. Ní cinturón yeⁿ'ē sa ní díiⁿmaⁿ 'iiti. Níicú chí che'ē sa ní 'iiti langostas ndúúcū n̄'di'i yeⁿ'ē 'iiti 'yáaiⁿ chí vεε cuεeti. ⁵ N'deeé 'iiⁿ'yāⁿ can'daa yā chí 'caandiveéⁿ yā nduudu yeⁿ'é Juan miiⁿ. Ní can'daa yā yeⁿ'e yāāⁿ Jerusalén, yeⁿ'e yáⁿ'āa Judea, ní yeⁿ'e yáⁿ'āa chí cuaaⁿ 'diituú yeⁿ'ē yíicú Jordán. ⁶ 'Iiⁿ'yāⁿ ní caⁿ'a yā nuuⁿndi yeⁿ'é yā nanááⁿ Ndyuūs níicú Juan miiⁿ ní chεēdínuūⁿnīⁿ sá 'iiⁿ'yāⁿ miiⁿ na yíicú Jordán miiⁿ.

⁷ Taachí Juan miiⁿ n'diīchī sa chí neené 'yaaⁿ 'iiⁿ'yāⁿ fariseos ndúúcū 'iiⁿ'yāⁿ saduceos neⁿ'é yā chí cuεēdínuūⁿnīⁿ sa 'iiⁿ'yāⁿ, Juan miiⁿ caⁿ'a sa chí sa 'iiⁿ'yāⁿ miiⁿ: Ndís'tiī tan'dúúcā cúú, 'tíicā ndís'tiī.

¿Du'ú chí 'cuééⁿ ndís'tiī chí cuuvi cáánu nī yeⁿe castigo taaⁿ chi cuchii? ⁸ N'daāca diíⁿ nī maaⁿ níicú 'cuuⁿmíⁿ nī 'iiⁿyāⁿ chí 'āā ndaacadaamí nī yeⁿe nuuⁿndi yeⁿe nī. ⁹ Ndís'tiī ní 'āā ntéé nadacádíinuⁿ nī chí n'dai nī caati ndaata yeⁿe Abraham ndís'tiī. Naati 'úú ní ngaⁿ'á ngī ndís'tiī chí Ndyuūs cuuvi diíⁿ yā chí tuūu s'tiī ní cuuvi daiya Abraham. ¹⁰ Cutíiⁿ míⁿ 'āā canéé na dii'yu yáⁿ'á. Nducyaaca yáⁿ'á chí nguéé n'dáacā ngii n'gui'i yeⁿe canee chí 'caata yáⁿ'á míⁿ ní cūnuuⁿ na yaⁿ'ā. ¹¹ 'Úú ní cuaacu níⁿnyúⁿ chí ngēēdínuūⁿnīⁿ ndís'tiī ndúúⁿcū nuūⁿnīⁿ caati 'āā ndaacadaamí nī yeⁿe nuuⁿndi yeⁿe nī. Naati ndáá táámá 'iiⁿyāⁿ cuayiivi yeⁿe 'úú chí ch'εεε taavi cá poder yeⁿe yā nguéé ti 'úú. 'Úú ní nguéé neené n'dai 'úú chí cuuvi candéé ndaacuú yeⁿe yā. 'Iiⁿyāⁿ miiⁿ ní n'dai taavi cá yā chí cuuvi 'úú. 'Iiⁿyāⁿ miiⁿ ní cuēēdínuūⁿnīⁿ yā ndúúⁿcū Espíritu N'dai yeⁿ'é Ndyuūs ndúúⁿcū yaⁿ'ā. ¹² Ní taachi ndaa 'iiⁿyāⁿ miiⁿ chí nguuvi Jesús diíⁿ yā tan'dúúⁿcā 'áámá 'iiⁿyāⁿ chí didεεvé yā trigo 'tíicā diíⁿ yā ndúúⁿcū 'iiⁿyāⁿ. Ní sta'á yā zaranda yeⁿe yā ní nadidaamá yā trigo na chεeti díinuūⁿ. Ní dεεcú miiⁿ ni'neen yaⁿ'a yā ná nguuchí yaⁿ'ā chí 'āā ntéé n'tuūvi. Dεεcú miiⁿ ní tan'dúúⁿcā 'iiⁿyāⁿ chí nguéé i'téenu yā Ndyuūs.

*Juan chεēdínuūⁿnīⁿ sa Jesús
(Mr. 1.9-11; Lc. 3.21-22)*

¹³ Tuu'mi ní Jesús chiicá yā na yáⁿ'āa Galilea ní ndaá yā na yíicú Jordán naachi canee Juan chí Juan miiⁿ ní cuēēdínuūⁿnīⁿ sa Jesús miiⁿ. ¹⁴ Juan miiⁿ ní nguéé 'cuuⁿ sa. Ní caⁿ'a sa chí sa Jesús miiⁿ:

'Úú ní neⁿ'é chi dii cuεεdínúⁿñⁿ di 'úú. ¿'Áá dii cuchii di nanáaⁿ 'úú?

¹⁵ Jesús nan'guεεcútaⁿ'a yā: Diiⁿ dí maaⁿ 'tíicā; ní diiⁿ yú tan'dúúicā chi Dendyuūs neⁿ'e yā chi diiⁿ yú. Tuu'mi ní Juan 'cuūⁿ sa.

¹⁶ Cuayiivi taachi 'āā chεεdínúⁿñⁿ Juan miiⁿ Jesús miiⁿ, tuu'mi ní Jesús ní nan'dáa yā na nuūⁿñⁿ. Cuayiivi ní nanguaāⁿ nanguuvi. Ní Juan n'diichí sa Espíritu N'dai yeⁿ'é Ndyuūs miiⁿ chi tan'dúúicā paloma 'tíicā. Chiica yeⁿ'ē na va'ai chεeti nguuvi ní ndaā vmnaaⁿ yeⁿ'e Jesús miiⁿ. ¹⁷ Tuu'mi ní n'giindiveén yā 'áámá nduudu yeⁿ'ē nanguuvi chí ngaⁿ'a: Saⁿ'a 'cūū Daiyá chí neⁿ'e taaví. Ní yeenú taaví cáávā sáⁿ'a 'cūū.

4

Yááⁿ'guiinūⁿ neⁿ'e sa tuu'vi neeⁿ sa Jesús

(Mr. 1.12-13; Lc. 4.1-13)

¹ Tuu'mi ní Espíritu N'dai yeⁿ'é Ndyuūs candéē Jesús miiⁿ ná yáⁿ'āa cuūⁿmáⁿ naachi nguée ch'εεtinéé 'iiⁿ'yāⁿ chi yááⁿ'guiinūⁿ neⁿ'e sa chi Jesús diíⁿ yā nuuⁿndi.

² Jesús canée yā miiⁿ 'uūvū ngεεcu nguuvi ní 'uūvī ngεεcu n'gaaⁿ ní nguée che'é yā. Ní cuayiivi ní cuiicú yā. ³ Yááⁿ'guiinūⁿ ní ndaā sa nanááⁿ Jesús chí n'diichineeⁿ sa 'iiⁿ'yāⁿ. Ní caⁿ'ā sa: Dii Jesús, nduuti chi dii chi Daiya Dendyuūs dii, caaⁿ'maⁿ dí cuuvi dí tuūu 'cūū chi nduuví pan. Ní nduuvi pan ní cuuvi che'e di.

⁴ Jesús miiⁿ nan'guεεcútaⁿ'a yā ní caⁿ'a yā: 'Túúicā canee nguūⁿ na libro yeⁿ'é Ndyuūs: Nguée dámaāⁿ pan che'é 'iiⁿ'yāⁿ ní cunduūchi yā caati ndúúicū

tanducuéⁿē nduudu chi ngaⁿ'a Ndyuūs ní 'iiⁿ'yāⁿ cunduūchí yā nduuti chi cu'téenu yā.

⁵ Tuu'mi ní yááⁿ'n'guiinūⁿ miiⁿ candεε sa Jesús na yáāⁿ Jerusalén chi yáāⁿ yeⁿ'e Ndyuūs. Ní chin'duu sá 'iiⁿ'yāⁿ na yáácú yeⁿ'e yaācū. ⁶ Ní yááⁿ'n'guiinūⁿ caⁿ'a sa chii sa Jesús: Nduuti chi dii chi Daiya Dendyuūs dii, cáāvā di ndii 'múúⁿ ndii na yáⁿ'āa; caati 'túúcā canéé nguūⁿ na libro yeⁿ'é Ndyuūs:

Ndyuūs dichó'o yā ángeles yeⁿ'e yā chi diiⁿ yā cuidado yeⁿ'ē di. Ní ángeles cundεε yā dii ndúúcū ta'á yā, ní nguéé cuuvi ya'ai ca'a di na tuūu.

⁷ Jesús nán'gυεεcútáⁿ'a yā: 'Tuucá ntúūⁿ canéé nguūⁿ na libro yeⁿ'é Ndyuūs: Nguéé díⁿ di mar 'áámá cosa chi n'diichineeⁿ di Señor Ndyuūs yeⁿ'ē di.

⁸ Tuu'mi candéε yááⁿ'n'guiinūⁿ miiⁿ Jesús miiⁿ na 'áámá yiīcū yáácú ní ch'iⁿ'i sa tanducuéⁿē naciones yeⁿ'ē in'yeeⁿdí 'cūū ndúúcū chí ngaⁿ'á ntiinnyuⁿ sa yeⁿ'ē ndúúcū dendú'ū chí n'gεεε chi véé yeⁿ'ē. ⁹ Ní caⁿ'a sa chii sa Jesús miiⁿ: Tanducuéⁿē chuū teé dii nduuti chi caantíí'ya dí nanaáⁿ ní cu'téenu di 'úú.

¹⁰ Tuu'mi ní Jesús miiⁿ caⁿ'a yā chii yā saⁿ'ā miiⁿ: Díí yááⁿ'n'guiinūⁿ, cuvíi di nanaáⁿ caati 'túúcā canéé nguūⁿ na libro yeⁿ'e Dendyuūs: Cu'téenu di Señor Ndyuūs yeⁿ'ē di ni 'caandiveeⁿ di yeⁿ'e 'iiⁿ'yāⁿ mííⁿ nūuⁿ.

¹¹ Tuu'mi ní yááⁿ'n'guiinūⁿ miiⁿ divíi sa yeⁿ'e Jesús, ní nínđā ángeles ní dichíí've yā Jesús miiⁿ.

Jesús tucá'a yā ntiinnyuⁿ yeⁿ'e yā na yáⁿ'āa Galilea (Mr. 1.14-15; Lc. 4.14-15)

12 Taachi ch'iindiveéⁿ Jesús miiⁿ chi Juan chi ngeεdinuūⁿnīⁿ 'iiⁿ'yāⁿ canúúⁿ sá vácūū, nanguεcunée yā cunaⁿ'a yā na yáⁿ'āa Galilea.

13 Chiicá yā na yāⁿ Nazaret ní ndaa yā canee yā na yāⁿ Capernaum. Yāⁿ miiⁿ ní niiⁿnuúⁿ na nuūⁿnīⁿ'yáⁿ'ā canee, ní canee na yáⁿ'āa yeⁿ'e Zabulón ndúúⁿcū yáⁿ'āa yeⁿ'e Neftalí. 14 Ní cuuvi cuaacu nduudu yeⁿ'e saⁿ'ā profeta Isaías chí caⁿ'a sa cuááⁿ vmnaaⁿ 'tíicā:

15 Ná yáⁿ'āa yeⁿ'ē Zabulón ndúúⁿcū na yáⁿ'āa yeⁿ'e Neftalí chi canée na yúúⁿí chi ngeⁿ'e ná nuūⁿnīⁿ'yáⁿ'ā ndúúⁿcū na yáⁿ'āa chí canee taama lado yeⁿ'e yíicú chí nguuvi Jordán. Míiⁿ canée yáⁿ'āa Galilea yeⁿ'e 'iiⁿ'yāⁿ chí nguée yeⁿ'ē ndaata 'iiⁿ'yāⁿ Israel.

16 'Iiⁿ'yāⁿ chí snée na maāiⁿ ti nguée yeⁿ'e Ndyuūs, 'iiⁿ'yāⁿ s'eeⁿ n'diichí yā 'áámá δεενε ch'εετε. Ní chíi δεενέ miiⁿ naachi snee 'iiⁿ'yāⁿ s'eeⁿ.

17 Ndíiⁿ tuu'mi tucáⁿ'ā Jesús caⁿ'a yā nduudu cuaacu ní caⁿ'a yā: Ndaacadaamí nī yeⁿ'e nuuⁿndi yeⁿ'é nī caati tiempo chí Ndyuūs ngaⁿ'a ntiiⁿnyúⁿ yā na va'ai chεeti nguuvi 'āā ndaa niiⁿnuúⁿ.

*Jesús yaa'vi yā cuūuⁿ saⁿ'a chí itungááⁿ 'yaācā
(Mr. 1.16-20; Lc. 5.1-11)*

18 Cuayivi ní Jesús miiⁿ cachiicá yā cuaaⁿ 'diituú nuūⁿnīⁿ'yáⁿ'ā chí nguuvi Galilea, ní n'diichí yā na 'uuvī saⁿ'ā 'díinu sa vi'ī. 'Áámá saⁿ'a ní Simón Pedro nguuvi sa. Táámá saⁿ'ā ní 'diinu sa ní Andrés nguuvi sa. Saⁿ'ā s'uun ní n'gaa nuuⁿ sa yáanā yeⁿ'é 'yaācā miiⁿ na nuūⁿnīⁿ'yáⁿ'ā ti saⁿ'ā s'eeⁿ itungááⁿ sa 'yaācā na nuūⁿnīⁿ'yáⁿ'ā ti ntiiⁿnyuⁿ yeⁿ'ē sa.

19 Jesús caⁿa yā chii yā saⁿ'ā s'eeⁿ: Cuchíi nī nduucú, ni 'úú ní díiⁿ chí in'nuúⁿ nī 'iiⁿ'yāⁿ chí cuuvi caⁿ'á yā nduucú. Ní tan'dúú^cā chí tungaáⁿ nī 'yaācā yeⁿ'e nuūⁿnīⁿ'yáⁿ'ā, 'tíicā in'nuúⁿ nī 'iiⁿ'yāⁿ chí caⁿ'á yā nduucú.

20 Hora míiⁿ nūuⁿ ní saⁿ'ā s'eeⁿ s'neeⁿ sa yaānā yeⁿ'ē sa ní cueⁿ'e sa ndúú^c Jesús miiⁿ.

21 Tuu'mi ní Jesús miiⁿ cueⁿ'e ca yā ní n'diichi yā taama 'uuvi saⁿ'ā chí 'diinu sá vi^l chí nguuvi sa Jacobo ndúú^c Juan. Ní saⁿ'ā s'uuⁿ ní daiya Zebedeo. Ní snee sa na barco miiⁿ ndúú^c chíida yā Zebedeo miiⁿ ní n'diyaatá yā yáanā yeⁿ'e yā. Jesús 'cai yā Juan ndúú^c Jacobo miiⁿ. 22 Tuu'mi nūuⁿ ní saⁿ'ā s'uuⁿ ní s'neeⁿ sa barco miiⁿ ndúú^c chíida sa, ní cueⁿ'e saⁿ'ā s'uuⁿ ndúú^c Jesús miiⁿ.

*Jesús ngi'cuéⁿ yā 'yaaⁿ taavi 'iiⁿ'yāⁿ
(Lc. 6.17-19)*

23 Jesús cachiicá yā núúⁿmáⁿ ná yáⁿ'āa yeⁿ'e Galilea ní ngi'cueⁿ yā na yaacū sinagogas na yáāⁿ yeⁿ'ē yáⁿ'āa miiⁿ. Ní caⁿ'á yā nduudu cuaacu yeⁿ'é naachi Ndyuūs ngaⁿ'a ntiiⁿ'nyúⁿ yā. Jesús miiⁿ ní díiⁿ yā chí nduū^vā yeⁿ'é 'iiⁿ'yāⁿ yeⁿ'e nducuéⁿ'ē naaⁿ ca'ái ndúú^c 'iiⁿ'yāⁿ yeⁿ'e nducuéⁿ'ē chí ya'ai yeⁿ'e yā. 24 Ní nducyáácá 'iiⁿ'yāⁿ yeⁿ'e núúⁿmáⁿ yáāⁿ yeⁿ'e yáⁿ'āa Siria ch'iindiveéⁿ yā yeⁿ'e Jesús miiⁿ. Ní candéε yā 'iiⁿ'yāⁿ chí ya'ai yeⁿ'ē, ndúú^c 'iiⁿ'yāⁿ chí n'dee nááⁿ ca'ai ndii yā, ndúú^c 'iiⁿ'yāⁿ chí canee yā ndúú^c espíritus yeⁿ'e yááⁿ'nguiniūⁿ, ndúú^c 'iiⁿ'yāⁿ chí ndistáⁿ'ā vaanicádiinūⁿ yeⁿ'ē, ndúú^c 'iiⁿ'yāⁿ ndúú^c ca'āi chí in'dúuví cuerpo yeⁿ'e yā. Ní Jesús díiⁿ yā chí nducyaaca 'iiⁿ'yāⁿ nduū^vā yeⁿ'é yā. 25 Neené 'yaaⁿ 'iiⁿ'yāⁿ cueⁿ'é yā ndúú^c Jesús miiⁿ.

'Iiⁿyāⁿ s'eeⁿ ní yeⁿ'e yáⁿ'āa Galilea, ndúúcu distrito yeⁿ'ē Decápolis chi véé ndííchi yāⁿ yeⁿ'ē, ndúúcu yāⁿ Jerusalén, ndúúcu yáⁿ'āa yeⁿ'e Judea, ndúúcu yáⁿ'āa chi snéé táámá lado yeⁿ'ē yíícu Jordán.

5

*Jesús ngaⁿ'a yā nduudu cuaacu na 'áámá yiicu
(Lc. 6.20-23)*

¹ Taachi Jesús n'diichí yā chi n'dee n'dái 'iiⁿyāⁿ cueⁿ'e yā ndúúcu yā tuu'mi ní Jesús cueⁿ'e yā 'áámá yīīcū. Taachi Jesús miiⁿ ch'iindí yā tuu'mi ní discípulos yeⁿ'e yā ní ndaa yā nanáán yā. ² Jesús ní caⁿ'a yā ní ngi'cuéeⁿ yā 'iiⁿyāⁿ s'eeⁿ.

³ Dε'ε chúúcā n'dai 'iiⁿyāⁿ chi deenú yā na staava yeⁿ'é yā chi neⁿ'e deenu cá yā yeⁿ'e Ndyuūs, caati cuuvi yeⁿ'é yā yeⁿ'e naachi Ndyuūs ngaⁿ'a ntiⁿnyúⁿ yā ná va'ai chεeti nguuvi.

⁴ Dε'ε chúúcā n'dai 'iiⁿyāⁿ chi ndaachi 'iinú yā cáávā chi i'téenu yā Ndyuūs maaⁿ, caati cuayiivi ní Ndyuūs ca'á yā 'viich'εtínūⁿ 'iiⁿyāⁿ.

⁵ Dε'ε chúúcā n'dai 'iiⁿyāⁿ chi ndiicúⁿ yā na staava yeⁿ'e yā, ti 'iiⁿyāⁿ s'eeⁿ cuuvi ndaācá yā dε'ε chi cuuvi yeⁿ'e yā chi Ndyuūs caⁿ'a yā chi ca'a yā 'iiⁿyāⁿ s'eeⁿ.

⁶ Dε'ε chúúcā n'dai 'iiⁿyāⁿ chí neⁿ'e ca yā diiⁿ yā chi n'daācā tan'dúúcā chi neⁿ'e Ndyuūs. Ní Ndyuūs cúnnee yā 'iiⁿyāⁿ s'eeⁿ.

⁷ Dε'ε chúúcā n'dai 'iiⁿyāⁿ chi 'nuūⁿ ndī ya'ai 'iinú yā cáávā tanáⁿ'ā 'iiⁿyāⁿ, caati Ndyuūs 'nuūⁿ ndī ya'ai 'iinú ntúuⁿ yā cáávā 'iiⁿyāⁿ s'eeⁿ.

⁸ Dε'ε chúúcā n'dai 'iiⁿyāⁿ chi dεεve staava yeⁿ'é yā, ti 'iiⁿyāⁿ s'eeⁿ ní snaaⁿ yā Ndyuūs.

9 De'ε chúúcā n'dai 'ii'yāⁿ chi diiⁿ yā chi nguée 'caa'vá 'ii'yāⁿ, ti taná'n'ā 'ii'yāⁿ caa'n'mán yā ye'n'é 'ii'yāⁿ chi daiyá Dendyuūs 'ii'yāⁿ.

10 De'ε chúúcā n'dai 'ii'yāⁿ chi n'geenú yā ngii cáávā chi diiⁿ yā chíⁿ chi Ndyuūs ne'n'é yā, caati véé parte ye'n'e yā naachi Ndyuūs nga'n'a ntii'nyúⁿ yā ná va'ai chεeti nguuvi.

11 De'ε chúúcā n'dai ndís'tiī taachi 'ii'yāⁿ diiⁿ yā chi ndís'tiī 'cueenú nī cuuvi cucáávā 'úú, ní taachi 'ii'yāⁿ taán yā ndúúcū ndís'tiī ní n'dee n'dái caa'n'mán yā nduudu yaadi ye'n'e ndís'tiī cucáávā 'úú. 12 Cuuvi yeenu taaví nī caati cuuvi ndaācá nī chí ch'εεε ye'n'é nī ná va'ai chεeti nguuvi. 'Túúcā 'ii'yāⁿ can'daa yā ndíí cuaaⁿ vmnaaⁿ 'ii'yāⁿ profetas chi ndéé yā nduudu ye'n'e Ndyuūs. Ní profetas ch'eenú yā chíi.

Yiīmā ye'n'ē yá'n'āa

(Mr. 9.50; Lc. 14.34-35)

13 Jesús ca'n'a yā: Ndís'tiī, nduuti chi i'téenu nī chi 'úú chí Cristo, tuu'mi ní ndís'tiī, tan'dúúcā yiīmā ye'n'ē yá'n'āa 'tiicá nī. Nduuti chí yiīmā nguée n'daācā sabor ye'n'ē, ¿de'ē cuuvi diiⁿ nī? Nguée de'ē vεε dichíí'vē yiīmā miiⁿ. 'Āā taanduu rá chí cungéē 'ii'yāⁿ na yá'n'āa ní n'diivi neeⁿ ca'a yā.

Déévé ye'n'e in'yeēdí 'cūū

14 Ndís'tiī chi i'téenu nī chi 'úú chí Cristo, tan'dúúcā dεεvε ye'n'e in'yeēdí 'cūū 'tiicá nī, ti ca'n'á nī ch'i'n'i nī dεεvε ye'n'é Ndyuūs nanááⁿ 'ii'yāⁿ. 'Áámá yāāⁿ chi canduūu na 'áámá yiīcū nguée cúúví cunuuⁿ n'de'eī. 15 Ndíí nguée ndúú 'ii'yāⁿ ra 'cuu'miⁿ yā 'áámá lámpara ní cu'nuúⁿ yā maaⁿ 'áámá caja; naati cun'duúⁿ yā na 'áámá mesa, ní

íicú cuuvi dεεε yeⁿē nducyaaca 'iiⁿyāⁿ chi snée yā chεeti va'āī. ¹⁶ Tan'dúúcā 'áámá lámpara chí ngii ndεεε, 'tíicā cuuvi n'daācā vida yeⁿé nī nanááⁿ 'iiⁿyāⁿ chi snée yā iⁿ'yee^{ndí} 'cūū. Ní 'íicú 'iiⁿyāⁿ s'eeⁿ cuuvi snaaⁿ yā ntiiⁿnyuⁿ chí n'daacā chi idiíⁿ nī. Ní 'iiⁿyāⁿ s'eeⁿ caaⁿ'máⁿ yā: Dε'ε chúúcā ch'εεε Ndyuūs chi Chiidá nī, Ndyuūs chi canée yā ná va'ai chεeti nguuvi.

Jesús ngaⁿ'a yā yeⁿ'e ley yeⁿ'e 'iiⁿyāⁿ Israel

¹⁷ Nguéé nadicádínuuⁿ ndís'tiī chí 'úú chí Jesús ní cúchií chí divií ley yeⁿ'e Moisés ndúúcū nduudu yeⁿ'e profetas chí canée nguūⁿ ndíí cuaaⁿ vmnaaⁿ. 'Úú nguéé ndaá chí divií ti ndaá chí dicuaācú yeⁿ'ē. ¹⁸ Ti cuaacu níⁿnyúⁿ ngaⁿ'á ngii ndís'tiī: Neⁿ'e chí canée cá nanguuvi ndúúcū iⁿ'yee^{ndí} 'cūū nguéé cuuvi chó'ōo mar 'áámá punto 'lííⁿ ndíí nguéé ndúú mar 'áámá coma yeⁿ'e ndúúdú yeⁿ'e ley, nuuⁿmaⁿ neⁿ'e chí tanducuéⁿ'ē 'āā cuéé cuuvi cuaacu taanduvεε chí canée nguūⁿ na libro yeⁿ'e Ndyuūs. ¹⁹ 'Tíicā 'āā du'ú nūuⁿ 'iiⁿyāⁿ chí nguéé dííⁿ yā cumplir 'áámá mandamiento 'lííⁿ ní 'tíicā ngi'cueeⁿ yā 'iiⁿyāⁿ chí dííⁿ yā tan'dúúcā maáⁿ yā diíⁿ yā, 'lííⁿ 'lííⁿ cá nūuⁿ cuuvi tuneeⁿ yā naachi Ndyuūs ngaⁿ'a ntiiⁿnyúⁿ yā na va'ai chεeti nguuvi nguéé tan'dúúcā tanáⁿ'ā 'iiⁿyāⁿ. Naati 'iiⁿyāⁿ chí n'daāca idiíⁿ yā ní ngi'cueeⁿ yāⁿ 'iiⁿyāⁿ táacā chí cuuvi diíⁿ n'daacá yā, 'iiⁿyāⁿ miiⁿ cuuvi tuneeⁿ yā dendu'ū chí n'daacā ná va'ai chεeti nguuvi naachí Ndyuūs ngaⁿ'a ntiiⁿnyuⁿ yā. ²⁰ 'Úú ní ngaⁿ'á ngii ndís'tiī: Nduuti chí ndís'tiī nguéé n'daācā ca idiíⁿ nī chí cuuvi 'iiⁿyāⁿ chí ngi'cueeⁿ ley ndúúcū 'iiⁿyāⁿ fariseos, tuu'mi ní ndís'tiī nguéé cuuví cundaa

nī na va'ai chεeti nguuvi naachi Ndyuūs nga'a ntiinyúⁿ yā.

Jesús nga'a yā ye'e chi nduuvi tááⁿ 'ii'yāⁿ
(Lc. 12.57-59)

²¹ Maaⁿ ní ch'ííndiveéⁿ nī chí caⁿ'a yā chii yā 'ii'yāⁿ ndii cuááⁿ vmnaaⁿ chí 'túúcā: Nguéé 'caaⁿ'nuⁿ di 'ii'yāⁿ. Du'u chí 'caāⁿ'nūⁿ 'ii'yāⁿ véé nuuⁿndi yeⁿ'e yā nguuvi chí Ndyuūs caaⁿ'maⁿ yā yeⁿ'e nuuⁿndi. ²² Naati 'úú ní ngaⁿ'á ngii ndís'tiī 'tíicā: 'Āā du'ú nūⁿ chí nduuvi taaⁿ yeⁿ'ē vi'i, véé nuuⁿndi yeⁿ'e yā nguuvi chí Ndyuūs caaⁿ'maⁿ yā yeⁿ'ē nuūⁿndi. 'Āā du'ú nūⁿ chí caaⁿ'maⁿ cuuvi vi'i 'tíicā: De'ē chúúcā chεechí tiīⁿ di, véé nuuⁿndi yeⁿ'e yā nanááⁿ juez. 'Āā du'ú nūⁿ 'ii'yāⁿ chí caaⁿ'maⁿ yā 'tíicā: De'ē chúúcā zonzo dii, caⁿ'á yā na infierno naachi canéé 'áámá nguuchi yaⁿ'ā.

²³ Nduuti chí diiⁿ di tan'dúúcā costumbre yeⁿ'ē di ní ndεε di ofrenda yeⁿ'ē di ní ca'a di Ndyuūs vmnááⁿ nátaī yeⁿ'e yaācū templo, ní hora míⁿ nūⁿ ninán'gaacu di chí vi'i di ní véé vaadi 'caa'va yeⁿ'ē di ndúúcu sa; ²⁴ tuu'mi ní cu'neeⁿ di ofrenda yeⁿ'ē di niiⁿnuúⁿ nátaī. Ní cueⁿ'e di ntun'dáá n'dai di ndúúcū vi'i di. Cuayiivi ní cuuví nguεεcundí di ní ca'a di ofrenda yeⁿ'ē di nátaī.

²⁵ Tun'dáá n'dai di ndúúcū 'āā du'u nūⁿ 'ii'yāⁿ chí taaⁿ yeⁿ'e di maāⁿnchεēté nūⁿ taachi canúu di yúúní ndúúcu yā, 'aatī caⁿ'a yā canguu yā dii nanááⁿ juez. Ní juez míⁿ nca'a yā dii ta'ā policía. Ní policía miīⁿ ní cu'nuūⁿ sa dii vácūū. ²⁶ Cuaacu níinyúⁿ ngaⁿ'á ngii dii chí nguéé nan'daā di vácūū neⁿ'e chí nguéé 'cuiinu nadí'vē di tanducuéⁿ'ē chí can'diicu di.

Jesús ngaⁿ'a yā yeⁿ'e adulterio

27 N'giindiveéⁿ nī chí caⁿ'a 'iiⁿ'yāⁿ yeⁿ'ē nuuⁿndi chí adulterio 'túúcā: Ndís'tiī chí n'giindivaacú nī, nguéé in'nuúⁿ nī n'daataá o isaⁿ'ā chí nguεε yeⁿ'ē di. 28 Naati 'úú, Jesús ní ngaⁿ'á ngii ndís'tiī 'tíícā: 'Āā du'ú nūuⁿ chí n'giīⁿnyūⁿ ndúúcū 'áámá saⁿ'ā o n'daataá ní neⁿ'e yā cuuvi n'dáí yā ndúúcū vi'ī, 'āā diiⁿ nuuⁿndí yā na staava yeⁿ'e yā tan'dúúcā chí 'āā 'tííca yā ndúúcū vi'i. Ní 'āā diiⁿ yā adulterio.

29 Chuū ngaⁿ'á: Nduuti chí nduutináaⁿ di lado tá cuaācú di diiⁿ chí diiⁿ di nuuⁿndī, 'caaca di nduutināaⁿ di ní cun'dāa di. Ti n'dáacā ca chí cuuvi ndai di 'áámá parte yeⁿ'e cuerpo yeⁿ'ē di, nguéé ti tanducuéⁿ'ē cuerpo yeⁿ'ē di caⁿ'a na infierno. 30 Ndúúti chí ta'ā cuaācú di idiiⁿ chí diiⁿ dí nuuⁿndi, 'caaca di ní cun'dāa di. Ti n'dáacā ca chí cuuvi ndai 'áámá parte yeⁿ'e cuerpo yeⁿ'ē di, nguéé ti núúⁿmáⁿ ch'εεε cuerpo yeⁿ'ē dii caⁿ'a na infierno.

Jesús ngaⁿ'a yā yeⁿ'e chí i'tεεchi vi'i yā

(Mt. 19.9; Mr. 10.11-12; Lc. 16.18)

31 Tiempo chí chó'ōo 'iiⁿ'yāⁿ caⁿ'a yā 'túúcā: 'Āā du'ú nūuⁿ 'iiⁿ'yāⁿ chí t'εεchi n'daataá yeⁿ'é yā, canéé chí ca'a yā 'áámá caaca yeⁿ'ē chí t'εεchí vi'i yā. 32 Naati 'úú ní ngaⁿ'á ngii ndís'tiī 'tíícā: Nduuti chí 'áámá saⁿ'ā chí t'εεchi sá n'daataá yeⁿ'ē sa, nguéé cáāvā chí véé saⁿ'ā chí n'dai ndúúcu tá, tuu'mi ní diiⁿ sa chí n'daātāa cuuvi adulterio tá. 'Āā du'ú nūuⁿ saⁿ'ā chí 'caandavaacu sá ndúúcū n'daataa chí i'néé isaⁿ'ā yeⁿ'e ta táⁿ'ā, saⁿ'ā miiⁿ idiiⁿ ntúūⁿ sa nuuⁿndi chí adulterio.

Jesús ngaⁿ'a yā yeⁿ'ē nduudu chí 'tíícā o nguεε 'tíícā

33 Ndís'tiī ní ch'iindiveén nī chí ca'a yā chii yā 'ii'yāⁿ tiempo chi 'āā chó'ōo 'tuucā: Nguéé caaⁿ'maⁿ nī nduudu, “por Ndyuūs”, cáávā cosa chi cuaacu nííⁿnyúⁿ chí diíⁿ nī ní nguéé 'tíicā diiⁿ nī. Taachi caaⁿ'máⁿ nī nduudu, “por Ndyuūs”, diiⁿ cuaacú nī tan'dúucā chí diíⁿ nī cáávā Ndyuūs.

34 Naati 'úú ní ngaⁿ'á ngúí ndís'tiī: Nguéé caaⁿ'máⁿ nī nduudu, “por Ndyuūs”, yeⁿ'ē mar 'áámá naaⁿ. Ndíí nguéé caaⁿ'máⁿ nī nduudu, “cucáávā nanguuvi”, ti miiⁿ canéé trono yeⁿ'e Dendyuūs. 35 Ndíí nguéé ndúú caaⁿ'máⁿ nī nduudu, “cáávā yáⁿ'āa 'cūū”, ti chííⁿ chi banco 'lííⁿ yeⁿ'ē ca'a Ndyuūs; ndíí nguéé ndúú 'áámá nduudu, “cáávā yáāⁿ Jerusalén”, ti chiiⁿ chí yáāⁿ yeⁿ'ē Rey Ndyuūs chí ch'εεε yā.

36 Ndíí nguéé ndúú caaⁿ'máⁿ nī nduudu, “cáávā tííⁿ nī”, ti nguéé cúúví diiⁿ nī chí cuuvi cuéē naachi cuáiⁿ mar 'áámá yuūdū tííⁿ nī. Ní nguéé cuuvi diiⁿ nī chí cuuvi cuáiⁿ naachi cuéē mar 'áámá yuūdū tííⁿ nī. 37 Naati ndís'tiī caaⁿ'máⁿ nī, “'tíicā”, nduuti chí 'tíicā; o nduuti chí nguéé 'tíicā, tuu'mi ní caaⁿ'maⁿ nī, “nguεε 'tíicā”, caati nduuti chí caaⁿ'máⁿ nī nduudu, “por Ndyuūs” o cáávā táámá yeⁿ'e chuū, tuu'mi ní nduudu miiⁿ ní nguéé n'daācā chí caaⁿ'maⁿ nī.

*Diné'e nī 'ii'yāⁿ chí nguéé ngúí n'diichí yā ndís'tiī
(Lc. 6.29-30)*

38 Jesús ca'a yā: Ndís'tiī ní ch'iindiveén nī chí ca'a 'ii'yāⁿ tiempo chí chó'ōo yeⁿ'e ley chí 'tíicā: Nduuti chí 'áámá 'ii'yāⁿ tun'dáa yā nduutinaaⁿ taama 'ii'yāⁿ, 'tiicá ntúūⁿ 'ii'yāⁿ miiⁿ ní cuuví tun'daá yā nduutináaⁿ 'ii'yāⁿ chí diiⁿ nduucú yā 'tíicā. Ní 'áámá 'ii'yāⁿ chí tun'dáa yā 'dii'yuⁿ

táamá 'iiⁿyāⁿ, 'tiicá ntúūⁿ cuuví tun'daa yā 'diiⁿyuⁿ 'iiⁿyāⁿ chí diiⁿ nduucú yā 'tíicā. ³⁹ Naati 'úú ní ngaⁿ'á ngii ndís'tiī: Nguéé 'cuuⁿ'maⁿ nī ndúúcu 'iiⁿyāⁿ chí yaādii'yá yā. 'Āā du'ú nūⁿ 'iiⁿyāⁿ chí 'cueⁿ'é yā tiicūnáⁿ nī ti duuchineéⁿ yā yeⁿ'e nī 'cuuⁿ nī chí diiⁿ yā taama vmnéⁿ'ēe nduuti chí neⁿ'e yā. ⁴⁰ Ní nduuti chí 'aama 'iiⁿyāⁿ chí in'nuúⁿ yā vaadi 'caa'va ndúúcu nī, ní neⁿ'e yā divi yā tiinuⁿ yúudu yeⁿ'e nī, ca'a ntúūⁿ nī cotón yeⁿ'e nī. ⁴¹ Ní nduuti chí 'aama 'iiⁿyāⁿ chí cuuví yā ndís'tiī chí a fuerza canéé chí cándεε nī chéédí yeⁿ'e yā tan'dúúca 'uūvī kilómetros 'tíicā yaⁿ'ai ca candεε nī yeⁿ'e yā ndii cuūⁿ kilómetros. ⁴² Taachí caaca 'iiⁿyāⁿ ndís'tiī 'āā de'é nūⁿ cosa ca'a nī 'iiⁿyāⁿ cosa miiⁿ. Nguéé nguεεcundí nī cuadáámí nī yeⁿ'é yā.

Diné'e nī 'iiⁿyāⁿ chí taaⁿ ndúúcu nī
(Lc. 6.27-28, 32-36)

⁴³ Ndís'tiī ní ch'iindiveéⁿ nī chí caⁿ'a 'iiⁿyāⁿ tiempo chí 'āā chó'ōo: Diné'e di 'iiⁿyāⁿ na niiⁿnuúⁿ vaacu dí. Nguéé diné'e di 'iiⁿyāⁿ chí taáⁿ yā ndúúcu di. ⁴⁴ Naati 'úú ní ngaⁿ'á ngii ndís'tiī: Diné'e nī 'iiⁿyāⁿ chí taaⁿ yā ndúúcu nī. N'dáacā caaⁿ'maⁿ nī yeⁿ'e 'iiⁿyāⁿ chí nguéé n'dáacā ngaⁿ'a yā yeⁿ'e nī. N'dáacā diiⁿ nī ndúúcu 'iiⁿyāⁿ chí nguéé neⁿ'e yā ndís'tiī. Caaⁿ'mángua'á nī yeⁿ'e 'iiⁿyāⁿ chí 'cueⁿ'e ndís'tiī ní nguéé n'daācā idiíⁿ yā ndúúcu nī ní idiíⁿ yā chí ndís'tiī n'geenú nī ngii. ⁴⁵ Ní ndís'tiī ní 'cuuⁿ'miⁿ nī 'iiⁿyāⁿ s'eeⁿ chí ndís'tiī ní daiya Dendyuūs ndís'tiī. Chiida yú chí canéé na va'ai chεeti nguuvi idiíⁿ yā chí ican'daa 'yáⁿ'ā naachi snéé 'iiⁿyāⁿ chí n'dai ndúúcu 'iiⁿyāⁿ chí nguéé n'daācā diiⁿ yā. Ní Ndyuūs idiíⁿ yā chí ngeeⁿ cuūvī

ye^{n'}é 'ii^{n'}yāⁿ chí n'daācā idiíⁿ yā ndúú^{cū} 'ii^{n'}yāⁿ chí nguéé n'daācā idiíⁿ yā. ⁴⁶ Nduú^{ti} chí ndís'tiī diné^{n'e} nī 'ii^{n'}yāⁿ chí ne^{n'e} yā ndís'tiī, ¿dé'ē premio chí ndaacá nī? ¿'Áá nguéé 'tiicá ntúūⁿ idiíⁿ 'ii^{n'}yāⁿ chí cobrador yā? ⁴⁷ Nduuti chí ndís'tiī diíⁿ nī saludar dámaāⁿ hermanos ye^{n'e} nī, ¿de'ē premio chí ndaacá nī? ¿'Áá nguéé 'tiicá ntúūⁿ idiíⁿ 'ii^{n'}yāⁿ chí nguéé ye^{n'e} ndaata Israel chí nguéé i'téenu yā Ndyuūs? ⁴⁸ N'daācā n'dai ca diíⁿ ndís'tiī chí diíⁿ nī tan'dúú^{cā} chí diíⁿ Dendyuūs, Chiida yú, chí canéé na va'ai cheeti nguuvi.

6

Jesús nga^{n'}a yā ye^{n'e} chí nginnee yú 'ii^{n'}yāⁿ

¹ Ndís'tiī nguéé diíⁿ nī dendu'ū chí n'daācā ye^{n'e} yaācū nanááⁿ 'ii^{n'}yāⁿ caati snaaⁿ yā chí diíⁿ nī chí nadacadiinúúⁿ yā chí ndís'tiī ní n'daāca nī. Nduuti chí 'túú^{cā} idiíⁿ nī, tuu'mi ní Ndyuūs Chiida yú nguéé téé yā chí cuuvi ye^{n'e} nī ye^{n'e} chí diíⁿ nī taachi ndaa nī ná va'ai cheeti nguuvi. ² Taachi ndís'tiī ca'a nī ofrenda ye^{n'e} nī, nguéé diíⁿ yuudú nī níí^{cú} nguéé cuuvi cadíⁿuuⁿ 'ii^{n'}yāⁿ. 'Tíicá idiíⁿ ná^{n'}a 'ii^{n'}yāⁿ chí 'uū^{vī} naaⁿ 'uū^{vī} cheendí yā taachi snée yā na yaācū sinagoga ndúú^{cū} na cuaaⁿ cyúú^{ní}. Ní 'íicú 'ii^{n'}yāⁿ ní cuuvi snaaⁿ yā ní caa^{n'}maⁿ yā chí 'ii^{n'}yāⁿ s'eeⁿ ní nn'dai yā. Cuaacu ní^{n'}nyúⁿ 'úú nga^{n'}á ngī ndís'tiī, chí 'ii^{n'}yāⁿ s'eeⁿ ní vεε chí 'āā ndaāca yā ye^{n'e} chí diíⁿ yā na i^{n'}yee^{n'dí} 'cūū. ³ Taachi ndís'tiī ní ca'á nī cosas chí inneé nī 'ii^{n'}yāⁿ chí nguéé ye^{n'e} yā, nguεε ca'a nī chí tuumí^{cá}diinuuⁿ ta'ā 'cueé nī chí diíⁿ tá'ā cuaacú nī. ⁴ 'Tíicá ca'a n'de'éí nī cosas miíⁿ ye^{n'e} nī ní 'ii^{n'}yāⁿ nguεε cuuvi

snaaⁿ yā; 'íicú Chiida yú chi cánéé ná va'ai chεεti nguuví inaáⁿ yā chi nguéé n'diichi 'iiⁿyāⁿ s'eeⁿ. Ní Chiida yú téé yā chi cuuvi yeⁿ'e nī nanááⁿ 'iiⁿyāⁿ.

Jesús ngi'cueeⁿ yā yeⁿ'ē chí ngaⁿ āngua'āa
(Lc. 11.2-4)

⁵ Taachi ndís'tiī caaⁿmaⁿngua'á nī, nguéé díⁿ nī tan'dúúcā 'iiⁿyāⁿ chí 'uūvī naaⁿ 'uūvī cheendí yā, caati 'iiⁿyāⁿ s'eeⁿ inee yiinú yā chi n'gεεtíndii yā na yaācū sinagogas ndúúcū cuaaⁿ cyúúní ní 'íicú 'iiⁿyāⁿ ní snaaⁿ yā 'iiⁿyāⁿ s'eeⁿ. Cuaacu níⁿnyúⁿ ngaⁿ'á ngií ndís'tiī, chí 'iiⁿyāⁿ s'eeⁿ ní 'āā véé chí cuuvi yeⁿ'é yā na iⁿyeeⁿdí 'cūū. ⁶ Ndís'tiī, taachi caaⁿmaⁿngua'á nī, cundāa nī na cuarto 'lín yeⁿ'e va'ai yeⁿ'e nī ní n'gaadí nī cheendi va'āi cuarto 'lín miiⁿ. Ní caaⁿmaⁿngua'á nī ndúúcū Chiida yú chí inaaⁿ n'de'ei yā. Ní Chiida yú ntée yā chí cuuvi yeⁿ'e nī nanááⁿ 'iiⁿyāⁿ.

⁷ Ní taachi caaⁿmaⁿngua'á nī, nguéé dachín dachín caaⁿmaⁿ nī tan'dúúcā chí diiⁿ náⁿ'ā 'iiⁿyāⁿ chí 'uūvī naaⁿ 'uūvī cheendí yā chí nguéé i'téenu yā Ndyuūs ní nguεε yeⁿ'e ndaata Israel yā. Ní 'iiⁿyāⁿ s'eeⁿ nadicadínuuⁿ yā chí Ndyuūs caⁿ'á yā 'caandiveén yā nduudu yeⁿ'é yā ti neené n'deēe nduudu ngaⁿ'a yā. ⁸ Nguéé díⁿ nī tan'dúúcā chí idiin 'iiⁿyāⁿ s'eeⁿ ti Chiida yú 'āā déenu yā dendu'ū chí neⁿ'e nī taachi 'āā cuéé caaca nī. ⁹ Ní taachi ndís'tiī caaⁿmāⁿngua'á nī, 'túúcā caaⁿmaⁿngua'á nī:

N'diī Chiidá nducyaaca 'nū, n'diī chí caneé nī ná va'ai chεεti nguuví. Dε'ε chúúcā dεεve chí ngúúví nī.

¹⁰ Canéé chí ndaá tiempo naachi chí ngaⁿ'a ntiiⁿnyuⁿ nī. Cúúví tan'dúúcā chí n'diī neⁿ'e

nī tan'dúúcā ná va'ai cheeti nguuvi 'tiicá ntúūⁿ na yáⁿ'āa 'cūū.

11 Tée nī chi cuuví che'é 'nū nguuví 'cūū.

12 Nadich'εεcú nī nuuⁿndi yeⁿ'e 'nū tan'dúúcā chí nús'uu inadich'εεcú 'nū yeⁿ'e 'iiⁿ'yāⁿ chi nguεε n'daācā dííⁿ yā nduucú 'nū.

13 Nguéé 'cuáaⁿ nī chi ndaā nanaáⁿ 'nū cosas chi cheεchi ca chi diiⁿ chi dííⁿ 'nū nuuⁿndi naati nadanguáⁿ'ai nī nús'uu yeⁿ'é nducuéⁿ'ē chi nguεε n'daācā. Ti yeⁿ'é nī naachi ngaⁿ'a ntiiⁿnyúⁿ nī ndúúcū poder ndúúcū δεενε chi n'dái taavi ca yeⁿ'e nī ndúúcū nducuéⁿ'ē nduuyū cueⁿ'e daāⁿmaⁿ. 'Tíicā cuuvi.

14 Nduuti chi ndís'tiī nadich'εεcú nī yeⁿ'e 'iiⁿ'yāⁿ chi nguéé n'daācā idiíⁿ yā nduucú nī, tuu'mí ní Chiida yú chi cánée yā ná va'ai cheeti nguuvi nadich'εεcú ntúūⁿ yā yeⁿ'é nī. 15 Ndúúti chi ndís'tiī nguéé nadich'εεcú nī yeⁿ'e 'iiⁿ'yāⁿ chi nguéé n'daācā idiíⁿ yā ndúúcu nī, 'tiicá ntúūⁿ Chiida yú nguéé nadich'εεcú yā nuuⁿndi yeⁿ'é nī.

Jesús ngaⁿ'a yā yeⁿ'e chi 'iiⁿ'yāⁿ nguéé ca'diinú yā tiempo chi ngaⁿ'angua'á yā

16 Taachi nguéé nga'dííⁿnúⁿ nī caati ngaⁿ'angua'á nī nguéé nduuví ndaachií naáⁿ nī tan'dúúcā 'iiⁿ'yāⁿ chí 'uūví naaⁿ 'uūví cheendí yā chí neⁿ'é yā chí tanáⁿ'ā 'iiⁿ'yāⁿ snaaⁿ yā. 'Iiⁿ'yāⁿ s'eeⁿ idiví yā catecai vmnááⁿ yā ní 'cuuⁿ'mínⁿ yā tanáⁿ'ā 'iiⁿ'yāⁿ chí nguéé nga'dííⁿnúⁿ yā. Cuaacu níⁿnyúⁿ ngaⁿ'á ngii ndís'tiī, chí 'iiⁿ'yāⁿ s'eeⁿ ní 'āā véé chí ndaācā yeⁿ'e yā na iⁿ'yeeⁿdí 'cūū. 17 Naati ndís'tiī, ní taachi nguéé nga'dííⁿnúⁿ nī, 'cuiīnī aceite tííⁿ nī ní nááⁿnú nī naaⁿ nī. 18 Ní nguéé 'cuuⁿ'mínⁿ nī nanááⁿ 'iiⁿ'yāⁿ

chi nguée nge'é nī naati Chiida yú chi cánuuⁿ yā nán'de'ei snaán yā. Ní Chiida yú chi snáaⁿ yā chííⁿ chí diiⁿ nī taachi cánúúⁿ nī nán'de'ei ní téé yā nanáán 'iiⁿyāⁿ de'ē chi cuuví yeⁿe nī.

*Vée vaadī 'cuiica ná va'ai chεeti nguuvi
(Lc. 12.33-34)*

¹⁹ Caⁿa Jesús: Ndís'tiī ní nguée diiⁿ nī chí cuuvi 'cuiica nī ná iⁿyeeⁿdí 'cūū naachi véé i'yéevē chí di'tuuví tī ndúú^{cū} che'e yáⁿāa chí tuuviī ní naachi véé chí duucu ní diduucú sa. ²⁰ Naati n'dáacā chí diiⁿ nī chí 'cuūndí yeⁿe nī ná va'ai chεeti nguuvi naachi nguée véé i'yéevē chí di'tuūví tī ndíí nguée ndúú che'e yáⁿāa chí tuuviī, ndíí nguée ndúú cuuvi cundaā chí duucu ní diduucú sa. ²¹ Caati naachi canée vaadī 'cuiica yeⁿe nī, miiⁿ canee staava yeⁿe nī chí nadicadiinúúⁿ nī yeⁿe tanducuéⁿē.

*Chíδεενε yeⁿe cuerpo yeⁿe yú ní nduutinaaⁿ yú
(Lc. 11.34-36)*

²² Caⁿa Jesús chí chíδεενε yeⁿe cuerpo yeⁿe yú chííⁿ chí nduutináaⁿ yú. Ndúúti chí nduutinaáⁿ nī n'daācā, tuu'mi ní núúⁿmáⁿ nchεετε cuerpo yeⁿe nī ní inaaⁿ chí δεενε. ²³ Ní nduuti chí nduutinaáⁿ nī nguée n'dai, tuu'mi ní núúⁿmáⁿ nchεετε cuerpo yeⁿe nī cunée na maāiⁿ. 'Tíicā nduuti chí δεενε chí cánee nduucú nī nguée n'daācā, tuu'mi ní canée nī na maāiⁿ chí díitūu n'dái.

*Jesús ngaⁿa yā yeⁿe chí 'cuiica 'iiⁿyāⁿ
(Lc. 16.13)*

²⁴ Mar 'áamá 'iiⁿyāⁿ nguée cuuvi dichíí'vε yā 'uūví 'iivi yā caati dinéⁿe yā 'aama yā ní nguεε dinéⁿe yā taama yā. Ní n'dáacā nadicadíínuuⁿ yā yeⁿe 'aama yā ní nguée n'daācā nadicadíínuuⁿ

yā yeⁿ'e taama yā. Nguéé cuuvi in'nuuⁿ nī vaadi 'cuiica yeⁿ'é nī ní dichí'vε nī 'iivú Ndyuūs.

*Ndyuūs idiíⁿ yā cuidado yeⁿ'e 'iiⁿ'yāⁿ yeⁿ'e yā
(Lc. 12.22-31)*

²⁵ Chuū ngaⁿ'á ngii ndís'tiī: Nguéé nadicadíínuuⁿ nī yeⁿ'e vida yeⁿ'e maaⁿ nī, o yeⁿ'ē chi che'é nī, o yeⁿ'ē chi cu'u nī, ndíí nguéé ndúú cáávā chí neⁿ'e cuerpo yeⁿ'e nī chi 'cuεetinúu nī. ¿'Áá nguéé yaⁿ'ai ca vida yeⁿ'e nī nguéé ti chí ngé'e nī? ¿'Áá nguεε yaⁿ'ai ca chí'vε cuerpo yeⁿ'e nī nguéé ti catecai nī? ²⁶ Cuiⁿ'diichí nī 'yaada yeⁿ'ē nanguuvi. Nguéé ngiinú tī ndaata, ndíí nguéé ngii cosecha yeⁿ'e tī, ndíí nguéé ndúú ín'guain'daí tī yeⁿ'e tī. Chiida yú chí cánéé ná va'ai chεeti nguuvi ngá'a yā chí nge'e tī. ¿'Áá nguéé yaⁿ'ai cá chii'vε ndís'tiī nguéé ti 'yaada? ²⁷ ¿Chéé ndís'tiī chí nééné n'dai tííⁿ nī cúúví iintiineeⁿ nī 'áamá yuūchí yeⁿ'ē chí yaācu nī?

²⁸ ¿Dε'ε cáávā chí ínadicadíínuuⁿ nī yeⁿ'ē catecai nī? Nadacadíínuuⁿ nī yeⁿ'e naāndā cuéé yeⁿ'ē cuεeti táácā chí n'giita. Nguéé diíⁿ ntiiⁿnyuⁿ ndíí nguéé ndúú idin'daí hilo. ²⁹ Naati 'úú ní ngaⁿ'á ngii ndís'tiī, chí rey Salomón miiⁿ ní ndúúcū tandu-cuéⁿ'ē catecai yā chí n'déévé n'dai ndii tuunu ngii 'yáⁿ'ā naati nguéé neené n'dεεveé tan'dúúcā yeⁿ'e naāndā s'eeⁿ. ³⁰ Ndúútí chí Ndyuūs idiíⁿ yā cuidado yeⁿ'ē yáatā chí vεε cuεeti chí maāⁿ ní canee ní cavyaaⁿ ní nti'í ní n'nee yaⁿ'ā 'iiⁿ'yāⁿ. ¿'Áá nguéé diiⁿ cá Ndyuūs cuidado yeⁿ'e ndís'tiī, 'iiⁿ'yāⁿ chí duū'vii i'téenu nī Ndyuūs? ³¹ Nguéé nadicadíínuuⁿ ndís'tiī, ní caaⁿ'maⁿ nī 'tíicā: ¿Dε'ε che'é 'nū? o ¿dε'ε cu'ú 'nū? o ¿dε'ε 'cuεetinúu 'nū? ³² 'Iiⁿ'yāⁿ chí nguéé

yeⁿe ndaata Israel in'nuúⁿ yā dendu'ū chi 'túúcā. Chiida yú chi cánée yā ná va'āi chεeti nguuvⁱ déenu yā tanducuéⁿē dendú'ū chi necesidades neⁿe yú. ³³ Naati ndís'tiī ní canee chi in'nuúⁿ nī vmnááⁿ vmnaaⁿ yeⁿé naachi Ndyuūs ngaⁿ'a ntiⁿnyúⁿ yā ndúúcū vaadī cuaacu yeⁿé Ndyuūs, ní 'íícú tanducuéⁿē dendu'ú 'cūū ní ntiineeⁿ yā yeⁿé nī. ³⁴ Nguéé nadicádíínuuⁿ nī yeⁿē cavyaaⁿ caati cavyaaⁿ ní táámá nguuvⁱ ndúúcū yeⁿē, ní 'íícú nguuvⁱ ní 'āā véé nūuⁿ chi véé. Dámaāⁿ nadacádíínuuⁿ nī yeⁿē maaⁿnguuvⁱ, 'āā 'tiicá nūuⁿ.

7

'Túúcā ngaⁿ'a Jesús: Nguéé tun'daá nī nuuⁿndi yeⁿe táámá 'iiⁿ'yāⁿ

(Lc. 6.37-38, 41-42)

¹ Jesús caⁿ'a yā: Ndís'tiī ní nguéé caaⁿ'maⁿ néeⁿ nī yeⁿe táámá 'iiⁿ'yāⁿ maaⁿ ní 'íícú Ndyuūs nguéé caaⁿ'máⁿ yā nuuⁿndi yeⁿe nī. ² Caati ndúúti chí ndís'tiī caaⁿ'maⁿ nī nuuⁿndi yeⁿe 'iiⁿ'yāⁿ, 'tiicá ntúūⁿ Ndyuūs caaⁿ'máⁿ yā nuuⁿndi yeⁿe nī. Nduuti chi n'dee n'dái caaⁿ'máⁿ nī, 'tiicá ntúūⁿ caaⁿ'máⁿ Dendyuūs yeⁿe nī. Nduuti chi duu'ví nūuⁿ, 'tiicá ntúūⁿ Ndyuūs caaⁿ'máⁿ yā yeⁿe nī. ³ ¿Dε'ē cúúví chi maaⁿ nch'εεté nūuⁿ n'gíínu nī nuuⁿndī chi diiⁿ tanáⁿ'ā 'iiⁿ'yāⁿ ní nguéé inaaⁿ nī nuuⁿndī ch'εεε chi diíⁿ nī? ⁴ ¿Dε'ē cúúví chí caaⁿ'máⁿ nī 'iiⁿ'yāⁿ yeⁿe chi diíⁿ yā chi nguεε n'daācā nduuti chí ndís'tiī diíⁿ nī cosas chí nguéé n'daācā? 'Caandivéeⁿ nī. Véé nuuⁿndi yeⁿé nī chí ch'εεε chí nguéé ndaacadaamí nī yeⁿē. ⁵ Ndís'tiī 'iiⁿ'yāⁿ 'uūví naaⁿ 'uuví cheendi nī. Dííⁿ cā maáⁿ nī ndaacadaamí nī yeⁿe nuuⁿndi chí diíⁿ nī ní 'íícú cuuvi caaⁿ'máⁿ nī yeⁿe 'iiⁿ'yāⁿ chí

canéé chí din'daācá yā ní ndaacadaamí yā yeⁿe nuuⁿndi chi diíⁿ yā.

⁶ Nguéé ca'a nī dendu'ū chí yeⁿe Ndyuūs 'yaānā s'eeⁿ ti 'yaānā s'eeⁿ cuuvi contra yeⁿe nī. Ní caⁿ'á tī che'e tī ndís'tiī chi pedazos cánéé nī. Nguéé 'cuíi nī cosas yeⁿe nī chí dīchíí'vē tan'dúúcā perlas nanááⁿ puercos ti cuuvi nanguεεcúndii tī ní ca'a ta'á tī ní ndís'tiī canéé nī maaⁿ ca'a tī.

Caacá nī, in'nuúⁿ nī, ní yaa'ví nī cheendi va'ai
(Lc. 11.9-13; 6.31)

⁷ Caⁿ'a Jesús: Caacá nī Ndyuūs, ní Ndyuūs téé yā yeⁿe nī. In'nuúⁿ nī ní ndaāca nī. Yaa'ví nī cheendi va'āī ní nan'guaaⁿ yeⁿ'é nī. ⁸ Caati nducyaaca 'iiⁿ'yāⁿ chí ngiica Ndyuūs ní Ndyuūs ca'a yā yeⁿe yā. Ní nducyáácá 'iiⁿ'yāⁿ chí in'nuuⁿ yā, ní in-ndaaca yā. Ní nducyáácá 'iiⁿ'yāⁿ chí yaa'vi yā cheendi va'āī, ní nan'guaaⁿ yeⁿ'é yā.

⁹ ¿Chéé yeⁿe ndís'tiī taachi caaca daiya nī 'aama pan, ca'a nī 'áámá tuūu? ¹⁰ O nduuti chí caaca daiyá nī 'áámá 'yaācā, ¿'áá ca'á nī 'áámá cúú? ¹¹ Nduuti chí ndís'tiī chí cúⁿncheeⁿ nī deenú nī ca'a nī cosa chí n'daācā daiya nī, ndii 'tεε cá Chiida yú chí canéé yā na va'ai chεεti nguuvi ca'á yā cosas chí n'dáácā n'dai cá 'iiⁿ'yāⁿ chí caaca yā Ndyuūs.

¹² 'Tíicā chí tanducuéⁿ'ē chí neⁿ'é nī chí diíⁿ 'iiⁿ'yāⁿ ndúúcu nī, chuū ntúūⁿ diíⁿ nī ndúúcu 'iiⁿ'yāⁿ. Chuū chí ley yeⁿe Moisés ndúúcu chí canéé nguūⁿ yeⁿe profetas s'uuⁿ ndíí cuááⁿ vmnaaⁿ.

Cheendi va'āī chí 'tuūcuú
(Lc. 13.24)

¹³ Caⁿ'a Jesús: Cundáa nī chééndí va'āī chí 'tuucuú, tí cheendi va'ai ch'εē'nū ndúúcu yúúní

ch'ε̄nū, chiiⁿ chi candéε̄ 'iiⁿyāⁿ chí caⁿ'a yā na infierno. Néénε̄ 'yaaⁿ 'iiⁿyāⁿ chí ndaa yā chééndí va'ai chí ch'ε̄nū miiⁿ. ¹⁴ Naati chééndí va'āi 'tucúū miiⁿ ní yúúní cuéēⁿ miiⁿ chí candéε̄ 'iiⁿyāⁿ chí caⁿ'a yā na vida cueⁿ'e daāⁿmaⁿ. Ní duu'ví 'iiⁿyāⁿ chí ndaāca yā chééndí va'āi miiⁿ.

*Yáⁿ'á ní cucáávā n'gui'i yeⁿ'ē tuumicádíínuuⁿ nī
(Lc. 6.43-44)*

¹⁵ Caⁿ'a Jesús: Dííⁿ nī cuidado ndís'tī yeⁿ'e 'iiⁿyāⁿ profetas chí falsos yā chí ngaⁿ'a yā chí ndε̄ yā nduudu cuaacu yeⁿ'é Ndyuūs naati nguεε̄ 'tíicā. Taachi nndaa yā nanááⁿ ndís'tī cuaaⁿ dáámí 'iiⁿyāⁿ miiⁿ tan'dúúicā catecai 'iiti cuūchī naati cuááⁿ chε̄ti yā tan'dúúicā 'yááⁿyāⁿ ngaātāā chí taaⁿ tī. ¹⁶ Ní yeⁿ'e chí dííⁿ yā tuumicádíínuuⁿ nī yeⁿ'e yā. ¿Áá cuta'a 'iiⁿyāⁿ uvas yeⁿ'e yááⁿ? o ¿'áá cuta'a 'iiⁿyāⁿ n'guiidīi yaaⁿ nguuví yeⁿ'e yááⁿ? Nguεε̄ 'tíicā. ¹⁷ 'Tíicā, nducyaaca yáⁿ'á chí n'dáí, n'daācā ngíi n'gui'i n'dáacā yeⁿ'ē, naati yáⁿ'á chí nguéé n'daācā ní nguéé n'dai n'gui'i yeⁿ'ē. ¹⁸ 'Áámá yáⁿ'á chí n'dáacā nguéé 'cuūndi n'gui'i chí nguéé n'daācā, ndíi nguéé ndúú yeⁿ'e chí nguéé n'daācā 'cuūndī n'gui'i chí n'daācā yeⁿ'ē. ¹⁹ Nducyaaca yáⁿ'á chí nguéé n'daācā ngíi n'gui'i yeⁿ'ē, 'iiⁿyāⁿ ní 'cááca yā ní 'cuii yā na yaⁿ'ā. ²⁰ 'Tiicá ntúūⁿ ndís'tī tuumicadíínuuⁿ nī yeⁿ'e 'iiⁿyāⁿ cáávā cosas chí dííⁿ yā yeⁿ'e chí n'daācā o yeⁿ'e chí nguéé n'daācā.

*Nguéé cuuví cundaa nducyaaca 'iiⁿyāⁿ na va'ai
chε̄ti nguuví
(Lc. 13.25-27)*

21 Jesús ngaⁿ'a yā 'tíicā: Nguéé nducyaaca 'iiⁿ'yāⁿ chi ngaⁿ'á yā yeⁿ'ē 'úú: N'díi Señor, Señor, ní cuuví cundaa yā naachí Ndyuūs ngaⁿ'a ntiiⁿ'nyuⁿ yā, dámaāⁿ 'iiⁿ'yāⁿ chi díiⁿ yā tan'dúúicā chi neⁿ'e Chiidá chi canee yā na va'ai chεeti nguuví. 22 Nééné 'yaaⁿ 'iiⁿ'yāⁿ caaⁿ'maⁿ yā cuuvi yā 'úú nguuví yeⁿ'é juicio N'díi Señor, Señor, ¿'áá nguéé caⁿ'a 'nū nduudu cuaacu ndúúicū chi duuchí nī ní tun'dáa 'nū yááⁿ'nguiinūⁿ yeⁿ'e 'iiⁿ'yāⁿ ndúúicū chi duuchí nī? Ní nééné n'deēe vaadi n'gíínú idiíⁿ 'nū ndúúicū chi duuchí nī. 23 Tuu'mi ní 'úú Cristo caaⁿ'máⁿ cuaacú cuuví 'iiⁿ'yāⁿ s'eeⁿ: 'Úú nguéé n'diichí tandíi ndís'tiī. Cuví nī yeⁿ'ē 'úú, ndís'tiī chi nguéé n'daācā díiⁿ nī.

*Yeⁿ'ē ndúú 'uūví cimientu yeⁿ'é va'aī s'eeⁿ
(Lc. 6.47-49; Mr. 1.22)*

24 Ní caⁿ'a ntūūⁿ Jesús: 'Āā du'ú nūⁿ 'iiⁿ'yāⁿ chi n'giindiveéⁿ yā ndúúúú 'cūū yeⁿ'é níicú idiíⁿ yā chεε chí 'úú ngaⁿ'á, 'iiⁿ'yāⁿ miiⁿ ní tan'dúúicā 'áámá saⁿ'ā chí n'dēēvεε nadicádíínuuⁿ sa. Saⁿ'ā miiⁿ din'dái sa vaacu sá na 'áámá yáává. 25 Níicú chééⁿ cúúví naⁿ'ā ní ch'iita yíicú. Ní chéenū 'yúúné taaⁿ contra yeⁿ'é va'aī miiⁿ ní nguéé chindεεvε caatí n'daacā chééndii na yáává miiⁿ. 26 'Āā du'ú nūⁿ 'iiⁿ'yāⁿ chi n'giindiveéⁿ yā nduudú 'cūū yeⁿ'é ní nguéé idiíⁿ yā tan'dúúicā chi ngaⁿ'á, 'iiⁿ'yāⁿ miiⁿ ní tan'dúúicā 'aama saⁿ'ā chi nguéé n'daācā inadicádíínuuⁿ sa. Saⁿ'ā miiⁿ ní din'dái sa vaacu sa na yáⁿ'āa ndúútíi. 27 Ní cheeⁿ cuuví naⁿ'ā ní ch'iita yíicú miiⁿ. Ní chéenū 'yúúné taaⁿ contra yeⁿ'é va'aī miiⁿ ní va'aī chidεεvε ní ntuūvīi.

28 Taachí Jesús miiⁿ ch'iinu caⁿ'a yā ndúúúú 'cūū, 'iiⁿ'yāⁿ mííⁿ chen'e yiinú yā yeⁿ'e chííⁿ chí ngi'cueeⁿ Jesús. 29 Caati Jesús miiⁿ ngi'cueeⁿ yā 'iiⁿ'yāⁿ s'eeⁿ

tan'dúúcā 'áámá 'ii'yāⁿ chí déénu o 'áámá 'ii'yāⁿ chí ngaⁿ'a ntiⁿ'nyúⁿ yā nguéé tan'dúúcā 'áámá maestro chí ngi'cueeⁿ ley yeⁿ'e yā.

8

Jesús idiiⁿ yā chí nduūvā yeⁿ'ē 'áámá saⁿ'ā yeⁿ'e ca'āi chí nguuvi lepra chí ín'duuti yuūtē yeⁿ'ē sa
(Mr. 1.40-45; Lc. 5.12-16)

¹ Taachí Jesús cuch'eeⁿ yā na 'áámá yiicū, nééné 'yaaⁿ 'ii'yāⁿ cueⁿ'é yā ndúúcu yā. ² N'diichí nī. Nanááⁿ Jesús ndaā 'áámá saⁿ'ā chí ndíí sa 'áámá ca'ai chí nguuvi lepra chí índuuti yuūtē yeⁿ'ē sa. Ní chíntii'ya sa nanááⁿ yā ní s'teenú sá ní caⁿ'a sa chíi sa 'ii'yāⁿ: N'diī Señor, nduuti chí neⁿ'e nī, ní dííⁿ nī chí nduūvā yeⁿ'é.

³ Jesús ní n'doó yā ta'á yā ní tuu'ví yā saⁿ'ā miiⁿ ní caⁿ'a yā chíi yā saⁿ'ā: 'Úú neⁿ'é. Nduūvā yeⁿ'ē di. Tuu'mí nūuⁿ ndúuvā n'daācā yeⁿ'ē sa ní nduūvī δεενε sa. ⁴ Tuu'mi ní Jesús ní caⁿ'a yā chíi yā saⁿ'ā miiⁿ: Cuéⁿ'e di ní 'cuuⁿ'miⁿ dí cuerpo yeⁿ'ē di nanááⁿ chiiduú ní ca'a di ofrenda nanááⁿ Ndyuūs tan'dúúcā chí ngaⁿ'a na ley chí dinguuⁿ Moisés. 'Tíicā ní chiiduú caaⁿ'maⁿ cuaacú yā yeⁿ'ē di nanááⁿ nducyaaca 'ii'yāⁿ, ní nguéé 'cuuⁿ'miⁿ di yeⁿ'ē chí chíi ndúúcu di mar 'áámá 'ii'yāⁿ.

Jesús dííⁿ yā chí nduūvā yeⁿ'e 'aama mozo yeⁿ'e capitán romano
(Lc. 7.1-10)

⁵ Taachí Jesús cáámá ndaa yā na yáāⁿ Capernaum, ndaā 'áámá saⁿ'ā capitán yeⁿ'e ndaata yeⁿ'e 'ii'yāⁿ romanos nguéé yeⁿ'e ndaata Israel. Ní ndaā sa nanááⁿ Jesús miiⁿ ní di'cuíⁿtu sa 'ii'yāⁿ. ⁶ Ní caⁿ'a

sa chii sa Jesús: N'díí Señor, mozo ye^{n'}é candíítí sá na cama ndúúcu ca'āi chi in'dúuví cuerpo ye^{n'}é sa. Nééné ya'āi ngiitā sa.

⁷ Jesús ca^{n'}a yā chii yā sa^{n'}ā: 'Úú ní ca^{n'}á ní dííⁿ chí sa^{n'}ā ní nduūvā ye^{n'}é sa.

⁸ Sa^{n'}ā capitán nan'guεεcúta^{n'}a sa ní ca^{n'}a sa chii sa Jesús mii^{n'}: N'díí Señor, 'úú nguéé neené n'dai 'úú chí cundaa nī chéétí va'āi ye^{n'}é. Dámaāⁿ chí caa^{n'}maⁿ núuⁿ nī ní sa^{n'}ā mozo ye^{n'}é ndúuvā ye^{n'}é sa. ⁹ 'Úú ní sa^{n'}ā chí v'éé sa^{n'}ā ndíí tiiⁿ ye^{n'}é, ní nga^{n'}ā ntiiⁿnyúⁿ yā ye^{n'}e 'úú. 'Úú ntúūⁿ ní nga^{n'}á ntiiⁿnyúⁿ ye^{n'}é cien soldados chi maaⁿ poder ye^{n'}é. 'Úú ní nga^{n'}á ngíí 'aama sa: Cúna^{n'}ā di, ní ina^{n'}ā sa. Ní nga^{n'}á ngíí taama sa: Cuchí di, ní chii sa. Ní nga^{n'}á ngíí mozo chí diiⁿ mandado ye^{n'}é: Diiⁿ di ntiiⁿnyúⁿ 'cūū, ní diiⁿ sa.

¹⁰ Taachi Jesús ch'iindiveéⁿ yā chuū che^{n'}é yiinú yā. Ní ca^{n'}a yā chii yā 'ii^{n'}yāⁿ chí ndúúcu yā: Cuaacu níⁿnyúⁿ nga^{n'}á ngíí ndís'tiī chí 'úú nguéé indaacá 'ii^{n'}yāⁿ chí i'téenu n'dai yā mar 'áámá 'ii^{n'}yāⁿ ye^{n'}e ndaata Israel tan'dúúcā sa^{n'}á 'cūū. ¹¹ Ní nga^{n'}á ngíí ndís'tiī, chí neené 'yaaⁿ yā chí caaca yā cuaaⁿ ná ícan'daa 'yá^{n'}ā ndúúcu cuaaⁿ na ngiiya 'yá^{n'}ā ní 'cuεεté yā ná va'ai cheεti nguuví ndúúcu Abraham, ndúúcu Isaac, ndúúcu Jacob. ¹² Naati n'deee n'dái daiyá 'ii^{n'}yāⁿ ye^{n'}e ndaata Israel chí canéé chí 'cuεεtinée yā naachí Ndyuūs nga^{n'}a ntiiⁿnyuⁿ yā ná va'ai cheεti nguuví, Ndyuūs tun'dáa yā 'ii^{n'}yāⁿ s'een chuva'āi naachí maāiⁿ. Mííⁿ ní cuεεcu yā ní che'e 'diiⁿ'yuⁿ yā ti nguéé i'téenu yā Dendyuūs.

¹³ Tuu'mi ní Jesús miiⁿ ca^{n'}a yā chii yā capitán mii^{n'}: Cuna^{n'}ā di. Tan'dúúcā chí i'téenu di chí 'úú

idiíⁿ chi nduūvā yeⁿe mozo yeⁿē di, 'tíicā cuuví ndúúcu mozo yeⁿē di. Ní hora míⁿ nūuⁿ nduūvā yeⁿe mozo yeⁿē sa.

*Jesús diíⁿ yā chi nduūvā yeⁿe indáⁿā Pedro
(Mr. 1.29-31; Lc. 4.38-39)*

¹⁴ Cuayivi ní ndaā Jesús ná va'ai yeⁿē Pedro miiⁿ ní n'diichí yā chí indáⁿā Pedro miiⁿ candiiti yā na cama. Ndεε 'iíⁿnūⁿ taáⁿ táⁿā miiⁿ. ¹⁵ Jesús tuu'ví yā ta'ā tá ní 'iiⁿnūⁿ míⁿ ní chivii. Tuu'mi ní táⁿā miiⁿ ní nducueeⁿ tá ní diiⁿ ta mandado yeⁿē 'iiⁿyāⁿ s'eeⁿ ní ca'a ta chi che'e yā.

*Jesús diiⁿ yā chi nanduūvā yeⁿē n'dee n'dái
'iiⁿyāⁿ
(Mr. 1.32-34; Lc. 4.40-41)*

¹⁶ Taachi chi 'da'a nguuvi miiⁿ, tuu'mi ní 'iiⁿyāⁿ yeⁿe yāáⁿ miiⁿ ndaa yā chí ndéε yā 'yaaⁿ n'dái 'iiⁿyāⁿ nanááⁿ Jesús. Ndεε yā 'iiⁿyāⁿ chí snée yā ndúúcu espíritus yeⁿe yááⁿn'guiinūuⁿ. Jesús caⁿa yā 'áámá nduudu nūuⁿ ní tun'dáa yā espíritus yeⁿe yááⁿn'guiinuuⁿ yeⁿe 'iiⁿyāⁿ. Ní diíⁿ yā chí nduuva yeⁿē nducyáácá 'iiⁿyāⁿ s'eeⁿ chí ngíta yā. ¹⁷ 'Tíicā ní cuuví cuaacu chí caⁿa saⁿā profeta Isaías ndíi cuaaⁿ vmnaaⁿ taachí caⁿa yā 'túúca: 'Iiⁿyāⁿ maáⁿ yā sta'á yā ca'āi yeⁿe yú ní candéε yā vaadī ya'ai yeⁿe yú.

*'Iiⁿyāⁿ 'āā neⁿe yā caⁿa yā ndúúcu Jesús
(Lc. 9.57-62)*

¹⁸ Taachi Jesús n'diichi yā nducyaaca 'iiⁿyāⁿ cuaaⁿ 'diitú yā caⁿa yā chíi yā discípulos yeⁿe yā chí cho'ó yā táámá lado yeⁿe nuūⁿnīⁿ'yáⁿā. ¹⁹ 'Áámá saⁿā chí ngi'cueeⁿ ley ndaā sa nanááⁿ Jesús ní caⁿa

sa chii sa 'iiⁿyāⁿ: N'dií Maestro, caⁿ'á ndúúcu nī 'āā tií nūⁿ naachi cáⁿ'a nī.

²⁰ Jesús caⁿ'a yā chii yā saⁿ'ā miiⁿ: 'Yuunēⁿ ní véé yiivi yáává yeⁿ'e tī. 'Yáádá yeⁿ'ē nanguuvi véé 'd'ééce tī naati 'úú chi Saⁿ'ā chi Daiya Dendyuūs nguéeé va'ai chi vaacú naachi cundiití tiíⁿ.

²¹ Táámá discípulo yeⁿ'é yā caⁿ'a sá chii sa Jesús: N'dii Señor, vmnááⁿ vmnaaⁿ téé nī lugar 'úú ti caⁿ'á 'cuūchí chiidá ní caⁿ'a yú.

²² Jesús ngaⁿ'a yā ngii yā saⁿ'ā: Cuchíi di ndúúcu 'úú. Cu'neeⁿ dí 'iiⁿyāⁿ chi nguéeé i'téenu yā chí 'cuuchí yā tináⁿ'ā chi chiida di. Tí 'iiⁿyāⁿ s'een tan'dúúcā tináⁿ'ā 'tíica yā.

Jesús chi'neen 'diíⁿ yā olas yeⁿ'ē nuūⁿnī'yáⁿ'ā nduūcū 'yúúné chi tááⁿ

(Mr. 4.35-41; Lc. 8.22-25)

²³ Jesús sndaa yā na 'áámá barco ní discípulos yeⁿ'e yā cueⁿ'e yā ndúúcu yā ni sndaa yā na barco miiⁿ. ²⁴ Hora míⁿ nūⁿ ní ndaā 'áámá 'yúúné tááⁿ chí olas yeⁿ'e nuūⁿnī'yáⁿ'a miiⁿ ní ch'εεε cá chí ndaā nuūⁿnīⁿ chεεti barco miiⁿ. 'T'éé 't'éé nūⁿ nguéeé cánduūu ná barco. Jesús miiⁿ ní cyaadu yā. ²⁵ Discípulos yeⁿ'é yā ndaa yā nanááⁿ Jesús ní nanduūchí yā 'iiⁿyāⁿ miiⁿ ní ngaⁿ'a yā ngii yā Jesús: N'dii Señor, nadanguáⁿ'ai nī s'uūúⁿ caati 'cuūvi yú. 'Āā 'cuεεchi yú cuaaⁿ maaⁿ nuūⁿnī'yáⁿ'ā.

²⁶ Jesús caⁿ'a yā chii yā discípulos yeⁿ'é yā: ¿Dε'ē cúúví chí 'va'á ní? Ndís'tií ní dúú'vīi i'téenu nī. Tuu'mi ní Jesús nducueeⁿ yā ní yaa'vi yā 'yúúné míⁿ ndúúcu nuūⁿnī'yáⁿ'ā chí cu'nééⁿ 'diíⁿ. Ní hora míⁿ nūⁿ canee 'diíⁿ. ²⁷ Discípulos ní cheⁿ'e yiinú yā ní caⁿ'a yā nguaaⁿ vi'ī: ¿Du'u

sá'nā chi 'túúcā, ti ndii 'yúúné ndíí nuū'nī'n'yá'nā n'giindiveēén ye'nē sa?

Sa'nā s'ee'n ye'n'e yá'nāa Gadara chi véé espíritus ye'n'e yáá'n'guiinūū'n ndúúcu sa

(Mr. 5.1-20; Lc. 8.26-39)

²⁸ Taachi Jesús ndúúcū discípułos ye'n'é yā cho'ó yā nuū'nī'n'yá'nā mii'n ní ndaá yā nii'nuú'n na yá'nāa Gadara mii'n, snéé na 'uuvi sa'nā chi snéé sa ndúúcū espíritus ye'n'e yáá'n'guiinūū'n ní nacan'dáa sa na yiivε yáává chi nguaa'n yáinyā'n. Ní nééné taa'n sa chi mar 'áámá 'ii'n'yā'n nguéé ngíí ngo'ó yā yúúní mii'n. Sa'nā s'ee'n ní ndaa sa nanáá'n Jesús. ²⁹ Ní 'cai yiicu sa: N'dii Jesús Daiya Dendyuūs, ¿dé'ε canéé ye'n'é nī ndúúcū nús'uu? ¿'Áá ndaá nī 'muu'n chi di'vaachí nī ye'nē nús'uu taachi 'āā cuéé cúúnú ca'a tiempo taachi Dendyuūs ca'a yā castigo?

³⁰ Ní naachi snéé sa'nā s'ee'n ní ya'n'ai 'téé na 'áámá yiicū. Ní nii'nuú'n sa'nā s'ee'n snéé 'yaa'n n'dái puercoš, chi nge'é tī. ³¹ Ní espíritus ye'n'e yáá'n'guiinūū'n mii'n ní di'cuítu sa Jesús mii'n: N'dii Jesús, ndúúti chi tun'dáa nī nús'uu ye'n'e sa'nā s'uu'n, 'cuáa'n nī chi cundaa 'nū chεeti puercos mii'ya. ³² Jesús mii'n ca'n'a yā chii yā espíritus ye'n'e yáá'n'guiinūū'n: Cué'n'e nī. Tuu'mi ní espíritus ye'n'e yáá'n'guiinūū'n cán'daa sa ní cue'n'e sa chεeti puercos. Cuin'diichí nī. Nducyaa ca puercos chéenu tī na yiicū mii'n ní chingéé nuú'n tī nguáá'n nuū'nī'n'yá'nā ní ch'íí nuú'n tī nguáá'n nuū'nī'n' mii'n.

³³ 'Ii'n'yā'n chi dii'n cuidado puercos mii'n cuna'ná yā ngéenu yā na yáā'n mii'n ní ca'n'a yā tandu-cué'n'é chí chíi tan'dúúcā chí chó'ōo ye'n'e 'ii'n'yā'n chi snéé ndúúcū espíritus ye'n'e yáá'n'guiinūū'n.

34 Nducyaaca 'iiⁿyāⁿ yeⁿ'e yāāⁿ miiⁿ cheⁿ'e yā n'diichi yā Jesús. Taachí ndaa yā naachi canéé Jesús miiⁿ, 'iiⁿyāⁿ s'eeⁿ ní di'cuíitu yā Jesús miiⁿ chí cuεεvíi yā yeⁿ'ē yāāⁿ vaacú yā.

9

Jesús diiⁿ yā chi nduuvā yeⁿ'e 'áámá saⁿ'ā ndúúcū ca'āi chi in'dúuví sá

(Mr. 2.1-12; Lc. 5.17-26)

¹ Tuu'mi ní Jesús miiⁿ sndáa yā na barco, ní cueⁿ'é yā táámá lado yeⁿ'ē nuūⁿnīⁿ'yáⁿ'ā ní cueⁿ'e yā ní ndaa yā yāāⁿ vaacú yā. ² Tuu'mi ní ndaā nanááⁿ Jesús 'iiⁿyāⁿ ní ndεε yā 'áámá saⁿ'ā ndúúcū ca'āi chí in'dúuví cuerpo yeⁿ'e sa. Candúu sa na 'áámá yiivε. Taachí Jesús miiⁿ tuumicadínuuⁿ yā chí saⁿ'ā s'eeⁿ i'téenu sa yeⁿ'é yā, tuu'mi ní caⁿ'a yā chii yā saⁿ'a miiⁿ: Nduuví tiinú di daiyá. 'Úú 'āa nadach'εεcú nuuⁿndi yeⁿ'ē di.

³ Tuu'mi ní náⁿ'ā saⁿ'ā s'eeⁿ chí ngi'cueeⁿ ley chí snee sa miiⁿ tucá'a sa nadacadínuuⁿ sa nguaaⁿ maāⁿ sa: Sáⁿ'a 'cūū ní ngaⁿ'a taaⁿ sa contra yeⁿ'e Ndyuūs. ⁴ Jesús miiⁿ tuumicadínuuⁿ yā vaanicadínuuⁿ yeⁿ'ē sa ní caⁿ'a yā chii yā saⁿ'ā s'eeⁿ: ¿De'ē cuuvi chí nguéé n'daācā inadicadínuuⁿ nī na staava yeⁿ'e nī? ⁵ ¿Chεε cá chí nguéé ngiⁿ'i chí caaⁿ'máⁿ cuuví sáⁿ'a 'cūū: Nuuⁿndi yeⁿ'ē di nch'εεcū o chí caaⁿ'máⁿ: Ndúcuééⁿ dí ní caaca dí? ⁶ 'Tíicā ngaⁿ'á chí ndís'tiī cadínuuⁿ nī chí Saⁿ'ā chí Daiya Dendyuūs ní véeⁿ poder yeⁿ'ē sa na in'yeeⁿdí 'cūū chí nadach'εεcú sa nuuⁿndi yeⁿ'é 'iiⁿyāⁿ. Tuu'mi ní caⁿ'a yā chii yā saⁿ'ā ndúúcū ca'āi chí in'dúuví sá: Nducueeⁿ di ní nta'a di yiivε yeⁿ'e di ní cunaⁿ'ā di na vaacu di.

7 Tuu'mi ní sa^{n'}ā miiⁿ ní nducuééⁿ sá ní cúna^{n'}ā sa na vaacu sa. 8 Taachí 'ii^{n'}yāⁿ s'eeⁿ n'diichí yā chuū che^{n'}e yiinú yā ní ca^{n'}a yā: De'ε chúúcā ch'εεε Dendyuūs chí ca'á yā poder 'cūū sa^{n'}ā i^{n'}yeeⁿdí cūū.

Jesús yaa'vi yā sa^{n'}ā chi nguuvi Mateo

(Mr. 2.13-17; Lc. 5.27-32)

9 Jesús cho'ó yā miiⁿ, ní cachiicá yā ní n'diichí yā 'áámá sa^{n'}ā chi nguuví sa Mateo. Mateo miiⁿ ní vεε sa na cuarto naachi nadí^{'vē} 'ii^{n'}yāⁿ ye^{n'}ē yá^{n'}āa ye^{n'}e yā. Jesús ca^{n'}a yā chii yā sa^{n'}ā: Díí, cuchí di ca^{n'}ā di nduucú. Ní Mateo miiⁿ nducueeⁿ sa ní cue^{n'}e sa ndúúcū Jesús.

10 Taachí Jesús vεε yā na mesa ná va'āi ye^{n'}e Mateo miiⁿ, hora míⁿ nééné 'yaaⁿ 'ii^{n'}yāⁿ publicanos chí cobradores chí inn'guεε yā ye^{n'}e impuesto ndúúcū 'ii^{n'}yāⁿ nuūⁿndíí ní ndaa yā ní ch'ēēté yā na mesa ndúúcū Jesús ndúúcū discípulos ye^{n'}e yā.

11 Taachí 'ii^{n'}yāⁿ fariseos n'diichí yā chuū, ca^{n'}a yā chii yā discípulos ye^{n'}e Jesús: ¿De'ε cúúví chí nge'e maestro ye^{n'}e nī ndúúcū sa^{n'}ā publicanos chí cobradores chí inn'guεε yā ye^{n'}e impuesto ndúúcū 'ii^{n'}yāⁿ nuūⁿndíí?

12 Taachí Jesús ch'iindiveeⁿ yā chuū, ca^{n'}a yā chii yā 'ii^{n'}yāⁿ s'eeⁿ: 'Ii^{n'}yāⁿ chí nguéé ngiitā nguéé ne^{n'}e yā 'aama médico, dámaaⁿ 'ii^{n'}yāⁿ chí ngiitā. 13 Cue^{n'}e nī ní tuumicádiinuuⁿ nī de'ε chí canéé nguūⁿ na libro ye^{n'}e Ndyuūs ndúúcū chí ne^{n'}e caa^{n'}maⁿ chí 'tíicā: 'Úú ne^{n'}é chí 'ii^{n'}yāⁿ nduuví ya'āi 'iinú yā ndúúcū vi'ī. 'Úú ní nguéé ne^{n'}é chí 'caa^{n'}nuⁿ yā 'iiti ní ca'á yā 'iiti tan'dúúcā ofrenda cucáávā 'úú. Ní 'úú ní nguéé cuchí i^{n'}yeeⁿdí 'cūū chí yaa'vi 'ii^{n'}yāⁿ chí nadacádiinuuⁿ yā chí n'dááca yā ti nguéé

dinuuⁿndí yā, naati 'iiⁿ'yāⁿ chi véé nuuⁿndi yeⁿ'e yā ní 'íicú ndaacadaamí yā yeⁿ'ē nuuⁿndi yeⁿ'e yā.

Tiⁿ'yāⁿ ntiinguuneeⁿ yā yeⁿ'e chi nguéé ca'diiⁿnúⁿ yā ti caaⁿ'maⁿngua'a yā

(Mr. 2.18-22; Lc. 5.33-39)

¹⁴ Tuu'mi ní discípu^los yeⁿ'e Juan chi chεdínuⁿniⁿ yā ndaá yā nanááⁿ Jesús miiⁿ ní caⁿ'a yā: N'dií Jesús, ¿de'ē cúúví chí nús'uu ndúúcu 'iiⁿ'yāⁿ fariseos nééné n'deeé cuúví nguéé nga'diiⁿnúⁿ 'nū ní discípu^los yeⁿ'e ní nga'díⁿnúⁿ yā?

¹⁵ Jesús caⁿ'a yā chi yā 'iiⁿ'yāⁿ s'eeⁿ: ¿Áá cu-uví 'cuεtinéé 'iiⁿ'yāⁿ ndúúcu catecai 'cuáⁿ tinaⁿā taachí caⁿ'á yā naachi n'giindivaacu 'iiⁿ'yāⁿ neⁿ'e chí saⁿ'ā chí n'giindivaacu miiⁿ canéé sá? Naati ndaá nguuvi chí isaⁿ'ā yeⁿ'e yā ní cuaví sa yeⁿ'é yā ti 'cuúví sa; tuu'mi ní nguεε ca'diiⁿnúⁿ yā.

¹⁶ Mar 'áámá 'iiⁿ'yāⁿ nguéé cúúví cuta'á yā 'áámá tiinūⁿ ngai chí nguéé naaⁿnu yā chí n'dyaatá yā na catecai ndiicúⁿ yeⁿ'e yā. Nduuti chí 'tíicā díⁿ yā, caātā ndu'ū tiinūⁿ ndiicúⁿ. Ní cuuvi ch'εete ca naachí ndíí nteeⁿ tiinūⁿ ndiicúⁿ. ¹⁷ Ndíí nguéé ndúú caaⁿ'yúⁿ 'iiⁿ'yāⁿ vino ngai ch'éetí bolsa yiiⁿmaⁿ ndiicúⁿ tan'dúúcā chí diiⁿ 'iiⁿ'yāⁿ tiempo chí chó'ōo caati yiiⁿmaⁿ ndiicúⁿ miiⁿ ní cúteeⁿ ní vino miiⁿ ní cungéé. Ní cuuvi ndái yiiⁿmaⁿ. Caaⁿ'yúⁿ yā vino ngai ch'εeti bolsa yiiⁿmaⁿ ngai; ní cuaví iⁿnduu 'uúví n'dáacā canéé yeⁿ'ē.

Jesús diíⁿ yā chí nanduūvā yeⁿ'e 'uūví n'daataá

(Mr. 5.21-43; Lc. 8.40-56)

¹⁸ Taachí Jesús miiⁿ ngaⁿ'a yā ndúúdu 'cūⁿ, 'áámá saⁿ'ā chí ngaⁿ'a ntiiⁿnyúⁿ yā yeⁿ'e yáacū sinagoga ndáa sa nanááⁿ Jesús, ní chiintiiⁿ'ya sá ní chí'teenu

sa. Ní caⁿ'a sa chii sa 'iiⁿ'yāⁿ: N'diī Jesús, miniiⁿyuⁿ ch'iī daiyá; naati cuchii nī ní cun'duu nī ta'a nī vmnaaⁿ yeⁿ'ē tá ní nduuchi tá.

19 Ní Jesús nducueeⁿ yā ní cueⁿ'e yā ndúú^{cū} discípulos yeⁿ'e yā ní ndáa yā ndúú^{cū} saⁿ'ā miiⁿ na vaacu sá. 20 Tuu'mi ní 'áámá n'daataa chi canéé ndúú^{cū} 'áámá ca'ai, chí ican'dáa yuuúⁿ yeⁿ'e cuerpo yeⁿ'ē tá 'āā ndiichúúví nduūyū ndaa niiⁿnuⁿ tá cuaaⁿ dáámí Jesús. Tuū'vi tá naachí ndεεtúú yeⁿ'e catecai Jesús miiⁿ. 21 Ti taⁿ'ā miiⁿ maāⁿ tá nadicádiinuⁿ tá 'tíicā; Ndúúti chi 'úú tuū'ví dámaaⁿ catecai yā, tuu'mi ní nduūvā yeⁿ'é. 22 Tuu'mi ní Jesús nguεεcúndii yā ní n'diichi yā táⁿ'ā, ní caⁿ'a yā chii yā táⁿ'ā: Cúúví dítīnú di, díí daiyá; 'āā nanduuvā yeⁿ'ē di ti i'téénu di 'úú. Hora miiⁿ nūuⁿ táⁿ'ā miiⁿ nānduūvā yeⁿ'ē tá.

23 Taachí Jesús miiⁿ sndaa yā na va'ai yeⁿ'ē sán'ā chi ngaⁿ'a ntiiⁿnyuⁿ yā yeⁿ'e yáacū sinagoga tuu'mi ní n'diichí yā 'iiⁿ'yāⁿ chí i'tiiví yā flauta, ndúú^{cū} 'iiⁿ'yāⁿ chí n'gai yā, ndúú^{cū} 'iiⁿ'yāⁿ chí nguεεcú yā ní snéé yā naachi candítí tináⁿ'ā. 24 Ní Jesús caⁿ'a yā chii yā 'iiⁿ'yāⁿ s'eeⁿ: Cuví nī; ti ta'díí miiⁿ nguéé n'dii tá, cyaadu tá. 'Iiⁿ'yāⁿ s'eeⁿ ní ch'ííⁿnyuⁿneeⁿ yā Jesús miiⁿ. 25 Taachi tun'dáa yā 'iiⁿ'yāⁿ miiⁿ chεεti va'āī, Jesús ndaa yā va'āī ní sta'á yā ta'ā n'daataa 'lííⁿ miiⁿ, ní n'daata 'lííⁿ miiⁿ ní nducueeⁿ tá. 26 Chuū chí diiⁿ Jesús ní ndōō fama miiⁿ nuuⁿmaⁿ ná yāāⁿ naachí chii chuū.

Jesús diiⁿ yā chí nanduūvā 'uuvi 'iiⁿ'yāⁿ chí ngueenááⁿ

27 Taachi Jesús cho'ó yā yeⁿ'ē miiⁿ, ní 'uuvī saⁿ'ā chí ngueenááⁿ can'dáa sa 'iiⁿ'yāⁿ. 'Cai yiicú sá ní

caⁿa sa: N'dií Daiya David, cunéé ya'ai 'iinu nī nūs'uu.

²⁸ Taachi Jesús cueⁿé yā ndaa yā na va'ai tuu'mi ní ndaa ndúú 'uūvī saⁿā ngueenááⁿ miiⁿ nanááⁿ Jesús. Jesús caⁿa yā chiī yā saⁿā s'eeⁿ: ¿'Áá i'téenu nī chi 'úú cuuvi diíⁿ chi nanduūvā yeⁿé nī? Saⁿā s'eeⁿ ní caⁿa sa: 'Tíicā Señor.

²⁹ Tuu'mi ní Jesús tuū'ví yā nduutinááⁿ saⁿā s'eeⁿ ní caⁿa yā: 'Tíicā cuuví tan'dúúcā chi i'téenu nī yeⁿé.

³⁰ Nduutinááⁿ saⁿā s'eeⁿ ní n'guaaⁿ ní nduuvā yeⁿé sa. Ní Jesús caⁿa yā chiī yā saⁿā s'eeⁿ: Nguéé ca'a nī chi cadíínúuⁿ 'iiⁿ'yāⁿ yeⁿe chuū.

³¹ Naati saⁿā s'eeⁿ ní cueⁿe sa núúⁿmáⁿ ná yáⁿ'āa miiⁿ, ní caⁿa sa nducuéⁿé chi Jesús miiⁿ diíⁿ yā.

Jesús diíⁿ yā chí nduūvā yeⁿé 'áámá 'dií'mī

³² Taachi Jesús ndúúcū 'iiⁿ'yāⁿ s'eeⁿ nan'daa yā na va'ai miiⁿ, ndaa saⁿā s'eeⁿ nanááⁿ Jesús ní ndéé sa 'áámá 'dií'mī chi canee sa ndúúcū espíritu yeⁿe yááⁿ'nguiinūⁿ. ³³ Ní taachi Jesús miiⁿ tun'dáa yā espíritu yeⁿe yááⁿ'nguiinūⁿ miiⁿ, tuu'mi ní 'díi'mi miiⁿ ní chí caⁿa sa. 'Iiⁿ'yāⁿ ní cheⁿe yiinú yā ní caⁿa yā: Nguéé in'diichí dendu'ū chi 'túúcā nguaaⁿ 'iiⁿ'yāⁿ yeⁿe Israel.

³⁴ Naati 'iiⁿ'yāⁿ fariseos caⁿa yā: Saⁿā miiⁿ ní tun'dáa sa espíritu yeⁿe yááⁿ'nguiinūⁿ cáávā saⁿā chi ngaⁿa ntiiⁿnyuⁿ sa yeⁿe espíritus yeⁿe yááⁿ'nguiinūⁿ.

Jesús ya'ai 'iinú yā 'iiⁿ'yāⁿ

³⁵ Jesús cachiica yā nuuⁿmáⁿ na yááⁿ n'gεεεε ndúúcū yaáⁿ n'gaiyáá, ní ngi'cueeⁿ yā na yáacū sinagogas yeⁿe 'iiⁿ'yāⁿ Israel. Ní ngaⁿa yā nduudu

cuaacu yeⁿ'ē naachí Ndyuūs ngaⁿ'ā ntiiⁿnyúⁿ yā na va'ai cheeti nguuvi. Ní diiⁿ yā chi nduūvā yeⁿ'ē nducyaaca 'iiⁿ'yāⁿ yeⁿ'e nducuéⁿ'ē naaⁿ ca'ai yeⁿ'e yā ndúúⁿcū 'iiⁿ'yāⁿ chi ya'ai yeⁿ'é yā. ³⁶ Ní taachi Jesús n'diichi yā nducyaaca 'iiⁿ'yāⁿ s'eeⁿ, tuu'mi ní yá'ai 'iinú yā caava 'iiⁿ'yāⁿ s'eeⁿ, ti iiⁿ'yāⁿ s'eeⁿ ndicúúnu yā ní snée yā tan'duucā 'iiti cuūchí chi nguée du'ū chi idiiⁿ cuidado 'iiti. 'Tiicá yā. ³⁷ Tuu'mi ní Jesús miiⁿ caⁿ'a yā chii yā discípulos yeⁿ'e yā: Cuaacu níⁿnyúⁿ chí ngí yeⁿ'ē nééné n'deēe chi diiⁿ yú cosechar naati 'iiⁿ'yāⁿ chí idiiⁿ ntiiⁿnyuⁿ nguée 'yaaⁿ yā. ³⁸ Cáávā chuū cáácá ní Ndyuūs chí véé cosecha yeⁿ'e yā chí dicho'ó yā mozos ní nadidáámá yā cosecha yeⁿ'é yā.

10

Jesús yaa'vi yā ndu'u ndiichúúví discípulos (Mr. 3.13-19; Lc. 6.12-16)

¹ Tuu'mi ní Jesús yaa'ví yā ndu'ū ndiichúúví discípulos yeⁿ'e yā chí ndaa yā nanáaⁿ yā. Ní Jesús miiⁿ ca'a yā poder discípulos chí tun'daá yā espíritus yeⁿ'e yááⁿ'nguiinūⁿ yeⁿ'é 'iiⁿ'yāⁿ, ní diiⁿ yā chí nduūvā yeⁿ'é 'iiⁿ'yāⁿ chí ngiitā yeⁿ'e nducuéⁿ'ē naaⁿ ca'ai yeⁿ'e yā ndúúⁿcū 'iiⁿ'yāⁿ chí ya'ai yeⁿ'é yā.

² 'Túúⁿcā duūchi ndu'u ndiichúúví apóstoles; Simón chí nguuvi Pedro ndúúⁿcū Andrés 'dínu sa, Jacobo ndúúⁿcū Juan 'diinū sa chí daiya Zebedeo; ³ ndúúⁿcū Felipe, ndúúⁿcū Bartolomé, ndúúⁿcū Tomás, ndúúⁿcū Mateo chí sán'a publicano chí cobrador; ndúúⁿcū Jacobo saⁿ'ā daiya Alfeo; ndúúⁿcū Lebeo chí nguuvi Tadeo; ⁴ ndúúⁿcū Simón yeⁿ'e yáⁿ'āa Caná; ndúúⁿcū Judas Iscariote saⁿ'a

miiⁿ chi cuayivi ch'iⁿi sá du'u chí Jesús miiⁿ chi cuuvi 'caaⁿnúⁿ ya 'yā.

Ntiiⁿnyuⁿ yeⁿ'ē ndiichúúví apóstoles

(Mr. 6.7-13; Lc. 9. 1-6)

⁵ Jesús dicho'ó yā ndu'u ndiichúúví apóstoles ní caⁿa yā chii yā 'iiⁿ'yāⁿ taacā chi canee chi díⁿ yā. Ní Jesús caⁿa yā: Nguεε caⁿ'á nī cuaaⁿ yúúní yeⁿ'é 'iiⁿ'yāⁿ chi nguée ndaata yeⁿ'ē Israel chi judíos. Nguée cundaa nī yāāⁿ vaacú 'iiⁿ'yāⁿ Samaritanos. ⁶ Naati ndís'tiī ní caⁿ'a nī nanááⁿ 'iiⁿ'yāⁿ Israel s'eeⁿ tí 'iiⁿ'yāⁿ s'eeⁿ tan'dúú^{cā} 'íí^{tí} cuuchi chi nín^{dái} tī na icyáⁿ'ā, 'tííca yā. ⁷ Ní taachi caⁿ'á nī 'túú^{cā} caaⁿ'maⁿ nī nduudu cuaacu ní caaⁿ'maⁿ nī yeⁿ'ē naachí Dendyuūs ngaⁿ'a ntiiⁿnyúⁿ yā na va'ai cheεti ngu- uvi chí 'āā ndaa niiⁿnuúⁿ. ⁸ Díⁿ nī chi nduū^{vā} yeⁿ'é 'iiⁿ'yāⁿ chi ngí^{ta}. Díⁿ nī chí nduuchi 'iiⁿ'yāⁿ chí n'díⁱ chí tináⁿ'ā. Díⁿ nī chí nduū^{vā} ní nduuví dεεve cuerpo yeⁿ'e 'iiⁿ'yāⁿ chí véé vaadī ya'ai chí nguuvi lepra chí in'duuti yuūtē yeⁿ'e yā. Ní díⁿ nī chí divíⁱ nī espí^{rítus} yeⁿ'ē yááⁿ'guinūⁿ chí snéé ndúú^{cū} 'iiⁿ'yāⁿ. Ndís'tiī ndaacá nī poder 'cū^ū yeⁿ'é Dendyuūs, ní nguée cuta'a nī tuumī cáá^{vā} chuū. Chuū chí díⁿ nī ndúú^{cū} 'iiⁿ'yāⁿ nguée cuuvi cún'di'i yeⁿ'é yā.

⁹ Nguée candée nī 'díⁿnguaaⁿ, ndíⁱ nguée ndúú 'díⁿnguεε, ndíⁱ nguée ndúú tuū^{mī} cheē^{yé} ra. ¹⁰ Nguée candée nī morral yeⁿ'e nī cuaaⁿ cyúú^{ní} chí cáⁿ'a nī. Ndíⁱ nguée ndúú 'uū^{vī} ra catecai nī candée nī. Ndíⁱ nguée ndúú canduu ndaā^{cú} yeⁿ'é nī, ndíⁱ nguée ndúú in'daacú^ú rá yeⁿ'e nī, ti 'iiⁿ'yāⁿ chí díⁿ ntiiⁿnyuⁿ, na ntiiⁿnyúⁿ chí díⁿ yā ní ndaā^{cā} chí ché'e yā ndúú^{cū} necesidades chí neⁿ'e yā.

11 'Āā tií nūuⁿ yáāⁿ n'gεεε ndúúcu yáāⁿ n'gaiyáá naachí cundáa nī tínguuneeⁿ nī du'ú 'iiⁿyāⁿ yeⁿ'ē yáāⁿ miiⁿ chí n'dai yā ní cunée nī na vaacú yā ndii n'dáá cá nī. 12 Taachí ndaá nī na vaacu 'iiⁿyāⁿ: Ndaí ndís'tiī, caaⁿ'máⁿ nī, tan'dúúcā costumbre yeⁿ'e nī. 13 Ndúúti chí 'iiⁿyāⁿ yeⁿ'é va'āī miiⁿ n'dai yā tuu'mi ní vaadī 'diiⁿ yeⁿ'e nī cunée ndúúcu yā. Nduuti chí nguéeⁿ n'dai yā o nguéeⁿ vaadī 'diiⁿ ndúúcu yā, nacan'dáa nī va'āī miiⁿ ndúúcū 'áámá nduudu n'dai. 14 Nduuti chí 'iiⁿyāⁿ s'eeⁿ nguéeⁿ 'cuaaⁿ yā ndís'tiī ndíí nguéeⁿ ndúú 'caandiveeⁿ ra yā nduudu yeⁿ'e nī nan'dáa nī va'ai miiⁿ o yeⁿ'e yáāⁿ miiⁿ ní n'dáádi nī iyaācáa yeⁿ'e ca'á nī ti nguéeⁿ n'giindiveeⁿ yā yeⁿ'é nī. 15 Cuaacu níⁿnyúⁿ cuaacu níⁿnyúⁿ ngaⁿ'á ngī ndís'tiī chí taachi ndaá nguuvi chí Ndyuūs n'diichí yā nuuⁿndi yeⁿ'e yáāⁿ, castigo yeⁿ'e 'iiⁿyāⁿ yeⁿ'e yáāⁿ 'cūū cunncaā ca chí cuuví castigo yeⁿ'e 'iiⁿyāⁿ yeⁿ'e yáāⁿ Sodoma ndúúcū yáāⁿ Gomorra chí yáāⁿ s'eeⁿ yeⁿ'é 'iiⁿyāⁿ chí nguéeⁿ díⁿ yā chí n'dai ndíí nguéeⁿ 'iiⁿyāⁿ yeⁿ'e ndaata Israel yā.

Ndáá nguuvi chí 'iiⁿyāⁿ din'gínu yā nduucú nī

16 Cun'diichí nī. 'Úú ní dicho'ó ndís'tiī tan'dúúcā chí ndís'tiī ní 'iiti cuūchī náávtaⁿ'ā yeⁿ'ē 'yáāⁿyāāⁿ n'gaātáā, 'tiicá nī. Canée chí díⁿ nī chí listo nī tan'dúúcā 'aama cúú. Ní canée chí din'daacá nī ní canée manso nī tan'dúúcā 'áámá paloma. 'Tíicā díⁿ nī. 17 Candée nī cuidado caati 'iiⁿyāⁿ s'eeⁿ ní nca'á yā ndís'tiī nanááⁿ 'iiⁿntyenⁿ'ē yeⁿ'e yaacū sinagoga. Ní cúuví 'cueⁿ'é yā ndís'tiī na yaacū sinagoga miiⁿ. 18 Ní 'iiⁿyāⁿ s'eeⁿ candée yā ndís'tiī nanááⁿ gobernadores ndúúcū nanááⁿ reyes cucáávā 'úú. Ní 'íicú ndís'tiī cuuví caaⁿ'máⁿ nī nduudu cuaacu

yeⁿē 'úú nanááⁿ 'iiⁿ'yāⁿ s'eeⁿ ndúú^cū 'iiⁿ'yāⁿ chi nguéé yeⁿe ndaata Israel. ¹⁹ Ní taachi 'iiⁿ'yāⁿ nca'a yā ndís'tiī nanááⁿ 'iiⁿ'yāⁿ s'eeⁿ, nguéé nadicádíínuuⁿ nī yeⁿe chi caaⁿ'máⁿ nī ti hora míⁿ nūuⁿ ní Ndyuūs té^e yā nduudu chí caaⁿ'máⁿ nī. ²⁰ Ti nguéé ndís'tiī chí caaⁿ'máⁿ nī naati Espíritu N'dai yeⁿ'é Ndyuūs Chiida yú. Espíritu miiⁿ caaⁿ'máⁿ yā cáávā ndís'tiī ti canée yā nduucú nī.

²¹ Nguaaⁿ 'díínū sa caⁿ'a sa caaⁿ'maⁿ sa contra yeⁿ'ē ví'ī chi canée chí 'cuūví sa. 'Tiicá ntúūⁿ chiidá yā caⁿ'a yā caaⁿ'maⁿ yā contra yeⁿ'ē daiya yā chi canée chí 'cuūví yā. 'Tiicá ntúūⁿ daiyá yā ní caⁿ'á yā diiⁿ yā ndúú^cū chiidá yā ti ndís'tiī candé^e nī nduudu yeⁿ'é. ²² Ní nducyáá^cá 'iiⁿ'yāⁿ nguéé cuuvi n'diichí yā ndís'tiī cucáávā 'úú ti cueⁿ'é nī nduucú. 'Iiⁿ'yāⁿ chi cuché^e yā tanducuéⁿ'ē chuū nducuéⁿ'ē nguuvi yeⁿ'é yā 'iiⁿ'yāⁿ miiⁿ chí nanguaⁿ'ai yā. ²³ Taachí 'iiⁿ'yāⁿ can'daá yā ndís'tiī chí neⁿ'e yā chi ndís'tiī 'cueenú nī cuuvi, na 'áámá yáāⁿ, tuu'mi ní caⁿ'ā nī cáánu nī ná taama yáāⁿ ti cuaacu níⁿnyúⁿ ngaⁿ'á ngíí ndís'tiī chí Saⁿ'ā chí Daiya Ndyuūs miiⁿ nndaa sá taama vmnéⁿ'ēe vmaaaⁿ chí ndís'tiī cuuvi caaⁿ'maⁿ nī nduudu cuaacu yeⁿ'é nuuⁿmaⁿ na yáⁿ'āa Israel.

²⁴ Mar 'áámá discípulo ní nguéé n'gεεε ca ntiiⁿnyuⁿ sá chi cuuvi maestro yeⁿ'ē sa, ndíí nguéé ndúú mar 'áámá mozo ní ng'εεε ca sa chí cuuvi 'iivi sa. ²⁵ N'dáacā chí discípulo miiⁿ diiⁿ sa tan'dúú^cā chí ídiiⁿ maestro yeⁿ'e sa ní mozo miiⁿ diiⁿ sa tan'dúú^cā chí diiⁿ 'iivi sa. Ndúúti chí 'iiⁿ'yāⁿ chí ngaⁿ'a ntiiⁿnyuⁿ yeⁿ'e va'ai chí nguuví Beelzebú chí yááⁿ'n'guiinūⁿ, tuu'mi ní tanáⁿ'ā 'iiⁿ'yāⁿ chí

nguéeé yeⁿe familia yeⁿe Beelzebú miiⁿ cunncáa caⁿ'a yā caaⁿ'máⁿ yā yeⁿe 'iiⁿ'yāⁿ yeⁿe Beelzebú.

Du'ū chí cuuvi 'va'ā yú

(Lc. 12.2-9)

²⁶ Tuu'mi ní ndís'tiī nguéeé 'va'á nī 'iiⁿ'yāⁿ ti nguéeé 'áámá chí canúúⁿ n'de'ei chí nguéeé cuuvi snaaⁿ yú, ndíí nguéeé ndúú canee 'áámá secreto chí 'iiⁿ'yāⁿ nguéeé cuuvi cadíínuuⁿ yā. ²⁷ 'Iicu chiiⁿ chí 'úú ngaⁿ'á ngíí ndís'tiī yeⁿe nduūdū n'de'ei chí nguéeé ituumicádíínuuⁿ 'iiⁿ'yāⁿ, ndís'tiī caaⁿ'maⁿ nī nduudu chí túúmícádiínuuⁿ 'iiⁿ'yāⁿ. Níícú dε'ε chí ngaⁿ'á ngíí ndís'tiī ní 'cuai nī ndii na yaacū yeⁿ'ē tiiⁿ va'āí ní túúmícádiínuuⁿ 'iiⁿ'yāⁿ nduudú 'cūū. ²⁸ Nguéeé 'va'á nī 'iiⁿ'yāⁿ chí 'caāⁿ'nūⁿ cuerpo yeⁿe nī ní nguéeé cuuvi 'caaⁿ'núⁿ yā alma yeⁿ'e nī. Dì'va'á ca nī Dendyuūs chí cuuvi 'caaⁿ'núⁿ yā alma yeⁿ'e nī ndúúcū cuerpo yeⁿ'e nī chí caⁿ'á nī na infierno.

²⁹ ¿'Áá nguéeé in'díícui yā na 'uūvī 'yaada cáávā 'aama tuūmī? Mar 'áámá 'yáádá s'één nguéeé 'cuuvá tī na yáⁿ'āa 'cūū núúⁿmáⁿ nen'e chí nguéeé déenu Ndyuūs Chiida yú. ³⁰ Níícú nducyaaca yuudu tííⁿ nī ní ndii dúúché ndúúcū Ndyuūs. ³¹ Nguéeé di'vá'a ndís'tiī caati ch'εεε cá nī chí cuuvi 'yaaⁿ n'dái 'yaada.

'Iiⁿ'yāⁿ chí ngaⁿ'á yā iintiiⁿ'naáⁿ yā Cristo nanááⁿ 'iiⁿ'yāⁿ

(Lc. 12.8-9)

³² 'Āā du'ú nūuⁿ chí ngaⁿ'a chí iintiiⁿ'naaⁿ 'úú nanááⁿ 'iiⁿ'yāⁿ, 'úú ntúūⁿ ní caāⁿ'máⁿ chí iintiiⁿ'naáⁿ 'iiⁿ'yāⁿ s'eeⁿ nanááⁿ Chiidá chí canée yā na va'ai chεeti nguuvi. ³³ 'Āā du'ú nūuⁿ chí caāⁿ'máⁿ chí nguéeé in'diichi 'úú nanááⁿ 'iiⁿ'yāⁿ, 'úú ntúūⁿ ní

caān'mán chi nguée in'diichí 'ii'yān s'een nanáán
chiidá chi canée yā na va'āi chεeti nguuví.

Cáāvā Jesús miiⁿ véé divisiones nguaaⁿ 'ii'yānⁿ
(Lc. 12.51-53; 14.26-27)

³⁴ Nguée nadicádínuuⁿ nī chi 'úú, Jesús, ndaá chi
ndéé vaadī 'diīiⁿ 'ii'yān na in'yeeⁿdí 'cūū. Nguée
ndaá chi ndéé vaadī 'diīiⁿ caati ndéé vaadī 'caa'va
ní tan'dúúcā chi candéé 'áámá machete chi 'caāiⁿ
nduu 'uuvī lados. ³⁵ Tí ndaá chí 'ii'yān ní nguée
cuuvi n'diichí yā chiidá yā, ní n'daataá nguée cuuvi
n'diichi tá chεecu tá, n'daataá nguée cuuvi n'diichi
ntūūⁿ tá indán'a tá. ³⁶ Caati 'áámá 'áámá yā ní
enemigos yā yeⁿe yā ví'i na vaacu yā.

³⁷ 'Ii'yān chí neⁿe cá yā chiidá yā o chεecu yā
nguée ti 'úú, nguée neene n'dai yā chi cuuvi yeⁿé
'ii'yān. 'Ii'yān chí neⁿe cá yā daiyá yā saⁿā o daiyá
yā n'daataá nguée ti 'úú, nguée neene n'dai yā chi
cuuvi yeⁿé 'ii'yān. ³⁸ Ní 'ii'yān chí nguée neⁿe yā
'cuenú yā cuuvi cucáāvā 'úú chi tan'dúúcā chi
cuta'á yā cruz yeⁿe yā ní caⁿ'a yā nduucú, nguée
neene n'dai yā chi cuuvi yeⁿé 'ii'yān. ³⁹ 'Ii'yān
chi neⁿe cá yā vida yeⁿe yā cáāvā cosas chi véé ná
in'yeeⁿdí 'cūū nguée ti 'úú, tuu'mi ní táámá vida ní
dindaí yā. 'Iicú 'ii'yān chí dindaí yā vida yeⁿe yā
na in'yeeⁿdí 'cūū cucáāvā 'úú, ti diīⁿ yā chi 'úú neⁿé
ní ndaacá yā táámá vida yeⁿé yā.

Yeⁿe chi ndaācā yeⁿé yú
(Mr. 9.41)

⁴⁰ 'Ii'yān chi 'cuaaⁿ yā ndís'tiī, 'cuaaⁿ yā 'úú.
'Ii'yān chi n'gúuⁿ yā 'úú, n'gúuⁿ yā 'ii'yān chi
dichó'o yā 'úú. ⁴¹ 'Ii'yān chi n'gúuⁿ yā 'áámá saⁿ'a
profeta caati profeta miiⁿ chíí yā lado yeⁿe Nduuūs

'iiⁿyāⁿ ní cuta'á yā premio chí ndaacā yeⁿē chi tunéén 'iiⁿyāⁿ chí profeta. 'Iiⁿyāⁿ chí n'gúuⁿ yā 'áámá 'iiⁿyāⁿ chí n'dai caati 'iiⁿyāⁿ miiⁿ ní n'dai yā, 'iiⁿyāⁿ ní cuta'á yā premio chí tunéén 'iiⁿyāⁿ chí n'dai. ⁴² 'Āā du'ú nūuⁿ 'iiⁿyāⁿ chí ca'a 'áámá vaso nuūⁿnīⁿ 'iiche 'áámá 'iiⁿyāⁿ caati i'téenu yā 'úú, cuaacu níⁿnyúⁿ ngaⁿ'á ngii ndís'tiī chí véé premio yeⁿe 'iiⁿyāⁿ miiⁿ chí cuuvi ndaacā yā yeⁿe yā.

11

*Juan chí chεēdínuūⁿnīⁿ sa dichó'o sa 'iiⁿyāⁿ nanááⁿ
Jesús*

(Lc. 7.18-35)

¹ Taachí Jesús ch'íínú chii yā ndu'u ndiichúví discípulos yeⁿe yā táácā chí canéé chí diíⁿ yā tuu'mi ní Jesús chiicá yā yáāⁿ miiⁿ ní cueⁿ'é yā na tanáⁿ'ā yáāⁿ s'eeⁿ chí ca'cueeⁿ yā ní caaⁿ'maⁿ yā nduudu cuaacu yeⁿ'é Ndyuūs.

² Juan chí chεēdínuūⁿnīⁿ sa 'iiⁿyāⁿ canúúⁿ sá vácūū. Ní taachí ch'iindiveeⁿ sá taacā idiiⁿ Jesús miiⁿ, tuu'mi ní dichó'o sa ná 'uuvi discípulos yeⁿe sa nanááⁿ Jesús.

³ Ní 'iiⁿyāⁿ s'eeⁿ ndáa yā ní ntiinguuneeⁿ yā Jesús miiⁿ: ¿'Áá n'diī chí Cristo chí canee chí ndaa o cunee ngíínú 'nū taama yā?

⁴ Jesús miiⁿ nán'guεεcútaⁿ'a yā yeⁿe 'iiⁿyāⁿ s'eeⁿ ní caⁿ'a yā: Ndís'tiī cúnaⁿ'a nī ní cuuvi nī Juan miiⁿ yeⁿ'é dendu'ū chí inaaⁿ nī ndúúcū chí n'giindiveeⁿ nī. ⁵ 'Iiⁿyāⁿ chí ngeeenááⁿ ní inaaⁿ yā, 'iiⁿyāⁿ chí nguéeⁿ ngii ngiicá ní ngiicá yā, 'iiⁿyāⁿ chí ndíí ca'ai lepra chí in'duuti yuūtē yeⁿe yā ní nduuva dεεvε yeⁿ'é yā, 'iiⁿyāⁿ chí chεεtúū ní

n'giindiveéⁿ yā, 'iiⁿyāⁿ chi n'díí ní nnduuchí yā yeⁿe nguaaⁿ tináⁿā, níícú 'iiⁿyāⁿ chi ndaachí snee yā ch'iindiveéⁿ yā nduudu cuaacu yeⁿé Ndyuūs chi nadanguáⁿai 'iiⁿyāⁿ ti 'iiⁿyāⁿ candεε yā nduudu cuaacu miiⁿ nanáaⁿ yā. ⁶ Δε'ε chúúcā n'dai 'iiⁿyāⁿ chi nguée cuncáā ch'εενú yā 'úú ndúúcū nduudu yeⁿé.

⁷ Taachi cuinaⁿa yā 'iiⁿyāⁿ s'een, Jesús tucá'a yā caⁿa yā chii yā 'iiⁿyāⁿ yeⁿe Juan chí chεεdínuūⁿnīⁿ miiⁿ: ¿Δε'ε cheⁿe ndís'tiī n'diichi nī na yáⁿāa cuūⁿmáⁿ naachi nguée ch'εεtinée 'iiⁿyāⁿ? ¿'Áá 'áámá ndúú chí n'giidī 'yúúné? ⁸ O ¿δε'ε tuu'mi cheⁿe nī n'diichí nī? ¿'Áá 'áámá saⁿā chi cánuuⁿ sa catecái n'dai sa? Cuin'diichí nī. 'Iiⁿyāⁿ chí snúuⁿ yā catecai n'dai yā snee yā ná va'ai yeⁿe rey. ⁹ Tuu'mi ní ¿δέ'ε cheⁿé nī n'diichi nī? ¿'Áá 'aama profeta chí ngaⁿa nduudu cuaacu yeⁿe Ndyuūs? 'Tíicā nduudu cuaacu. Ní 'úú ní ngaⁿá ngī ndís'tiī 'tíicā. Cheⁿé nī n'diichí nī 'áámá 'iiⁿyāⁿ chí ch'εεε ca yā chí cuuvi profeta. ¹⁰ Chuū cánée nguūⁿ yeⁿe Juan miiⁿ náⁿ libro yeⁿé Ndyuūs ndii cuááⁿ vmnaaⁿ:

Cuin'diichí nī. 'Úú ní dicho'ó 'áámá saⁿā chí caaⁿmaⁿ sa nduudu cuaacu yeⁿé nanáaⁿ di. Saⁿā miiⁿ ní nuūⁿ'nūⁿ cuaacú sa yúúni cáávā di.

¹¹ Cuaacu níⁿnyúⁿ ngaⁿá ngī ndís'tiī: Nguááⁿ nducyaaca 'iiⁿyāⁿ chí n'giindiyáaⁿ yā yeⁿe n'daataá nguée taama yā chí ch'εεε ca yā ti Juan miiⁿ chí chεεdínuūⁿnīⁿ sa. Naati 'iiⁿyāⁿ chí ndiicuúⁿ ca yā naachí Ndyuūs ngaⁿa ntiⁿnyuⁿ yā ní ch'εεε ca yā nguée ti Juan miiⁿ.

¹² Caati ndíí tiempo chí ch'iindiyaāⁿ Juan chí

chεεdínuūnīⁿ sa ndíí maaⁿ yeⁿ'e naachi Ndyuūs ngaⁿ'a ntiiⁿnyuⁿ yā ndúúcu 'iiⁿ'yāⁿ chi yeⁿ'é Ndyuūs ní n'geenu cá yā ngii. Ní 'iiⁿ'yāⁿ chi nguⁿ'u yā contra yeⁿ'e Ndyuūs neⁿ'e yā caaⁿ'maⁿ ntiiⁿnyúⁿ yā yeⁿ'e naachi Ndyuūs ngaⁿ'a ntiiⁿnyúⁿ yā. ¹³ Ní nducyaaca 'iiⁿ'yāⁿ profetas ndúúcu ley yeⁿ'e Moisés ngaⁿ'ā nduudu cuaacu yeⁿ'é naachi Ndyuūs ngaⁿ'a ntiiⁿnyuⁿ yā ndíí tiempo chi ndaā Juan miiⁿ ná iⁿ'yeeⁿdí 'cūū. ¹⁴ Ndúúti chi ndís'tiī neⁿ'e nī 'caandiveeⁿ nī nduudu yeⁿ'e profetas ndúúcu nduudu yeⁿ'e ley miiⁿ, tuu'mi ní cadíínuuⁿ nī chi Juan miiⁿ ní saⁿ'ā chí profeta Elías dinguuⁿ yā chi canéé chí ndaa sa. ¹⁵ Ndís'tiī chi véé veéⁿ nī 'caandiveeⁿ nī yeⁿ'é.

¹⁶ ¿De'é tan'dúúca 'iiⁿ'yāⁿ chi snéé yā na iⁿ'yeeⁿdí 'cūū maaⁿ? 'Iiⁿ'yāⁿ s'eeⁿ tan'dúúca saⁿ'ā n'gaiyāá chí n'gεεtεε nīiⁿ'vεε ní duūchi sa ní n'gai sa compañeros yeⁿ'e sa. ¹⁷ Ní ngaⁿ'a sa: 'Tiiví 'nū flauta cáávā baile naati nguéé inde'etí nī. Ní chita 'nū canción chí ndaachií tan'dúúca canciones cáávā tinán'ā naati nguéé chεεcu nī. ¹⁸ Juan chí chεεdínuūnīⁿ sa ndaā sa. Nguéé che'e sa pan, nguéé chí'i sa vino ní ndís'tiī ngaⁿ'á nī chí saⁿ'ā miiⁿ ní canee sa ndúúcu espíritu yeⁿ'e yááⁿ'nguiinūⁿ. ¹⁹ 'Úú ní ndaá, 'úú chí Saⁿ'ā chí Daiyá Ndyuūs 'úú. Ní nge'é ní ngi'í. Tuu'mi ní ndís'tiī ngaⁿ'a nī yeⁿ'é: Cuin'dííchí nī. 'Áamá saⁿ'ā chí n'deēe n'dái nge'e sa ní ngi'i taavi sá vino. Ní ngaⁿ'á nī chí 'úú ní saⁿ'ā chí n'dai ndúúcu 'iiⁿ'yāⁿ publicanos chí cobradores chí inn'guεε yā yeⁿ'e yáⁿ'āa ndúúcu 'iiⁿ'yāⁿ chí dinuuⁿndi yā. Nducyaaca 'iiⁿ'yāⁿ deenu yā chí vaadī deenu miiⁿ ní yeⁿ'é Ndyuūs. Ní

'iiⁿyāⁿ ch'iⁿ'í yā vaadī deenu miiⁿ cáávā dendu'ū
chi n'daācā chi díiⁿ yā ti yeⁿ'é Ndyuūs 'iiⁿyāⁿ.

*Dε'ε chúúcā ya'āī 'iiⁿyāⁿ yeⁿ'e yāāⁿ naachi nguéeé
indaacadaamí yā yeⁿ'ē nuuⁿndi yeⁿ'é yā*

(Lc. 10.13-15)

²⁰ Jesús tucá'a yā díiⁿ yā regañar 'iiⁿyāⁿ s'eeⁿ na
yāāⁿ s'eeⁿ naachi diiⁿ yā néené n'deēe vaadī n'giinu
ti 'iiⁿyāⁿ yeⁿ'e yāāⁿ miiⁿ 'āā cuéeé ndaacadaamí yā
yeⁿ'ē núuⁿndi yeⁿ'e yā. Ní ngaⁿ'a yā 'tíicā: ²¹ Dε'ē
chúúcā ya'āī yeⁿ'é ndís'tiī 'iiⁿyāⁿ yeⁿ'e yāāⁿ Corazín.
Dε'ē chúúcā ya'āī yeⁿ'ē ndís'tiī 'iiⁿyāⁿ yeⁿ'e yāāⁿ
Betsaida ti ndúúti chi chiī vaadī n'giinu na yāāⁿ
Tiro ndúúcū yāāⁿ Sidón tan'dúúcā chí chiī nguaaⁿ
ndís'tiī, tuu'mi ní 'iiⁿyāⁿ yeⁿ'e yáⁿ'āa s'eeⁿ 'āā 'naaⁿ
tiempo ndaacadaamí yā yeⁿ'e nuuⁿndi yeⁿ'é yā.
Ní ch'iⁿ'í yā 'iiⁿyāⁿ tan'dúúcā costumbre yeⁿ'é yā
chi neené ya'ai yā. Ní ch'εetinúuⁿ yā catecaí yā
yeⁿ'e chi díinūuⁿ ní ch'εeté yā nguaaⁿ yaiyāā. ²² 'Úú
ngaⁿ'á ngíi ndís'tiī ti nguuvi chí Ndyuūs caaⁿ'máⁿ
yā nuuⁿndi yeⁿ'é 'iiⁿyāⁿ nguéeé ya'āī ca 'cueenú
yā cuuvi 'iiⁿyāⁿ yeⁿ'ē yáⁿ'āa Tiro ndúúcū 'iiⁿyāⁿ
yeⁿ'e yáⁿ'āa Sidón nguéeé ti ndís'tiī. ²³ Ndís'tiī 'iiⁿyāⁿ
yeⁿ'e yāāⁿ Capernaum, ¿'áá cuuvi caⁿ'á nī na va'ai
chεeti nguuvi? Nguéeé cuuvi. Caⁿ'á nī infierno
ti nguéeé i'téenu nī nduudu cuaacu yeⁿ'é ndúúcū
vaadī n'giinu chi diiⁿ Ndyuūs. Ndúúti chi chiī
vaadī n'giinu na yāāⁿ Sodoma tan'dúúcā chí chiī
nguaaⁿ ndís'tiī tuu'mi ní 'iiⁿyāⁿ yeⁿ'e yāāⁿ 'cūū 'āā
i'téenu yā. Ní yāāⁿ 'cūū 'āā canéé ndíi maaⁿ. ²⁴ 'Úú
ngaⁿ'á ngíi ndís'tiī ti nguuvi chí Ndyuūs caaⁿ'máⁿ
yā nuuⁿndi yeⁿ'e 'iiⁿyāⁿ nguéeé ya'āī ca 'cueenú yā
cuuvi 'iiⁿyāⁿ yeⁿ'e yáⁿ'āa Sodoma nguéeé ti ndís'tiī.

*Cuchíí nī nanaaⁿ 'úú ní ntaavi'tuunúúⁿ nī
(Lc. 10.21-22)*

²⁵ Ní tiempo miiⁿ ní Jesús nan'guεεcútaⁿ a yā yeⁿ e yā ní caⁿ a yā: N'diī Chiidá chi 'iiví nī yeⁿ e va'ai chεεti nguuví ndúúcū yáⁿ āa 'cūū, 'úú ca'á gracias n'diī caati snuuⁿ n'dé'ei nī nduudu 'cūū yeⁿ e 'iiⁿ yāⁿ chi déénu ca yā ndúúcū 'iiⁿ yāⁿ chi n'dee n'dái tumicádíínuuⁿ yā, ní ca'a nī chí cadíínuuⁿ 'iiⁿ yāⁿ chi ndiicúuⁿ yā chi nguéé n'dee cá déénu yā. ²⁶ 'Tíicā diíⁿ nī Chiidá ti 'tíicā neⁿ e nī chi n'daācā diiⁿ nī ti n'daācā.

²⁷ Ní Jesús caⁿ a yā chii yā discípulos yeⁿ e yā: Chiidá ní teé yā 'úú tanducuéⁿ e dendu'ū. Mar 'áámá 'iiⁿ yāⁿ nguéé deenu yā táácā 'áámá n'dyáⁿ ā Daiya Dendyuūs, dámaāⁿ Chiidá yā. Mar 'áámá 'iiⁿ yāⁿ nguéé deenu yā táácā Dendyuūs Chiida yú, dámaāⁿ 'áámá n'dyáⁿ ā Daiyá yā ndúúcū 'āā du'ú nūuⁿ 'iiⁿ yāⁿ chi Daiyá Ndyuūs neⁿ é yā 'cuuⁿ miⁿ yā Chiida yā. ²⁸ Cuchíí nī nanáaⁿ 'úú, ndís'tiī, chí vée n'deē n'dái cuidado yēⁿ e nī chí tan'dúúcā 'áámá carga yeⁿ é nī ní 'úú ní diíⁿ chí ntaavi'tuunúúⁿ nī.

²⁹ Ní diíⁿ nī tan'dúúcā chí can'déε nī yugo yeⁿ é chí 'tíica. 'Cueeⁿ nī yeⁿ e 'úú caati 'úú ní ndiicúūⁿ 'úú ní nééné n'dai staava yeⁿ é, tuu'mi ní ndaācā nī vaadī ntaavi'tuunúuⁿ yeⁿ e alma yeⁿ e nī. ³⁰ Caati yugo yeⁿ é chí teé ndís'tiī nguéé ngiⁿ ti. Candéε nī chεεdí yeⁿ é ní nguéé cuuví n'gii yeⁿ e nī.

12

*Discípulos yeⁿ e Jesús sta'á yā trigo nguuví chí
ntaavi'tuunúúⁿ 'iiⁿ yāⁿ Israel
(Mr. 2.23-28; Lc. 6.1-5)*

¹ 'Áámá nguuvi sábadó chí ntaavi'tuunúún 'iiⁿ'yāⁿ Israel, Jesús cueⁿ'e yā ndúúcū discípu^los yeⁿ'e yā cuaaⁿ naachí 'iiⁿ'yāⁿ 'āā n̄dííⁿ ntiiⁿ'nyúⁿ yā ní mííⁿ ní véé trigo. Discípu^los yeⁿ'e Jesús miiⁿ chíi cuiicú yā ní sta'á yā trigo ní che'e yā. ² 'Iiⁿ'yāⁿ fariseos n'diichí yā chuū, ní caⁿ'a yā chíi yā Jesús miiⁿ: Cuin'diichí nī, discípu^los yeⁿ'e nī ní nguée dííⁿ yā tan'dúúcā chí ngaⁿ'a ley yeⁿ'e nguuvi chí ntaavi'tuunúún 'iiⁿ'yāⁿ.

³ Jesús caⁿ'a yā chíi yā 'iiⁿ'yāⁿ s'eeⁿ: ¿'Áá nguée n'geeⁿ nī táácā dííⁿ David miiⁿ ndúúcū 'iiⁿ'yāⁿ chí cueⁿ'e ndúúcu sa taachi chíi cuiicú yā? ⁴ David miiⁿ sndáa yā ná yáacū yeⁿ'e Ndyuūs ní sta'á yā pan chí canée na mesa yeⁿ'ē nátaí. Ní che'é yā ní ca'a yā chí che'e 'iiⁿ'yāⁿ chí nduucú yā. Pan miiⁿ dámaāⁿ chíiduú s'eeⁿ cuuvi che'é yā. Ní tan'dúúcā chí ngaⁿ'a na ley miiⁿ nguée canée chí che'e rey David ní nguée cánée chí che'é 'iiⁿ'yāⁿ chí ndúúcu yā. ⁵ ¿'Áá nguée n'geeⁿ ndís'tiī na ley yeⁿ'e Moisés chí dííⁿ chíiduú s'eeⁿ? Nguée ntaavi'tuunúún yā yeⁿ'e ntiiⁿ'nyuⁿ yeⁿ'e yaacū tínnūuⁿ nguuvi chí ntaavi'tuunúún 'iiⁿ'yāⁿ. Chíidu s'eeⁿ nguée dííⁿ yā tan'dúúcā chí ngaⁿ'a ley yeⁿ'e Moisés ní nguée nuuⁿndi yeⁿ'é yā. ⁶ 'Úú ngaⁿ'á ngī ndís'tiī chí véé 'áámá 'iiⁿ'yāⁿ chí ch'εεε ca yā chí yaacū templo ní canee yā ndúúcū ndís'tiī. ⁷ Ndís'tiī nguée déénu nī dε'ε chí neⁿ'e caaⁿ'maⁿ chí canée nguūⁿ na libro yeⁿ'é Ndyuūs yeⁿ'e chuū: Neⁿ'é chí 'iiⁿ'yāⁿ ya'āi 'iinú yā 'iiⁿ'yāⁿ caavā 'úú. Nguée neⁿ'é chí 'caaⁿ'nuⁿ yā 'iiti ní téé yā 'iiti caavā ofrenda yeⁿ'ē 'úú. Nduuti chí cadínnuuⁿ nī tuu'mi ní nguée dííⁿ nī condenar 'iiⁿ'yāⁿ chí nguée nuuⁿndi yeⁿ'e yā. ⁸ 'Tíicā Saⁿ'ā chí Daīyá Dendyuūs miiⁿ véé ntúūⁿ poder yeⁿ'e sa yeⁿ'e

nguuvi chí ntaavi'tuunúúⁿ 'iiⁿ'yāⁿ.

Saⁿ'ā chi ntí'i ta'ā sa
(Mr. 3.1-6; Lc. 6.6-11)

⁹ Cuayiivi ní Jesús cheⁿ'e yā na yáacū sinagoga yeⁿ'é 'iiⁿ'yāⁿ yeⁿ'e yaāⁿ miiⁿ. ¹⁰ Cuiⁿ'diichí nī. Miiⁿ ní canéé 'áámá saⁿ'ā chi ntí'i ta'ā sa. Snéé 'iiⁿ'yāⁿ miiⁿ chi tiinguunéeⁿ yā Jesús miiⁿ ní caⁿ'a yā: ¿'Áá canéé na ley yeⁿ'e yú chí nduuvā yeⁿ'é 'iiⁿ'yāⁿ nguuvi chí ntaavi'tuunúúⁿ 'iiⁿ'yāⁿ? Chuū ní caⁿ'a yā ti neⁿ'é yā cuuvi caaⁿ'maⁿ yā núúⁿndí yeⁿ'e Jesús miiⁿ.

¹¹ Jesús caⁿ'a yā chii yā 'iiⁿ'yāⁿ s'eeⁿ: ¿Dú'u 'aama saⁿ'ā nguaaⁿ ndís'tiī chí véé 'áámá 'iiti cuūchī yeⁿ'é sa? Ní ndúúti chí cun'daa nuúⁿ tī na 'áámá yi-ivi yáⁿ'āa nguuvi chí ntaavi'tuunúúⁿ 'iiⁿ'yāⁿ, ¿'áá nguéeⁿ ntuun'dáa sa 'iiti nguuvi miiⁿ? ¹² ¿'Áá nguéeⁿ yaⁿ'ai ca chíiⁿ'vē 'áámá 'iiⁿ'yāⁿ nguéeⁿ ti 'áámá 'iiti cuūchī? 'Tíicā diiⁿ yú chí n'daācā nguuvi chí ntaavi'tuunúúⁿ 'iiⁿ'yāⁿ.

¹³ Tuu'mi ní Jesús caⁿ'a yā chii yā saⁿ'ā chí ya'āi yeⁿ'é sa: N'doo dí ta'a di. Saⁿ'ā miiⁿ ní n'doō sá ta'ā sa ní ta'ā sa nduūvī n'dáácā tan'dúúcā taama. ¹⁴ 'Iiⁿ'yāⁿ fariseos nan'dáa yā chεeti yaācū ní ndu-uvidaamá yā chí caⁿ'a yā contra yeⁿ'e Jesús miiⁿ ti neⁿ'é yā 'caaⁿ'núⁿ yā 'iiⁿ'yāⁿ.

'Áámá nduudu chí caaⁿ'maⁿ yeⁿ'e Jesús

¹⁵ Taachí Jesús chicadínuuⁿ yā chuū nan'daa yā miiⁿ. Neené 'yaaⁿ 'iiⁿ'yāⁿ cueⁿ'e yā ndúúcū Jesús miiⁿ ní Jesús miiⁿ idiíⁿ yā chí nduūvā yeⁿ'e nducyáácá 'iiⁿ'yāⁿ. ¹⁶ Ní caⁿ'a yā chii yā 'iiⁿ'yāⁿ s'eeⁿ chí nguéeⁿ caaⁿ'maⁿ yā cuuví yā tanáⁿ'ā 'iiⁿ'yāⁿ du'u yā. ¹⁷ Ní 'iicu cuaacu chí profeta Isaías miiⁿ caⁿ'a yā

ndii cuáán vmnaaⁿ taachí dinguuⁿ yā 'tíicā. Ndyuūs ngaⁿ'a yā:

- 18 Sáⁿ'a 'cūū ni idichíí'vē 'úú. 'Úú chínnⁿdeēvⁿé saⁿ'á 'cūū chi neⁿ'é ní neene yeenú ndúúcu sa. 'Úú ní cu'neéⁿ Espíritu N'dai yeⁿ'é vmnáán yeⁿ'e sa. Saⁿ'á 'cūū caaⁿ'maⁿ sa yeⁿ'e ley yeⁿ'é nanáán nducyáácá naciones na in'yeeⁿdí 'cūū.
- 19 Nguéé 'cuuⁿ'maⁿ sa ndíí nguéé ndúú 'cuāi ra sa. Mar 'áámá 'iiⁿ'yāⁿ na yúúní nguéé 'caandi-veéⁿ yā nduudú yeⁿ'e sa ti nguéé caaⁿ'maⁿ yúúdu sa cuaaⁿ na yúúní.
- 20 Saⁿ'á 'cūū nginnee sa 'iiⁿ'yāⁿ chi véé ca cuida-dos yeⁿ'e yā, 'iiⁿ'yāⁿ chi tan'dúúicā 'áámá taaⁿ ndúú chí 'aa ndeētúú 'tεε 'téé, 'tiicá yā. Ndíí nguéé ndúú chí ntuūvi sa 'aama mecha yeⁿ'e quinque chí ican'dáā ca 'yaāⁿ'míⁿ yeⁿ'e. Ndíí nguéé candéε sa nduudu cuaacu yeⁿ'é Ndyuūs ndii taachi a fuerza 'āā cuéé de'ē vεε chi cuchεε sa ndúúicū vaadī cuaacu miiⁿ yeⁿ'e tanducucéⁿ'ē.
- 21 Ní 'íicú nducyáácá 'iiⁿ'yāⁿ yeⁿ'e naciones yeⁿ'e in'yeeⁿdí 'cūū cūnee ngíínú yā yeⁿ'e saⁿ'á 'cūū chí cu'téenu yā yeⁿ'e sa.

'Iiⁿ'yāⁿ ngaⁿ'á yā chi Jesús véé poder yeⁿ'e yáán'guiinūuⁿ ndúúcu yā

(Mr. 3.19-30; Lc. 11.14-23; 12.10)

22 Tuu'mi ní 'iiⁿ'yāⁿ ndaa yā nanáán Jesús ní ndéε yā 'áámá saⁿ'ā chí canee sa ndúúicū espíritu yeⁿ'e yáán'guiinūuⁿ yeⁿ'ē chí ngueenáaⁿ sa ndúúicū chí nguéé ngii ngaⁿ'a sa. Jesús miiⁿ dííⁿ yā chí nduūvā yeⁿ'ē sa. Ní saⁿ'ā chí ngueenáaⁿ miiⁿ ní inaaⁿ sa ní

ngú ngaⁿā sa. ²³ Nducyaaca 'iiⁿyāⁿ ngeⁿe yiinú yā ní ngaⁿa yā: ¿'Áá sán'a 'cūū Daiya 'iiⁿyāⁿ chí ndaataá yeⁿē David?

²⁴ Ní taachi 'iiⁿyāⁿ fariseos ch'iindiveéⁿ yā chuū ní caⁿa yā: Sáⁿ'a 'cūū nitun'dáa sa espíritu yeⁿe yááⁿn'guiinūⁿ cáávā Beelzebú, chí Satanás chí ngaⁿā ntiiⁿnyuⁿ sa yeⁿe espíritus yeⁿe yááⁿn'guiinūⁿ.

²⁵ Jesús miiⁿ déénu yā chi nadacadíinūⁿ 'iiⁿyāⁿ s'eeⁿ ní caⁿa yā chí yā 'iiⁿyāⁿ s'eeⁿ: 'Áámá go-bierno chí ngaⁿa ntiiⁿnyúⁿ yā yeⁿe yáⁿ'āa chí véé 'uūvī partido yā chí nguⁿu yā 'áámá yā ndúúcū taama yā, tuu'mi ní nguεε cuuvi 'naaⁿ chí 'iiⁿntyéⁿe yā. Ní nducuéⁿē yáⁿ'āa o va'ai naachi 'iiⁿyāⁿ véé 'uūvī vaanīcadíinūⁿ yeⁿe yā nguéé cuuvi nduuvidaamá yā. ²⁶ 'Tiicá ntúūⁿ nduuti chí yááⁿn'guiinūⁿ tun'dáa sa espíritus yeⁿe yááⁿn'guiinūⁿ véé 'uūvī vaanīcadíinūⁿ yeⁿē sa ní cuáácú chí nguⁿu sa yeⁿē maaⁿ sa ní véé 'uūvī partido yeⁿe sa ní 'cuiinu sa. ²⁷ Ndís'tiī ní ngaⁿa nī chí 'úú itun'daá espíritu yeⁿe yááⁿn'guiinūⁿ yeⁿe 'iiⁿyāⁿ ndúúcū poder yeⁿe Beelzebú chí Satanás chí ngaⁿa ntiiⁿnyuⁿ sa yeⁿe espíritus yeⁿe yááⁿn'guiinūⁿ. Ndúúti chí 'tíicā tuu'mi ní, ¿ndúúcū du'ū rá poder yeⁿē tun'daá 'iiⁿyāⁿ chí ndúúcu nī espíritu yeⁿe yááⁿn'guiinūⁿ? Chíⁿ chí diiⁿ 'iiⁿyāⁿ chí ndúúcu nī n'giⁿi yā chí nguéé 'tíicā chí ngaⁿá nī. ²⁸ Ndúúti chí 'úú itun'daá espíritus yeⁿe yááⁿn'guiinūⁿ cáávā poder yeⁿe Espíritu N'dai yeⁿe Dendyuūs, cuaacu níⁿnyúⁿ naachí Ndyuūs ngaⁿa ntiiⁿnyúⁿ yā ndaā nanááⁿ ndis'tiī.

29 Mar 'áámá 'iiⁿyāⁿ nguεε cuuví cundaa yā va'ai yeⁿe 'aama saⁿā chí vée fuerzas yeⁿe sa ní diví yā chí vεε yeⁿe sa. ¿Canée chí cachiichí yā saⁿa vmnááⁿ vmnaaⁿ? Cuayivi ní cuuví diíⁿ yā tun'dáa yā dendu'ū chí snúūⁿ va'ai yeⁿē sa.

30 'Iiⁿyāⁿ chí nguée canée yā lado yeⁿé, 'iiⁿyāⁿ miiⁿ canée yā contra yeⁿé. 'Iiⁿyāⁿ chí nguée dáámá diíⁿ yā cosechar nduucú, tuu'mi ní diíⁿ yā tan'dúúcā chí ingée tanducuéⁿē cosecha.

31 Chíⁿ chí nduudu cuaacu chí 'úú ngaⁿá ngí ndís'tiī: Tanducuéⁿē nuuⁿndi chí diíⁿ 'iiⁿyāⁿ ndúúcū nduudu taaⁿ chí nguée n'dáacā chí ngaⁿa yā contra yeⁿe Ndyuūs, Ndyuūs nadach'εεcú yā yeⁿe yā. Naati 'iiⁿyāⁿ chí ngaⁿa yā nduudu taaⁿ chí nguée n'dáacā chí contra yeⁿe Espíritu N'dai yeⁿe Ndyuūs ní nguée nch'εēcū yēⁿe yā maaⁿ ní tiempo chí cuchí. 32 'Āā du'ú nūuⁿ chí caaⁿmaⁿ nduudu chí nguée n'dáacā contra yeⁿe Saⁿā chí Daiyá Ndyuūs ní cuuvi nach'εεcu yeⁿe yā. Naati 'iiⁿyāⁿ chí nguée n'daācā ngaⁿa yā contra yeⁿe Espíritu N'dai yeⁿe Ndyuūs ní nguée cuuvi nach'εēcū yeⁿe yā ndí nguée ndúú na iⁿyeeⁿdí 'cūū ndí nguée ndúú táámá iⁿyeeⁿdi chí cuchí.

*'Áámá yáⁿá ní ngiⁿi cucáávā n'gui'i yeⁿē
(Lc. 6.43-45)*

33 'Tiicá ntūūⁿ caⁿa Jesús: Ndúúti chí vée 'áámá yáⁿá chí n'dáacā yeⁿé nī tuu'mi ní cuuvi n'gui'i n'dáacā yeⁿē. Níicú ndúutī chí vée 'áámá yáⁿá chí nguée n'daācā yeⁿé nī nguεε n'dáacā cuuvi n'gui'i yeⁿē. Cáávā n'gui'i yeⁿe yáⁿá ituumicadínuuⁿ yā táacā yáⁿá nduuti chí n'dai o nduuti chí nguée

n'dai. ³⁴ Ndís'tiī, tan'dúúcā ndaata ye^{n'}ē cúú 'ti-icá nī. ¿Táácā nga^{n'}a nī cosas chí n'daācā ní idiíⁿ nī chí nguεε n'daācā? Ti chíúⁿ chí nga^{n'}a nī ndúúcū cheendí nī ngiica na staava ye^{n'}é nī. ³⁵ Sa^{n'}ā chí n'dái idiíⁿ sa dendú'ū chí n'daācā chí nadacadíínuuⁿ sa na staava ye^{n'}e sa chí n'daācā. Sa^{n'}a chí cunnccāⁿ idiíⁿ sa tanducué^{n'}ē chí nguεε n'daācā nadacadíínuuⁿ sa caati staava ye^{n'}e sa nguéé n'dáacā. Nduudu chí nga^{n'}ā sa ngiica sa ye^{n'}é chí ndiituú na staava ye^{n'}e sa. ³⁶ Naati 'úú ní nga^{n'}á ngií ndís'tiī: Nducué^{n'}ē nduudu chí nguéé dε'ē vεε chíí'vē chí 'ii^{n'}yāⁿ nga^{n'}a yā, nducyááca yā ní cánéé chí nca'á yā cuenta ye^{n'}e nduudu chí nguεε n'daācā chí ca^{n'}a yā nguuví chí Ndyuūs caa^{n'}maⁿ yā ye^{n'}e nuuⁿndi ye^{n'}e yā. ³⁷ Ti cáávā nduudu ye^{n'}e nī chí n'daācā nduuví n'dai nī ní 'iicu cáávā nduudu ye^{n'}é nī nduuti chí nguéé n'dáacā cuuví nī castigo.

'Ii^{n'}yāⁿ chí nguéé n'daācā né^{n'}e yā snaaⁿ yā señales (Mr. 8.12; Lc. 11.29-32)

³⁸ Tuu'mi ní n'duuvi maestros ye^{n'}e ley ndúúcū n'duuvi sa^{n'}ā fariseos nga^{n'}a sá ngii sa Jesús miiⁿ ní ca^{n'}a sa: N'dií maestro, né^{n'}e 'nū snaaⁿ 'nū 'áámá señal chí diíⁿ nī.

³⁹ Jesús nán'guεεcúta^{n'}a yā ye^{n'}e sa^{n'}ā s'eeⁿ ní ca^{n'}a yā: 'Ii^{n'}yāⁿ cunnccāⁿ ndúúcū 'ii^{n'}yāⁿ chí nguéé i'téenu yā Ndyuūs ne^{n'}e yā snaaⁿ yā señal naati señal nguéé snaaⁿ yā. Dámaaⁿ snaaⁿ yā señal ye^{n'}e profeta Jonás chí ndíí cuaaⁿ vmnaaⁿ canee nguūⁿ na libro ye^{n'}e Ndyuūs. ⁴⁰ Ti tan'dúúcā Jonás canúúⁿ sá chεεti 'yaācā ch'εεte 'iīnū nguuví 'iīnū n'gaaⁿ 'tíicā canee chí cūnee Sa^{n'}ā chí Daiyá Ndyuūs mááⁿ yá^{n'}āa 'cúú 'iīnū nguuví 'iīnū n'gaaⁿ. ⁴¹ Na nguuví ye^{n'}e juicio 'ii^{n'}yāⁿ chí ch'εεtinée yā na yāāⁿ

chi nguuvi Nínive nducueéⁿ yā contra yeⁿ'e 'iiⁿ'yāⁿ chi snéé maaⁿnguuvu taachi Ndyuūs caaⁿ'máⁿ yā yeⁿ'ē nuuⁿndi yeⁿ'e 'iiⁿ'yāⁿ, ní cuuví yā condenado. 'Tíicā tí 'iiⁿ'yāⁿ yeⁿ'e yāāⁿ Nínive ní ndaacadaamí yā taachi profeta Jonás miiⁿ ndii cuááⁿ vmnaaⁿ caⁿ'a sá nduudu cuaacu yeⁿ'e Ndyuūs. Cuin'diichí nī 'áámá saⁿ'ā chi ch'εεε ca nguéé tí profeta Jonás miiⁿ canee sa 'muuⁿ na lugar 'cūū. ⁴² 'Tiicá ntúūⁿ nguuvu yeⁿ'e juicio n'daataá reina chí tiempo chi chó'ōo ngaⁿ'ā ntiiⁿnyuⁿ tá yeⁿ'e lado yeⁿ'e Sur caⁿ'a tá nducueeⁿ tá contra yeⁿ'e 'iiⁿ'yāⁿ chi snéé yā maaⁿnguuvu taachi Ndyuūs caāⁿ'máⁿ yā nuuⁿndi yeⁿ'é 'iiⁿ'yāⁿ. Ní táⁿ'ā miiⁿ ní diīⁿ tá condenar 'iiⁿ'yāⁿ chi snéé yā maaⁿnguuvu ti táⁿ'ā miiⁿ ndaā tá ndíí na yaⁿ'ai taaví yeⁿ'ē yáⁿ'āa. Ní ngiica tá ní ch'iindiveeⁿ tá yeⁿ'ē vaadī deenu yeⁿ'e rey Salomón. Cuin'díichí nī 'áámá saⁿ'ā chi ch'εεε ca vaadī deenu yeⁿ'e sa canee sa 'muuⁿ nguéé ti Salomón miiⁿ.

Espíritu yeⁿ'e yááⁿ'nguuiⁿūⁿ chí nanguεεcunéé na saⁿ'ā

(Lc. 11.24-26)

⁴³ Caⁿ'a Jesús: Taachi espíritu yeⁿ'e yááⁿ'nguuiⁿūⁿ nacan'daa na 'áámá saⁿ'ā cachiica na yáⁿ'āa cuūⁿmáⁿ naachi nguεεε ch'εεεtinéé 'iiⁿ'yāⁿ ní n'nuūⁿ naachi cuuvi ntaaviⁿ'tuunúⁿ ní nguéé ndaācā. ⁴⁴ Tuu'mi ní espíritu yeⁿ'e yááⁿ'nguuiⁿūⁿ ngaⁿ'a: Nanguεεcuneeé na vaacú naachi chiicá. Taachi nguεεcūnéé ní ndaā na vaacu miiⁿ ndaācā saⁿ'a miiⁿ ní tan'dúúⁿcā 'aama va'āī chí n'dai ní nduuvu dεεvé ndúúⁿcū nducuéⁿ'e na lugar yeⁿ'ē. ⁴⁵ Tuu'mi ní espíritu miiⁿ cuenⁿ'e ní in'nuuⁿ tá ná ndεēchē espíritus chí cunncāā ca chí cuuví maāⁿ. Ní ndaā espíritu miiⁿ ndúúⁿcū ndεēchē espíritus ní

ch'εεtinéé na saⁿā miiⁿ. Cuayiiivi ní n'geenu sa ngii taavi ca ní cunncāā ca canee sa nguéé ti vmnaaⁿ. 'Tiicá ntūūⁿ 'cueenú yā cuuvi 'iiⁿyāⁿ chi snée yā maaⁿ ti nguεε n'dáacā idiíⁿ yā.

*Chεεcú Jesús miiⁿ ndúúcu 'díinu yā
(Mr. 3.31-35; Lc. 8.19-21)*

⁴⁶ Taachí Jesús miiⁿ índeé yā ndúúcu 'iiⁿyāⁿ, tuu'mi ní ndaā niiⁿnuúⁿ chεεcú yā ndúúcu 'díinu yā ní snée yā chuva'āī. Ní neⁿe yā ndeé yā ndúúcu Jesús miiⁿ. ⁴⁷ 'Áamá 'iiⁿyāⁿ caⁿa yā chii yā Jesús miiⁿ: N'dií Jesús, cuin'diíchí nī. Chεεcú nī ndúúcu 'díinu nī snée yā chuva'āī ní neⁿe yā ndee yā ndúúcu nī.

⁴⁸ Jesús nan'guεεcútaⁿa yā ní caⁿa yā chii yā saⁿa miiⁿ: ¿Dú'ū chí chεεcú miiⁿ? o ¿dú'ū chí 'diinú miiⁿ?

⁴⁹ Ní n'doó yā ta'á yā naachi snée discípulos ní caⁿa yā: Cuin'diíchí nī, 'iiⁿyāⁿ s'ūuⁿ ní tan'dúúcā chí chεεcú ndúúcu 'diinú, 'tíica yā. ⁵⁰ Tí 'āā du'ú nūuⁿ 'iiⁿyāⁿ chí diíⁿ yā tan'dúúcā chí neⁿe Chiidá chí canée yā ná va'ai chεεti nguuvi tuu'mi ní 'iiⁿyāⁿ s'eeⁿ chí 'diinú ndúúcu ví'í ndúúcu chεεcú.

13

*'Áamá ejemplo yeⁿē sán'ā chi ngiīnū ndaata
(Mr. 4.1-9; Lc. 8.4-8)*

¹ Nguuvi miiⁿ Jesús can'dáa yā va'āī miiⁿ ní ch'iīndi yā niiⁿnuúⁿ ná nuūⁿnīⁿyáⁿā. ² Ní nééné n'deēe 'iiⁿyāⁿ ndúúvidaamá yā naachi canée Jesús. Tuu'mi ní Jesús ndaa yā na 'áamá barco ní ch'iīndi yā. Nducyáácá 'iiⁿyāⁿ snée yā 'diituu núuⁿnīⁿ naachi vεε yáⁿāa ndúútī. ³ Ní Jesús caⁿa yā nééné n'deēe nááⁿ ndúúcu parábolos chí ejemplos

tan'dúúcā dendu'ū chi véé iⁿ'yeeⁿdí 'cūū. Ní caⁿ'a yā chuū: 'Áámá saⁿ'ā chi ngiīnū ndaata can'dáa sa chiīnū sa ndaata. ⁴ Taachí chiīnū sa, 'áámá duutu ndaata míⁿ ní chiīya cyúúní. Ndaā 'yaadá ní ch'iinu che'e tī. ⁵ Náⁿ'ā duutu ndaata miiⁿ ní chiīya na tuūu naachi nguéé ch'εεε yáⁿ'āa. Maaⁿnchεεté nūuⁿ can'dāā ti nguéé ch'εεε yáⁿ'āa yeⁿ'ē. ⁶ Can'dāā 'yáⁿ'ā ní yaata miiⁿ ní ti'i ti nguéé dii'yu yeⁿ'ē. ⁷ 'Iicu náⁿ'ā duutu ndaata miiⁿ ní chiīya nguaaⁿ yááⁿ. Yááⁿ miiⁿ ní ch'iita ní di'vaāchí yeⁿ'ē yaata miiⁿ. ⁸ 'Iicu náⁿ'ā duutu ndaata miiⁿ ní chiīya na yáⁿ'āa n'dáacā ní n'dáacā chiī cosecha yeⁿ'ē. 'Áámá ní chiī 'áámá ciento yeⁿ'ē, taama ní chiī 'iīnū ngεεcyu yeⁿ'ē, ní táámá ní chiī ndíícú ndiichi yeⁿ'ē. ⁹ 'Iiⁿ'yāⁿ chi véé veéⁿ yā ní 'caandiveéⁿ yā nduudu yeⁿ'é.

Chíⁿ chí neⁿ'ē caāⁿ'māⁿ ejemplo miiⁿ

(Mr. 4.10-20; Lc. 8.9-15)

¹⁰ Tuuⁿ'mi ní discípulos ndaá yā nanááⁿ Jesús miiⁿ ní caⁿ'a yā chiī yā Jesús: ¿Dε'ε cáávā chi ndúúcū ejemplos ngi'cueeⁿ nī 'iiⁿ'yāⁿ?

¹¹ Jesús nan'guεεcútaⁿ'a yā ní caⁿ'a yā chiī yā discípulos yeⁿ'e yā: 'Āā ndís'tií nūuⁿ ndaācā chīcadíínuuⁿ nī dendu'ū chi canúúⁿ n'de'ei yeⁿ'e naachí Ndyuūs ngaⁿ'a ntiiⁿnyúⁿ yā ná va'ai chεeti nguuvi, naatí tanáⁿ'ā 'iiⁿ'yāⁿ s'eeⁿ nguéé canéé chí cadíínuuⁿ yā. ¹² 'Iiⁿ'yāⁿ chi véé yeⁿ'e yā Ndyuūs ca'a cá yā ní n'deēe cá cuuvi yeⁿ'e yā. 'Iiⁿ'yāⁿ chi nguéé véé yeⁿ'e yā, 'áará chí dúú'ví nūuⁿ chi nadacadíínuuⁿ yā chi véé yeⁿ'e yā chuū ní Ndyuūs ndivíi yā yeⁿ'e yā. ¹³ Cáávā chííⁿ chí ngaⁿ'á ngií 'iiⁿ'yāⁿ ndúúcū ejemplos caati inaaⁿ yā naati n'gεetinée yā tan'dúúcā chi nguéé inaaⁿ yā. Ní

n'giindiveéⁿ yā naati n'gεεtinee yā tan'dúúcā chi nguéé n'giindiveéⁿ yā ndíí nguéé ndúú tuumicadi-inuuⁿ yā. ¹⁴ Ní 'íícú cuuvi cuaacu yeⁿ'e 'iiⁿ'yāⁿ s'eeⁿ chííⁿ chi caⁿ'a profeta Isaías ndii cuááⁿ vmnaaⁿ taachi caⁿ'a yā 'túúcā ní canéé nguūⁿ na libro yeⁿ'e Ndyuūs:

Ndúúcū veéⁿ yā 'caandiveéⁿ yā ni nguεε tuumicadíínuuⁿ yā; ní snaaⁿ yā ní nguéé ca'a yā cuenta yeⁿ'ē.

¹⁵ Caati staava yeⁿ'e 'iiⁿ'yāⁿ s'eeⁿ ní chεεchi. Ndúúcū veéⁿ yā n'giindiveéⁿ yā naati nguéé tuumicadíínuuⁿ yā n'daācā. 'Iiⁿ'yāⁿ s'eeⁿ ní n'gaadí yā nduutinaaⁿ yā caati nguéé snaaⁿ yā ndúúcū nduutinaáⁿ yā; ní nguéé 'caandiveéⁿ yā ndúúcū veéⁿ yā, ndii nguεε ndúú ituumicadiinúúⁿ yā ndúúcū staava yeⁿ'é yā, ndii nguéé ndúú ndaacadaamí yā yeⁿ'ē nuuⁿndi yeⁿ'e yā chi 'úú cuuví nadich'εēcú nuuⁿndi yeⁿ'é yā.

¹⁶ Dεε chúúcā n'dai ndís'tiī ti véé nduutinaaⁿ nī chí inaaⁿ nī ní veéⁿ nī chí n'giindiveéⁿ nī. ¹⁷ Tí cuaacu nííⁿnyúⁿ 'úú Jesús ngaⁿ'á ngií ndís'tiī chí neené 'yaaⁿ 'iiⁿ'yāⁿ profetas ndúúcū 'iiⁿ'yāⁿ chí n'dai neⁿ'é yā snaaⁿ yā chííⁿ chí ndís'tiī inaaⁿ nī naati nguéé n'diichi yā. Neⁿ'e yā 'caandiveéⁿ yā chííⁿ chí ndís'tiī n'giindiveéⁿ nī naati nguéé ch'iindiveéⁿ yā.

¹⁸ 'Caandiveeⁿ ndís'tiī ejemplo yeⁿ'e saⁿ'ā chí ngiīnū ndaata. ¹⁹ 'Iiⁿ'yāⁿ chí n'giindiveéⁿ yā nduudu yeⁿ'e naachí Ndyuūs ngaⁿ'a ntiiⁿnyúⁿ yā yeⁿ'ē va'ai chεεti nguuvi ní nguéé ituumicadíínuuⁿ yā, 'iiⁿ'yāⁿ s'eeⁿ tan'dúúcā duutu ndaata chí chiiya cuaaⁿ cyúúní. Ndaa yááⁿn'guiinūⁿ ní sta'ā sa

nduudu ye^{n'}é Ndyuūs chi canéé na staava ye^{n'}é yā. ²⁰ Ndaata chí chiíya nguaaⁿ tuūu ní tan'dúúca 'ii^{n'}yāⁿ chí n'giindiveéⁿ yā nduudu ye^{n'}é Ndyuūs. Ní taachí n'giindiveéⁿ yā nduudu miiⁿ ní yeenú n'dai yā, ²¹ naati nguéé 'áamá cānee na staava ye^{n'}é yā ní nguéé 'nááⁿ tiempo cūnee. Taachí n'géenu yā ngii tí 'ii^{n'}yāⁿ cán'daa yā 'ii^{n'}yāⁿ s'eeⁿ cáavā nduudu ye^{n'}é Ndyuūs, tuu'mí nūuⁿ diví yā nduudu miiⁿ ní nguéé canéé na staava ye^{n'}é yā. ²² Ndaata chí chiíya nguaaⁿ yááⁿ ní tan'dúúca 'ii^{n'}yāⁿ chí ch'iindiveéⁿ yā nduudu miiⁿ naati ne^{n'}e cá yā nducuén'ē ye^{n'}ē i^{n'}yeeⁿdí 'cūū ndúúcu chí véé. Ní nginnche'éi yā 'ii^{n'}yāⁿ. Ní vaadī 'cuiica miiⁿ di'vaachíi ye^{n'}ē nduudu miiⁿ ní diiⁿ chí nguéé dichí'vē nduudu miiⁿ na vida ye^{n'}e 'ii^{n'}yāⁿ s'eeⁿ. ²³ Ndaata chí chiíya na yá^{n'}āa n'dáacāa chíiⁿ chí tan'dúúca 'ii^{n'}yāⁿ chí n'giindiveéⁿ yā nduudu ye^{n'}é Ndyuūs ní tuumicadiinúúⁿ yā ní i'téenu yā nduudu miiⁿ. Ní n'daācā idiíⁿ yā. Ní nduudu miiⁿ tan'dúúca chí chíi 'aama ciento ye^{n'}ē o chí chíi 'iīnū ngeεcu ye^{n'}ē o chí chíi ndiicú ndiichi ye^{n'}ē. 'Tíicā chíi cosecha ye^{n'}ē nduudu miiⁿ.

Ejemplo ye^{n'}é yaātā chí nguéé n'daācā chí véé nguaaⁿ trigo

²⁴ Jesús miiⁿ nga^{n'}a yā ngii yā 'ii^{n'}yāⁿ s'eeⁿ: Cuuví ndís'tiī táamá ejemplo. Ní caa^{n'}mán ye^{n'}e naachí Ndyuūs nga^{n'}a ntiīnyúⁿ yā ye^{n'}ē na va'ai cheeti nguuvi ní tan'dúúca 'áamá sa^{n'}ā chí ngiīnū sa ndaata ye^{n'}e trigo chí n'daācā na campo ye^{n'}ē sa. ²⁵ Taachí mozos cyaadu sa, tuu'mi ní sa^{n'}ā chí enemigo ye^{n'}ē sa ndaā sa ni chíiīnū sa 'daa^{n'}nuⁿ trigo na campo ye^{n'}e sa^{n'}ā miiⁿ nguaaⁿ trigo chí n'daācā

miiⁿ, ní cúnaⁿa sa. ²⁶ Taachí can'daa yaata yeⁿē ní chiī trigo, tuu'mi ní can'daā nguuvi 'daaⁿ'nuⁿ trigo miiⁿ. ²⁷ Tuu'mi ní mozos chi idiiⁿ sa ntiⁿnyuⁿ na campo miiⁿ ndaa sa nanááⁿ saⁿ'a chi 'iivi yeⁿe campo miiⁿ ní caⁿ'a sa chii sa 'iivi: N'dií Señor, ¿'áá nguéé chiinū ndaata yeⁿe trigo chi n'daācā na campo yeⁿe nī? ¿Tií chiicā ndaata 'daaⁿ'nuⁿ trigo? ²⁸ Saⁿ'ā 'iivi miiⁿ ní caⁿ'a sa chii sa mozos chi idiiⁿ ntiⁿnyuⁿ: 'Áamá saⁿ'ā enemigo yeⁿ'é niinū sa. Mozos ní caⁿ'a sa chii sa 'iivi sa: ¿'Áá neⁿe nī chi caⁿ'a 'nū ní tiicu 'nū yaātā miiⁿ chi nguéé n'daācā? ²⁹ 'Iivi miiⁿ ní caⁿ'a sa chii sa mozos chi idiiⁿ ntiⁿnyuⁿ: Nguéé tiicū di 'daaⁿ'nuⁿ trigo miiⁿ caati cuuví tiicú ntúuⁿ di trigo chí n'daācā miiⁿ. ³⁰ Ca'a di lugar chi dáámá 'cuiita ndíi taachi ndaa tiempo yeⁿe cosecha miiⁿ, tuu'mi ní 'úú caaⁿ'máⁿ cuūví 'iiⁿ'yāⁿ chi 'caacá yā trigo miiⁿ chi 'caacá yā vmnááⁿ vmnaaⁿ 'daaⁿ'nuⁿ trigo miiⁿ ní dichiihí yā caadī ticuaá ní 'neeⁿ yaⁿ'a yā. 'Cuiinu maaⁿ ní nandéε yā trigo miiⁿ ní 'cuíi yā chεeti díinūⁿ.

*'Áamá ejemplo yeⁿē ndaata yeⁿē yivē ntíi'yāa
(Mr. 4.30-32; Lc. 13.18-19)*

³¹ Táámá ejemplo Jesús caⁿ'a yā chii yā 'iiⁿ'yāⁿ s'eeⁿ: Naachí Ndyuūs ngaⁿ'a ntiⁿnyuⁿ yā na va'ai chεeti nguuvi ní tan'dúucā 'aama nduutií yeⁿe yivē ntíi'yāa chi 'áámá saⁿ'ā staⁿ'ā sa ní chiinū sa na yáⁿ'āa yeⁿē sa. ³² Ndaata yivē ntíi'yāa 'cūū ní 'liiⁿ ca nguéé ti tanducuéⁿ'ē ndaata. Taachí n'giita yaātā miiⁿ, tuu'mi ní ch'εεε ca chi cuuvi tanáⁿ'ā yaātā. Ní chiī yáⁿ'á. Ní ndaa 'yáádá yeⁿē nanguuvi ní din'dái tī 'dεεε tī na dúuⁿnē yáⁿ'á miiⁿ.

*Ejemplo yeⁿe levadura yeⁿe pan
(Lc. 13.20-21)*

³³ Táámá ejemplo Jesús caⁿ'a yā chii yā 'iiⁿ'yāⁿ s'eeⁿ: Naachí Ndyuūs ngaⁿ'a ntiiⁿ'nyúⁿ yā yeⁿ'ē na va'ai chεεti nguuvi ní tan'dúú^{cā} 'áámá tááⁿ levadura yeⁿe pan. 'Áámá n'daataá sta'a tá levadura miiⁿ ní chistaⁿ'ā tá nguaaⁿ 'iīnū medida yeⁿ'e harina ndíí chí nan'guiita tanducu^é'ē yaāchī yeⁿ'ē.

*Chuū chí ngaⁿ'ā Jesús miiⁿ ndúú^{cū} ejemplos
(Mr. 4.33-34)*

³⁴ Tanducu^é'ē chuū ngi'cueeⁿ Jesús ní caⁿ'a yā chii yā 'iiⁿ'yāⁿ s'eeⁿ ndúú^{cū} ejemplos. Ni nduuti chí ngu^éé ndúú^{cū} ejemplos yeⁿ'e chí véé iⁿ'yeeⁿdí 'cuū, ngu^éé ngi'cueeⁿ yā 'iiⁿ'yāⁿ s'eeⁿ. ³⁵ Ní 'iicu cuuvi cuaacu chí caⁿ'a profeta ndii cuááⁿ vmnaaⁿ taachí caⁿ'a yā 'túú^{cā}. Ní canéé nguūⁿ ná libro yeⁿ'é Ndyuūs 'túú^{cā}: Caaⁿ'máⁿ ndúú^{cū} ejemplos. Ca'cueéⁿ dendu'ū chí canúúⁿ n'de'ei ndíí taachi Ndyuūs din'dái yā iⁿ'yeeⁿdī.

Jesús ngaⁿ'a yā yeⁿ'e chí neⁿ'e caaⁿ'māⁿ ejemplo yeⁿ'e trigo

³⁶ Tuu'mi ní Jesús yaa'vi yā 'iiⁿ'yāⁿ s'eeⁿ chí cunaⁿ'á yā na vaacú yā. Jesús ntúūⁿ cunaⁿ'a yā ní sndaa yā 'áámá va'ai. Discípulos yeⁿ'e yā nndaa yā nanááⁿ Jesús, ní caⁿ'a yā chii yā 'iiⁿ'yāⁿ: N'dī, Jesús, ca'cuééⁿ nī chí neⁿ'e caāⁿ'maⁿ ejemplo yeⁿ'e 'daaⁿ'nuⁿ trigo chí véé nguaaⁿ trigo na campo.

³⁷ Jesús nan'guεεcútaⁿ'a yā ní caⁿ'a yā chii yā 'iiⁿ'yāⁿ s'eeⁿ: 'Iiⁿ'yāⁿ chí ngiīnu ndaata chí trigo chí n'dáacā, 'iiⁿ'yāⁿ miiⁿ chí Saⁿ'ā chí Daiya Ndyuūs.

38 Campo miiⁿ ní tan'dúúcā iⁿ'yeeⁿdí 'cūū. Ndaata chi n'dáacā miiⁿ ní tan'dúúcā nducyáácá 'iiⁿ'yāⁿ chi daiya Ndyuūs ní yeⁿ'ē naachi Ndyuūs ngaⁿ'a ntiiⁿnyúⁿ yā. Yaātā yeⁿ'e ndaata chi nguéé n'daācā ní tan'dúúcā 'iiⁿ'yāⁿ chi nguéé n'daācā idiíⁿ yā, 'iiⁿ'yāⁿ s'eeⁿ chi daiya yááⁿ'nguiinūⁿ. 39 Saⁿ'ā chi chiinū sa 'daaⁿ'nuⁿ trigo miiⁿ ní tan'dúúcā maāⁿ yááⁿ'nguiinūⁿ. Ní cosecha yeⁿ'ē miiⁿ ní tan'dúúcā chí 'cuiinu iⁿ'yeēⁿdī. Saⁿ'ā s'eeⁿ chi ita'a sa cosecha miiⁿ ní tan'dúúcā ángeles. 40 Tan'dúúcā chí tiícú yā 'daaⁿ'nuⁿ trigo ní nadidáámá yā ní 'neeⁿ yaⁿ'a yā, 'tíicā cuuvi tiempo taachi 'cuiinū iⁿ'yeeⁿdí 'cūū. 41 Saⁿ'ā chi Daiya Ndyuūs ní dichó'o yā ángeles yeⁿ'e yā chi nadidáámá yā 'iiⁿ'yāⁿ chí yeⁿ'ē naachi Ndyuūs ngaⁿ'a ntiiⁿnyúⁿ yā. Niicú tun'dáa yā nducyaaca 'iiⁿ'yāⁿ chi diíⁿ yā chi náⁿ'a yā idiíⁿ nuuⁿndí yā ndúúcū 'iiⁿ'yāⁿ chi idiíⁿ chi nguεε n'daācā. 42 Ní cu'nuúⁿ yā 'iiⁿ'yāⁿ na nguuchí yaⁿ'ā. Mííⁿ 'iiⁿ'yāⁿ s'eeⁿ ní cuεεcú yā ní che'e 'diiⁿ'yúⁿ yā. 43 Tuu'mi ní 'iiⁿ'yāⁿ chi n'dái nanááⁿ Ndyuūs cuuvi dεεvé yā ngii tan'dúúcā 'yáⁿ'ā taachi 'āā snée yā naachi Ndyuūs Chiidá yā ngaⁿ'a ntiiⁿnyúⁿ yā na va'ai cheeti nguuvi. Ndís'tiī chi véé veéⁿ ní 'caandiveéⁿ nī nduudu yeⁿ'é.

Ejemplo yeⁿ'e vaadī 'cuiica chi canúúⁿ n'de'ei

44 Caⁿ'a ca Jesús miiⁿ táámá ejemplo: Naachi Ndyuūs ngaⁿ'a ntiiⁿnyúⁿ yā yeⁿ'ē va'ai cheeti nguuvi ní tan'dúúcā vaadī 'cuiica chí canúúⁿ n'de'ei na 'áámá campo. 'Áámá saⁿ'ā ní ndaācā sa vaadī 'cuiica miiⁿ ní cunuⁿ n'dé'ei ntūūⁿ sa lugar miiⁿ. Yeenú taavi sa. Cunaⁿ'a sa ní n'diicui sa tandu-cuéⁿ'ē chí véé yeⁿ'ē sa ní cuái sa campo miiⁿ.

Ejemplo ye'n'ē 'áámá perla chi ya'n'ai taavi chí'vē

⁴⁵ 'Tiicá ntúūⁿ. Naachí Ndyuūs ngaⁿ'a ntiiⁿnyúⁿ yā na va'ai chεeti nguuvi ní tan'dúú^{cā} 'áámá saⁿ'ā chí n'diicui sa chí in'nuuⁿ sa perlas chí ya'n'ai taavi chí'vē. ⁴⁶ Taachí ndaācā sa 'áámá perla chí n'dεεvεé ní ya'n'ai taavi chí'vε, tuu'mi ní cuinaⁿ'ā sa ní n'diicui sa tanducuéⁿ'ē chí v'éé yeⁿ'ē sa ní^{cú} cuai sa perla miiⁿ.

Ye'n'e ejemplo ye'n'e yaānā

⁴⁷ 'Tiicá ntuūⁿ. Naachí Ndyuūs ngaⁿ'a ntiiⁿnyúⁿ yā na va'ai chεeti nguuvi ní tan'dúú^{cā} 'áámá yaānā chí saⁿ'ā n'gaa nuúⁿ sa na nuūⁿnīⁿ'yáⁿ'ā ní ita'āa nducuéⁿ'ē naaⁿ 'yaācā. ⁴⁸ Taachí 'aā ndiituú yaānā miiⁿ, intun'dáa yā cuaaⁿ 'diituú nuūⁿnīⁿ'yáⁿ'ā miiⁿ. Ní n'daaviyaí yā ní nan'guaáⁿ yā 'yáacā chí n'daācā. N'gii yā 'iiti 'cuéétεε. Ní 'iiti chí ngu'éé n'dáacā miiⁿ nginngée yā 'iiti. ⁴⁹ 'Tíicā cuuvi taachi 'cuiīnū iⁿ'yeeⁿdí 'cūū. Nandaā ángeles ní tun'dáa yā 'iiⁿ'yāⁿ chí n'dai yā nguaaⁿ 'iiⁿ'yāⁿ chí nguεε n'dáacā idiíⁿ yā. ⁵⁰ Ní 'cuíⁱ yā 'iiⁿ'yāⁿ chí ngu'éé n'daācā ná nguuchi yaⁿ'ā. Mííⁿ 'iiⁿ'yāⁿ s'eeⁿ cueⁿ'e daāⁿmaⁿ cuεεcú yā ní cueⁿ'e daāⁿmaⁿ ché'é 'diiⁿ'yuⁿ yā.

Ejemplo ye'n'ē vaadī 'cuíicá ngai ndúú^{cū} chí ndi-icūū

⁵¹ Jesús tiinguuneeⁿ yā 'iiⁿ'yāⁿ s'eeⁿ: ¿'Áá tuumicádíⁿnuuⁿ ndís'tiī tanducuéⁿ'e dendu'ū chí 'túú^{cā}? 'Iiⁿ'yāⁿ s'eeⁿ ní n'guεεcú^{tā}'a yā: 'Tíicā Señor.

⁵² Jesús ní caⁿ'a yā chii yā 'iiⁿ'yāⁿ s'eeⁿ: 'Áámá 'aama maestro yeⁿ'ē ley chí'neeⁿ yā yeⁿ'e naachi Ndyuūs ngaⁿ'a ntiiⁿnyúⁿ yā na va'ai chεeti nguuvi, maestro miiⁿ ní cuuví yā tan'dúú^{cā} 'áámá patrón

chi véé vaadī 'cuiica yeⁿ'e sa na va'ai yeⁿ'ē sa. Ní deenu sa táácā tun'dáa sa yeⁿ'e vaadī 'cuiica yeⁿ'ē sa dendu'ū cosa chi ngaī ndúúcū cosa chi ndiicúū.

Jesús canee yā na yáāⁿ Nazaret

(Mr. 6.1-6; Lc. 4.16-30)

⁵³ Taachí Jesús miiⁿ ch'íínú caⁿ'á yā nduudu 'cūū, cueⁿ'é yā yeⁿ'ē miiⁿya. ⁵⁴ Ní ndaá yā yáāⁿ vaacú yā chí nguuvi Nazaret ní ngi'cueeⁿ yā yaacū sinagoga miiⁿ. 'Iiⁿ'yāⁿ s'eeⁿ ní cheⁿ'e yiinú yā yeⁿ'e chí chi'cueeⁿ Jesús. Ní ngaⁿ'a yā: ¿Tíí ndiicaá vaadī déenu yeⁿ'ē saⁿ'á 'cūū? ¿Táácā cuuvi diiⁿ sa vaadī n'giinu chí idiiⁿ sa? ⁵⁵ Sáⁿ'a 'cūū chí daiya 'viichiyáⁿ'ā ní María nguūvī chεεcu sa. Ní 'dínū sa ní Jacobo, ndúúcū José, ndúúcū Simón, ndúúcū Judas. ⁵⁶ Ví'i ntúuⁿ sa snee yā ndúúcu yú. ¿Tíí ndiicaá tanducuéⁿ'ē vaadī deenú 'cūū chí ngi'cuééⁿ sa? ⁵⁷ Ní cáávā chuū 'iiⁿ'yāⁿ yeⁿ'e yáāⁿ miiⁿ cuncáā caⁿ'a yā yeⁿ'e Jesús miiⁿ, ní nguéé i'téenu yā yeⁿ'e yā. Naati Jesús ní caⁿ'a yā chíi yā 'iiⁿ'yāⁿ s'eeⁿ: Nguéé véé mar 'áámá profeta chí candεε nduudu yeⁿ'é Ndyuūs chí 'iiⁿ'yāⁿ yeⁿ'ē yáāⁿ vaacú yā ndúúcū 'iiⁿ'yāⁿ na vaacu yā dinéⁿ'e yā profeta miiⁿ.

⁵⁸ Jesús miiⁿ nguéé neené n'deēe vaadī n'giinu diiⁿ yā miiⁿ caati 'iiⁿ'yāⁿ s'eeⁿ nguéé s'téenu yā yeⁿ'e Jesús miiⁿ.

14

Ch'iiⁿ'núⁿ yā Juan chí ngεεdínuūⁿnīⁿ

(Mr. 6.14-29; Lc. 9.7-9)

¹ Tiempo 'cūū saⁿ'a rey Herodes, chí gobernador yeⁿ'e yáⁿ'āa Galilea, ch'iindiveeⁿ sá tan'dúúcā chí 'iiⁿ'yāⁿ ngaⁿ'a yā yeⁿ'e Jesús miiⁿ. ² Ní rey miiⁿ caⁿ'a

sa chii sa mozos yeⁿē sa: Sáⁿā Jesús 'cūū ní Juan chí γεεδίνουⁿñīⁿ chí nnduuchi sá yeⁿē nguaaⁿ tináⁿā. Ní cáávā chuū véé poder yeⁿē sa chí idiiⁿ sa vaadī n'giinu.

³ Rey Herodes miiⁿ ní 'iiⁿyāⁿ chí caⁿ'a ntiⁿnyúⁿ yā chí soldados sta'a sa Juan miiⁿ ní cāchiichí sa Juan ndúúcu cadenas ní chí'nuuⁿ sa Juan vácuū. 'Tíicā diíⁿ rey miiⁿ cucáávā n'daataá yeⁿe yā chí nguuvi Herodías ti vmnááⁿ vmnaaⁿ n'daataá miiⁿ ní n'daataá yeⁿē Felipe chí 'díinu rey miiⁿ. Ní divíi rey miiⁿ táⁿā miiⁿ yeⁿe Felipe. ⁴ 'Tíicā diíⁿ rey ndúúcu Juan chí γεεδίνουⁿñīⁿ ti Juan miiⁿ ngaⁿ'a sá ngii sa Herodes miiⁿ chí tan'dúúcā chí ngaⁿ'a na ley, nguéé canee chí cuuvi n'daataá yeⁿē yā n'daataá miiⁿ.

⁵ Rey Herodes miiⁿ ní neⁿ'e yā 'caanⁿ'nuⁿ yā Juan miiⁿ, naati 'va'á yā 'iiⁿyāⁿ yeⁿe yāāⁿ miiⁿ; ti 'iiⁿyāⁿ s'eeⁿ ní s'téenu yā chí Juan miiⁿ ní 'iiⁿyāⁿ profeta chí dichó'o Ndyuūs. ⁶ Taachí 'iiⁿyāⁿ diíⁿ yā 'viicu yeⁿē cumpleaños yeⁿe Herodes miiⁿ, n'daataá 'líiⁿ daiya táⁿā Herodías miiⁿ nde'ei tá naavtaⁿ'ā yeⁿe 'iiⁿyāⁿ s'eeⁿ. Ní rey Herodes miiⁿ ní chíi yeenu yā chí nde'ei tá ní caⁿ'a yā: ⁷ Dii, n'daataá 'líiⁿ. 'Úú ngaⁿ'á ndúúcu nduudu, “por Dios”, chí teé dii 'āā de'é nūuⁿ chí neⁿ'e di. ⁸ Chεεcu tá ni caⁿ'a yā chíi yā n'daataa 'líiⁿ miiⁿ de'ε chí caaca tá. Ní n'daata 'líiⁿ caⁿ'a ta chíi tá rey miiⁿ: N'dií rey, téé nī 'úú tiíⁿ Juan chí γεεδίνουⁿñīⁿ cu'nuúⁿ chεεtī 'áámá cu'u.

⁹ Tuu'mi ní rey Herodes miiⁿ s'neeⁿ ndaachii yiinú yā; naati rey miiⁿ caati 'āā caⁿ'a yā ndúúcu nduudu, “por Dios”, ní ch'iindiveéⁿ 'iiⁿyāⁿ chí snée yā ndúúcu yā na mesa miiⁿ, caⁿ'a yā chí 'āā ca'a núúⁿ yā chíiⁿ chí ngiica táⁿā miiⁿ. ¹⁰ Caⁿ'a ntiⁿnyúⁿ

yā chí 'caātā daandu Juan chi ngεεdinuūⁿnīⁿ chí canúuⁿ sa vácuū. ¹¹ Ní ndεε sa tiiⁿ yā miiⁿ sn'núúⁿ chεeti cu'u ní ca'a sa n'daata 'lííⁿ miiⁿ. Ní táⁿ'ā miiⁿ ní ca'a tá chεecu tá.

¹² Tuu'mi ní discípulos yeⁿe Juan chi ngεεdínuūⁿnīⁿ ndaá yā ní sta'á yā cuerpo yeⁿe Juan miiⁿ ní ch'iīchi yā. Ní cheⁿe yā chí yā Jesús miiⁿ tan'dúúcā chí chí.

Jesús ca'á yā che'e nyu'u mil 'ii'yāⁿ
(Mr. 6.30-44; Lc. 9.10-17; Jn. 6.1-14)

¹³ Taachí Jesús miiⁿ ch'iindiveéⁿ yā chuū, cueⁿé yā ní sndáa yā na 'áamá barco, ní cueⁿe yā na 'áamá lugar cuεeti naachi nguée 'ii'yāⁿ. Taachí 'ii'yāⁿ s'eeⁿ ch'iindiveéⁿ yā chuū, can'dáa yā yeⁿe yáāⁿ s'eeⁿ ní cueⁿe yā ndúúcū Jesús. ¹⁴ Ní taachí Jesús miiⁿ nan'dáa yā ná barco miiⁿ, n'diichí yā n'dee n'dái 'ii'yāⁿ, ní nnee ya'ai 'iinu yā 'ii'yāⁿ s'eeⁿ. Ní dííⁿ yā chí nduūvā yeⁿé 'ii'yāⁿ chí ngítā chí ndaā ndúúcū 'ii'yāⁿ chí candεε yā 'ii'yāⁿ s'eeⁿ. ¹⁵ Ní taachí 'āā chíinu discípulos yeⁿe Jesús miiⁿ ndaá yā nanáāⁿ Jesús ní caⁿ'a yā chí yā 'ii'yāⁿ: 'Āā chí chíínū maaⁿ, ní 'muuⁿ nguée n'gεetinée 'ii'yāⁿ. Yaa'ví nī 'ii'yāⁿ s'tí chí caⁿ'á yā cuáāⁿ na yáāⁿ n'gaiyāā ní cuái yā chí che'e yā.

¹⁶ Jesús caⁿ'a yā chí yā discípulos: 'Ii'yāⁿ s'tí nguée cánée chí náⁿ'a yā. Ndís'tí ca'a nī chí che'e yā.

¹⁷ Discípulos ní caⁿ'a yā: Nguée tunéeⁿ chí che'e yā. Dámāāⁿ nyuⁿ'u panes ndúúcū na 'uūvī 'yaācā véé.

¹⁸ Jesús caⁿ'a yā chí yā discípulos: Candée nī panes ndúúcū 'yaācā 'muuⁿ.

19 Cuayivi ní Jesús chii yā 'iiⁿ'yāⁿ s'eeⁿ chí ch'εεté yā ná yaātā miiⁿ. Jesús ní sta'á yā nduu nyúⁿ'ú panes miiⁿ ndúú^{cū} 'uūvī 'yaaca ní n'diichí yā nanguuvi ní ca'a yā gracias Ndyuūs Chiidá yā. Cuayivi ní n'deee yā panes ní ca'a yā discipulos yeⁿ'e yā. Discipulos miiⁿ ní ca'a yā 'iiⁿ'yāⁿ chí snéé miiⁿ. 20 Nducyááca yā che'e yā ní chiitu 'iiⁿ'yāⁿ. Ní discipulos nān'guaáⁿ yā chí nángaāva panes yeⁿ'e miiⁿ ndúú^{cū} 'yaācā miiⁿ ní chiitu tá ndiichúúvī 'cuεεtēε. 21 'Iiⁿ'yāⁿ chí che'e miiⁿ nyuⁿ'u mil ngii yā, ndii nguéé chiduūche n'daataá, ndíí nguéé ndúú da'caīyā ra.

*Jesús ngiicá yā cuááⁿ vmnaaⁿ nuūⁿnīⁿ'yáⁿ'ā
(Mr. 6.45-52; Jn. 6.16-21)*

22 Cuayivi ní Jesús caⁿ'a yā chii yā discipulos yeⁿ'e yā chí cundaa yā na barco ní caⁿ'á yā táámá 'díítuú nuūⁿnīⁿ'yáⁿ'ā, 'naaⁿ chí Jesús miiⁿ diíⁿ yā despedir yeⁿ'é 'iiⁿ'yāⁿ. 23 Jesús diíⁿ yā despedir yeⁿ'é 'iiⁿ'yāⁿ s'eeⁿ ní divíi yā yeⁿ'e yā ní cuchεε yā na 'áámá yiīcū ní caⁿ'angua'á yā. Taachí chiī 'da'a, 'āā dámaaⁿ Jesús canée yā miiⁿ. 24 Barco miiⁿ ní 'āā cánduūu naavtaⁿ'ā yeⁿ'ē nuūⁿnīⁿ'yáⁿ'ā miiⁿ naachi olas yeⁿ'e nuūⁿnīⁿ miiⁿ neⁿ'e 'cuuchii na yaānūuⁿ yeⁿ'e nuūⁿnīⁿ miiⁿ. 'Yúúné ní ngeēnū taaⁿ ní diitu n'dái n'geⁿ'e na barco miiⁿ. Ní barco miiⁿ nguéé ngii ngiicá. 25 Taachi 'da'a ca táámá nguuvi tan'dúú^{cā} n'gεεcu cuūuⁿ o n'gεεcu nyuⁿ'u, Jesús ndaá yā nanááⁿ discipulos ní ngiicá yā cuaaⁿ vmnaaⁿ nuūⁿnīⁿ'yáⁿ'ā miiⁿ. 26 Taachí discipulos ní n'diichí yā Jesús miiⁿ chí ngiicá yā cuaaⁿ vmnaaⁿ nuūⁿnīⁿ'yáⁿ'ā miiⁿ ní dii'yā yā chiī. Ní chistaⁿ'a

vaanicadiinūuⁿ ye^{n'}é yā. Ní 'cai yā: Chuū ní 'áámá bulto. Ní ca^{n'}á yā ndúúcū vaadī 'va'a.

²⁷ Cuayiivi miiⁿ ní Jesús yaa'ví yā discípulos ní ca^{n'}a yā: Ndís'tiī cúúví ditiinú nī caati 'úú. Nguéé di'va'á nī.

²⁸ Tuu'mi ní Pedro nán'guεεcúta^{n'}a sa ní ca^{n'}a sa: N'diī Señor, ndúúti chí n'diī caa^{n'}maⁿ ntiiⁿnyúⁿ nī chí ca^{n'}á naachi canee nī ní caacá cuaaⁿ vmnaaⁿ nuūⁿnī^{n'}yá^{n'}ā.

²⁹ Jesús miiⁿ ní ca^{n'}a yā chii yā: Pedro, cuchí di. Pedro miiⁿ ní nan'dáa sa na barco miiⁿ nī tucá'a sa ngiica sa cuaaⁿ vmnaaⁿ nuūⁿnī^{n'} miiⁿ. Ní cue^{n'}é sa naachi canéé Jesús miiⁿ. ³⁰ Taachí Pedro miiⁿ n'diichi sa 'yúúné taaⁿ miiⁿ di'vá'a sa ní 'āā tucá'ā chεεchi sa nguaaⁿ nuūⁿnī^{n'} miiⁿ. Tuu'mi ní 'cái yiicu sa ní ca^{n'}a sa: Señor, nadanguá^{n'}ai nī 'úú.

³¹ Hora mííⁿ nūuⁿ, Jesús miiⁿ n'doó yā ta'a yā ní sta'á yā ta'a Pedro ní ca^{n'}a yā chii yā Pedro: Dii sa^{n'}ā chí dúú'vī i'téénu di, ¿de'ε cúúví chí nadi'uúvī di staava ye^{n'}é di ní nguéé i'téénu di?

³² Ní taachí Jesús ndúúcū Pedro sndáa yā na barco miiⁿ, canee 'diiíⁿ 'yúúné mííⁿ. ³³ Tuu'mi ní discípulos chí snúuⁿ yā na barco miiⁿ ní ndaá yā nanááⁿ Jesús ní s'téénu yā 'iiⁿyāⁿ. Ní ca^{n'}a yā: N'diī Jesús, cuaacu nííⁿnyúⁿ chí Daiya Ndyuūs n'diī.

Jesús diíⁿ yā chí nduuvā ye^{n'}e 'iiⁿyāⁿ ye^{n'}e yá^{n'}āa Genesaret

(Mr. 6.53-56)

³⁴ Táachí ch'iinu cho'ó yā táámá lado ye^{n'}e nuūⁿnī^{n'}yá^{n'}ā miiⁿ ní ndaá yā na yá^{n'}āa Genesaret. ³⁵ 'Iiⁿyāⁿ s'eeⁿ ye^{n'}e yá^{n'}āa miiⁿ taachi tumicádíinuⁿ yā chí Jesús canéé yā miiⁿ, tuu'mi ní 'iiⁿyāⁿ s'eeⁿ ca^{n'}á yā ní chii yā 'iiⁿyāⁿ ye^{n'}e

núúⁿmáⁿ cuaaⁿ yáāⁿ n'gaiyáā chi snéé niiⁿnuúⁿ chi Jesús canée yā miiⁿ. Níícú 'iiⁿyāⁿ s'eeⁿ cándéε yā nducyaaca 'iiⁿyāⁿ chi ngúíta yā nanááⁿ Jesús miiⁿ.
 36 Ní 'iiⁿyāⁿ s'eeⁿ di'cuíítu yā Jesús miiⁿ chi 'cuáaⁿ yā chi 'iiⁿyāⁿ s'eeⁿ tuu'ví yā naachi n'déétií yeⁿ'ē catecaí yā. Ní nducyaaca 'iiⁿyāⁿ chí tuu'ví yā catecai Jesús miiⁿ ní nduūvā yeⁿ'e yā.

15

*Yeⁿ'e chi diiⁿ chí vεε nuuⁿndi yeⁿ'e 'iiⁿyāⁿ
 (Mr. 7.1-23)*

1 Tuu'mi ní duu'vi maestros chi ngi'cueeⁿ ley ndúúⁿcū 'iiⁿyāⁿ fariseos chi chiicá yā yáāⁿ Jerusalén ndaá yā nanááⁿ Jesús miiⁿ, ní caⁿ'a yā chiī yā 'iiⁿyāⁿ: 2 ¿De'ē cúúví chí discípulos yeⁿ'e nī nguéé diiⁿ yā tan'dúúⁿcā costumbre yeⁿ'ē 'iiⁿyāⁿ ndiicúū? ¿De'ē cúúví chí nguéé inaaⁿnu yā ta'á yā taachi 'āā cuéé che'e yā pan?

3 Jesús nan'guεεcútaⁿ'a yā ní caⁿ'a yā chiī yā 'iiⁿyāⁿ s'eeⁿ: ¿De'ē cúúví chí ndís'tiī ní nguéé diiⁿ nī tan'dúúⁿcā chi ngaⁿ'a ley yeⁿ'é Ndyuūs ní diiⁿ nī tan'dúúⁿcā costumbre yeⁿ'ē 'iiⁿyāⁿ ndiicúū? 4 Ti Ndyuūs ní ca'á yā ley yeⁿ'e yā ní caⁿ'a yā: Diiⁿ nī honrar chiidá nī ndúúⁿcū chεεcú nī. 'Iiⁿyāⁿ chi nguéé n'dáacā ngaⁿ'a yā yeⁿ'e chiidá yā o yeⁿ'ē chεεcú yā ní 'cuūvi yā. 5 Naati ndis'tiī ní ngaⁿ'a nī chi 'āā du'ú nūuⁿ 'iiⁿyāⁿ chí caaⁿ'máⁿ yā cuuvi yā chiidá yā ndúúⁿcū chεεcú yā 'tíicā: Nducuéⁿ'ē chi teé n'diī maaⁿ ní ca'á lado yeⁿ'é Ndyuūs caava ofrenda yeⁿ'e yā. 6 'Iiⁿyāⁿ 'āā ntéé idiīⁿ yā chi neⁿ'é yā chiida yā ndúúⁿcū chεεcú yā. 'Tíicā caavā costumbre yeⁿ'é nī diiⁿ nī chi 'āā ntéé idichí'vē ley

ye^{n'é} Ndyuūs ye^{n'e} yú. ⁷ Ndís'tiī 'uūvī naaⁿ 'uuvi cheendí nī. N'daācā ca^{n'a} profeta Isaías miiⁿ ye^{n'é} nī taachi ca^{n'a} sa ndíí vmnaaⁿ ní canéé nguūⁿ na libro ye^{n'e} Ndyuūs 'tííca:

⁸ 'Iiⁿ'yāⁿ s'uuⁿ ní i'téenu yā 'úú ndúúcu nduudu ye^{n'e} yā, naati staava ye^{n'é} yā ya^{n'ai} canee ye^{n'e} 'úú.

⁹ Nguéé dε'ε vεε dichíí'vē chi i'téenu yā 'úú, caati chi ngi'cueeⁿ yā ní ley ye^{n'e} sa^{n'ā} ye^{n'e} iⁿ'yee^{n'dí} 'cūū nguéé ye^{n'é} Ndyuūs.

¹⁰ Jesús n'gai yā n'deee n'dái 'iiⁿ'yāⁿ chí ndaa yā nanáaⁿ yā. Ní ca^{n'a} yā chii yā 'iiⁿ'yāⁿ s'eeⁿ: 'Caandivéeⁿ nī ní tuumicadíínuuⁿ nī. ¹¹ Nguéé tan-ducué^{n'e} chi nge'e sa^{n'ā} chí ndaā cheendi sa^{n'ā} idivaatí sa^{n'ā} naati nduudu chí ican'daā cheendi sa^{n'ā}, chííⁿ chí diiⁿ chí véé nuūⁿndí ye^{n'e} sa^{n'ā}.

¹² Tuu'mi ní discípulos ye^{n'e} Jesús ndaá yā nanáaⁿ yā ní ca^{n'a} yā chii yā Jesús miiⁿ: ¿'Áá nguéé déenu nī chí 'iiⁿ'yāⁿ fariseos taachí ch'iindiveéⁿ yā nduudú 'cūū nduuvi taáⁿ yā?

¹³ Naati Jesús miiⁿ nan'guεεcúta^{n'a} yā ní ca^{n'a} yā: Taanduvéé yaāta chi nguéé chiichi Chiidá chi canéé yā na va'ai cheeti nguuvi canee chí tiicūu ndii díí'yú. ¹⁴ 'Āā s'néén rá 'iiⁿ'yāⁿ s'eeⁿ chí tan'dúúcā 'iiⁿ'yāⁿ chí ngueenááⁿ chí candéε yā táámá 'iiⁿ'yāⁿ chí ngueenááⁿ ndúúcu yā. Nduuti chí 'áámá 'iiⁿ'yāⁿ chí ngueenááⁿ candéε yā táámá 'iiⁿ'yāⁿ chí ngueenááⁿ ndúúcu yā, nduu 'uuví yā cungéē nuūⁿ yā na yiivi yá^{n'ā}.

¹⁵ Tuu'mi ní Pedro miiⁿ ní nan'guεεcúta^{n'a} sa ní ca^{n'a} sa chii sa Jesús miiⁿ: Cúúví nī nús'uu dε'ε né^{n'é} caāⁿ'māⁿ ejemplo 'cūū.

16 Jesús caⁿ'a yā: ¿'Áá 'tiicá ntúūⁿ nguéé itu-
 umicadíínuuⁿ nī? 17 ¿'Áá nguéé ituumicadíínuuⁿ
 nī chí tanducuéⁿ'ē chí indaā cheendi saⁿ'ā ngeⁿ'e
 cheētī sa ní cungéē cuaaⁿ chuva'āī? 18 Naati
 nduudu chí ícan'daa cheendi sa chí níngiica na
 staava yeⁿ'ē sa, chuū idiīⁿ chí véé núúⁿndí yeⁿ'ē
 sáⁿ'ā. 19 Caati yeⁿ'e na staava yeⁿ'e 'iiⁿ'yāⁿ ngiicá
 dendú'ū chí nguéé n'dáacā chí inadicadíínuuⁿ yā.
 Chuū ní inadicadíinúúⁿ yā yeⁿ'ē chí 'caāⁿ'nuⁿ yā
 'iiⁿ'yāⁿ, ndúúcū yeⁿ'ē chí caⁿ'á yā ndúúcū isaⁿ'ā o
 n'daataá chí nguéé yeⁿ'e yā, ndúúcū chí n'diichí
 yā 'aama saⁿ'ā o n'daataá chí duuchí ví'ī, ndúúcū
 yeⁿ'ē chí ididuucú yā, ndúúcū yeⁿ'ē chí testigo yā
 ní caaⁿ'máⁿ yā nduudu yaadi, ndúúcū yeⁿ'ē chí
 caaⁿ'maⁿ taáⁿ yā contra yeⁿ'e Ndyuūs. 20 Dendú'u
 'cūú chí ídíīⁿ chí véé nuuⁿndi yeⁿ'ē sa naati chí
 che'e sa taachi nguéé naaⁿnú sa ta'a sa, chíiⁿ ní
 nguéé idinuuⁿndi sa.

*Yeⁿ'e 'áámá n'daataá chí nguéé yeⁿ'e ndaata Israel
 ní i'téenu tá Jesús*

(Mr. 7.24-30)

21 Jesús chíicá yā yeⁿ'ē yāāⁿ miiⁿ ní cueⁿ'e yā na
 yáⁿ'āa yeⁿ'e Tiro ndúúcū Sidón. 22 Cuin'díichí nī.
 'Áámá n'dáátāa yeⁿ'e yáⁿ'āa Canaán chí can'daā tá
 yeⁿ'e yāāⁿ vaacu tá. N'gai yiicu tá ní ngaⁿ'a tá ngii tá
 Jesús miiⁿ: N'díí Señor chí Daiya David, nnéé ya'ai
 'iinu nī 'úú. 'Áámá espíritu yeⁿ'e yááⁿ'n'guiinūuⁿ
 idindú'ū taaví táⁿ'ā daīyá.

23 Jesús nguéé nan'guéécútaⁿ'a yā yeⁿ'ē tá. Tuu'mi
 ní discípulos yeⁿ'ē Jesús miiⁿ ndaá yā nanáaⁿ yā ní
 di'cuítu yā Jesús ní caⁿ'a yā chíi yā 'iiⁿ'yāⁿ: N'dií

Jesús, dííⁿ nī despedir yeⁿē ta ti táⁿa 'cūū ní n'gaī tá cūchiitá cuaaⁿ daami yú.

²⁴ Jesús nan'guεεcútaⁿa yā ní caⁿa yā: Dendyuūs dicho'ó yā 'úú cucáávā 'iiⁿ'yāⁿ yeⁿe Israel chi tan'dúú^cā 'iiti cuūchī chí nindái, 'tiicá yā.

²⁵ Tuu'mi ní taⁿā miiⁿ ndaā ta nanááⁿ Jesús ní chiintiī'ya tá ní caⁿa tá chii tá 'iiⁿ'yāⁿ: N'díí Señor, cunneé nī 'úú.

²⁶ Jesús miiⁿ ní nan'guεεcútaⁿa yā yeⁿē tá ní caⁿa yā chii yā táⁿā: Nguéé n'daācā chí divií pan yeⁿē daiyá 'nū ní ca'á chí che'e 'yaānā.

²⁷ Táⁿā miiⁿ ní caⁿā ta: 'Tíicā Señor, naati 'yáanā miiⁿ ngé'e tī yeⁿē cheeyéé chí ngéé yeⁿē na mesa yeⁿē 'iiví tī.

²⁸ Tuu'mi ní Jesús miiⁿ nan'guεεcútaⁿa yā ní caⁿa yā chii yā táⁿā: Díí n'daataá, dé'ε chúú^cā ch'εεε vaadī i'téénú yeⁿē di. Cuuví ndúú^cu di tan'dúú^cā chí neⁿē di. Daiya tá miiⁿ ní hora mííⁿ nūuⁿ nduuva yeⁿē ta.

Jesús idiíⁿ yā chí nduūvā yeⁿe 'yaaⁿ n'dai 'iiⁿ'yāⁿ

²⁹ Jesús chiicá yā yeⁿē yáⁿāa miiⁿ ní ndaá yā 'di-ituú nuūⁿnīⁿ'yáⁿā Galilea. Cuayivi ní cuchéε yā ná yiicū miiⁿ ní ch'iīndi yā. ³⁰ Nééné 'yaaⁿ 'iiⁿ'yāⁿ ndaā niíⁿnuúⁿ yā nanááⁿ Jesús miiⁿ ní ndéε yā 'iiⁿ'yāⁿ chí ngaā yó'ōo, ndúú^cū 'iiⁿ'yāⁿ chí ngueenááⁿ, ndúú^cū 'iiⁿ'yāⁿ 'díi'mī, ndúú^cū 'iiⁿ'yāⁿ chí ló'ō ta'á yā o ca'a yā, ndúú^cū 'yaaⁿ n'dái 'iiⁿ'yāⁿ chí véé cá tanáⁿā ca'ai chí ndí yā. Ní s'neeⁿ yā 'iiⁿ'yāⁿ s'eeⁿ nanááⁿ Jesús miiⁿ. Ní Jesús dííⁿ yā chí nduūvā yeⁿe 'iiⁿ'yāⁿ s'eeⁿ. ³¹ Nducyáácá 'iiⁿ'yāⁿ chen'e yiinú yā taachí n'diichi yā chí 'iiⁿ'yāⁿ 'díi'mī ní ngíí ngaⁿa, ní 'iiⁿ'yāⁿ chí ló'ō ta'á yā o ca'a yā nduuva yeⁿe yā, ní

'iiⁿyāⁿ chi nguéé ngii ngiicá, ngiica yā; ní 'iiⁿyāⁿ ngueenááⁿ, inaaⁿ yā; ní tucá'a yā caⁿ'a yā: Dε'ε chúúca ch'εετε Ndyuūs yeⁿ'e 'iiⁿyāⁿ Israel.

Jesús ca'a yā chi che'e cuūuⁿ mil 'iiⁿyāⁿ
(Mr. 8.1-10)

³² Jesús 'caí yā discípulos yeⁿ'é yā ní caⁿ'a yā chii yā discípulos: Ya'ái cáávā 'iiⁿyāⁿ s'tíi ti 'āā 'iīnū nguuvī snée yā nduucú ní 'muuⁿ ní nguéé dε'ε vεε chi che'e yā. Nguéé neⁿ'é nadicho'ó 'iiⁿyāⁿ chi nguéé che'e yā. 'Áátīi cuuví cúunu yā cuaaⁿ cyúúni chi náⁿ'a yā.

³³ Tuu'mi ní discípulos yeⁿ'e yā caⁿ'a yā chíi yā Jesús: ¿Tíi cáⁿ'a 'nū nguai 'nū pan chi n'dee n'dái chi ché'é nducyaaca 'iis'tíi na lugar 'cūū naachi nguεε ch'εεtinéé 'iiⁿyāⁿ?

³⁴ Jesús caⁿ'a yā chíi yā discípulos: ¿'Áá 'yaaⁿ ca pan yeⁿ'é nī vεε? Discípulos caⁿ'a yā: Nδεēchē panes ndúúcū n'duuvī 'yaācā n'gaiyāā vεε.

³⁵ Jesús ca'a yā orden 'iiⁿyāⁿ s'eeⁿ chí 'cuεεté yā na yáⁿ'āa miiⁿ. ³⁶ Tuu'mi ní Jesús sta'á yā ndu'ū ndεēchē panes miiⁿ ndúúcū 'yaācā miiⁿ. Ní ca'a yā gracias Ndyuūs cáávā panes miiⁿ. Ní n'dee yā panes miiⁿ ní ca'a yā discípulos yeⁿ'e yā. Ní discípulos ní ca'a yā 'iiⁿyāⁿ chi snée miiⁿ. ³⁷ Nducyááca yā che'e yā ní chiitu 'iiⁿyāⁿ. Discípulos ní nān'guaáⁿ yā chí nángaāva ní chiitu tá ndεēchē 'cuéétεε. ³⁸ 'Iiⁿyāⁿ chí che'e yā miiⁿ ní taandu cuūuⁿ mil ngii sáⁿ'ā. Nguéé diduuche yā n'daataá ndíi nguéé ndúú da'caīyāa. ³⁹ Tuu'mi ní Jesús yaa'ví yā 'iiⁿyāⁿ s'eeⁿ chi cunaⁿ'á yā. Ní Jesús ndaá yā na barco miiⁿ ní cueⁿ'e yā na yáⁿ'āa yeⁿ'e Magdala.

16

Iiⁿyāⁿ s'eeⁿ ngiica yā vaadī n'giinu

(Mr. 8.11-13; Lc. 12.54-56)

¹ Iiⁿyāⁿ fariseos ndúúcū 'iiⁿyāⁿ saduceos ndaá yā nanááⁿ Jesús chí neⁿe n'diichíneeⁿ yā Jesús. Ní chiica yā Jesús 'áámá vaadī n'giinu yeⁿ'ē va'ai chεεti nguuvī.

² Naati Jesús nan'guεεcútaⁿa yā yeⁿ'é 'iiⁿyāⁿ s'eeⁿ ní caⁿa yā: Taachí ngii chíinū ní nanguuvi ní ndíí cuá'āa, ndís'tiī ní ngaⁿ'á nī chí n'dáacā diīⁿ tiempo. ³ Ní cuááⁿ ná nguεεtyaaⁿ taachí meēeⁿ ngúí cuá'áa, ndís'tiī ngaⁿ'a nī chí nguéé n'dáacā diīⁿ tiempo maaⁿ. Ndís'tiī 'uūvī naaⁿ 'uūvī cheendí nī chí déenu nī de'ē chí cúúví yeⁿ'ē nanguuvi naati nguéé tuumicadínuuⁿ nī de'ē chí cuuvi tiempo 'cūū ndúúcū señales chí inaaⁿ nī. ⁴ 'Iiⁿyāⁿ chí cuncnáa idiīⁿ yā ndúúcū 'iiⁿyāⁿ chí nguéé i'téenu yā Ndyuūs 'iiⁿyāⁿ miiⁿ néⁿe yā snaaⁿ yā 'áámá vaadī n'giinu naati señal miiⁿ nguéé ndaāca yā. Dámaāaⁿ cánéé señal yeⁿ'e profeta Jonás chí ndíí cuaaⁿ vmnaaⁿ chí canéé nguūⁿ na libro yeⁿ'e Ndyuūs. Jesús s'néⁿe yā 'iiⁿyāⁿ s'eeⁿ ní cueⁿ'e yā.

Levadura yeⁿ'e 'iiⁿyāⁿ fariseos

(Mr. 8.14-21)

⁵ Discípulos yeⁿ'e Jesús ndaá yā táámá lado yeⁿ'e nuūⁿnīⁿyáⁿ'ā ní chinaáⁿ yā chí cāndεε yā pan. ⁶ Jesús ca'a yā chii yā 'iiⁿyāⁿ s'eeⁿ: Cundéε ndís'tiī cuidado yeⁿ'e levadura yeⁿ'e 'iiⁿyāⁿ fariseos ndúúcū 'iiⁿyāⁿ saduceos ti levadura miiⁿ ní chiiⁿ chí chí'cueeⁿ yā.

⁷ Discípulos ní tuca'á yā caⁿ'a yā nguaaⁿ maaⁿ yā. ¿'Áa chí nguéé ndεε yú pan chiiⁿ chí 'tíicā ngaⁿ'a yā?

8 Jesús miiⁿ tuumicadínnuuⁿ yā yeⁿ'ē chí inadacádiinnūⁿ discípulos ní caⁿ'a yā chii yā discípulos: ¿De'ē cúúví chí inadacádiinnuuⁿ nī 'túúcā na staava yeⁿ'é nī chí cáávā chí nguéé ndεε nī pan? Ndís'tī ní dúú'vī i'téenu nī. 9 ¿'Áá nguéé ituumicadínnuuⁿ nī, ndii nguεε ndúú inan'gaacú nī yeⁿ'ē nyuⁿ'u panes chí che'e nyuⁿ'u mil saⁿ'ā? ní ¿'áá n'deēe 'cuéétēε ca panes nángaāva? 10 ¿'Áá ndí nguéé nduu inan'gaacú nī yeⁿ'ē ndεεchē panes chí che'ē cuūⁿ mil saⁿ'ā? ní ¿'áá n'deēe 'cuéétēε ca panes nángaāva? 11 ¿De'e cuuvi chí nguεε ituumicádiinnuuⁿ nī chí nguéé cáávā pan miiⁿ chí caⁿ'á chí cundεε nī cuidado yeⁿ'e levadura yeⁿ'e 'iiⁿ'yāⁿ fariseos ndúúcū 'iiⁿ'yāⁿ saduceos?

12 Tuu'mi ní discípulos tuumicadínnuuⁿ yā chí Jesús miiⁿ nguéé caⁿ'a yā chii yā chí discípulos nguéé cundεε yā cuidado yeⁿ'e levadura yeⁿ'e pan ti yeⁿ'e chí chí'cueen 'iiⁿ'yāⁿ fariseos ndúúcū 'iiⁿ'yāⁿ saduceos.

Pedro miiⁿ caⁿ'a sa nduudu cuaacu chí Jesús chí Cristo yā

(Mr. 8.27-30; Lc. 9.18-21)

13 Jesús ndaá yā yeⁿ'e yáⁿ'āa yeⁿ'e Cesarea yeⁿ'e yáⁿ'āa yeⁿ'e Filipo ní itiinguuneéⁿ yā discípulos yeⁿ'e yā ní caⁿ'a yā: ¿Du'ú 'úú ngaⁿ'a 'iiⁿ'yāⁿ yeⁿ'e 'úú chí Saⁿ'ā chí Daiya Dendyuūs 'úú?

14 Discípulos ní caⁿ'a yā: Náⁿ'a yā ní ngaⁿ'a yā chí díí chí Juan chí chεεdinuūⁿnī díí. Náⁿ'a yā ní ngaⁿ'a yā chí díí chí profeta Elías miiⁿ díí. Níícú náⁿ'a yā ní ngaⁿ'a yā chí díí profeta Jeremías o 'āā du'ú nūⁿ profeta.

15 Jesús caⁿ'a yā chii yā discípulos: ¿Du'ū 'úú ngaⁿ'a ndís'tiī?

16 Simón Pedro miiⁿ nan'guεεcútaⁿ'a sa ní caⁿ'a sa: N'diī ní Cristo chi Daiya Dendyuūs chi cánduuchī cueⁿ'e daāⁿmaⁿ.

17 Tuu'mi ní Jesús miiⁿ nan'guεεcútaⁿ'a yā yeⁿ'ē sa ní caⁿ'a yā: Dε'ē chúúcā n'dai dii Simón, daiya Jonás, ti 'úú nguée ch'iⁿ'í dii ndii nguεε nduu táámá 'iiⁿ'yāⁿ, naati Chiidá chi canée yā ná va'ai cheeti nguuvi ch'iⁿ'í yā dii. 18 'Úú ntúūⁿ ngaⁿ'á ngií dii chi dii ní nguuvi Pedro dii ní nguuvi di neⁿ'e caaⁿ'maⁿ tuūu. Ní vmnaaⁿ 'áámá tuūu ch'εεté 'cūū chí neⁿ'e caaⁿ'maⁿ Cristo, ní 'úú din'daí yaácū yeⁿ'é. Ní ndíí mar 'áámá poder yeⁿ'e yááⁿ'nguiinūuⁿ nguée cuuvi din'nú'u tuūu miiⁿ. 19 'Úú teé dii, Pedro, poder tan'dúúcā chi teé dii llaves yeⁿ'e va'ai cheeti nguuvi yeⁿ'e naachí Ndyuūs ngaⁿ'a ntiⁿ'nyúⁿ yā 'tíicā diíⁿ. Ní tanducuén'ē chi cachiichí di na iⁿ'yeeⁿdi 'cūū cuchiichi ntúūⁿ ná va'ai cheeti nguuvi. Ní tanducuén'ē chi n'gúuⁿ di na iⁿ'yeeⁿdí 'cūū 'cuaāⁿ ntúūⁿ ná va'ai cheeti nguuvi.

20 Tuu'mi ní Jesús ca'á yā chii yā discípulos yeⁿ'e yā chi nguée caaⁿ'maⁿ yā cuuvi yā mar 'áámá 'iiⁿ'yāⁿ chí Jesús miiⁿ chí Cristo yā.

Jesús caⁿ'a yā chí canee chi 'cuūvi yā

(Mr. 8.31-9.1; Lc. 9.22-27)

21 Tuu'mi ní Jesús miiⁿ tucá'a yā chi'cueeⁿ yā discípulos yeⁿ'e yā. 'Úú cánée chi caⁿ'á na yáāⁿ Jerusalén ní cánée chí 'cueenu taaví cuuvi nééné n'deēe dendu'ū yeⁿ'é 'iiⁿ'yāⁿ ndiicúū chi ngaⁿ'ā ntiⁿ'nyuⁿ yeⁿ'e yaácū miiⁿ, ndúúcū chiiduú n'gεεté, ndúúcū yeⁿ'e maestros yeⁿ'e ley. Cuayiivi ní 'iiⁿ'yāⁿ

s'eeⁿ 'caaⁿnúⁿ yā 'úú. Ní 'cuūví. Ndiichi ndii 'íínú nguuvi ní 'úú nduūchí yeⁿ'e nguaaⁿ tináⁿ'ā. 22 Tuu'mi ní Pedro miiⁿ ní cueⁿ'e sa ndúúcu Jesús 'áámá lado ní caⁿ'a sa chii sa Jesús: N'diī Señor, nguéeⁿ'cuáaⁿ nī Ndyuūs 'iivi yú ndii mar 'áámá naaⁿ chi cuuvi chuū ndúúcu nī.

23 Jesús nan'guεεcútaⁿ'a yā yeⁿ'e Pedro miiⁿ ní caⁿ'a yā chii yā saⁿ'ā: Divíi di nanaán, dii chi tan'dúúca yááⁿ'nguīnūⁿ. Dii ní nguéeⁿ nadicádíínuuⁿ di tan'dúúca Ndyuūs nadicádíínuuⁿ yā ti nadicádíínuuⁿ di yeⁿ'e dendú'ū yeⁿ'e iⁿ'yeeⁿdí 'cūū.

24 Tuu'mi ní Jesús caⁿ'a yā chii yā discípulos yeⁿ'e yā: Nduuti chi 'áámá 'iiⁿ'yāⁿ néⁿ'e yā caⁿ'á yā nduucú, canéeⁿ chi cu'neeⁿ maán yā tanducuéⁿ'ē dendu'ū chi véé yeⁿ'e yā ní cuta'á yā cruz yeⁿ'e yā chi tan'dúúca chi 'cueenu taaví yā cuuvi cucáávā 'úú. Ní 'íícú caⁿ'a yā nduucú. 25 Tí nducyáácá 'iiⁿ'yāⁿ chi neⁿ'e yā nadanguáⁿ'ai maán yā vida yeⁿ'e yā na iⁿ'yeeⁿdí 'cūū ní dindaí yā táámá vida yeⁿ'e yā nanááⁿ Ndyuūs. Ní nducyáácá 'iiⁿ'yāⁿ chi dindaí yā vida yeⁿ'e yā cucáávā 'úú ní nandaācá yā táámá vida yeⁿ'e yā nanááⁿ Ndyuūs. 26 ¿Dε'ε dichíí'vε yeⁿ'e saⁿ'ā ndúúti chi diiⁿ sa ganar nducuéⁿ'ē chi véé núúⁿmán iⁿ'yeeⁿdí 'cūū ní dindaí sa alma yeⁿ'e sa? ¿'Áá n'deēe cuuvi nadíí'vε sa 'áámá 'iiⁿ'yāⁿ cucáávā alma yeⁿ'e sa? 27 Naati 'úú chí Saⁿ'á chi Daiya Dendyuūs 'úú ní ndaá ndúúcu dεεve ch'εεti n'dai yeⁿ'e Chiidá chi canée yā na va'ai chεeti ngu- uvi. Ní ndaá ndúúcu ángeles yeⁿ'é. Tuu'mi ní 'úú diiⁿ chi nadíí'vε ca'áámá ca'áámá yā tuunu tuunu ca chi n̄diíⁿ yā. 28 Cuaacu níⁿ'nyúⁿ ngaⁿ'á ngií ndís'tiī chi véé náⁿ'a nī chi snée nī 'muuⁿ chi nguéeⁿ

'cuūvi nī taanduvéé ndíí snaaⁿ nī Saⁿ'a chi Daiya Dendyuūs ndaa sá chi caaⁿ'maⁿ ntiiⁿnyuⁿ sa yeⁿ'e tanducuéⁿ'ē.

17

*Jesús n̄'dáaⁿ yā cuerpo yeⁿ'e maaⁿ yā
(Mr. 9.2-13; Lc. 9.28-36)*

¹ Chó'ōo jaāⁿ nguuvi, ní Jesús candéε yā Pedro ndúúcu Jacobo ndúúcu Juan chi 'dínū Jacobo. Ní Jesús cueⁿ'é yā ndúúcu saⁿ'ā s'eeⁿ na 'áámá yiīcū yaacu. ² Ní Jesús n̄'dáaⁿ yā cuerpo yeⁿ'e maáⁿ yā nanááⁿ saⁿ'ā s'eeⁿ. Ní chín'gai naaⁿ yā tan'dúúca 'yáⁿ'ā 'iicu catecai yā ní nduuvi cuéε tan'dúúca δεενε. ³ Cuin'diichí nī. Tuu'mí nūuⁿ che'enaāaⁿ Moisés ndúúcu profeta Elías. 'Iiⁿ'yāⁿ s'eeⁿ chi n'díí ndíí cuaaⁿ vmnaaⁿ ní ndeé yā ndúúcu Jesús miiⁿ. ⁴ Tuu'mi ní Pedro caⁿ'a sá chii sa Jesús: Señor, de'ε chúúca n'dáaca yeⁿ'e yú chí 'cuεetinée yú 'muuⁿ. Ndúútī chí neⁿ'é nī din'dai 'nū ná 'iīnū va'ai n'gaiyāā, 'áámá ní yeⁿ'é n'diī, táámá ní yeⁿ'e Moisés, táámá ní yeⁿ'e profeta Elías.

⁵ Taachí Pedro ngaⁿ'a sá chuū, 'áámá meēⁿ cuéε chí ngii yáⁿ'āa ndii sn'díí 'iiⁿ'yāⁿ s'eeⁿ ní discípulos ch'iindiveéⁿ yā 'áámá nduudu ná meēⁿ miiⁿ chí ngaⁿ'ā: Sáⁿ'a 'cūū Daiyá chí neⁿ'e taaví ní yeenú cáávā sáⁿ'a 'cūū. 'Cu'neeⁿ veéⁿ nī yeⁿ'ē sa.

⁶ Taachí discípulos ch'iindiveéⁿ yā nduudu 'cūū candiitín'dii yā ní dii'yaa n'dái yā chiī. ⁷ Tuu'mi ní Jesús miiⁿ ndaa niiⁿnuúⁿ yā ní tuu'ví yā discípulos ní caⁿ'a yā: Nducueeⁿ nī. Nguéé 'va'a nī.

⁸ Taachí nducueeⁿ discípulos 'āā ntéé n'diichí yā du'ū veε caati 'āā dámaāaⁿ Jesús miiⁿ n'diichi yā.

⁹ Taachi nangua'á yā yeⁿ'e yiicū miiⁿ ní na yúúní naachí cunaⁿ'a yā, Jesús caⁿ'a yā chii yā 'iiⁿ'yāⁿ s'eeⁿ chi nguéeⁿ cuuvi yā mar 'áámá 'iiⁿ'yāⁿ yeⁿ'e chi n'diichí yā ndíí taachi Saⁿ'ā chi Daiya Ndyuūs nduuchí yā yeⁿ'e nguaaⁿ tináⁿ'ā.

¹⁰ Tuu'mi ní discípulos ntiinguunéeⁿ yā Jesús ní caⁿ'a yā: ¿De'ē cúúví chí ngaⁿ'a maestros yeⁿ'e ley chí canéeⁿ chí profeta Elías miiⁿ ndaa sa vmnaaⁿ?

¹¹ Jesús miiⁿ nán'guεεcútaⁿ'a yā ní caⁿ'a yā chii yā discípulos: Cuaacu níⁿ'nyúⁿ profeta Elías miiⁿ ndaá sá vmnááⁿ vmnaaⁿ ní 'cuundiyāaⁿ sa tanducuéⁿ'ē. ¹² Naati 'úú ní ngaⁿ'á ngii ndís'tiī chí profeta Elías miiⁿ ní 'āā ndaá yā. Ní 'iiⁿ'yāⁿ s'uuⁿ nguéeⁿ tuumicadínuuⁿ yā yeⁿ'e yā du'u chí Elías miiⁿ naati dííⁿ yā ndúúcū Elías miiⁿ tan'dúúcā chí neⁿ'e yā ní n'geenu sá ngii. "Tiicá ntúūⁿ Saⁿ'ā chí Daiyá Ndyuūs 'cueenu sá cuuvi yeⁿ'e 'iiⁿ'yāⁿ s'uuⁿ.

¹³ Tuu'mi ní discípulos tuumicadínuuⁿ yā chí Jesús ngaⁿ'a yā ngii yā discípulos yeⁿ'e Juan chí chεεdínuūⁿnīⁿ.

Jesús idiíⁿ yā chí nduūvā yeⁿ'e 'áámá saⁿ'ā 'dííⁿ chí ndii sa ataques

(Mr. 9.14-29; Lc. 9.37-43)

¹⁴ Taachí ndaá Jesús ndúúcū discípulos yeⁿ'e yā naachi snéeⁿ n'deee n'dái 'iiⁿ'yāⁿ, tuu'mi ní ndaā 'áámá saⁿ'ā nanááⁿ Jesús ní chiintii'ya sá ní caⁿ'a sá:

¹⁵ Señor, nnéeⁿ ya'ai 'iinú nī daiyá ti sta'a ataques daiyá ní neené n'geenu sá ngii. Nééné n'deee cuūvi in'dáa nuūⁿ sa na yaⁿ'ā ní 'āā neené n'deēe cuūvi chí in'dáa nuūⁿ sa nguaaⁿ nuūⁿnīⁿ. ¹⁶ Ní 'āā chí nguú saⁿ'ā nanááⁿ discípulos yeⁿ'e nī naati nguéeⁿ ngii dííⁿ yā chí nduūvā yeⁿ'e sa.

17 Jesús nan'guεεcútaⁿa yā ní caⁿa yā chii yā saⁿā: Ndís'tiī 'iiⁿyāⁿ chi nguεε i'téenu nī ndíi nguée ndúú idiīⁿ n'daacá nī. ¿'Áá 'naaⁿ tiempo cánée chi cuneé ndúúcu nī? ¿'Áá 'naaⁿ cuchée ndúúcu ndís'tiī? Candéε nī 'muuⁿ saⁿā 'díiⁿ.

18 Jesús miiⁿ yaa'vi neeⁿ yā espíritu yeⁿe yááⁿn'guiinūⁿ ní espíritu miiⁿ nan'dáa yeⁿe saⁿā 'díiⁿ miiⁿ ní tuu'mí nūⁿ ndúuvā yeⁿe sa.

19 Tuu'mi ní discípulos ní ndaa yā nanááⁿ Jesús na 'áámá lado naachi nguée snée 'iiⁿyāⁿ ní caⁿa yā chii yā Jesús: ¿De'ε cúuví chí nús'uū nguée chí tun'dáa 'nū espíritu yeⁿe yááⁿn'guiinūⁿ miīⁿ yeⁿe saⁿā 'díi?

20 Jesús miiⁿ ní caⁿa yā chii yā discípulos: Nguée ch'εετε vaadī i'téenu yeⁿe nī. Cuaacu níⁿnyúⁿ ngaⁿá ngiī ndís'tiī chi nduuti chi véé vaadī i'téenu yeⁿe nī ní tan'dúúcā 'áámá duuti yeⁿe yīivē ntíi'yaá chí 'líiⁿ ca cuuvi nī yīicū 'cúū: Yīicū, cuvī ndii 'muuⁿ ni cuén'é ndíi taama lugar. Ní yīicū ní caⁿā. Tanducuén'é cuuvi díiⁿ nī nduuti chí cuaacu chí i'téenu nī. 21 Naati tanducuén'é espíritu yeⁿe yááⁿn'guiinūⁿ chí 'túúcā nguée nan'daā yeⁿe 'iiⁿyāⁿ chí 'tiicá nūⁿ caati dámaāⁿ ndúúcu chí ngaⁿ'angua'a yā ndúúcu chí nguεε 'āā ca'diiⁿnúⁿ yā nguuvi chí ngaⁿ'angua'á yā.

*Jesús caⁿa ntuúⁿ yā táámá yeⁿe chí 'cuūvi yā
(Mr. 9.30-32; Lc. 9.43-45)*

22 Taachi 'iiⁿyāⁿ s'eeⁿ snée yā na yáⁿāa Galilea Jesús caⁿa yā chii yā discípulos yeⁿe yā: Saⁿā chí Daiya Ndyuūs ní 'iiⁿyāⁿ canée chí ca'a yā saⁿā na tá'ā 'iiⁿyāⁿ. 23 Ní 'iiⁿyāⁿ 'caaⁿnuⁿ yā saⁿā miiⁿ naati saⁿa miīⁿ ndii chíiⁿ ndii 'íínú nguuvi nduuchi sa

yeⁿe nguaaⁿ tináⁿā. Discípulos ní s'neeⁿ ndaachi yiinú yā.

Yeⁿ'ē chi nadí[']vε yā yeⁿ'ē yáacū templo

²⁴ Taachí ndaa Jesús ndúú^cū discípulos yeⁿ'e yā na yāāⁿ Capernaum, 'iiⁿ'yāⁿ s'eeⁿ chi indaaca tumī yeⁿ'e yaācū templo ní ndaá yā nanááⁿ Pedro miiⁿ. Ní caⁿ'a yā chii yā saⁿ'ā: ¿'Áá nguéé nadí[']vε maestro yeⁿ'é nī tuūmī chi cáávā yeⁿ'ē yaācū templo?

²⁵ Pedro miiⁿ ní caⁿ'ā sa chi 'tíicā va. Taachí sndaⁿ yā va'ai yeⁿ'e sa Jesús miiⁿ caⁿ'a yā ndúú^cū Pedro: ¿Táácā chi ngíi yeⁿ'e di, díi Simón Pedro? ¿Du'ú nadí[']vε impuestos yeⁿ'ē yáⁿ'āa nanááⁿ reyes yeⁿ'ē iⁿ'yeeⁿdí 'cūū? ¿'Áá daiya 'iiⁿ'yāⁿ yeⁿ'e yáⁿ'āa naachi rey ngaⁿ'a ntiiⁿnyúⁿ yā nadí[']vε sa o 'iiⁿ'yāⁿ chi cuchii táámá lado?

²⁶ Pedro miiⁿ nan'guεεcútaⁿ'a sa ní caⁿ'a sa chii sa Jesús: 'Iiⁿ'yāⁿ chi chiica táámá lado nadí[']vε yā. Jesús caⁿ'a yā chii yā Pedro: Daiya 'iiⁿ'yāⁿ yeⁿ'e yáⁿ'āa naachi rey ngaⁿ'a ntiiⁿnyúⁿ yā miiⁿ ní nguéé canéé chí nadí[']vε sa. ²⁷ Nguéé neⁿ'e yú chi nduuvu taaⁿ yā. Maaⁿ ní cuaeⁿ'e di ná nuūⁿnīⁿ'yáⁿ'ā ní caⁿ'nuuⁿ di 'áámá gancho yeⁿ'ē 'yaacā nguaaⁿ nuūⁿnīⁿ. 'Yaācā chí ndaācā di vmnááⁿ vmnaaⁿ cutá'a di ní nn'guaaⁿ di cheendí tī. Míiⁿ ní ndaāca di 'aama tuūmī. Ndúú^cū tuūmī miiⁿ ní caⁿ'a di cá'a di yeⁿ'ē 'úú ndúú^cū yeⁿ'e maaⁿ di chí nadí[']vε yú yeⁿ'e yaācū templo.

18

*¿Du'u 'iiⁿ'yāⁿ chi ch'εεε ca yā?
(Mr. 9.33-37; Lc. 9.46-48)*

1 Nguuvi míⁿ discípulos yeⁿe Jesús ndaá yā nanáⁿ yā ní caⁿ'a yā chíi yā Jesús: N'diī Jesús, ¿du'u cá chi ch'εεε cá naachi Ndyuūs ngaⁿ'a ntiiⁿnyuⁿ yā na va'ai chεeti nguuvi?

2 Jesús 'cai yā 'áámá saⁿ'ā líⁿ ní ch'ííndi yā saⁿ'ā líⁿ náávtaⁿ'a yeⁿe discípulos. 3 Ní caⁿ'a yā: Cuaacu níⁿnyúⁿ ngaⁿ'á ngíi ndís'tiī. Ndúúti chí ndís'tiī nguée díⁿ nī tan'dúú^{cā} 'áámá saⁿ'ā líⁿ nguée cuuvi ndaa nī naachí Ndyuūs ngaⁿ'a ntiiⁿnyúⁿ yā na va'ai chεeti nguuvi. 4 'Tíicā 'āā du'ú nūⁿ 'iiⁿ'yāⁿ chí ndi-icú^ū maán yā tan'dúú^{cā} saⁿ'a líⁿ 'cūū, 'iiⁿ'yāⁿ 'cūū chí ch'εεε ca yā naachí Ndyuūs ngaⁿ'a ntiiⁿnyúⁿ yā na va'ai chεeti nguuvi. 5 'Āā du'ú nūⁿ 'iiⁿ'yāⁿ chí 'cuaáⁿ yā 'áámá saⁿ'ā líⁿ ndúú^{cū} chí duuchí, tuu'mi ní 'cuaáⁿ yā 'úú.

*Dendu'ū chí idiīⁿ chí 'iiⁿ'yāⁿ dinuuⁿndi yā
(Mr. 9.42-48; Lc. 17.1-2)*

6 Ní caⁿ'a Jesús: 'Āā du'ú nūⁿ 'iiⁿ'yāⁿ chí díⁿ yā chí 'áámá chεε chí n'gaiyāā chí i'téénu yā 'úú dinuuⁿndí yā n'daācā ca cáāvā 'iiⁿ'yāⁿ miiⁿ chí 'iiⁿ'yāⁿ s'eeⁿ cāchiichí yā 'áámá tuūu yúú^{dú} chí íngúú 'iiⁿ'yāⁿ na daandú yā ní canuúⁿ yā 'iiⁿ'yāⁿ miiⁿ naachi yāanūⁿ yeⁿe nuūⁿnīⁿ'yáⁿ'ā ní 'iiⁿ'yāⁿ miiⁿ cun'dáá nuúⁿ yā. 7 De'ε chúú^{cā} ndaachí yeⁿe 'iiⁿ'yāⁿ yeⁿe iⁿ'yeeⁿdí 'cūū cáāvā dendu'ū chí 'túú^{cā} chí díⁿ chí cuuvá yā na nuuⁿndi. 'Āā véé nūⁿ cosas chí 'tíicā naati de'ε chúú^{cā} ndaachí yeⁿe 'iiⁿ'yāⁿ chí díⁿ yā chí táámá 'iiⁿ'yāⁿ cuuva yā na nuuⁿndi.

8 Ní nduuti chí ta'a di o ca'a di idiīⁿ chí dinuuⁿndí nī, 'caacá nī ta'a di o ca'a di ní diví di. N'dáacā ca chí ndaa di ló'ō ta'a di o ló'ō ca'a di na vida cueⁿe daāⁿmaⁿ ní nguée chí caⁿ'a di ndúú^{cū} 'uūvi ta'a di o

nduu 'uūvi ca'a di na infierno naachí nguuchi yaⁿā chí 'áámá cūnee. ⁹ Nduutí chí nduutináaⁿ di idiíⁿ chí idinuuⁿndí di, tun'dáa di ní divíi di. N'daācā ca chí cunee di ndúúcū 'áámá nduutináaⁿ di nguéé ti chí cunee di ndúúcū nduu 'uūvi nduutináaⁿ di ní caⁿ'a di ná nguuchi yaⁿā chí 'áámá cānee cueⁿ'e daāⁿmaⁿ.

'Áámá ejemplo yeⁿ'e 'iiti cuūchī chi nindái
(Lc. 15.3-7)

¹⁰ Ní caⁿ'a Jesús: Tandii ra diíⁿ nī ndúúcū mar 'áámá da'caiyāa n'gaiyāā ní diíⁿ nī chí cuuvi dinuuⁿndí nī. Nguéé cunncāā diíⁿ nī yeⁿ'ē ti 'úú ngaⁿ'á ngíi ndis'tiī chí ángeles yeⁿ'ē da'caīyāá snée yā ná va'ai cheeti nguuvi nanááⁿ Chiidá ní īnaaⁿ yā cucáāvā da'caīyāá. ¹¹ Ti Saⁿ'ā Daiyá Ndyuūs miiⁿ ní ndaa sa chí nadinguáⁿ'ai sa chííⁿ chí nindái.

¹² ¿De'ē inadicádiinuuⁿ ndís'tiī? Nduuti chí 'áámá saⁿ'ā véé 'áámá ciento 'iiti cuūchī yeⁿ'ē sa ní cuuvi ndái 'áámá tī ¿'áá nguéé cū'neeⁿ sa 'iiti chí cuūⁿ ngεεcú ndítiiⁿ'yuⁿ cuúⁿ tī ní caⁿ'a sa cuááⁿ yīcū miiⁿ ní cun'nuuⁿ sa 'áámá 'iiti chí nindái miiⁿ. ¹³ Ndúúti chí ndaācā sa 'iiti, cuaacu níⁿnyúⁿ ngaⁿ'á ngíi ndís'tiī ti yeenú taavi sa cáāvā 'iiti chí nindai nguéé ti ndu'ū chí cuūⁿ ngεεcú ndítiiⁿ'yuⁿ cuúⁿ tī chí nguéé chí nindái tī. ¹⁴ 'Tíicā Chiidá yú chí canée yā ná va'ai cheeti nguuvi nguéé neⁿ'e yā chí mar 'áámá chí n'gaiyāā s'ūuⁿ cuuvi ndái.

Tiⁿyāⁿ canee chi nadich'εεcú yā yeⁿ'ē vi'i
(Lc. 17.3)

¹⁵ 'Tiicá ntúūⁿ ngaⁿ'á ngíi ndís'tiī: Ndúúti chí 'díínū di diiⁿ sa chí nguéé n'daācā ndúúcu di, cueⁿ'e di ní ndee di ndúúcu sa nguaaⁿ maáⁿ nī yeⁿ'e chí

nguεε n'daācā chi diiⁿ sa. Nduuti chi cu'neeⁿ veeⁿ sa yeⁿ'e di, 'āā nan'dāā n'daí di ndúúcū 'dínū di. ¹⁶ Naati nduuti chi nguéeⁿ cu'neeⁿ veeⁿ sa yeⁿ'e di 'cuai di ná 'uūvi o 'iīnu 'iiⁿ'yāⁿ. Ní chíi yā na 'uūvi yā o na 'iīnu yā chi 'caandiveéⁿ yā tanducuéⁿ'ē chí caaⁿ'maⁿ dí ní véé testigos yeⁿ'é di tan'dúúcā chi canéeⁿ nguūⁿ na ley. ¹⁷ Ndúúti chi 'dínū di nguéeⁿ cu'nēēⁿ veeⁿ sa yeⁿ'é yā ndúúcu yeⁿ'e di cúúví dí 'iiⁿ'yāⁿ chí ngaⁿ'a ntiiⁿ'nyúⁿ yā yeⁿ'ē 'iiⁿ'yāⁿ chí i'téenu yā Ndyuūs. Ndúúti chí 'dínū di miiⁿ nguéeⁿ cu'nēēⁿ veeⁿ sa yeⁿ'é 'iiⁿ'yāⁿ chí ngaⁿ'a ntiiⁿ'nyúⁿ yā yeⁿ'e 'iiⁿ'yāⁿ chí i'téenu yā Ndyuūs, cu'neeⁿ dí 'dínū di tan'dúúcā 'áámá 'iiⁿ'yāⁿ ndiica yáⁿ'ái chí nguéeⁿ yeⁿ'ē ndaata yeⁿ'e di o tan'dúúcā chí 'aama saⁿ'ā chí inn'guεε sa yeⁿ'ē yáⁿ'āa.

¹⁸ Cuaacu níⁿ'nyúⁿ ngaⁿ'á ngíí ndís'tiī: Tanducuéⁿ'ē chí nguéeⁿ 'cuaaⁿ nī chí 'iiⁿ'yāⁿ dííⁿ yā na iⁿ'yeeⁿdí 'cūū Ndyuūs chí canéeⁿ ná va'ai chεeti nguuví nguéeⁿ 'cuaaⁿ ntuúⁿ yā. Tanducuéⁿ'ē chí 'cuáaⁿ nī chí 'iiⁿ'yāⁿ dííⁿ yā na iⁿ'yeeⁿdí 'cūū Ndyuūs chí canéeⁿ ná va'ai chεeti nguuví 'cuaaⁿ ntuúⁿ yā.

¹⁹ Taama vmnéⁿ'ēe ngaⁿ'á ngíí ndís'tiī: Nduuti chí ná 'uūvi ndís'tiī nduuvidaamá nī ná yáⁿ'āa 'cūū yeⁿ'e 'āā de'é nūuⁿ chí caacá nī yeⁿ'ē Chiidá chí canéeⁿ yā na va'ai chεeti nguuví, Chiidá téé yā ndís'tiī. ²⁰ Tiī naachí snéeⁿ 'uūvī o 'iīnu 'iiⁿ'yāⁿ chí nduuvidaama yā cucáávā chí duuchí, miiⁿ caneeⁿ nduucú yā.

²¹ Tuu'mi ní ndaā Pedro miiⁿ nanááⁿ Jesús ní caⁿ'a yā chíi yā 'iiⁿ'yāⁿ: N'dií Señor, ¿'áá n'deēe cuūví caneeⁿ chí nádich'εēcú yeⁿ'ē 'dīnū chí nguéeⁿ n'daācā idiiⁿ sa nduucú? ¿'Áá ndeēchē cuūví?

²² Jesús caⁿ'a yā chii yā Pedro: Nguéé ngaⁿ'á ngíí dii chí ndéēchē cuuvi tīī 'iīnū ngεεcu ndiichi veces chí ndéēchē ngaⁿ'á ngíí dii.

Ndúú 'uūví 'iī'yāⁿ chí sn'diicu yā

²³ Ní caⁿ'a Jesús: 'Tíicā naachí Ndyuūs ngaⁿ'a ntiiⁿnyúⁿ yā ná va'ai chεeti nguuvi ní tan'dúúicā 'áámá rey chí neⁿ'e yā tun'dáa yā cuenta ndúúicū mozos yeⁿ'é yā. ²⁴ Taachí neⁿ'e yā tuca'a yā tun'daa yā cuenta, candéε yā 'áámá mozo yeⁿ'é rey nanáaⁿ yā chí can'diicū sa n'dee n'dái mīl tuūmī. ²⁵ Mozo miiⁿ ní nguéé cuuvi diiⁿ sá nadíí'vē sa. Tuu'mi ní rey chí 'iiví sa caⁿ'a yā chii yā táámá mozo miiⁿ chí n'diicui sa mozo ndúúicū n'daatā yeⁿ'ē sa ndúúicū daiya sa ndúúicū tanducuéⁿ'ē chí véé yeⁿ'ē sa ní nadíí'vē mozo miiⁿ chí can'diicū sa yeⁿ'é yā. ²⁶ Tuu'mi ní mozo miiⁿ candiitin'dī sa nanááⁿ 'iivi sa ní di'cuítu sa 'iī'yāⁿ ní caⁿ'a sa chí sa 'iī'yāⁿ: N'dií Señor, cunee ngíínú nī 'áámá tiempo ní 'úú ní nadíí'vé tanducuéⁿ'ē yeⁿ'é nī. ²⁷ 'Iivi sa miiⁿ ní nneé ya'ai 'iīnu yā saⁿ'ā ní caⁿ'a yā chí yā saⁿ'ā: Cunaⁿ'ā di ní 'āā ntéé cun'diicū di yeⁿ'é. ²⁸ Sáⁿ'a 'cūū cuínaⁿ'a sa ní nan'daā sa ní ndaācā sa mozo chí daama idiiⁿ sa ntiiⁿnyuⁿ ndúúicū sa. Táámá mozo miiⁿ can'diicu ntúūⁿ sa 'aama ciento tuūmī yeⁿ'ē sa. Ní mozo miiⁿ chitaⁿ'ā sa daandu sáⁿ'ā miiⁿ ní tucá'a sa chí sa yaācū sa ní caⁿ'a sa: Nadíí'vē di chí can'diicu di. ²⁹ Tuu'mi ní mozo miiⁿ candiitín'dī sa nanáaⁿ sa ní caⁿ'a sa chí sa: Cunee ngíínú dí 'téé ní nadíí'vé yeⁿ'ē di. ³⁰ Naati saⁿ'ā miiⁿ nguéé 'cuūⁿ sa. Cheⁿ'e sa chíica sa nuūⁿndī yeⁿ'e mozo miiⁿ ndúúicū sa ní s'nuúⁿ yā mozo vácūū ndíí nadíí'vē sa chí cán'diicū sa. ³¹ Tanáⁿ'ā mozos ndúúicū sa n'diichi yā chí chí ní s'neeⁿ ndaachi yiínú yā. Ní cheⁿ'e yā nanááⁿ

'iivi yā ní caⁿ'a yā chii yā 'iiví yā tanducuéⁿ'ē chí chí. ³² Tuu'mi ní 'iiví mozos 'cai yā mozo 'cūū chí ndaa sa nanáaⁿ yā. Ní caⁿ'a yā chii yā mozo miiⁿ: Dii mozo, nguéé n'daācā di. Tanducuéⁿ'ē chí can'díicū di yeⁿ'é 'āā chíí dii chí 'āā ntéé nadí'vē di ti di'cuítu di 'úú. ³³ ¿'Áá nguéé nnee ya'āi 'iinu di mozo ndúú^cū di tan'dúú^cā chí 'úú nnee ya'ai 'iinú dii? ³⁴ Tuu'mi ní nduuvi taáⁿ 'iivi sa ní chiicá yā nuūⁿndí yeⁿ'ē sa. Ní cueⁿ'e sa vácūū chí ch'eⁿ'é yā saⁿ'ā ní miiⁿ canee sa ndii nadí'vē sa tanducuéⁿ'ē chí can'díicū sa yeⁿ'e yā.

³⁵ 'Tiicá ntūūⁿ Chiidá chí canéé na va'ai chεēti nguuvi 'tíicā díiⁿ yā ndúú^cū ndís'tiī nduuti chí ndís'tiī ní nguéé nadich'εεcú nī ndúú^cū nuuⁿmaⁿ staava yeⁿ'e nī yeⁿ'e 'áámá 'áámá 'díinu nī yeⁿ'e chí nguéé n'daācā ndiíⁿ yā ndúú^cū nī.

19

*Jesús ngi'cueⁿ yā yeⁿ'ē chí 'tεεchí vi'i 'iiⁿ'yāⁿ
(Mr. 10.1-12; Lc. 16.18)*

¹ Taachí Jesús ch'íinú caⁿ'a yā ndúú^dú 'cūū chí-icá yā na yáⁿ'āa Galilea ní cueⁿ'e yaⁿ'ai cá yā na yáⁿ'āa yeⁿ'e Judea chí táámá lado yeⁿ'e yíicú Jordán.

² Nééné 'yaaⁿ 'iiⁿ'yāⁿ cueⁿ'é yā n'daa yā Jesús miiⁿ ní Jesús díiⁿ yā chí nduū^vā yeⁿ'e 'iiⁿ'yāⁿ s'eeⁿ chí ngiitā.

³ Tuu'mi ní 'iiⁿ'yāⁿ fariseos ndaá yā nanááⁿ Jesús miiⁿ ti neⁿ'é yā chí n'diichíneeⁿ yā Jesús miiⁿ. Ní ngaⁿ'a yā ngiī yā 'iiⁿ'yāⁿ: N'diī Jesús, ¿'áá canéé ná ley chí saⁿ'ā ní cu'neeⁿ sa n'daataá yeⁿ'ē sa chí nguéé ch'εεte dε'ē chí ndiíⁿ tá?

⁴ Jesús miiⁿ nan'guεεcútaⁿ'a yā ní caⁿ'a yā chii yā 'iiⁿ'yāⁿ s'eeⁿ: ¿'Áá nguéé n'geeⁿ nī naachi canéé

nguūⁿ na libro yeⁿ'é Ndyuūs naachí ngaⁿ'ā chi Ndyuūs din'dái yā taanduvéé cosas ndíí cuááⁿ vmnaaⁿ ní din'dái yā saⁿ'ā ndúú^cū n'daataá? ⁵ Ní caⁿ'a yā: Chííⁿ chí saⁿ'ā cu'neeⁿ sá chiida sa ndúú^cū chεεcu sá ní ndūūvidaama sa ndúú^cū n'daataá yeⁿ'é sa ní nduu 'uuví yā ní nduūvī 'aama yā nduucū vi'ī. ⁶ Tuu'mi ní 'āā ntéé 'uuvī ngii yā tí 'āā 'aama núúⁿ yā. Chííⁿ chí Ndyuūs nádaama yā, 'iiⁿ'yāⁿ nguεε cánéé chí idiví yā.

⁷ 'Iiⁿ'yāⁿ fariseos caⁿ'a yā chii yā Jesús: ¿De'ε cáávā chi Moisés caⁿ'a ntiiⁿ'nyuⁿ sa chí ca'á yā carta chí i'tεεchi vi'i yā ní cu'neeⁿ yā n'daataá yeⁿ'e yā?

⁸ Jesús caⁿ'a yā chii yā 'iiⁿ'yāⁿ fariseos: Moisés miiⁿ ní 'cuūⁿ sa chi s'neeⁿ saⁿ'ā n'daataá yeⁿ'e sa cucáávā chi staava yeⁿ'e sa ní néénε chεεchi. Naati cuááⁿ vmnaaⁿ naachí chí nga'a, nguεε 'tíicā chí.

⁹ 'Úú ní ngaⁿ'á ngii ndís'tiī chí 'āā du'ú nūuⁿ saⁿ'ā chí cu'neeⁿ sa n'daataá yeⁿ'é sa ndúú^ti chí nguéé cáávā chí cueⁿ'e tá ndúú^cū taama saⁿ'ā ní saⁿ'ā miiⁿ cunee sa ndúú^cū taama tá, véé nuūⁿ'ndi yeⁿ'é sa. Sáⁿ'ā chí 'caandavaacu sa ndúú^cū n'daataá chí s'neeⁿ tá isaⁿ'ā yeⁿ'é tá, véé ntúūⁿ nuuⁿ'ndi yeⁿ'é sa chí adulterio.

¹⁰ Tuu'mi discípulos yeⁿ'e Jesús ní caⁿ'a yā chii yā Jesús: Ndúú^ti chí saⁿ'ā miiⁿ cú'neeⁿ sa n'daataá yeⁿ'é sa tuu'mi ní n'daācā ca chí nguéé 'caandavaacu sa.

¹¹ Tuu'mi ní Jesús miiⁿ caⁿ'a yā chii yā discípulos: Nguéé nducyaaca 'iiⁿ'yāⁿ cuuvi deenu yā chuū naati 'āā dámaāⁿ 'iiⁿ'yāⁿ chí Ndyuūs nca'a yā chuū.

¹² Véé 'yaaⁿ razones chí nguéé 'caandavaacu saⁿ'ā. Véé saⁿ'a chí ndii taachi n'giindiyáaⁿ sa yeⁿ'é chεεcu sa 'āā nguéé cuuvi 'caandavaacu sa. Ní véé ntúūⁿ

saⁿā eunucos chi 'iiⁿyāⁿ idiⁿ yā chi nguéé cuuvi 'caandavaacu sa. Véé ntúūⁿ saⁿā chi maaⁿ sa nguéé neⁿe sa 'caandavaacu sa cáávā chi diiⁿ sa ntiiⁿnyuⁿ yeⁿe naachí Ndyuūs ngaⁿ'a ntiiⁿnyúⁿ yā. Nduuti chi 'iiⁿyāⁿ cuuvi ca'cueeⁿ yā nduudú 'cūū tuu'mi ní 'āā deenú yā.

Jesús idi'viicú yā dá'caiyāa
(Mr. 10.13-16; Lc. 18.15-17)

¹³ Tuu'mi ní ndaa 'iiⁿyāⁿ chi ndεε yā da'cáiyāa nanááⁿ Jesús. Ní 'íicú Jesús miiⁿ cun'du'ú yā ta'a yā vmnááⁿ yeⁿ'ē da'caiyāa s'eeⁿ ní caⁿ'angua'á yā yeⁿ'ē dá'caiyāa. Discípulos yaa'vi néeⁿ yā 'iiⁿyāⁿ chí índaa ndúúccū dá'caiyāa. ¹⁴ Jesús miiⁿ ní caⁿ'a yā chii yā discípulos: 'Cuaáⁿ nī chí chii da'caiyāa nanaáⁿ. Nguéé caaca taaⁿ nī yeⁿ'ē da'caiyāa s'tíi ti naachí Ndyuūs chi canéé na va'ai chεeti nguuvi ngaⁿ'a ntiiⁿnyúⁿ yā ní yeⁿ'ē da'caiyāa s'tíi. 'Tíica chíi.

¹⁵ Ch'iinu chin'du'ū ta'á yā vmnaaⁿ yeⁿ'ē da'caiyāa s'eeⁿ ní chiicá yā lugar miiⁿ.

Saⁿā 'díiⁿ chí 'cuiica ní indeē sa ndúúccū Jesús
(Mr. 10.17-31; Lc. 18.18-30)

¹⁶ Tuu'mi ní ndaa 'áámá saⁿā 'díiⁿ nanááⁿ Jesús miiⁿ ní caⁿ'a sa chíi sa Jesús: N'diī maestro chí n'dai, ¿dε'ē chí n'dáacā chí cuuví díiⁿ ní cuuví ndaācá vida cueⁿe daāⁿmaⁿ chí cuuvi yeⁿ'é?

¹⁷ Jesús caⁿ'a yā chíi yā saⁿā 'díiⁿ miiⁿ: ¿Dε'ē cúúví chí ngaⁿ'ā di chí n'dai 'úú? Mar 'áámá 'iiⁿyāⁿ nguéé n'dai yā ti dámaáⁿ Ndyuūs. Naati ndúúti chí neⁿe di cundaā di na va'ai chεeti nguuvi naachí Ndyuūs ngaⁿ'a ntiiⁿnyuⁿ yā, idiⁿ di tan'dúúccā chí ngaⁿ'a mandamientos.

18 Saⁿ'ā 'dííⁿ mííⁿ ní caⁿ'a sa: ¿Cheé chííⁿ? Jesús caⁿ'a yā: Nguéé 'caāⁿ'nūⁿ di. Nguéé caⁿ'a di ndúú^{cū} 'aama n'daatáá chi nguéé yeⁿ'ē di. Nguéé didu-ucú di. Nguéé caaⁿ'maⁿ di nduudu yaadi yeⁿ'é mar 'áámá 'iiⁿ'yāⁿ. 19 Dinéⁿ'e di cheεcu di ndúú^{cū} chiida di. Dinéⁿ'e di 'iiⁿ'yāⁿ na niiⁿnuúⁿ vaacú di tan'dúú^{cā} chi neⁿ'e di maāⁿ di.

20 Saⁿ'ā 'dííⁿ miiⁿ ní caⁿ'ā sa: Tanducuéⁿ'ē chuū 'āā idiíⁿ ndíí taachi saⁿ'ā 'lííⁿ 'úú. ¿De'ē cá indai yeⁿ'é?

21 Jesús caⁿ'a yā chii yā saⁿ'ā: Ndúú^{ti} chi neⁿ'e di chí cúú^{ví} n'dai ca di tuu'mi ní cueⁿ'e di ní n'diicui di tanducuéⁿ'ē chí v'éé yeⁿ'ē di ní ca'a di 'iiⁿ'yāⁿ chí nguéé yeⁿ'e yā. Tuu'mi ní ndaācā chí v'éé vaadi 'cuiica yeⁿ'ē ná va'ai cheεti nguuvi chí cuuví yeⁿ'ē di. Ní cuchí di ní caⁿ'a di nduucú.

22 Taachí saⁿ'ā 'dííⁿ miiⁿ ch'iindiveeⁿ sa chuū, cunáⁿ'a sa ní s'neeⁿ ndaachi yiinú sa tí neené 'cuiica sa.

23 Tuu'mi ní Jesús caⁿ'a yā chii yā discípulos yeⁿ'e yā: Cuaacu nííⁿnyúⁿ ngaⁿ'á ngíí ndís'tiī chí ngíⁿ'i chí cundaā 'áámá saⁿ'ā 'cuiica naachí Ndyuūs ngaⁿ'a ntiiⁿnyúⁿ yā na va'ai cheεti nguuvi. 24 Táámá cosa ngaⁿ'á ngíí ndís'tiī chí 'ááma iti camello chí ch'εεte ca nguéé tí 'yuudūu 'tiicá tí, nguéé ngíⁿ'i ca chí cho'ó tí na nduutinááⁿ 'iini chí cheendi va'ai 'lííⁿ nguéé tí 'áámá 'iiⁿ'yāⁿ 'cuiica cu'téenu yā Ndyuūs ní cundáa yā naachí Ndyuūs ngaⁿ'a ntiiⁿnyúⁿ yā na va'ai cheεti nguuvi.

25 Taachí ch'iindiveeⁿ discípulos yeⁿ'é yā chuū, neéne nadicádíínuuⁿ yā ní caⁿ'a yā nguááⁿ maaⁿ yā: ¿Du'u cuuví nanguaⁿ'āi?

26 Jesús ch'íinu yā discípulos ní caⁿ'a yā: Saⁿ'ā yeⁿ'e in'yeeⁿdi' cūū ní nguéé cuuví diiⁿ sa chuū naati Ndyuūs cuuví diiⁿ yā tanducuéⁿ'ē.

27 Tuu'mi ní Pedro miiⁿ ní nan'guεεcútaⁿ'a sa ní caⁿ'a sa chii sa Jesús: N'diī Señor, cuin'diichí nī. Nús'ūū ní sn'néeⁿ 'nū tanducuéⁿ'ē chi véé yeⁿ'é 'nū ní cuchíí 'nū ndúúcū n'diī. ¿De'é ndaācā yeⁿ'é 'nū?

28 Jesús caⁿ'a yā chii yā discípulos: Cuaacu níⁿnyúⁿ, ngaⁿ'á ngí ndís'tiī, chi tiempo chí cuchíi taachí nducuéⁿ'ē nduuví ngai ní Saⁿ'a chi Daiyá Dendyuūs 'cuūndī sa na trono yeⁿ'ē sa ndúúcū δεεεε ch'εεε yeⁿ'e maaⁿ sa ní 'cuai sa ndís'tiī chi cueⁿ'e nī ndúúcu sa. Ní ndís'tiī ní 'cuεεté nī na ndiichuuví tronos ní diiⁿ nī juzgar ndu'u ndiichúúví ndaata yeⁿ'e 'iiⁿ'yāⁿ Israel chí judíos yā. 29 'Āā du'ú nūuⁿ chí cu'neeⁿ ná vaacu yā o 'díinu yā o ví'i yā o chiidá yā o chεεcú yā o n'daataá yeⁿ'e yā o daiya yā o yáⁿ'āa yeⁿ'e yā cáávā chí duuchí, 'iiⁿ'yāⁿ miiⁿ ndaācā cá yā táámá ciento más cá. Ní Ndyuūs cá'á yā 'iiⁿ'yāⁿ miiⁿ vida cueⁿ'e daāⁿmaⁿ yeⁿ'e yā ná va'ai chεεti nguuvi. 30 Nééné 'yaaⁿ 'iiⁿ'yāⁿ chí maaⁿ snée yā cuááⁿ chí vmnaaⁿ ní 'iiⁿ'yāⁿ s'eeⁿ 'cuεεtinée yā cuaaⁿ chí cuayiivi ní nééné 'yaaⁿ 'iiⁿ'yāⁿ chí maaⁿ snée yā cuaaⁿ chí cuayiivi ní 'iiⁿ'yāⁿ s'eeⁿ 'cuεεtinée yā cuaaⁿ chí vmnaaⁿ.

20

Ejemplo yeⁿ'e 'iiⁿ'yāⁿ chí diiⁿ yā ntiⁿnyuⁿ

1 Caⁿ'a Jesús: Naachí Ndyuūs ngaⁿ'a ntiⁿnyúⁿ yā yeⁿ'e na va'ai chεεti nguuvi ní tan'dúúcā 'áámá dueño chí véé yáⁿ'āa yeⁿ'e yā. Dueño miiⁿ ní can'dáa yā cuaaⁿ ná nguεεtiyaaⁿ chí in'nuuⁿ yā mozos

chi diiⁿ ntiiⁿnyuⁿ naachi véé díí'yú uvas yeⁿ'é yā.
 2 Ní indeé yā ndúúcū mozos taaca chi nadíí'vē
 yā mozos. Ní caⁿ'a yā chi ca'a yā 'aama caadi
 plata nguuvi miiⁿ ní dicho'ó yā mozos miiⁿ chi
 diiⁿ sa ntiiⁿnyuⁿ naachi véé díí'yú uvas yeⁿ'é yā.
 3 Dueño miiⁿ can'dáa yā na vaacu yā taandúú cuáán
 náán n'gεεcú nuuuⁿ nguεetiyaanⁿ ní cuéⁿ'e yā cuaanⁿ
 nii'vεε ní n'diichi yā ta n'duuvu sán'ā chi snée sa
 chi nguée ndaācā ntiiⁿnyuⁿ yeⁿ'e sa. 4 Ní caⁿ'a yā
 chii yā saⁿ'ā s'eeⁿ: Ndís'tiī, cuéⁿ'e nī diiⁿ nī ntiiⁿnyuⁿ
 yeⁿ'é naachi véé díí'yú uvas yeⁿ'é. 'Úú ní nadíí'vé
 ndís'tiī tan'dúúcā chí tuumicadiinúúⁿ chí n'daācā.
 Saⁿ'ā s'eeⁿ ní cueⁿ'e sa diiⁿ sa ntiiⁿnyúⁿ miiⁿ. 5 Ní
 can'dáá ntuuⁿ yā taandúú cuáán naaⁿ ingyáⁿ'ā.
 'Tiicá ntúūⁿ cun'daa yā táánduu cuaanⁿ náán n'gεεcú
 'íínú chiinū, 'tiicá ntúūⁿ diiⁿ yā n'nuúⁿ yā mozos
 chi diiⁿ sa ntiiⁿnyuⁿ. 6 Ní taandúū n'gεεcu juⁿ'u
 chiinū cueⁿ'e ntúúⁿ yā ní ndaācā yā taanduu 'uuvu
 saⁿ'ā chí nguée índaācā ntiiⁿnyuⁿ yeⁿ'e sā. Ní caⁿ'a
 yā chii yā saⁿ'ā s'eeⁿ: ¿De'ē cúúví chí ndís'tiī snée
 nī 'muuⁿ ní núúⁿmáⁿ nguuvi chí nguée ntiiⁿnyuⁿ
 chí idiíⁿ nī? 7 Saⁿ'ā s'eeⁿ caⁿ'a sa: Ti mar 'áámá
 'iiⁿyāⁿ nguée tee yā ntiiⁿnyuⁿ yeⁿ'é 'nū. Dueño miiⁿ
 caⁿ'a yā chii yā saⁿ'ā s'eeⁿ: Ndís'tiī, cueⁿ'é nī diiⁿ
 nī ntiiⁿnyuⁿ naachi véé díí'yú uvas yeⁿ'é ní nadii'vé
 ndís'tiī tan'dúúcā chí ituumicadiinúúⁿ chí n'daācā.
 8 Taachí cueⁿ'e yā 'yáⁿ'āa, dueño miiⁿ naachi véé
 díí'yú uvas miiⁿ caⁿ'a yā chii yā saⁿ'a chí ngaⁿ'a
 ntiiⁿnyuⁿ sa yeⁿ'e mozos: 'Cuai dí mozos ní nadíí'vē
 di mozos chí ndaa sa cuayiivi. 'Cuiinu maaⁿ ní
 nadíí'vē di mozos chí ndaa sā cuayiivi. 'Cuiinu
 maaⁿ ní nadíí'vē di mozos chí ndaa sā cuayiivi
 'tεε 'téé. 'Cuiinu maaⁿ ní nadíí'vē di mozos chí

ndaa sā vmnaaⁿ. ⁹ Ndaa mozos chi cheⁿe sā na ntiiⁿnyuⁿ miiⁿ taanduu na n'gεεcú juⁿ'u chiinū ní nadíí'vē sa mozos. 'Áámá 'áámá sā ndaāca sā 'áámá caadi plata yeⁿ'é sā. ¹⁰ Taachí ndaa mozos chi cheⁿe sā vmnaaⁿ ná ntiiⁿnyuⁿ miiⁿ, nadacádiinuuⁿ sā n'deēe cá tuūmī ndaāca sā. Mozos ntúūⁿ ndaāca sā 'áámá caadi tuūmī yeⁿ'e sā. ¹¹ Taachí nadíí'vē sā mozos ní neené n'deeē caⁿ'a mozos yeⁿ'e dueño yeⁿ'e naachi véé díí'yú uvas miiⁿ. ¹² Mozos ní caⁿ'a sa: Sáⁿ'a s'tīi ti 'āā 'ai chiinū ndaā sa ní 'áámá hora nūuⁿ diiⁿ sa ntiiⁿnyuⁿ ní dáámá nūuⁿ nadíí'vē nī sáⁿ'a s'tīi ndúúcū nús'uū. Nús'uū ní diiⁿ 'nū ntiiⁿnyuⁿ ní ch'εtinée 'nū na 'yáⁿ'ā. ¹³ Dueño miiⁿ ní nan'guεεcútaⁿ'á yā ní caⁿ'a yā chii yā 'áámá cheε mozos: Ndís'tīi saⁿ'ā chí n'dai nduucú, nguée nduuví taaⁿ di nduucú. Nguée cuncāā idiiⁿ nduucú ndís'tīi. ¿'Áá nguée ndeé ndúúcu nī chí nadii'vé ndís'tīi 'áámá caadi plata ní 'āā canéē yiinú nī? ¹⁴ Cuta'á nī chí tunéeⁿ ndis'tīi ní cunaⁿ'a nī. 'Úú ní nadicádiinúúⁿ chí nadii'vé mozos chí ndaā sa cuayiivi tan'dúúcā chí nadii'vé ndís'tīi. ¹⁵ ¿'Áá nguée cuuvi diiⁿ 'úú tan'dúúcā chí neⁿ'é ndúúcū tuūmī yeⁿ'é? ¿'Áá ngíi nguee nī ti 'úú ní n'daí? ¹⁶ 'Túúcā 'iiⁿ'yāⁿ chí snée cuááⁿ vmnááⁿ 'cuεtinée yā ndii cuaaⁿ cuayiivi. 'Iiⁿ'yāⁿ chí snée cuayiivi ní 'cuεtinée yā cuáaⁿ vmnaaⁿ ti neéne 'yaaⁿ n'deēé 'iiⁿ'yāⁿ chí 'cai Ndyuūs naati duu'vīi 'iiⁿ'yāⁿ chí ndεεve Ndyuūs.

*Jesús ngaⁿ'a ntuuⁿ yā yeⁿ'ē chí 'cuūvi yā
(Mr. 10.32-34; Lc. 18.31-34)*

¹⁷ Jesús cucheε yā na yāāⁿ Jerusalén ní cuen'é yā ndúúcū ndu'ū ndiichúúví discípulos yeⁿ'é yā 'áámá lado. Ní Jesús caⁿ'a yā chii yā discípulos

taachi ngiicá yā: ¹⁸ Ndís'tiī ní maaⁿ ní cuchεε yú na yāāⁿ Jerusalén miiⁿ. 'Úú chi Saⁿā chi Daiya Dendyuūs 'iiⁿyāⁿ s'eeⁿ nca'á yā 'úú tá'āa chiiduú n'gεεté ndúú^{cū} maestros chí ngi'cueeⁿ ley. 'Iiⁿyāⁿ s'eeⁿ ní diíⁿ yā condenar 'úú ní 'cuūví. ¹⁹ Ní nca'a yā 'úú ta'a 'iiⁿyāⁿ chi nguéé ndaata yeⁿe 'iiⁿyāⁿ Israel. 'Iiⁿyāⁿ s'eeⁿ ní 'cááⁿnyuⁿneeⁿ yā 'úú ní 'cueⁿe yā 'úú ní cu'neeⁿnga'á yā 'úú. Ní 'úú chí Saⁿā chi Daiya Ndyuūs miiⁿ nanduuchí ndiichi ndii 'íínú nguuvi yeⁿ'ē nguaaⁿ tináⁿā.

*Chí chεεcu Jacobo ndúú^{cū} Juan chiica tá yeⁿ'ē 'áámá naaⁿ
(Mr. 10.35-45)*

²⁰ Tuu'mi ní ndaā n'daataá yeⁿe saⁿā Zebedeo nanááⁿ Jesús miiⁿ ndúú^{cū} daiya tá ní chiintii'ya tá nanááⁿ Jesús miiⁿ ní dich'εεε tá 'yā ní chiica ta 'áámá favor. ²¹ Jesús ní caⁿ'a yā: ¿D'é'ε neⁿ'ē di? Táⁿā miiⁿ ní caⁿ'a tá: Taachí ndaa di naachí caaⁿmaⁿ ntiiⁿnyuⁿ di, caaⁿmaⁿ ntiiⁿnyuⁿ di chí ndúú 'uūví saⁿā daiyá 'cuεεε sa 'diituu dí, 'aama sa ní lado tá cuaacu di ní taama sa ní lado tá 'cuée di.

²² Tuu'mi ní Jesús nan'guεεcútaⁿa yā ní caⁿ'a yā chíi yā 'iiⁿyāⁿ: Nguéé déénu nī de'ē chí ngi-ica nī. ¿'Áá cuuvi diiⁿ nī chí cú'u nuúⁿ nī yeⁿe chí n'geeⁿ yeⁿe vaso chí yeⁿ'ē chí 'cueenú cuuvi? ¿'Áá cuuvi cuta'á nī maaⁿ ngeédínuūⁿnī chí cuta'á? Juan ndúú^{cū} Jacobo miiⁿ ní ngaⁿ'a yā chí cuuvi diíⁿ yā. ²³ Jesús miiⁿ caⁿ'a yā chíi yā 'iiⁿyāⁿ s'eeⁿ: Cuaacu níⁿnyúⁿ canéé chí cu'ú nī yeⁿ'e vaso yeⁿ'é yeⁿ'e chí 'cueenú cuuvi ní canéé chí cuta'á nī chí chεēdínuūⁿnī chí 'úú ita'á. Naati nguéé tunééⁿ 'úú chí ca'á du'ū chí 'cuundi lado tá cuaācú o lado tá

'cuēe. Lugar 'cūū ní Ndyuūs ca'á yā 'ii'nyāⁿ chi Ndyuūs 'cuundiyaáⁿ yā cáávā 'ii'nyāⁿ.

24 Taachí ndu'u ndíichí discípulos ch'iindiveéⁿ yā chuū, nduuvi taáⁿ yā yeⁿ'e nduu 'uūvi discípulos chí daiya saⁿ'ā Zebedeo. 25 Tuu'mi ní Jesús yaa'ví yā discípulos ní caⁿ'a yā chii yā 'ii'nyāⁿ s'eeⁿ: 'Āā deenu ndís'tiī chí 'ii'nyāⁿ yeⁿ'e naciones chí ngaⁿ'a ntiiⁿnyuⁿ vεε poder yeⁿ'é yā nguaaⁿ 'ii'nyāⁿ yeⁿ'e naciones yeⁿ'é yā. Ní 'ii'nyāⁿ chí n'gεεε cá yeⁿ'ē naciones ní ngaⁿ'a ntiiⁿnyúⁿ yā yeⁿ'e tanáⁿ'a yā. 26 Naati nguéé 'tíicā cuuvi nguaaⁿ ndis'tiī. Saⁿ'ā chí neⁿ'e sa cúúví ch'εεε sa nguaaⁿ ndís'tiī canéé chí dichíí'vε sa ndís'tiī. 27 Saⁿ'ā chí neⁿ'e sa cūnee cuaaⁿ vmnaaⁿ ca yeⁿ'e ndís'tiī canéé chí dichíí'vε ca sa ndís'tiī. 28 Naati Saⁿ'ā chí Daiya Ndyuūs nguéé ndaā sa chí 'íi'nyāⁿ dichíí'vε yā saⁿ'ā ti maāⁿ sa dichíí'vε sa 'ii'nyāⁿ, ní chí ca'a sa vida yeⁿ'ē maaⁿ sa tan'dúúicā chí precio yeⁿ'ē nuuⁿndi cáávā chí nadanguaⁿ'ai yā 'yaaⁿ n'dáí 'ii'nyāⁿ.

*'Uūvi chí ngueenááⁿ nduūvā yeⁿ'ē sa
(Mr. 10.46-52; Lc. 18.35-43)*

29 Taachí Jesús ndúúicū discípulos yeⁿ'é yā can'daa yā yeⁿ'e yāāⁿ Jericó nééné 'yaaⁿ 'ii'nyāⁿ can'dáa yā 'ii'nyāⁿ s'eeⁿ. 30 'Uuvi saⁿ'ā chí ngueenááⁿ chí vεεε sa niiⁿnuúⁿ cyúúní taachí ch'iindiveeⁿ sa chí Jesús cho'ó yā miiⁿ, 'cai yiicú sa ní caⁿ'a sa: N'diī Señor, Daiya David, nneé ya'ai 'iinu nī nús'uu.

31 Nééné 'yaaⁿ 'ii'nyāⁿ yaa'vi neeⁿ yā saⁿ'a s'eeⁿ chí cunēé 'diiiⁿ cheendi sa naati saⁿ'a s'eeⁿ ní n'gaī yiicú cá sa: N'diī Señor, Daiya David, nneé ya'āī 'iinu nī nús'uu.

32 Jesús miiⁿ cheendii yā ní 'cai yā sa^{n'}ā s'eeⁿ ní ca^{n'}a yā chii yā sa^{n'}ā s'eeⁿ: ¿De'ē ne^{n'}é nī chí 'úú dííⁿ ndúúcu nī?

33 Sa^{n'}ā s'eeⁿ ní ca^{n'}a sa: N'diī Señor, dííⁿ nī chí snaaⁿ 'nū.

34 Tuu'mi ní Jesús, Daiya David, nnéé ya'ai 'íínu yā sa^{n'}ā s'eeⁿ ní tuu'ví yā nduutináaⁿ sa. Ní hora mííⁿ nūuⁿ nduutináaⁿ sa nnguaaⁿ ní chíi snaaⁿ sa. Sa^{n'}ā s'eeⁿ ní cue^{n'}e sa ndúúcu Jesús.

21

Jesús sndaayā na yáāⁿ Jerusalén tan'dúúcā 'áámá rey

(Mr. 11.1-11; Lc. 19.28-40; Jn. 12.12-19)

¹ Taachi Jesús ndaa niiⁿnuúⁿ yā na yáāⁿ Jerusalén ní ndaa yā ná yīcū chí nguuvi Olivos chí ye^{n'}ē yáāⁿ 'lííⁿ chí nguuvi Betfagé, dichó'o yā na 'uūví discípulos ye^{n'}é yā. ² Ní ca^{n'}a yā chíi yā discípulos: Cue^{n'}e nī na yáāⁿ 'lííⁿ chí canéé niiⁿnuúⁿ. Miiⁿ ní ndaaca nī 'áámá burra chí n'dēēchiichí tī ndúúcu daiya tī. Ndís'tiī ní n'daatí nī 'iiti ní candéε nī 'iiti 'muuⁿ. ³ Ní ndúúti chí 'áámá 'iiⁿ'yāⁿ yaa'vi yā ndís'tiī ye^{n'}e 'iiti miiⁿ, caa^{n'}maⁿ nī cuuvi nī 'iiⁿ'yāⁿ ti Señor ye^{n'}e yú ne^{n'}e yā 'iiti miiⁿ. Ní 'iiⁿ'yāⁿ miiⁿ caama nadīcho'ó yā 'iiti.

⁴ Tanducué^{n'}ē 'túúcā chíi ní 'iicu cuuví cuaacu chí ca^{n'}a profeta chí ndεε yā nduudu ye^{n'}é Ndyuūs ndii cuááⁿ vmnaaⁿ taachí dingúúⁿ yā chuū na libro ye^{n'}e Ndyuūs:

⁵ Cuuví nī 'iiⁿ'yāⁿ chí snée yā na yáāⁿ Sión 'tíicā. Cun'diichí nī, Rey ye^{n'}e nī cuchíí yā nanáaⁿ nī. Rey miiⁿ ní ndiicuúⁿ yā ní canduú yā

burra 'lííⁿ. Ní burra 'lííⁿ ní daiya 'iitī chi candéé.

⁶ Discípulos cueⁿe yā ní dííⁿ yā tan'dúú^{cā} chi Jesús miiⁿ dichó'o yā 'iiⁿ'yāⁿ s'eeⁿ. ⁷ Ní candεε yā burra miiⁿ ndúú^{cū} daiyá tī. Ní sn'duú yā cotón yeⁿ'é yā vmnááⁿ yeⁿ'é burra 'lííⁿ. Ní Jesús miiⁿ ní canduú yā 'iiti. ⁸ 'Iiⁿ'yāⁿ chí n'dee n'dái n'doo yā cotón yeⁿ'é yā cuaaⁿ cyúúⁿí. Tanáⁿ'a yā ch'iica yā dúuⁿnē yáⁿ'á ní n'doo yā cuaaⁿ cyúúⁿí. ⁹ 'Iiⁿ'yāⁿ chí cueⁿe yā cuááⁿ vmnaaⁿ ndúú^{cū} 'iiⁿ'yāⁿ chí cueⁿe yā cuaaⁿ dáámí yā tucá'a yā 'cai yiicú yā, ní caⁿ'a yā: Dε'ε chúú^{cā} ch'εεε n'dai 'iiⁿ'yāⁿ chí Daiya rey David. Dε'ε chúú^{cā} n'dai 'iiⁿ'yāⁿ chí cuchii ndúú^{cū} chí duuchi Señor miiⁿ. Dich'εεε yú Ndyuūs chí snée ná va'ai cheētī nguuvi.

¹⁰ Taachí Jesús miiⁿ sndaa yā na yāāⁿ Jerusalén nducyáá^{cá} 'iiⁿ'yāⁿ yeⁿ'e yāāⁿ miiⁿ tuumicadíⁿnuuⁿ yā ní caⁿ'a yā nguaaⁿ maaⁿ yā: ¿Du'u rá sán'a 'cūū?

¹¹ 'Iiⁿ'yāⁿ mííⁿ ngaⁿ'a yā: Sán'a 'cūū saⁿ'a profeta Jesús chí cuchii sá cuaaⁿ na yāāⁿ Nazaret yeⁿ'e yáⁿ'āa Galilea.

Jesús inadidεεvé yā yaācū templo

(Mr. 11.15-19; Lc. 19.45-48; Jn. 2.13-22)

¹² Jesús miiⁿ sndáa yā ná yaācū templo yeⁿ'é Ndyuūs ní tun'dáa yā nducyaaca 'iiⁿ'yāⁿ chí in'diicui yā ndúú^{cū} 'iiⁿ'yāⁿ chí ngái yā na yaācū miiⁿ. Ní chεεcundaa yā mesas yeⁿ'e 'iiⁿ'yāⁿ chí n'dáaⁿ yā tuūmī yeⁿ'e 'iiⁿ'yāⁿ. Ní chεεcú yā sillas yeⁿ'é 'iiⁿ'yāⁿ s'eeⁿ chí in'diicui yā 'yáádá palomas. ¹³ Ní Jesús caⁿ'a yā chii yā 'iiⁿ'yāⁿ s'eeⁿ: Na libro yeⁿ'e Ndyuūs naachi canéé nguūⁿ 'túú^{cā} ngaⁿ'a: Vá'ai yeⁿ'é canéé chí duuchi va'ai naachi 'iiⁿ'yāⁿ

caanⁿmaⁿngua'á yā, naati ndís'tiī ní diíⁿ nī chí yiivi yáává yeⁿe 'iiⁿ'yāⁿ chí díduucu.

14 Ní chεeti yaācū miiⁿ ndaá nanááⁿ Jesús 'iiⁿ'yāⁿ chí ngueenááⁿ ndúúcū 'iiⁿ'yāⁿ chí ngaā yó'ōo, ní Jesús miiⁿ diíⁿ yā chí nduūvā yeⁿe nducyaaca yā. 15 Naati chiiduu n'gεεtēē ndúúcū maestros yeⁿe ley nduuvi taáⁿ yā taachí n'diichi yā chí 'túicā idiiⁿ Jesús miiⁿ ní ch'iindiveéⁿ yā chuū. Ní saⁿ'ā dá'caīyāa n'gai sa ní caⁿ'a sa: De'ē chúúcā ch'εεtε saⁿ'ā chí Daiya rey David miiⁿ. 16 Ní 'iiⁿ'yāⁿ s'eeⁿ caⁿ'a yā chii yā Jesús miiⁿ: ¿'Áá n'giindiveéⁿ nī chí saⁿ'ā da'caīyāa ngaⁿ'ā sa? Jesús caⁿ'a yā: N'giindiveéⁿ. ¿'Áá nguéé n'geeⁿ ndís'tiī Nduudu yeⁿe Ndyuūs naachi canéé nguūⁿ? Ní ngaⁿ'a 'túúcā:
'Áā diíⁿ di chí da'caīyāá ndúúcū dacua'aá caata yā chí n'daāca n'dai yeⁿ'é Ndyuūs.

17 Jesús ní nan'daa yā yeⁿe yaācū miiⁿ. Ní nan'daa yā yeⁿe yáāⁿ miiⁿ ní cueⁿ'e yā na yáāⁿ 'lííⁿ chí nguuvi Betania. Ní mííⁿ canee yā nguūinū miiⁿ.

Jesús ngaⁿ'a yā chí nguεε n'dáacā yáⁿ'á yeⁿ'e n'guíídī yaaⁿ nguuvi chí nguéé n'gui'i yeⁿ'ē

(Mr. 11.12-14, 20-26)

18 Chidéévé táámá nguuvi, ní Jesús ndaa ntúuⁿ yā ná yáāⁿ miiⁿ ní chíi cuiicú yā. 19 Cuaaⁿ cyúúní ní n'diichi yā 'áámá yáⁿ'á yeⁿ'e n'guíídī yaaⁿ nguuvi niiⁿnuúⁿ cyúúní, ní cueⁿ'e yā naachí cutá'a yā n'guiidī miiⁿ, ní nguéé ndaaca yā n'gui'i yeⁿ'ē, dámaāⁿ tá'āa. Ní Jesús caⁿ'a yā chíi yā yáⁿ'á 'túúcā: Dii yáⁿ'á, 'āā ntéé nguεεcunéé 'cuūndī n'gui'i yeⁿ'ē di. Tuu'mí nūuⁿ yaⁿ'á miiⁿ nti'i. 20 Taachí discípulos n'diichí yā chuū, ngeⁿ'ē yiinú yā yeⁿ'ē ní caⁿ'a yā:

¿De'ē cúuví chi maā'ncheéte nuūuⁿ nti'i n'guídīi yaaⁿ nguuvi?

²¹ Jesús nán'guεεcútaⁿa yā ní caⁿ'a yā chii yā discípulos: Cuaacu níⁿnyúⁿ ngaⁿ'á ngii ndís'tiī, ndúúti chi ndís'tiī i'téenu nī ní nguée n'deēe nadicádíinuⁿ nī, nguée dámaāⁿ chuū cuuvi díⁿ nī yeⁿ'ē n'guídīi yaaⁿ nguuvi naati cuuvi díⁿ nī ndúúcū yīcū 'líⁿ 'cūū chí caaⁿ'maⁿ nī cuuvi nī: Dii yīcū, cuvii dí 'múúⁿ ní cueⁿ'e di cundáá nuūⁿ di ná nuūⁿnī'yáⁿ'ā, ní cuuvi. ²² Tanducuén'ē chi caaca nī naachí caaⁿ'maⁿngua'á nī, ndúúti chí cu'téenu nī, ní ndaācā yeⁿ'e nī.

*Jesús ngaⁿ'a ntiⁿnyúⁿ yā tan'dúúcā 'iiⁿntyéⁿ'ē
(Mr. 11.27-33; Lc. 20.1-8)*

²³ Taachí Jesús miiⁿ ndaá yā cheeti yaācū templo miiⁿ, chiiduú n'geéte ndúúcū 'iiⁿ'yāⁿ ndiicūū chi ngaⁿ'a ntiⁿnyúⁿ yā yeⁿ'e yaācū ndaá yā nanááⁿ Jesús miiⁿ taachí ngi'cueeⁿ yā, ní caⁿ'a yā chii yā Jesús: ¿Du'ú 'iiⁿntyéⁿ'ē ngaⁿ'a yā chí 'túúcā idiíⁿ nī? ¿Du'ú 'iiⁿ'yāⁿ tee yā poder chí caaⁿ'maⁿ ntiⁿnyúⁿ nī 'túúcā?

²⁴ Nan'guεεcútaⁿa Jesús miiⁿ ní caⁿ'a yā chii yā 'iiⁿ'yāⁿ s'eeⁿ: 'Úú ntúūⁿ ní intiinguuneéⁿ ndís'tiī. Nduuti chí nan'guεεcútaⁿa nī yeⁿ'ē, tuu'mi ní cuuví ndís'tiī du'ú 'iiⁿntyéⁿ'ē tee yā poder 'úú chí idiíⁿ dendú'u chuū. ²⁵ Yeⁿ'ē chí cheedinúⁿnīⁿ Juan, ¿tíí chiīcā? ¿'Áá yeⁿ'e Ndyuūs chí canéé na va'ai cheeti nguuvi o yeⁿ'e saⁿ'ā iⁿ'yeeⁿdí 'cūū? Tuu'mi ní 'iiⁿ'yāⁿ s'eeⁿ ndeé yā nguááⁿ maáⁿ yā ní caⁿ'a yā: Nduuti chí caaⁿ'maⁿ yú chí yeⁿ'ē nanguuvi, tuu'mi ní Jesús caaⁿ'maⁿ yā cuuvi yā s'uūuⁿ: ¿De'ē cuuví chí nguée s'teenu nī yeⁿ'e chí ngaⁿ'a Juan miiⁿ?

26 Ní nduuti chi caaⁿ'maⁿ yú chi yeⁿ'e saⁿ'ā iⁿ'yeeⁿ'dí 'cūū, 'va'a yú 'iiⁿ'yāⁿ yeⁿ'e yāāⁿ ti nducyaaca yā ní déénu yā chí Juan chí cheédínuūⁿnīⁿ ní 'aama profeta yeⁿ'é Ndyuūs.

27 Ní nan'guεεcútaⁿ'a yā yeⁿ'e Jesús miiⁿ ní caⁿ'a yā: Nguéé déénu 'nū. Jesús miiⁿ ní caⁿ'a ntúuⁿ yā: 'Tiicá ntúūⁿ 'úú ní nguéé cuuví ndís'tiī du'u 'íiⁿntyēⁿ'ē tee yā poder 'úú chí idiīⁿ chuū.

'Áámá ejemplo yeⁿ'ē 'uuví daiya yā

28 Jesús caⁿ'a yā: ¿De'ē inadacadiinúúⁿ ndís'tiī yeⁿ'e chuū? Caⁿ'á caaⁿ'máⁿ ndúúⁿcū ndís'tiī yeⁿ'e 'áámá saⁿ'ā chí véé 'uūvī daiya sa. Ndaā sa nanááⁿ 'áámá daiya sa ní caⁿ'a sa: Díí daiyá, cuéⁿ'é di ní diiⁿ dí ntiiⁿnyuⁿ naachi véé díí'yú uvas yeⁿ'é. 29 Daiya sa ní nan'guεεcútaⁿ'a sa ní caⁿ'a sa: Nguéé neⁿ'é. Ch'iinu maaⁿ ní nadicádínuuⁿ sa chí nguéé n'daācā diiⁿ sa ní cuéⁿ'e sa diiⁿ sa ntiiⁿnyuⁿ miiⁿ. 30 Ní cueⁿ'e ntúuⁿ saⁿ'ā miiⁿ ní yaa'vi sa táámá daiya sa, ní 'tiicá ntúūⁿ caⁿ'a sa chí sa daiya sa. Ní daiya sa mííⁿ nán'guεεcútaⁿ'ā sa ní caⁿ'a sa: 'Tiicā, n'diī chiidá, caⁿ'á. Naati nguéé cueⁿ'e sa diiⁿ sa ntiiⁿnyuⁿ.

31 ¿De'ē inadacadiinuuⁿ ndís'tiī? Naachi 'uūvī daiya yā ¿cheé chí diīⁿtan'dúúⁿcā chí neⁿ'e chiidá yā? 'Iiⁿ'yāⁿ s'eeⁿ caⁿ'a yā: Saⁿ'ā chí yaa'ví yā vmnaaⁿ. Jesús caⁿ'a yā chí yā 'iiⁿ'yāⁿ s'eeⁿ: Cuaacu níiⁿnyúⁿ ngaⁿ'á ngii ndís'tiī, chí 'iiⁿ'yāⁿ chí inn'guéé yeⁿ'e impuestos ndúúⁿcū n'daataá chí véé cá saⁿ'ā yeⁿ'e tá caⁿ'á yā vmnaaⁿ yeⁿ'é nī naachí Ndyuūs ngaⁿ'a ntiiⁿnyúⁿ yā. 32 Ti Juan chí cheédínuūⁿnīⁿ ndaā sa vmnááⁿ ndís'tiī. Chiica sá na 'áámá yúúⁿ ní cuaacu ní ngaⁿ'a sa yeⁿ'e yúúⁿ ní cuaacu yeⁿ'e Ndyuūs ní nguéé s'téénu nī yeⁿ'ē sa. Naati saⁿ'ā publicanos

chí inn'guéé yeⁿ'e impuestos ndúúcu n'daataá chí véé saⁿ'ā s'ee ndúúcu tá s'téenu yā nduudu yeⁿ'e sa. Ndís'tiī, taachí n'diichí nī chuū chí 'āā diiⁿ Juan, nguéé ndaacadaamí nī yeⁿ'e nuuⁿndi yeⁿ'é nī ní nguéé s'téenu nī chiiⁿ chí ngaⁿ'a Juan miiⁿ.

'Áámá ejemplo yeⁿ'e 'iiⁿyāⁿ chí nguεε n'dáácā idiiⁿ yā ntiiⁿnyuⁿ

(Mr. 12.1-12; Lc. 20.9-19)

³³ Tuu'mi ní caⁿ'a Jesús: 'Caandiveéⁿ nī táámá ejemplo chí 'tεε nguεε dáámá. Canéé 'áámá 'iiⁿyāⁿ chí véé yáⁿ'āa yeⁿ'e yā ní chiīnu yā diiⁿ'yu yeⁿ'e uvas na yáⁿ'āa yeⁿ'e yā. Ní din'dái yā 'áámá cheeⁿ yeⁿ'é yáⁿ'á 'líiⁿ núúⁿmáⁿ cuaaⁿ 'diituú. Din'dái yā 'aama tanque naachi cuuví tun'dáa yā nuūⁿnīⁿ yeⁿ'e uvas miiⁿ. Ní din'dái yā 'áámá torre nguaaⁿ diiⁿ'yu uvas naachi mozos yeⁿ'e yā 'cuεεtinéⁿ sa diiⁿ sa cuidado n'gui'i uvas miiⁿ. Dueño miiⁿ ca'a yā yáⁿ'āa yeⁿ'e yā saⁿ'ā s'eeⁿ chí diiⁿ sa ntiiⁿnyuⁿ miiⁿ ní cueⁿ'e yā táámá país. ³⁴ Taachí snuū ca'a yeⁿ'é tiempo yeⁿ'e n'gui'i uvas miiⁿ chí túúmá yā, dueño dicho'ó yā mozos yeⁿ'e yā chí saⁿ'ā s'eeⁿ nca'a sa n'gui'i uvas yeⁿ'e yáⁿ'āa, parte yeⁿ'e n'gui'i chí tuneⁿ dueño. ³⁵ Saⁿ'ā chí diiⁿ ntiiⁿnyuⁿ na yáⁿ'āa miiⁿ sta'a sa mozos. 'Áámá ní ch'eⁿ'e sa, táámá ní ch'iiⁿ'nuⁿ sa ní táámá ní chiītu sa. ³⁶ Dueño miiⁿ dicho'ó yā taandúú 'uūvī mozos, 'āā vī'í mozos chí cheⁿ'é vmnaaⁿ. 'Tiicá ntúūⁿ diiⁿ sa ndúúcu mozos.

³⁷ Cuayivi míiⁿ dicho'ó yā daiya yā ti dueño miiⁿ ní ngaⁿ'a yā: Saⁿ'ā s'eeⁿ ní diiⁿ sa honrar daiyá. ³⁸ Taachí saⁿ'ā s'eeⁿ chí diiⁿ sa ntiiⁿnyuⁿ yeⁿ'e yáⁿ'āa miiⁿ n'diichi sa daiya dueño miiⁿ, caⁿ'a sa nguááⁿ maaⁿ sa: Sáⁿ'a 'tī chí cuuví yeⁿ'é sa yáⁿ'āa 'cūū.

'Caaⁿnuⁿ yú sáⁿā miiⁿ ní ndúú^{cū} chí v^{éé} naaⁿ chí cuuví yeⁿē sa ní cuuví yeⁿē yú. ³⁹ Ní staⁿā sa daiya dueño miiⁿ ní tun'daa sa saⁿā 'áámá lado yeⁿe ch^{éē} yeⁿe díí'yú uvas miiⁿ ní ch'iⁿnuⁿ sa saⁿā.

⁴⁰ Taachí ndaā dueño yeⁿe díí'yú uvas ¿d^éē dííⁿ yā ndúú^{cū} saⁿā chí ídíiⁿ ntíⁿnyuⁿ na yáⁿāa yeⁿé ya?

⁴¹ 'Iiⁿyāⁿ s'eeⁿ ní caⁿ'a yā: Dueño miiⁿ ní 'caaⁿnuⁿ yā saⁿā chí cúúncheeⁿ sa díiⁿ sa. Ní caⁿ'á yā yáⁿāa yeⁿe yā naachi v^{éé} díí'yú uvas táámá 'iiⁿyāⁿ chí dííⁿ yā ntiiⁿnyuⁿ na yáⁿāa miiⁿ, 'iiⁿyāⁿ chí ntée yā uvas chí tuneéⁿ yā na tiempo yeⁿē n'gui'i.

⁴² Jesús caⁿ'a yā chíi yā 'iiⁿyāⁿ s'eeⁿ: ¿'Áá ngu^{éé} n'ge^ē ndís'tiī naachi canéé nguūⁿ na libro yeⁿe Ndyuūs chí ngaⁿ'a 'túú^{cā}:

Tuūu chí 'iiⁿyāⁿ chí idin'dái yā va'ai staⁿā yā ní ch'ē^{cū} yā 'áámá lado ti ngu^{éé} neⁿe yā. Tuūú 'cūū tuūú ch'ε^εε ní dichíí'v^ē ca ní canéé tuūu ch'ε^εé esquina yeⁿé va'āī. Chuū ní Señor Ndyuūs dííⁿ yā. Chuū ní 'áámá chí ngeⁿe yiinu yú taachí inaaⁿ yú yeⁿē.

⁴³ Chííⁿ chí 'túú^{cā} nga'á ngií ndís'tiī, chí naachi Ndyuūs ngaⁿ'a ntiiⁿnyúⁿ yā divíi yā yeⁿē ndís'tiī ní caⁿ'á yā táámá 'iiⁿyāⁿ chí caⁿ'á yā n'gui'i chí tune^ē lado yeⁿé Ndyuūs. ⁴⁴ 'Āā du'ú nūuⁿ 'iiⁿyāⁿ chí cun'dáá nduú yā vmnaaⁿ na tuūu 'cūū ní caātū 'ííⁿí yeⁿe yā. Naati 'āā du'ú nūuⁿ 'iiⁿyāⁿ chí cun'dáá nduūu tuūu 'cūū vmnaaⁿ yeⁿe yā, 'cuíⁿú ndúúví yuūni yā.

⁴⁵ Taachí 'iiⁿyāⁿ chiiduú n'ge^εé ndúú^{cū} 'iiⁿyāⁿ fariseos ch'iindive^ē yā chuū, 'iiⁿyāⁿ s'eeⁿ tumicadíⁿnuuⁿ yā chí yeⁿé yā ngaⁿ'a Jesús miiⁿ.

46 Nadicádíínuuⁿ yā taācā chi cuta'á yā Jesús miiⁿ naatí 'va'a yā 'iiⁿ'yāⁿ yeⁿ'e yāāⁿ tí 'iiⁿ'yāⁿ s'eeⁿ i'téenu yā Jesús miiⁿ tan'dúúcā chi 'áámá profeta chí ngaⁿ'a nduudu yeⁿ'é Ndyuūs.

22

'Áámá ejemplo yeⁿ'ē 'viicu chí n'giindivaacu yā

1 Jesús tuca'á yā ndee yā taama vmnéⁿ'ēe ndúúcū ejemplos, ní caⁿ'a yā: 2 Naachí Ndyuūs ngaⁿ'a ntiiⁿnyúⁿ yā yeⁿ'ē va'ai chεeti nguuvi tan'dúúcā 'áámá rey chí chiica yā 'viicu chí ch'iindivaacu saⁿ'a daiya yā. 3 Ní dichó'o yā mozos yeⁿ'e yā chí yaa'vi sa 'iiⁿ'yāⁿ chí ndíi yā invitado naati 'iiⁿ'yāⁿ s'eeⁿ nguéé néⁿ'e yā caⁿ'a yā. 4 Ní dichó'o yā tan'duuvi mozos ní caⁿ'a yā chii yā mozos: Caaⁿ'maⁿ nī cuuvi nī 'iiⁿ'yāⁿ chí ndíi yā invitado 'tíicā. 'Āā v'éé yaāaⁿ comida miiⁿ. 'Āā ch'iīⁿ'núⁿ i'tiindu yeⁿ'é ní 'iiti chí 'viicheé. Tanducuéⁿ'ē 'āā v'éé yaāaⁿ. Cuchii nī 'viicu. 5 Naatí 'iiⁿ'yāⁿ s'eeⁿ nguéé diiⁿ yā cuenta. 'Áámá yā ní cueⁿ'e yā cuééⁿí yeⁿ'e yā. Taama yā ní cueⁿ'e yā negocio yeⁿ'e yā. 6 Tanáⁿ'a yā ní sta'á yā mozos. Cuⁿ'u yā ndúúcū sa ní ch'iīⁿ'núⁿ yā mozos. 7 Taachi rey miiⁿ ch'iindiveéⁿ yā chuū, ndúúvi taaⁿ yā. Ní dichó'o yā soldados yeⁿ'é yā ní caⁿ'a ntiiⁿnyúⁿ yā chí 'caaⁿ'núⁿ sá 'iiⁿ'yāⁿ chí ch'iīⁿ'núⁿ yā mozos yeⁿ'é yā. Ní 'neeⁿ yaⁿ'ā sa yāāⁿ vaacú 'iiⁿ'yāⁿ s'eeⁿ. 8 Tuu'mi ní caⁿ'a yā chii yā mozos yeⁿ'é yā: Cuaacu níⁿnyúⁿ 'viicu miiⁿ ní 'āā v'éé yaāaⁿ caavā 'iiⁿ'yāⁿ chí chii yā invitado naati nguéé n'dai taaví yā chí cuchii yā. 9 Maaⁿ ní cueⁿ'e nī na yúúⁿí chí can'daā yeⁿ'e yáⁿ'āa yāāⁿ ní diíⁿ nī invitar 'iiⁿ'yāⁿ chí chii yā na 'viicu, 'iiⁿ'yāⁿ chí

ndaāca nī. ¹⁰ Mozos ní can'daa sa ní cuen'e sa cuaaⁿ cyúúní ní nadaama sa nducyaaca 'iiⁿyāⁿ chí ndaāca sa, 'iiⁿyāⁿ chí cúúncheeⁿ yā ndúúcū 'iiⁿyāⁿ chí n'dai yā. Ní ndaā nducyaacá 'iiⁿyāⁿ s'eeⁿ chi mozos 'cai sa ní n'deēe n'dái 'iiⁿyāⁿ ndaá yā 'viicu miiⁿ.

¹¹ Ní rey miiⁿ cheⁿe yā n'diichi yā 'iiⁿyāⁿ chí ndii yā invitado ní ndaācá yā 'áámá saⁿā chi nguée cánúúⁿ sá catecai sa yeⁿē naachi n'giindivaacu yā.

¹² Ní caⁿa yā chii yā saⁿā: N'diī amigo, ¿taācá chi ndāa nī 'muuⁿ chi nguée canúuⁿ nī catecai nī yeⁿē chí n'giindivaacú 'iiⁿyāⁿ? Saⁿā miiⁿ ní nguée nan'guεεcútaⁿa sa yeⁿe yā. ¹³ Tuu'mi ní rey miiⁿ

caⁿa yā chii yā mozos yeⁿe yā: 'Caāchiichí nī ca'a sa ndúúcū ta'a sa ní divíi nī saⁿā ndii 'múúⁿ ní 'cuεεcú nī saⁿā cuaaⁿ chuvá'āī na maāiⁿ. Mííⁿ cuεεcu sa ní ché'é 'diiⁿyuⁿ sa cuen'e daāⁿmaⁿ. ¹⁴ Jesús caⁿa ntúuⁿ yā chuū: Nééné 'yaaⁿ yā chí Ndyuūs 'cuai yā naati duu'ví yā chi Ndyuūs ndεεvé yā.

Chúⁿ chí ntiinguuneeⁿ yā yeⁿe asunto yeⁿe impuestos

(Mr. 12.13-17; Lc. 20.20-26)

¹⁵ Tuu'mi ní 'iiⁿyāⁿ fariseos cuen'é yā ní nduuvidaamá yā. Ní ndeé yā nguaaⁿ maáⁿ yā táácā cuuvi diiⁿ yā chí Jesús miiⁿ cástaⁿa nduudú yeⁿe yā chí caaⁿmáⁿ yā 'áámá nduudu yaadi. ¹⁶ Ní fariseos dicho'ó yā 'iiⁿyāⁿ yeⁿe yā ndúúcū 'iiⁿyāⁿ yeⁿe Herodes miiⁿ chí caaⁿmáⁿ yā Jesús: N'diī maestro, déénu 'nū chí n'diī ní 'áámá saⁿā chí n'dai. N'diī ní diiⁿ nī chí n'dáácā. Ní cuaacu níⁿnyúⁿ ngi'cueeⁿ nī yúúní yeⁿe Ndyuūs. Ní nguée 'va'a nī 'iiⁿyāⁿ ti nguée indeé nī cuidado táácā 'iiⁿyāⁿ. ¹⁷ Maaⁿ ní cúúví nī nús'uu: ¿De'ē inadacádíínuuⁿ nī? ¿'Áá

canéé nguūⁿ na ley chí nadíí^{vε} 'nū emperador César tuūmī ye^{n'}é 'nū o nguéé?

18 Jesús tuumicádíínuuⁿ yā chí 'ii^{n'}yāⁿ s'eeⁿ ní dííⁿ yā chí nguéé 'n'daācā ní ca^{n'}a yā chí yā 'ii^{n'}yāⁿ s'eeⁿ: ¿Dε'ē cúúví chí ne^{n'}e nī 'n'diichineéⁿ nī 'úú? Ndís'tiī ní vεε 'uūví chí nadacadíínuuⁿ nī. 19 Tée nī tuūmī chí nadíí^{vε} nī ye^{n'}e impuesto. 'Ii^{n'}yāⁿ s'eeⁿ ní ch'i^{n'}i yā 'áámá tuūmī Jesús miiⁿ. 20 Tuu'mi ní Jesús miiⁿ ca^{n'}a yā chí yā 'ii^{n'}yāⁿ s'eeⁿ: ¿Du'u nááⁿ chí canéé ná tuūmī? ¿Du'ū chí nguúví cánéé nguūⁿ?

21 'Ii^{n'}yāⁿ s'eeⁿ ní ca^{n'}a yā: Naaⁿ emperador César cānee. Ní Jesús ca^{n'}a yā chí yā 'ii^{n'}yāⁿ s'eeⁿ: Nca'a nī tuūmī emperador César chííⁿ chí ye^{n'}é sa ní ca'a nī Ndyuūs chí ye^{n'}e Ndyuūs.

22 Taachí ch'iindiveéⁿ yā chuū, che^{n'}e yiinu yā ní cue^{n'}e yā.

Chiiⁿ chí ntiinguuneéⁿ yā ye^{n'}e chí 'ii^{n'}yāⁿ nduuchi yā ye^{n'}e nguaaⁿ tiná^{n'}ā

(Mr. 12.18-27; Lc. 20.27-40)

23 Nguuvi miiⁿ 'ii^{n'}yāⁿ saduceos ndaá yā nanááⁿ Jesús miiⁿ. 'Ii^{n'}yāⁿ saduceos nga^{n'}a yā chí nguéé índuuchi 'ii^{n'}yāⁿ ye^{n'}é nguaaⁿ tiná^{n'}ā. Ní ntiinguunéⁿ yā Jesús, 24 ní ca^{n'}a yā: N'diī maestro, Moisés miiⁿ ca^{n'}a sá chí 'āā du'ú nūⁿ sa^{n'}ā chí 'cuūví sa ní nguéé ch'iindī daiya n'daataá ye^{n'}é sa tuu'mi ní 'dīnū sa 'caandavaacu sa ndúúcu n'daataá mííⁿ. Ní sa^{n'}ā miiⁿ ní 'cuūndī daiya sá lado ye^{n'}é 'dīnu tiná^{n'}ā. 25 Maaⁿ ní v'éé ndεēchē sá^{n'}a nūⁿ ye^{n'}é chεécú sa ye^{n'}é chiidá sa. Sá^{n'}ā vmnaaⁿ miiⁿ ní ch'iindivaacu sa ní ch'iī sa. Ní nguéé daiya n'daataá ye^{n'}é sa. Ní canee n'daataá ye^{n'}é sa. Ní 'dīnu sa ní canee sá ndúúcu tá. 26 'Tiicá ntúūⁿ chó'ōo ye^{n'}é ndii chíiⁿ ndii 'uuvi sa^{n'}ā. 'Tiicá ntúūⁿ

chó'ōo yeⁿe saⁿā chi ndii 'iīnū. 'Tiicá ntúūⁿ chó'ōo yeⁿē saⁿ'a s'eeⁿ nduu ndεεchē sa. ²⁷ Ndíí ná ch'iinú ní ch'iī ntúūⁿ n'daataá miiⁿ. ²⁸ Taachí nduuchi 'iīⁿ'yāⁿ yeⁿe nguaaⁿ tináⁿā, naachí ndεεchē saⁿā s'eeⁿ ní ζchεε sa chí n'daataá yeⁿē sa táⁿā caati nducyaaca sá canee sá ndúúcu tá?

²⁹ Tuu'mi ní Jesús miiⁿ ní nan'guεεcútaⁿ'a yā ní caⁿ'a yā chii yā 'iīⁿ'yāⁿ s'eeⁿ: Ndís'tiī ní nguéeé n'daācā nadicádiinuuⁿ nī, ti nguéeé déénu nī taacā ngaⁿ'a na libro yeⁿ'é Ndyuūs naachi canée nguūⁿ. Ndíí nguéeé ndúú déénu nī poder yeⁿ'é Ndyuūs. ³⁰ Ti naachí nduuchi 'iīⁿ'yāⁿ yeⁿe nguaaⁿ tináⁿā, nguéeé 'caandavaacú yā. Ndíí nguéeé ca'a ra yā chí 'caandavaacu daiya yā ti cuuví yā tan'dúúcā ángeles chi dichí'vε Ndyuūs chi canée yā na va'ai chεεtí nguuvi. ³¹ Naati yeⁿē chí nduuchi yā yeⁿe nguaaⁿ tináⁿā, ζ'áá nguéeé n'geeⁿ nī chi maán Ndyuūs caⁿ'a yā yeⁿē taachí caⁿ'a yā 'túúcā?: ³² 'Úú ní Ndyuūs yeⁿē Abraham ndúúcū Isaac ndúúcū Jacob. Ndyuūs miiⁿ ní nguéeé Ndyuūs yeⁿe tináⁿā ti yeⁿ'é 'iīⁿ'yāⁿ chi sндуuchi.

³³ Taachí nducyaaca 'iīⁿ'yāⁿ ch'iindiveéⁿ yā chuū, cheⁿ'e yiinú yā yeⁿē nduudu yeⁿ'e Jesús miiⁿ tan'dúúcā chi ngi'cueeⁿ yā.

*Mandamiento chi ch'εεε ca
(Mr. 12.28-34)*

³⁴ Tuu'mi ní saⁿā fariseos taachí ch'iindiveéⁿ yā yeⁿ'e chi Jesús dííⁿ yā, 'iīⁿ'yāⁿ saduceos 'āā ntéeⁿ caⁿ'a yā ndúúcū Jesús miiⁿ, fariseos miiⁿ nduuvidaamá yā. ³⁵ 'Áámá saⁿ'a fariseo abogado chí ngi'cueeⁿ sa chí ngaⁿ'ā ley miiⁿ neⁿ'e sa n'diichinééⁿ sa Jesús ní ntiinguunéeⁿ sa 'iīⁿ'yāⁿ. Ní caⁿ'a sá chii sa Jesús:

36 N'diī Maestro, ¿cheé mandamiento chí ch'εεε n'dai ca yeⁿ'ē na ley yeⁿ'ē Moisés?

37 Jesús caⁿ'a yā chii yā saⁿ'ā: Dinéⁿ'e di Señor Ndyuūs yeⁿ'ē di ndúúcū núúⁿmáⁿ stáává yeⁿ'ē di ndúúcū núúⁿmáⁿ alma yeⁿ'ē di ndúúcū núúⁿmáⁿ vaanicadínūuⁿ yeⁿ'ē di. 38 Chuū chí vmnaaⁿ ní ch'éétē ca chí cuuvi tanáⁿ'ā mandamientos. 39 Ndiichi ndii 'úúví tan'dúúcā chí vmnááⁿ vmnaaⁿ: Dinéⁿ'e di 'iiⁿ'yāⁿ na niiⁿnuúⁿ vaacú di tan'dúúcā chí neⁿ'e dí maāⁿ di. 40 Yeⁿ'ē ndúú 'uūvī mandamientos miiⁿ canee tanducuéⁿ'ē yeⁿ'e ley Moisés miiⁿ ndúúcū nduudu chí ngaⁿ'a profetas ndii cuááⁿ vmnaaⁿ.

*¿Du'u 'iiⁿ'yāⁿ chí daiya Cristo?
(Mr. 12.35-37; Lc. 20.41-44)*

41 Taachí 'iiⁿ'yāⁿ fariseos ndiidáámá yā Jesús ntinguuneeⁿ yā fariseos, 42 ní caⁿ'a yā chii yā 'iiⁿ'yāⁿ s'eeⁿ: ¿De'ē nadicádínūuⁿ ndís'tiī yeⁿ'e Cristo? ¿Du'ū daiyá 'iiⁿ'yāⁿ 'cúū? Ní fariseos caⁿ'a yā chii yā: Daiya David miiⁿ.

43 Ní Jesús caⁿ'a yā chii yā fariseos: ¿Táácā cuuvi David miiⁿ na espíritu yeⁿ'e sa ní caⁿ'a sa chí Cristo ní Señor? Ní caⁿ'a yā chuū:

44 Caⁿ'a Señor Ndyuūs miiⁿ chii yā Señor Cristo yeⁿ'é: 'Cuūndi di lado tá cuaacú chí lado yeⁿ'e honor ndí 'úú cu'neéⁿ 'iiⁿ'yāⁿ chí contra yeⁿ'ē di cuaaⁿ ndii yā na ca'a di tan'dúúcā chí enemigos ní 'áámá banco 'líí.

45 Maaⁿ ní nduuti chí David miiⁿ caⁿ'á yā yeⁿ'e Cristo chí Señor yeⁿ'é yā, ¿táácā cuuvi chí chí Señor miiⁿ ní daiya David 'iiⁿ'yāⁿ?

46 Mar 'aámá 'iiⁿ'yāⁿ nguéé cuuvi nan'guεεcútaⁿ'a yā yeⁿ'ē mar 'aámá. Ndíí nguuvi miiⁿ s'neeⁿ naaⁿ yā ntiinguuneeⁿ yā Jesús miiⁿ.

23

Jesús ngaⁿ'a yā chi dííⁿ yā cuidado yeⁿ'e maestros chi ngí'cueeⁿ ley ndúú^{cū} 'iiⁿ'yāⁿ fariseos

(Mr. 12.38-40; Lc. 11.37-54; 20.45-47)

¹ Jesús yaaⁿ'vi yā 'iiⁿ'yāⁿ ndúú^{cū} discípulos yeⁿ'e yā ní caⁿ'a yā: ² Maestros chi ngí'cueeⁿ ley ndúú^{cū} 'iiⁿ'yāⁿ fariseos, 'iiⁿ'yāⁿ s'uuⁿ deenu n'dai yā ní ngí'cueéⁿ yā ní caaⁿ'maⁿ cuaacú yā ley yeⁿ'e Moisés. ³ Tiicá ntúūⁿ cu'téenu ndís'tiī ní dííⁿ nī tan'duucā 'iiⁿ'yāⁿ s'eeⁿ ngaⁿ'a yā, naati nguéé dííⁿ nī tan'dúú^{cā} 'iiⁿ'yāⁿ s'eeⁿ idiíⁿ yā tí 'iiⁿ'yāⁿ s'eeⁿ ní ngaⁿ'a yā yeⁿ'e ley naati nguéé 'tíicā idiíⁿ yā. ⁴ 'Iiⁿ'yāⁿ s'eeⁿ ní dííⁿ yā tan'dúú^{cā} chi 'caachiichí yā chεεdi chi n'gii taaví chi 'iiⁿ'yāⁿ nguéé cuchée yā ní ngaⁿ'á yā chi 'iiⁿ'yāⁿ canéé chí cuchée yā. Naati 'iiⁿ'yāⁿ s'eeⁿ maáⁿ yā ndíí nguéé neⁿ'é yā 'neeⁿ nduutitá'a yā chi tuuⁿ'vi yā chεεdi miiⁿ ní dííⁿ yā. ⁵ 'Iiⁿ'yāⁿ s'eeⁿ ní idiíⁿ yā nducuén'ē ntiiⁿnyuⁿ yeⁿ'e yā caati tanáⁿ'ā 'iiⁿ'yāⁿ snáaⁿ yā ní n'diichí yā táacā idiíⁿ yā. Neⁿ'é yā candεε yā chi canéé nguⁿ chi yeⁿ'ē Nduudu yeⁿ'e Ndyuūs ní s'neeⁿ yā 'aámá caja 'lííⁿ ní dich'iichí yā 'aámá yiiⁿmaⁿ ní s'neeⁿ yā maaⁿ ta'a yā ní nchεεté yā. Ní n'gεēti núuⁿ yā vestido yeⁿ'e yā chí n'geē 'nūuⁿ ca. ⁶ 'Iiⁿ'yāⁿ s'eeⁿ ní neⁿ'e yā 'cuundí yā sillas chí yeⁿ'e 'iiⁿ'yāⁿ ch'εεte taachi caⁿ'á yā 'aámá 'viicu chí che'é yā. Ní neⁿ'e yā 'cuundí yā sillas yeⁿ'e honor chi vmnááⁿ vmnaaⁿ ná yáacu sinagogas. ⁷ Ní neⁿ'e yā chí tanáⁿ'ā 'iiⁿ'yāⁿ diiⁿ n'daacá yā ní diiⁿ yā saludar 'iiⁿ'yāⁿ taachi sneé

yā cuaaⁿ nii^vēē ní neⁿ'e yā chí 'iiⁿ'yāⁿ caaⁿ'máⁿ yā, maestro, maestro, taachi díⁿ yā saludar 'iiⁿ'yāⁿ.

⁸ Naati ndís'tiī ní nguéé neⁿ'e nī chí caaⁿ'maⁿ 'iiⁿ'yāⁿ yeⁿ'e nī maestro ti 'áámá 'iiⁿ'yāⁿ nūuⁿ chí maestro ní 'iiⁿ'yāⁿ miiⁿ chí Cristo. Ní nducyaaca ndís'tiī ní hermanos yeⁿ'e nī viⁱ. ⁹ Nguéé caaⁿ'maⁿ nī yeⁿ'ē mar 'áámá 'iiⁿ'yāⁿ yeⁿ'e yáⁿ'āa 'cúū: N'diī chiiduú padre, ti dámaāⁿ 'áámá chí Chiida yú chí Ndyuūs chí canéé na va'ai chεeti nguuvi. ¹⁰ Ndíí nguéé ndúú caaⁿ'maⁿ rá yā yeⁿ'e nī: Maestro, ti 'áámá chí maestro yeⁿ'e nī chí Cristo. ¹¹ 'Iiⁿ'yāⁿ chí ch'εεε ca yā yeⁿ'é nī canee chí dichí^vε yā ndís'tiī. ¹² Ní 'iiⁿ'yāⁿ chí díⁿ yā chí cuuví ch'εεε maáⁿ yā, 'iiⁿ'yāⁿ miiⁿ cuuví ndiicuúⁿ yā. 'Iiⁿ'yāⁿ chí idiíⁿ yā chí maáⁿ yā ndiicuúⁿ yā, cuuví ch'εεé yā.

Jesús caaⁿ'máⁿ yā yeⁿ'e nuuⁿndi yeⁿ'e 'iiⁿ'yāⁿ fariseos

(Mk. 12.40; Lc. 11.39-42, 44, 52; 20.47)

¹³ Naati de^ε chúúcā ya'ai yeⁿ'é ndis'tiī, maestros chí ngi'cueeⁿ ley ndúúcū 'iiⁿ'yāⁿ fariseos, ndís'tiī 'uūvī naaⁿ 'uūvī cheendí nī, ti nguéé ngi'cueeⁿ nī yeⁿ'e naachí Ndyuūs ngaⁿ'a ntiiⁿnyúⁿ yā nanááⁿ 'iiⁿ'yāⁿ yeⁿ'e in'yeeⁿdí 'cūū. Ndíí nguéé ndúú maaⁿ ndís'tiī cundáa nī va'ai chεeti nguuvi. Ndíí nguéé n'guúⁿ nī tanáⁿ'ā 'iiⁿ'yāⁿ chí neⁿ'e ndaá yā chí cūndaa yā.

¹⁴ De^ε chúúcā ya'ai yeⁿ'ē ndís'tiī, 'iiⁿ'yāⁿ chí dingúūⁿ ní ngi'cueeⁿ nī ley ndúúcū 'iiⁿ'yāⁿ fariseos, ti ndís'tiī 'uūvī nááⁿ 'uūvī cheendí nī, ti ndivíi nī va'ai yeⁿ'ē n'daataá nguá'āa. Ní nééné n'deēe ngaⁿ'a nī taachi ngaⁿ'angua'á nī nanááⁿ nducyaaca

'ii'yān. 'Úú nga'n'á chi ch'εεε ca castigo ye'n'e nī nguuvī ye'n'e juicio.

15 De'ε chúúcā ya'ai ye'n'ē ndís'tiī, maestros chi ngi'cuee'n ley ndúúcū ndís'tiī 'ii'yān fariseos ti ndís'tiī 'uūvī naa'n 'uūvī cheendí nī. Ndís'tiī ní chiicá nī ndíí yá'n'āa ya'n'ai táámá lado nuū'nī'n'yá'n'ā ní díí nī chi 'áámá 'ii'yān i'téenu yā tan'dúúcā ndís'tiī. Ní taachí 'ii'yān cu'téenu yā tan'dúúcā ndís'tiī ne'n'é nī, idií nī chi 'ii'yān mii'n ní 'uūvī tanto cuuví yā ye'n'ē daiya infierno nguéé ti chi ndís'tiī. 16 De'ε chúúcā ya'ai ye'n'e ndís'tiī, chi ngi'cuee'n nī tan'dúúcā 'ii'yān chi ngueenáán. De'ε inadacádíínuu'n ndís'tiī. Nduuti chi 'áámá 'ii'yān ca'n'a yā chi díí yā 'áámá cosa ní 'cuai yā, “cáávā yaācū templo”, tuu'mi ní nguéé de'ε vεε nacádíínuu'n nī ye'n'e chuū, naati nduuti chi 'ii'yān 'cuai yā, “cáávā 'dii'nguaa'n” chi véé chεeti yaācū templo mii'n, tuu'mi ní 'ii'yān mii'n canee cuu'mi'n chi díí yā chi caa'n'mán yā chi ca'n'a yā chi dii'n yā. 17 Ndís'tiī ní 'ii'yān chi nguεε deenu ti tan'dúúcā 'ii'yān ngueenáán 'tiicá nī. ¿Chεε cá ch'εεε ca? ¿'Áá 'díí'nguāā'n mii'n o yāacū mii'n chí dii'n chi didεεve 'díí'nguāā'n mii'n cucááva Ndyuūs? 18 'Tiicá ntúū'n ndís'tiī: Ndúúti chi 'áámá 'ii'yān ca'n'a yā chi díí yā 'áámá cosa, ní n'gaí yā, “cáávā nátaí”, nguéé de'ε vεε nacadíínuu'n nī ye'n'ē. Naati ndúúti chi 'ii'yān n'gaí yā, “cáávā ofrenda” chi candúú vmnáán ye'n'ē nátaí, tuu'mi ní 'ii'yān mii'n canee cúú'mí'n chi díí yā chi ca'n'a yā chi dii'n yā. 19 Ndís'tiī ní tan'dúúcā 'ii'yān chi chεεchí tiī'n o 'ii'yān chi ngueenáán, 'tiicá nī ti ¿chεé ca chi ch'εεε ca? ¿'Áá ofrenda mii'n o nátaí chi dii'n chí ofrenda mii'n ní didεεve cucáávā Ndyuūs? 20 'Tíicā. 'Ii'yān chí

n'gai yā, “cáávā nataī”, n'gai yā cáávā nátaī ndúúcū tanducuén'ē chi cánduū nátaī. ²¹ 'Iiⁿ'yāⁿ chí n'gai yā, “cáávā yaācū templo”, nguéé dámaāⁿ ngaⁿ'a yā cáávā yaācū templo miiⁿ naati cáávā maáⁿ Ndyuūs chi canéé na yaācū templo miiⁿ. ²² 'Iiⁿ'yāⁿ chí n'gai yā, “cáávā va'ai chεεti nguuvi”, n'gai yā cáávā trono yeⁿ'e Ndyuūs ní cáávā Ndyuūs chi véε yā na trono miiⁿ.

²³ Dε'ε chúúcā ya'ai yeⁿ'e ndís'tii, maestros chi ngi'cueén yā ley ndúúcū 'iiⁿ'yāⁿ fariseos, ndis'tiī 'uuvi naaⁿ 'uūvī cheendí nī. Ndís'tiī ní nga'á nī Ndyuūs 'áamá ndiichi parte yeⁿ'e yaātā chí yiivií, ndúúcū yaāta anís, ndúúcū yaātā comino. Ní ndís'tiī ní s'néeⁿ nī 'aama lado cosas chi n'gεεte ca yeⁿ'e na ley, chíiⁿ chí n'diichí nī nuuⁿndi yeⁿ'e 'iiⁿ'yāⁿ ndúúcū vaadī cuaacu ndúúcū vaadī ya'ai 'iinu ndúúcū vaadī i'téenu. Chuū canee chí díiⁿ nī ní díiⁿ nī táámá naaⁿ dendu'ū. ²⁴ Ndís'tiī 'iiⁿ'yāⁿ chí tan'dúúcā chí ngeenááⁿ chí candεε nī 'iiⁿ'yāⁿ. Díiⁿ nī tan'dúúcā chí i'yaáⁿ nī 'áámá 'yaācū yeⁿ'e nuūⁿnīⁿ chí cu'ú nī naati cu'ú nī 'iiti camello chí ch'εεε.

²⁵ Dε'ε chúúcā ya'ai yeⁿ'e ndís'tiī, maestros yeⁿ'e ley ndúúcū 'iiⁿ'yāⁿ fariseos, ndís'tiī ní 'uūvī naaⁿ 'uūvī cheendí nī, ti inadεεvé nī cuaaⁿ daami yeⁿ'e vaso ndúúcū cu'u, chí tan'dúúcā cuerpo yeⁿ'e maáⁿ nī, naati cuááⁿ chεētí nī ní ndiituú ndúúcū chí diduucú nī ndúúcū tanducuén'ē chí nguεε n'daācā. ²⁶ 'Caandiveén nī ndís'tiī 'iiⁿ'yāⁿ fariseos chí tan'dúúcā chí ngeenááⁿ. Díiⁿ cá nī chí didεεvé nī chí cuaaⁿ chεεti vaso ní 'tiicá ntúūⁿ cu'u, tuu'mi ní cuuvi dεεvé nī cuaaⁿ chuváⁿ'āi vaso miiⁿ.

²⁷ Dε'ε chúúcā ya'ai yeⁿ'e ndís'tiī, maestros yeⁿ'e

ley ndúúcū 'iiⁿ'yāⁿ fariseos, ndís'tiī 'uuvī naaⁿ 'uūvī cheendí nī, ti ndís'tiī ní tan'dúúcā yaīnyāⁿ 'cuéē chí cuaaⁿ daami mīíⁿ n'dεεvεé chí nneⁿ'ē yaāchī caaca, ti cuaacu níⁿ'nyúⁿ cuááⁿ chεētí miiⁿ ndiituú 'iini yeⁿ'ē tináⁿ'ā ndúúcū taanduvεé cosas chí vaati. ²⁸ 'Tíicā ndís'tiī ti cuaacu níⁿ'nyúⁿ n'giⁿ'i nī 'iiⁿ'yāⁿ chí ndís'tiī ní saⁿ'ā chí n'dai ndís'tiī naati cuaaⁿ chεētí nī ndiituú ndúúcū nduudu yaadi ndúúcū nuuⁿndi.

²⁹ Dε'ε chúúcā ya'ai yeⁿ'ē ndís'tiī, maestros yeⁿ'e ley ndúúcū 'iiⁿ'yāⁿ fariseos, 'iiⁿ'yāⁿ 'uūvī naaⁿ 'uūvī cheendí nī, ti idin'dái nī yaīnyāⁿ yeⁿ'ē profetas ní n'dεεvε nī yaīnyāⁿ yeⁿ'e 'iiⁿ'yāⁿ chí n'dai taachi snēe yā iⁿ'yeeⁿ'dí 'cūū. ³⁰ Ndís'tiī ní ngaⁿ'á nī 'tíicā: Ndúúti chí nús'uu ch'εεtinée 'nū tiempo chí ch'εεtinée chiidá 'nū cuááⁿ vmaaaⁿ, nguéé chinnee 'nū ch'iīⁿ'núⁿ 'nū profetas taachi cungéē yuūuⁿ yeⁿ'e yā. ³¹ 'Tíicā ndís'tiī ní ngaⁿ'á nī nduudu cuaacu yeⁿ'ē maáⁿ nī ti ndís'tiī ní dáiyá 'iiⁿ'yāⁿ chí ch'iīⁿ'nuⁿ yā profetas. ³² Ndís'tiī ní canéé chí dííⁿ nī tan'dúúcā chiidá nī.

³³ Ndís'tiī ní tan'dúúcā cúú 'tíicā ndáátá yeⁿ'e nī. ¿Táácā cuuvi nguáⁿ'ai nī yeⁿ'e castigo yeⁿ'e infierno? ³⁴ Cáávā chuū 'úú ní dicho'ó nanááⁿ ndís'tiī profetas chí candεε yā Nduudu yeⁿ'é Ndyuūs, ndúúcū 'iiⁿ'yāⁿ chí déenū, ndúúcū 'iiⁿ'yāⁿ chí ngi'cueeⁿ ley. N'dúúví 'iiⁿ'yāⁿ s'eeⁿ ní ndís'tiī ní chíta'á nī 'iiⁿ'yāⁿ ní chí'neeⁿnga'á nī 'iiⁿ'yāⁿ. Tá n'duuvi yā ní ch'eⁿ'é nī 'iiⁿ'yāⁿ na yaācū sinagogas yeⁿ'e nī ní can'dáa nī 'iiⁿ'yāⁿ ndii na 'áámá yáāⁿ táámá yáāⁿ chí ch'eenú yā chii. ³⁵ Ní ndís'tiī ní ca'á nī cuenta yeⁿ'é nducuéⁿ'e yuūúⁿ yeⁿ'e 'iiⁿ'yāⁿ chí n'dai chí 'iiⁿ'yāⁿ yeⁿ'é nī ch'iīⁿ'núⁿ yā 'iiⁿ'yāⁿ na

yáⁿáa 'cūū ndii yuūúⁿ yeⁿē Abel chí saⁿā n'dai ndii yuūúⁿ yeⁿe Zacarías daiya saⁿā Berequías chí ndís'tiī ch'iiⁿ'nuⁿ nī náávtaⁿā yeⁿē yaācū miiⁿ ndúúcū nátaī miiⁿ. ³⁶ Cuaacu níⁿnyúⁿ ngaⁿ'á ngíí ndís'tiī: Castigo yeⁿē tanducuéⁿē chuū canee vm-naaⁿ 'iiⁿ'yāⁿ chí snée yā maaⁿ tiempo 'cūū.

Jesús ngεεcu yā cáávā 'iiⁿ'yāⁿ yeⁿe yāāⁿ Jerusalén (Lc. 13.34-35)

³⁷ Ní ngaⁿ'a Jesús: Ndís'tiī 'iiⁿ'yāⁿ yeⁿe yāāⁿ Jerusalén, ndís'tiī 'iiⁿ'yāⁿ yeⁿe yāāⁿ Jerusalén, chí ch'iiⁿ'núⁿ nī 'iiⁿ'yāⁿ profetas ní chí chiītuúⁿ nī 'iiⁿ'yāⁿ chí Ndyuūs dicho'ó yā nanáaⁿ nī. Nééné n'deēe 'cuūví neⁿ'é nadaamá daiya nī tan'dúúcā tú'ū chí inadáámá tī daiya tī maaⁿ ngεεchi tī ní nguée 'cuuⁿ nī. ³⁸ Ndís'tiī, n'diichí nī. Ndyuūs chí'neeⁿ yā ndís'tiī ndúúcū vaacú nī dámaāⁿ. ³⁹ Ti 'úú ní ngaⁿ'á ngíí ndís'tiī, ti ndii maaⁿ ní 'āā ntée snaaⁿ nī 'úú ndíí ndaā tiempo taachí caaⁿ'maⁿ nī: De'ε chúúcā n'dai 'iiⁿ'yāⁿ chí cuchii yā ndúúcū chí duuchi Señor chí Daiyá Dendyuūs miiⁿ.

24

Jesús ngaⁿ'a yā chí yaācū templo miiⁿ ní ntuuvíí (Mr. 13.1-2; Lc. 21.5-6)

¹ Taachí Jesús miiⁿ nan'dáa yā yeⁿe yaācū templo cueⁿ'é yā. Discípulos yeⁿ'é yā ní ndaa yā nanáaⁿ yā ní n'giⁿ'i yā Jesús miiⁿ va'ai s'eeⁿ yeⁿe yaācū templo miiⁿ. ² Jesús miiⁿ ní n'guεεcútaⁿ'a yā ní caⁿ'a yā: ¿'Áá inaaⁿ ndís'tiī nducyáácá chuū? Cuaacu níⁿnyúⁿ ngaⁿ'á ngíí ndís'tiī, chí nguée cunee tuūu cuaaⁿ vmnaaⁿ yeⁿe ví'ī chí nguée ntuuvíí.

Jesús ngi'cueen yā de'ē chí cuuvi taachi 'āā ndaa nii'nuú' nguuví chí 'cuiinu i'nyee'di

(Mr. 13.3-23; Lc. 21.7-24; 17.22-24)

³ Jesús véε yā ná yiicū chí nguuvi Olivos. Discípulos ndaa yā nanáán yā taachi canee yā damáan yā ní ca'na yā chii yā Jesús: Cúúví nī nús'uu tíí cua'nā cuuví chuū. ¿De'ε señal 'cuu'mi' nī taachi 'āā ndaa nī taama vmné'ēe ní taachí 'cuiinu i'nyee'di?

⁴ Jesús nan'guεεcúta'na yā ye'ne yā ní ca'na yā: Cundéε nī cuidado chí mar 'áamá 'ii'yā' nguéé canche'éi yā ndís'tiī. ⁵ 'Yáán n'dái 'ii'yā' ndaa yā ndúúcū chí duuchí ní caa'ma' yā 'tíicā: 'Úú chí Cristo 'úú. Ní canche'éi yā 'yaa' n'dái 'ii'yā'. ⁶ Ní 'caandiveén nī chí véé caandaá ní 'caandiveén nī chí 'cuúndi caandaá. Cundéε nī cuidado chí 'ii'yā' s'ee' nguéé casta'na vaanicádinú'nye'ne nī ti canee chí chí'nducué'nē dendu'ū chí 'túúcā cuuvi, naatí 'āā cuéé chí 'āā 'cuiinu i'nyee'di. ⁷ Ti 'áamá nación 'cuu'ma' ndúúcū taama nación, ní 'áamá rey ndúúcū nducué'ne país naachi nga'na ntii'nyu' yā contra ye'ne taama rey ndúúcū nducué'ne país naachi chí nga'na ntii'nyu' yā. Ndaá tiempos chí cuiicu ndúúcū tiempos chí 'ii'yā' 'cuenú yā cuuvi cáávā chí ya'ai ye'ne yā, ní ndúúcū tiempos chí inu'nu yá'āa n'dee cuáán n'dai. ⁸ Taachí cuuví dendú'ū chí 'túúcā ní chíi tuu'mi ní cáámá cúūnga'a vaadi ya'ai.

⁹ Tuu'mi ní 'ii'yā' s'ee' ní nca'na yā ndís'tiī na ta'a 'ii'yā' chí 'cuenú nī cuuvi ní 'caa'nú' yā ndís'tiī. Ní nducyáácá 'ii'yā' nguéé cuaa' yā ndís'tiī caavā chí nga'na nī chí duuchí. ¹⁰ Ní tiempo mii'neené 'yaa' 'ii'yā' chí 'āā i'téenu yā ye'ne 'úú ní 'cuenú

yā cuuvi. Ní 'áámá yā caaⁿmaⁿ yā contra yeⁿe taama yā chí i'téenu yā. Ní 'āā ntéé neⁿé yā vi'ī.
 11 Ní néené 'yaaⁿ 'iiⁿ'yāⁿ profetas falsos chí nguéé ngaⁿ'a yā nduudu cuaacu yeⁿé Ndyuūs ndaa yā ní canche'éí yā 'yaaⁿ n'dái 'iiⁿ'yāⁿ. 12 Ní cáávā chí 'iiⁿ'yāⁿ neené dinuuⁿndí yā. 'Āā ntéé neⁿe yā 'áámá yā táámá yā vi'ī. 13 'Iiⁿ'yāⁿ chí cuchéε yā ní 'áámá i'téenu yā yeⁿé Ndyuūs ndii tiempo chí 'cuūvi yā ní nguáⁿ'ai yā. 14 Ní nduūdū cuaacú 'cūū chí ngai yeⁿé naachi Ndyuūs ngaⁿ'a ntiiⁿnyúⁿ yā 'iiⁿ'yāⁿ canéé chí caaⁿmaⁿ yā nanáán nducuéⁿ'ē iⁿ'yeeⁿdī. Ní nduudu cuaacu yeⁿé Ndyuūs ní cūnee chí 'caandiveén 'iiⁿ'yāⁿ yeⁿe tanducuéⁿ'ē nación yeⁿe núúⁿmaⁿ iⁿ'yeeⁿdī tuuⁿ'mi ní ndaa chí 'cuiinu iⁿ'yeeⁿdī.

15 Taachí ndís'tiī snaaⁿ nī tanducuéⁿ'ē chí cunncā ca tan'dúúcā chí dinguuⁿ profeta Daniel ndii cuááⁿ vmnaaⁿ taachi cheendíí yā na cuaaⁿ chí santo tuuⁿ'mi ní ndís'tiī ndúúcū 'iiⁿ'yāⁿ chí n'geen yā túúmícadíínuuⁿ yā yeⁿ'ē. 16 Ní tiempo yeⁿe chúū, 'iiⁿ'yāⁿ chí snée yā na yáⁿ'āa Judea cáánu yā caⁿ'á yā cuaaⁿ yiícū. 17 Ní 'iiⁿ'yāⁿ chí sndúu yā tíⁿ va'āī nguéé ngua'ái yā chí cuta'á yā 'tεε chí snúūⁿ chεeti va'āī ti cáánu yā. 18 'Iiⁿ'yāⁿ chí canée yā cuεeti nguéé nguεεcundíí yā na vaacu yā chí cuta'á yā tíínuuⁿ yeⁿe yā ti cáánu yā. 19 De'ε chúúcā ya'ai yeⁿ'ē n'daataá chí véé daiya tá chεeti tá ndúúcū n'daataá chí ngiicu dacua'āa yeⁿ'ē tá nguuvi s'een chí cáánu yā. 20 Caaⁿ'maⁿngua'á nī chí taachí ndaa nguuvi chí cáánu nī, nguéé tiempo chí 'iichε ndíí nguéé ndúú nguuvi sábadó chí ntaavi'tuunúúⁿ nī.
 21 Tuuⁿ'mi ní ndaa nguuvi chí néené 'cueenu cá

nī cuuvi chi nguée n'diichi nī, ndíí nguée ndúú ndíí naachi chinga'ā yeⁿe iⁿ'yeeⁿdī, ndíí mááⁿ, ndíí nguée ndúú snaaⁿ ra nī cuayiivi. ²² Ndúúti chí Ndyuūs nguée 'āā diduu'ví yā tiempo chi 'cueenu cá nī cuuvi mar 'áámá 'iiⁿ'yāⁿ nguée nguaⁿ'ai yā. Naati cáávā 'iiⁿ'yāⁿ chí Ndyuūs δεεεε yā, Ndyuūs diduu'ví yā tiempo miiⁿ.

²³ Tuu'mi ní ndúútī chi 'áámá 'iiⁿ'yāⁿ caaⁿ'maⁿ yā cuuvi yā ndís'tiī: Cuin'diichí nī, 'muuⁿ canee Cristo, o cuin'diichí nī, miiⁿ canée Cristo miiⁿ'ya, nguée cu'teenú nī 'iiⁿ'yāⁿ miiⁿ. ²⁴ Ti ndaá 'yaaⁿ n'dái 'iiⁿ'yāⁿ chí ngaⁿ'á yā chi Cristo yā naati nguée Cristo 'iiⁿ'yāⁿ s'eeⁿ. Ndaá 'yaaⁿ n'dái profetas falsos chi nguée caaⁿ'máⁿ yā nduudu cuaacu yeⁿé Ndyuūs. Ní 'iiⁿ'yāⁿ s'eeⁿ idiíⁿ yā señales chí n'gεεε ndúúcū vaadī n'giinu. Ní cannche'εί yā 'iiⁿ'yāⁿ ndíí 'iiⁿ'yāⁿ chi Ndyuūs δεεεε yā nduuti chi cuuví yā. ²⁵ 'Caandiveéⁿ nī. Āā ndíí vmaaaⁿ, 'āā ngaⁿ'á ngii chuū ndís'tiī. ²⁶ Ndúúti chí 'iiⁿ'yāⁿ caaⁿ'maⁿ yā cuuvi yā ndís'tiī 'tíicā: Cuin'diichí nī, Cristo canée yā na yáⁿ'āa cuūⁿmáⁿ, nguée caⁿ'á nī miiⁿ. O nduuti chí caaⁿ'máⁿ yā: Cuin'diichí nī, Cristo canée yā ná 'aama cuarto cheεti va'ai, nguée cu'téenu nī. ²⁷ Tan'dúúcā 'cuai chí ngiyya cuááⁿ naachi ican'daa 'yáⁿ'ā ní inaaⁿ yú ndíí taachi ndaā cuaaⁿ na ngiyya 'yáⁿ'ā, 'tiicā ntúūⁿ cuuvi taachí 'úú nndaá, 'úú chí Saⁿ'ā chí Daiya Ndyuūs. ²⁸ Tí 'āā tíí nūuⁿ naachi candiiti cuerpo yeⁿe tináⁿ'ā, mííⁿ nduuvidaama luutí.

*Taaca ndaá Saⁿ'a chí Daiya Ndyuūs
(Mr. 13.24-37; Lc. 21.25-28)*

29 Jesús ca'n'a yā: Tuu'mi ní taachi 'cuiinu 'cuenen yā cuuvi ní ch'ó'ōo tiempo miiⁿ, tuu'mi ní 'yá'n'ā ní cuuvi maāiⁿ, ní 'iiyū miiⁿ ní nguéé cunuūⁿ δεεβε. 'Ii'nyuⁿ ní cun'daā yeⁿ'ē nanguuvi ní nanguuvi ní nuⁿ'u ndúúcū poder yeⁿ'ē. 30 Tuu'mi ní snaāⁿ yā señales nanguuvi chí yeⁿ'e Saⁿ'ā chí Daiya Ndyuūs. Ní nducyáácá 'iiⁿ'yāⁿ yeⁿ'e nducuéⁿ'ē naciōn yeⁿ'ē iⁿ'yeeⁿdī ní cuεεcú yā ní snaaⁿ yā chí ndaā Saⁿ'ā chí Daiya Ndyuūs na meēéⁿ yeⁿ'e nanguuvi ndúúcū poder yeⁿ'e yā ndúúcū chíδεεvé n'dai yeⁿ'e maāⁿ yā. 31 Taachí dich'ó'o yā ángeles yeⁿ'e yā, tuu'mí nūuⁿ áámá yā ní dí'cuεεcú yā trompeta yeⁿ'e yā. Ní ángeles miiⁿ nadáámá yā 'iiⁿ'yāⁿ chí yeⁿ'e Cristo chí Cristo ndεεβε yā yeⁿ'e cuaaⁿ núúⁿ máⁿ yáⁿ'āa 'cūū ndii 'áámá 'diituú ndii táámá 'diituú yeⁿ'ē nanguuvi.

32 Cuayivi miiⁿ ní Jesús ca'n'a yā: 'Cueén nī ejemplo yeⁿ'ē yáⁿ'á yeⁿ'e n'guíídī yaaⁿ nguuvi taachí ínnguaaⁿnu duūⁿnē n'gaiyāā ní ican'daā tá'āā 'āā déénu nī chí 'āā cuchii yāāāⁿ. 33 'Tiicá ntūūⁿ, ndís'tiī, taachí snaaⁿ nī tanducuéⁿ'ē chúū, 'āā deenú nī chí 'āā cháā ndaa Saⁿ'ā chí Daiya Dendyuūs. Ní 'āā neené niiⁿnuúⁿ cánéé tiempo chí ndaa sa. 34 Cuaacu nííⁿnyúⁿ ngaⁿ'á ngii ndís'tiī, chí 'iiⁿ'yāⁿ chí snée yā maaⁿ nguéé 'cuūvi yā neⁿ'e chí 'āā cuéé cuuvi tanducuéⁿ'ē chuū. 35 Nanguuvi ndúúcū yáⁿ'āa 'cūū ch'ó'ōo naati nduudu yeⁿ'é nguεε ch'ó'ōo.

36 Naati nguuvi miiⁿ ndúúcū hora miiⁿ taachí ndaa Saⁿ'ā chí Daiya Dendyuūs, nguεε véé mar 'áámá 'iiⁿ'yāⁿ chí deenú yā yeⁿ'e, ndíí nguéé ndúú ángeles yeⁿ'e va'ai chεeti nguuvi, ti dámaaⁿ Ndyuūs Chiidá deenú yā.

³⁷ Tan'dúúccā chí chiī tiempo chi 'āā chó'ōo taachi canéé Noé miiⁿ tiempo taachi chó'ōo diluvio, 'tíicā cuuvi taachí ndaā Saⁿ'ā chi Daiya Dendyuūs. ³⁸ Ní tiempo taachi 'āā cuéé chó'ōo diluvio chi cueeⁿ taaⁿ cuūvī, 'iiⁿ'yāⁿ ní ngé'e yā, ní ngi'i yā, ní n'giindivaacu yā, ní nga'a yā daiya yā chí n'giindivaacu, ndíí nguuvi chi Noé miiⁿ sndaā yā na arca chi barco ch'εεεε ca chí din'dái yā. ³⁹ Ní 'iiⁿ'yāⁿ yeⁿ'e tiempo yeⁿ'e Noé nguéé s'neeⁿ veéⁿ yā ndíí taachi cheeⁿ taaⁿ cuūvī ní ch'iinū nducyááccá 'iiⁿ'yāⁿ ti ch'iī yā. 'Tiicá ntúūⁿ cuuvi taachí ndaa Saⁿ'ā chi Daiya Ndyuūs. ⁴⁰ Tuu'mi ní nguuvi taachi nndaā Daiya Ndyuūs snéé 'uūvī saⁿ'ā na cuεεti. 'Aama saⁿ'ā ní Cristo candéε yā saⁿ'ā, taama saⁿ'ā ní cūnee sa. ⁴¹ Ní na 'uūvī n'daataá snee ta ingúú tá 'áámá va'aī naachi ingúú yā. 'Aama tá ní candéε yā táⁿ'ā, taama ta ní cūnee ta.

⁴² Ndís'tiī cundéε nī cuidado, ti nguεε déénu nī de'ē hora chi nndaá Señor yeⁿ'e nī. ⁴³ Naati déénu nī chuū. Ndúúti chí saⁿ'ā n'dai chí vaacu sa miiⁿ déénu sa de'ē hora ndaa chí duucu tuu'mi ní canduuchi sa. Ní nguéé ca'a sa lugar chí diduucú yā chí véé chεεti vaacu sa. ⁴⁴ Chííⁿ chí ndís'tiī ní 'cuεεtinéé yaaⁿ nī ti Saⁿ'ā chí Daiya Ndyuūs miiⁿ ndaa yā hora chí ndís'tii nguéé déénu nī.

Ejemplo yeⁿ'e mozo chí n'daāccā ní yeⁿ'e mozo chí nguéé n'daāccā

(Lc. 12.41-48)

⁴⁵ Caⁿ'a Jesús: ¿Du'ú dueño caⁿ'a yā ntiinnyuⁿ chí s'nee yā vmaaaⁿ yeⁿ'e va'ai yeⁿ'é yā nduuti chí nguéé 'aama mayordomo chí n'daāccā n'dai ní deenu sa ní ca'a sa chí che'e mozos yeⁿ'é yā

hora chi che'e sa? ⁴⁶ Dε'ε chúúcā n'dai mayordomo miiⁿ chí diiⁿ sa ntiiⁿnyuⁿ taachi dueño miiⁿ ní ndāa yā ní ndaaca yā mayordomo chí diiⁿ sa tan'dúúcā chi neⁿ'e yā. ⁴⁷ Cuaacu níⁿnyúⁿ ngaⁿ'á ngii ndís'tiī, chí dueño miiⁿ cu'néeⁿ yā mayordomo miiⁿ chí caaⁿ'maⁿ ntiiⁿnyuⁿ sa yeⁿ'ē chí véé yeⁿ'e yā. ⁴⁸ Ndúúti chi mayordomo miiⁿ ní nguéeⁿ n'dáacā idiiⁿ sá ní 'íícú nacádíínuuⁿ sa na staava yeⁿ'ē sa chi dueño cuuvi 'náaⁿ yā ní ndaa yā. ⁴⁹ Ní tucá'a sa ch'eⁿ'e sa mozos chí idiiⁿ sa ntiiⁿnyuⁿ ndúúcu sa ní ngé'e sa ní ngi'i sa ndúúcū amigos yeⁿ'e sa ní cuu'vi sa. ⁵⁰ Dueño miiⁿ ní ndaá yā nguuvi chi nguεε canéé ngíínú sa ní hora chi nguεε deenu sa. ⁵¹ Ní dueño miiⁿ ní ca'á yā 'aama castigo ch'εεεε mayordomo miiⁿ. Ní 'caacá yā mayordomo chi cheeyē ní cu'neeⁿ yā mayordomo miiⁿ chuva'āi ndúúcū 'iiⁿyāⁿ 'uuvi nááⁿ 'uūvī cheendi yā. Lugar miiⁿ ní cuεεcu sa ní che'e 'diiⁿyuⁿ sa cuen'e daāⁿmaⁿ.

25

Ejemplo yeⁿ'e ndiichi n'daataá chi cuíínuú

¹ Jesús caⁿ'a yā taama ejemplo: Naachí Ndyuūs ngaⁿ'a ntiiⁿnyúⁿ yā na va'ai chεeti nguuvi tan'dúúcā ndiichi n'daataa chi cuíínuú chí sta'á yā lámparas yeⁿ'e yā ní can'dáa yā. Ní cuen'e yā ndaāca yā saⁿ'ā chí 'caandavaacú sa. ² Ní nyuⁿ'u yā candéē n'daāca yā cuidado ti lista yā. Tá nyuⁿ'u yā nguéeⁿ candéε yā cuidado ní diiⁿ yā tan'dúúcā chí n'daataá tonta yā. ³ N'daataa chí cuíínuú chí nguéeⁿ candéε yā cuidado, candéε yā lámparas yeⁿ'e yā ní nguéeⁿ candéε yā petróleo yeⁿ'ē. ⁴ Ní nyuⁿ'u yā ní candéε n'daacá yā cuidado, candéε yā

botellas yeⁿe petróleo ndúúcu yā ndúúcū lámparas yeⁿe yā. ⁵ Ní chi'naaⁿ saⁿ'ā miiⁿ chi ndaa sa chi 'caandavaacu sa. Ní taachi 'āā cuéé ndaa sa, n'daataá s'eeⁿ chi ndaā yááⁿ nááⁿ yā ní ch'εεti yaadú yā. ⁶ Chí maⁿ'ā yaaⁿ, ch'iindiveéⁿ yā 'áámá nduudu chí 'caī. Ní ngaⁿ'a yā: Ndaa sáⁿ'ā chí 'caandavaacu sa. Can'dáa nī ní dííⁿ nī recibir saⁿ'ā. ⁷ Tuu'mi ní nducyaaca chí cuíínuú s'éeⁿ nducueeⁿ yā ní nuuⁿ'mí yā lámparas yeⁿe yā. ⁸ Chí cuíínuú chí nguéé lista yā caⁿ'a yā chíi yā chí cuíínuú chí lista yā: Téé nī 'téé petróleo yeⁿ'é nī nús'uu ti lámparas yeⁿ'é 'nū 'āā cháā 'āā n'tuuvi. ⁹ Chí cuíínuú chí candεε yā petróleo n'guεεcútaⁿ'a yā ní caⁿ'a yā chíi yā tanáⁿ'a yā: Nguéé cuuvi teé 'nū ndís'tiī. Nús'uū ní neⁿ'e cá 'nū petróleo chí candεé 'nū ní 'íícú 'áátī nguéé cuuvi falta yeⁿ'e yú. N'dáaca ca yeⁿ'e ndís'tiī chí caⁿ'a nī naachí in'diicuí yā petróleo ní cuái nī yeⁿ'é nī. ¹⁰ Neⁿ'e chí n'daātā s'eeⁿ chí nguεε lista yā cueⁿ'e yā cuái yā petróleo miiⁿ, saⁿ'ā chí 'caandavaacu sa ndaa sa ní chí cuíínuú chí candεε n'daacá yā cuidado cueⁿ'é yā ndúúcū saⁿ'ā naachí n'giindivaacu 'iiⁿ'yāⁿ. Ní saⁿ'ā miiⁿ nan'gaādí sá cheendi va'āi miiⁿ. ¹¹ Cuayiivi miiⁿ ní ndaā tanáⁿ'ā chí cuíínuú s'eeⁿ ní caⁿ'a yā: N'diī Señor, Señor, nan'guaaⁿ nī yeⁿ'é 'nū. ¹² Naati saⁿ'ā miiⁿ chí 'caandavaacu sa ní nan'guεεcútaⁿ'a yā ní caⁿ'a yā: Cuaacu nííⁿnyúⁿ nga'á ngíí ndís'tiī, 'úú ní nguéé n'diichí ndís'tiī.

¹³ Maaⁿ ní nducyaaca ndís'tiī candεε nī cuidado ti nguéé déenu nī dε'ē nguuvi o dε'ē hora chí Saⁿ'ā chí Daiya Dendyuūs nndaa sa.

Ejemplo yeⁿ'e tuūmī

14 Tuu'mi ní ca'n'a Jesús: Naachí Ndyuūs nga'n'a ntii'nyu'n yā na va'ai chεεti nguuvi tan'dúúccā 'áámá sa'n'ā chi ca'n'ā ya'n'ái yā ndii táámá yá'n'āa ní 'cai yā mozos ye'n'e yā ní nca'a yā mozos mii'n dendú'ū chi véé ye'n'e yā, chi dii'n sa cuidado ye'n'ē.

15 'Aama mozo ní ca'a yā nyu'n'u mil caadi, táámá mozo ní 'uūvī mil caadi, táámá mozo ní 'aama mil caadi. Ní ca'a yā 'áámá 'áámá mozo tan'dúúccā chi chεε sa. Ní cue'n'ē ya'n'ái yā. 16 Mozo chí sta'ā nyu'n'u mil caadi cuna'n'ā sa ní dii'n sa negocio ndúúccū tuumī mii'n. Ní ndaācā sa tá nyu'n'u mil caadi ye'n'e daiya túumī mii'n. 17 'Tiicá ntúū'n mozo chí sta'a sa ná 'uūvī mil caadi mii'n ndaācā sa ná 'uūvī mil caadi ye'n'ē daiya tuumī mii'n. 18 Mozo chí sta'ā sa 'aama mil caadi che'n'e sa ní s'nee'n sa tuūmī mii'n chεεti 'áámá 'cuutií cuééé ní ch'ii sa maa'n yá'n'āa. 'Tiicā chinuu'n n'dé'ei sa tuumī ye'n'e 'iiví sa.

19 Chi 'naán ní ndaā 'iivi mozos mii'n ní tun'dáa yā cuenta ndúúccū mozos. 20 Ndaā mozo chí nca'a yā nyu'n'u mil caadi nanáa'n yā. Ndéε sa ta nyu'n'u mil caadi ye'n'ē daiya tuūmī mii'n. Ní ca'n'a sa chii sa 'iiví sa: N'diī señor, nyu'n'u mil caadi tee nī 'úú. 'Íngaā. Ndaācā ta nyu'n'u mil caadi daiya tuūmī ye'n'e nī. 21 'Iivi mozo mii'n ní ca'n'a yā chii yā sa'n'ā: Dii mozo ye'n'ē chí n'daācā ní n'dai, n'daācā n'dai n'diī'n di. Maa'n ti 'āā n'daācā dii'n di ndúúccū chí duū'vi, maa'n ní caa'n'ma'n ntii'nyu'n di ye'n'e n'deēe cá teé dii. Cho'o di cuaa'n chεεti va'āi ní cue'n'e daā'ma'n cuuvi yeenú di nduucú. 22 Ndaā ntúū'n nanáa'n yā mozo chí nca'a yā na 'uūvī mil caadi. Mozo mii'n ní ca'n'a sa chii sa 'iiví sa: N'diī señor, 'uūvi mil caadi tee nī 'úú. 'Íngaā tuumī ye'n'e nī. Ndaācā ta na 'uuvi mil caadi daiya tuūmī mii'n. 23 'Iivi sá ca'n'a yā chii

yā saⁿā: Díi mozo yeⁿé chi n'daācā ní n'dai, ní n'daācā idiⁿ di. Nguéé ch'εεε teé dii ní n'daācā diⁿ di. Maaⁿ ní caaⁿmaⁿ ntiiⁿnyuⁿ yeⁿe n'deēe ca chi teé dii. Cho'o di cuaaⁿ chεεti va'āi ní cueⁿe daāⁿmaⁿ cuuvi yeenu di nduucú. ²⁴ Ndaa nanāaⁿ yā mozo chí nca'á yā 'áamá mil cáadí, ní caⁿa sa chii sa 'iivi sa: N'diī Señor, deenu tí n'diī ní chεechí nī, ní diⁿ nī cosechar ndúúcū tuumī yeⁿé nī chi nguéé ngiinu nī, ní 'naaⁿ trigo ngaáⁿ nī naachí nguéé ngiinu nī ti yeⁿe nī. ²⁵ Chíⁿ chí diⁿ ti 'va'á. Ní cheⁿé ní s'nuuⁿ n'de'eí tuūmī yeⁿe nī na 'áamá yiivi yáává maaⁿ yáⁿāa. 'Ííngā tuūmī yeⁿe nī chi tee nī 'úú. ²⁶ 'Iivi sa míⁿ nan'guεεcútaⁿa yā ní caⁿa yā chii yā mozo miiⁿ: Díi mozo chi nguεε n'dáacā ní 'daān'dī dii. Ní nguéé n'dáacā ídiīⁿ. Díi ní déénu di chí ntā'a cosecha naachi nguéé ndiīⁿ ntiiⁿnyuⁿ ní nn'guaáⁿ trigo naachi nguéé ngiinu ti yeⁿé. ²⁷ ¿De'ē cúví chi nguéé s'neeⁿ di tuūmī yeⁿé na banco? Ní taachi 'úú ndaa cuuvi ntee di tuūmī yeⁿé ndúúcū daiya tuūmī miiⁿ. ²⁸ 'Iivi miiⁿ caⁿa yā ndúúcū 'iiⁿyāⁿ chi snéé miiⁿ: N'diī, divíi nī tuūmī yeⁿe sa ní ca'a nī tuūmī mozo chi ndεε ndiichi mil caadi. ²⁹ Ti 'iiⁿyāⁿ chi véé yeⁿe yā, ní ndaācā ca yeⁿe yā. Ní 'iiⁿyāⁿ miiⁿ n'deēe cá vεε yeⁿe yā. 'Iiⁿyāⁿ chi nguéé yeⁿe yā, ta 'líⁿ duū'vi chi véé yeⁿe yā ní divíi yā yeⁿe yā. ³⁰ Mozo chi nguεε dichí'vē ní cuta'á nī ní cu'nuuⁿ nī cuaaⁿ chuva'āi ná maaiⁿ. Miiⁿ cuεεcu sa ní che'e 'díⁿyúⁿ sá cueⁿe daāⁿmaⁿ.

N'diichí Jesús nuuⁿndi yeⁿē naciones

³¹ Ní caⁿa Jesús: Taachí ndaa Saⁿā chi Daiyā Dendyuūs tan'dúúcā Rey chí ch'εεε ca ní n'dεεve taavi ndúúcū tanducuéⁿē ángeles yeⁿe yā, tuu'mi

ní saⁿā miiⁿ 'cuūndi sa na trono yeⁿe sa. ³² Ní ndu-
 uvidaama nanááⁿ Rey miiⁿ 'iiⁿyāⁿ yeⁿe nducyaaca
 naciones ní Rey miiⁿ divíⁱ yā 'iiⁿyāⁿ, 'áámá yā yeⁿe
 táámá yā tan'dúúcā chi 'iiⁿyāⁿ pastor chi idiiⁿ yā
 cuidado yeⁿe 'iiti cuūchī divíⁱ yā chiivu nguaaⁿ
 'iiti cuūchī. ³³ Ní cu'neeⁿ yā 'iiti cuūchī lado tá
 cuaacú yā ní chiivú miiⁿ lado ta 'cueé yā. ³⁴ Tuu'mi
 ní Rey miiⁿ caaⁿmáⁿ yā cuuvi yā 'iiⁿyāⁿ lado ta
 cuaacu yā: Ndís'tiī chi Chiidá ngaⁿa yā yeⁿe nī
 n'dáí taavi nī. Cuchíⁱ nī. 'Íngaā parte chi ituneeⁿ
 ndís'tiī yeⁿe naachí Ndyuūs ngaⁿa ntiiⁿnyúⁿ yā ní
 nguaiⁿn'dai yā yeⁿe ndís'tiī ndíí taachi Ndyuūs 'āā
 cuéé din'dái yā iⁿyeeⁿdī. ³⁵ Tí taachí cuiicú, ní tee
 nī chi che'é. Ní taachí chi yaācá, ní tee nī chí chí'í.
 Ní taachí canuúⁿ yúúní tan'dúúcā 'iiⁿyāⁿ chí ndiicá
 yā táámá yāāⁿ, ndís'tiī 'cuúⁿ nī 'úú. ³⁶ Ní taachi 'āā
 ntéé catecaí, ní tee nī catecaí. Ní taachi chíitā 'úú,
 dicuéénaaⁿ nī 'úú. Ní taachi cheⁿ'é vácūū, ní ndaa
 nī n'diichi nī 'úú. ³⁷ Tuu'mi ní 'iiⁿyāⁿ chi n'dái yā
 nan'guεεcútaⁿa ní caⁿa yā cuuvi yā 'iiⁿyāⁿ: N'diī
 señor, ¿tií cuaⁿā n'diichí 'nū n'diī chí cuiicu nī ní
 tee 'nū chi che'é nī, o yaacá nī ní tee 'nū chi chí'i
 nī? ³⁸ ¿Tií cuaⁿā n'diichí 'nū n'diī cuaaⁿ cyúúní
 ní nta'á 'nū n'diī na vaacú 'nū, o nguéé catecaí nī
 ní tee 'nū catecaí nī? ³⁹ O ¿tií cuaⁿā n'diichí 'nū
 n'diī chí ngíita nī o vácūū canuuⁿ nī, ní níndaá 'nū
 nanááⁿ nī? ⁴⁰ Rey miiⁿ ní nan'guεεcútaⁿa yā ní caⁿa
 yā chii yā 'iiⁿyāⁿ s'uuⁿ: Cuaacu nííⁿnyúⁿ 'úú ngaⁿá
 ngií ndís'tiī, tí taachi dííⁿ nī 'tíicā ndúúcū 'áámá
 hermano 'áará chi ndíicúúⁿ cá yā, tuu'mi ní 'tiicá
 ntúūⁿ dííⁿ nī nduucú.

⁴¹ Tuu'mi ní Rey caaⁿmaⁿ ntúuⁿ yā cuuvi yā
 'iiⁿyāⁿ chí snée lado ta 'cueé yā: Cuvíⁱ nī yeⁿe

'úú, ndís'tiī, 'iiⁿyāⁿ condenado chi nguéé n'daācā idiⁿ nī. Ní caⁿ'a nī ná nguuchi yaⁿ'ā chí 'áámá ngiichi cueⁿ'e daāⁿmaⁿ. Lugar 'cūū ní n'dai cááva yááⁿn'guiinūⁿ ndúúⁿcū ángeles yeⁿ'e sa. ⁴² Tí taachí cuiicú, nguéé tee nī chi che'é. Chii yaācá, ndíi nguéé ndúú tee nī chi chí'í. ⁴³ Canuúⁿ yúúⁿí, ndíi nguéé ndúú 'cuúⁿ nī 'úú. 'Āā ntéé catecaí, ndíi nguéé ndúú tee nī catecaí. Chíitā 'úú ní canuúⁿ vácūū, ndíi nguéé ndúú dicuéénaaⁿ nī 'úú. ⁴⁴ Tuu'mi ní 'iiⁿyāⁿ s'eeⁿ nan'guεεcútaⁿ'a yā ní caⁿ'a yā: N'diī señor, ¿tíí cuáⁿ'ā n'diichí 'nū n'diī chi cuiicú nī, o yaācá nī, o canúⁿ nī yúúⁿí, o nguεε catecaí nī, o ngíita nī, o vácūū cánuuⁿ nī, ní nguéé dichíí've 'nū n'diī? ⁴⁵ Tuu'mi ní Rey miiⁿ nan'guεεcútaⁿ'a yā ní caaⁿ'maⁿ yā cuuvi yā 'iiⁿyāⁿ s'eeⁿ: Cuaacu níiⁿnyúⁿ ngaⁿ'á ngíí ndís'tiī, tan'dúúⁿcā chí nguéé díiⁿ nī ndúúⁿcū 'áámá chí ndíicúúⁿ cá 'tiicá ntúūⁿ 'úú, nguéé díiⁿ nī nduucú. ⁴⁶ 'Iiⁿyāⁿ s'eeⁿ ní caⁿ'a yā na 'áámá castigo chí 'áámá canee ní 'iiⁿyāⁿ chí n'dái yā caⁿ'á yā ná vida cueⁿ'e daāⁿmaⁿ.

26

*Tiⁿyāⁿ ní n'nuuⁿ yiinú yā táácā cuta'á yā Jesús
(Mr. 14.1-2; Lc. 22.1-2; Jn. 11.45-53)*

¹ Taachí Jesús ch'iinu caⁿ'a yā tanducuéⁿ'ē nduudú 'cūū, caⁿ'a yā chii yā discípulos yeⁿ'e yā: ² 'Āā déénu ndís'tiī ná 'uūvī nguuvi maaⁿ cuūvā 'viicu yeⁿ'ē pascua. 'Íicu 'úú Saⁿ'ā chí Daiya Dendyuūs 'úú ní 'iiⁿyāⁿ ncaⁿ'a yā 'úú ní cu'nééⁿnga'a yā 'úú.

³ Tuu'mi ní chiiduú n'gεεε ndúúⁿcū maestros yeⁿ'e ley ndúúⁿcū 'iiⁿyāⁿ ndiicúū s'eeⁿ chí ngaⁿ'a ntiiⁿnyuⁿ yeⁿ'é yaācū nduuvidaamá yā na palacio

yeⁿē chiiduú ch'εεté ca chí nguuvi Caifás. ⁴ Ní ndeé yā taācā cuuvi canche'etí yā Jesús ní cuta'á yā 'iiⁿyāⁿ ní 'caaⁿnúⁿ yā 'iiⁿyāⁿ. ⁵ Ní caⁿ'a yā: Nguéé diiⁿ yú nguuvi 'viicu ti 'iiⁿyāⁿ yeⁿ'e yáāⁿ Jerusalén miiⁿ didáⁿ'a yā ní diíⁿ yā vaadī 'caaⁿ'va ndúúcū nús'uu.

Ch'eēndáa yā aceite vmnaaⁿ tiiⁿ Jesús na yáāⁿ Betania

(Mr. 14.3-9; Jn. 12.1-8)

⁶ Jesús canée yā na yáāⁿ Betania ná va'ai yeⁿ'e Simón chi canée ca'ai lepra chi in'duuti yuūtē yeⁿ'e sa. ⁷ Ní ndaā 'áámá n'daataá nanááⁿ Jesús miiⁿ chi ndéē tá 'áámá frasco tuūu alabastro chi s'néēⁿ aceite perfume chí yaⁿ'ai n'dai chíí'vē. Ní ch'eēndáa ta perfume miiⁿ na tíⁿ Jesús taachí vεε yā na mesa. ⁸ Ní discípulos taachi n'diichí yā chūū nduuvi taáⁿ yā. Ní caⁿ'a yā: ¿De'ε cúúví chí chingéē aceite 'cūū? ⁹ Cuuví n'diicui ta chuū ti yaⁿ'ai n'dai chíí'vē chuū ní ca'a tá tuūmī miiⁿ 'iiⁿyāⁿ chi nguéé yeⁿ'e yā.

¹⁰ Jesús tuumicadínuuⁿ yā chi discípulos ngaⁿ'a yā 'tíicā, ní caⁿ'a yā chii yā discípulos: ¿De'ε cúúví chí n'gaa'va nī ndúúcū n'daataá 'tíí? Táⁿ'a 'tīī n'dáacā diiⁿ tá nduucú. ¹¹ Ti 'iiⁿyāⁿ chi nguéé véé yeⁿ'é yā ní 'áámá canée yā nduucú nī, naati 'úú ní nguéé 'aama cuneé nduucú nī. ¹² Taachi tá 'tīī ch'eēndáa ta perfume vmnááⁿ cuerpo yeⁿ'é, ndaā ta 'úú tí taachí 'cuūví 'āā canee listo cuerpo yeⁿ'é chí 'cuεεchí. ¹³ Cuaacu níⁿnyúⁿ ngaⁿ'á ngií ndís'tiī, chí 'āā tíí nūuⁿ chi caaⁿ'máⁿ yā ndúúúdu ngai yeⁿ'e chi nanguaⁿ'ai 'iiⁿyāⁿ na núúⁿmáⁿ iⁿ'yeēndī, caaⁿ'maⁿ ntuúⁿ yā chi tá 'tīī diiⁿ tá chuū ní n'gaacu yā yeⁿ'e tá.

*Judas miiⁿ ngaⁿa maaⁿ sa chí nca'a sa Jesús
(Mr. 14.10-11; Lc. 22.3-6)*

¹⁴ Tuu'mi ní 'áámá discípulo yeⁿ'ē naachi ndi-ichúúví yā chí nguuvi sa Judas Iscariote, cheⁿ'e sá nanááⁿ chiidúú n'gεεté. ¹⁵ Ní caⁿ'a sa chii sa 'iiⁿ'yāⁿ s'eeⁿ: ¿De'ē téé nī 'úú ní 'cuuⁿ'míⁿ ndís'tiī du'u chí Jesús? 'Iiⁿ'yāⁿ s'eeⁿ ní caⁿ'a yā chí nadii'vé yā Judas miiⁿ ndiīcū ndiichi caadi 'díiⁿ'nguεε. ¹⁶ Ndíi tuu'mí nūuⁿ in'nuuⁿ yíínú Judas miiⁿ de'ē tiempo ní táácā chí nca'a sa Jesús miiⁿ.

Jesús yaa'ví yā yeⁿ'ē chí che'e nguīnū yā 'viicu pascua

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Nguuvi vmnááⁿ vmnaaⁿ yeⁿ'e 'viicu pascua, nguuvi yeⁿ'e pan chí nguéé levadura yeⁿ'ē, discípulos ní ndaa yā nanááⁿ Jesús ní caⁿ'a yā chii yā 'iiⁿ'yāⁿ: ¿Tíi neⁿ'e nī chí in'nuúⁿ 'nū chí che'e nguīnū yú mááⁿ yeⁿ'e 'viicu yeⁿ'e pascua?

¹⁸ Níícú Jesús caⁿ'a yā chii yā discípulos: Cuen'é nī na yāā Jerusalén nī ndaacá nī 'áámá saⁿ'ā ní caaⁿ'maⁿ nī cuuvi nī saⁿ'ā: Maestro yeⁿ'e yú caⁿ'a yā 'túúcā: Tiempo yeⁿ'e chí 'cuūví 'āā snee niiⁿ'nuúⁿ ní neⁿ'é díiⁿ 'viicu yeⁿ'e pascua ndúúcū discípulos yeⁿ'é na va'ai yeⁿ'é nī.

¹⁹ Discípulos díiⁿ yā tan'dúúcā chí Jesús dicho'ó yā chí díiⁿ yā. Ní in'nuúⁿ yā chí che'e yā yeⁿ'e 'viicu yeⁿ'e pascua.

²⁰ Taachi 'āā chii chíinū miiⁿ, Jesús ch'iindi yā na mesa ndúúcū ndu'u ndiichúúví discípulos. ²¹ Ní taachí vεεté yā ní nge'e yā Jesús caⁿ'a yā: Cuaacu

ní'nyúⁿ ngaⁿ'á ngíí ndís'tiī, chi 'áámá chéé ndís'tiī díí ní entregar 'úú.

²² Discípulos s'neeⁿ ndaachi yiinú yā. 'Áámá 'áámá yā ní tucá'á yā caⁿ'a yā: N'dií Señor, ¿'áá 'úú?

²³ Tuu'mi ní Jesús nan'guεεcútaⁿ'a yā ní caⁿ'a yā: 'Iiⁿ'yāⁿ chi nduucú ní di'caandá yā pan yeⁿ'é yā na cú'ú 'cūū nduucú, 'iiⁿ'yāⁿ 'cūū ní nca'a yā 'úú.

²⁴ Cuaacu ní'nyúⁿ cuuvi ndúú^{cū} Saⁿ'ā chi Daiya Dendyuūs tan'dúú^{cā} chi canéé nguūⁿ yeⁿ'é sa na libro yeⁿ'é Ndyuūs, naati de'ε chúú^{cā} ya'āi yeⁿ'e saⁿ'ā chí nca'a sa 'úú chí Saⁿ'ā chi Daiya Dendyuūs. N'dáacā ca yeⁿ'é sa nduutī chi nguéé ch'iīndiyáaⁿ sa.

²⁵ Tuu'mi ní Judas, saⁿ'a chi neⁿ'e nca'a sa Jesús, ní caⁿ'a sa: ¿'Áá 'úú, Maestro? Jesús caⁿ'a yā chii yā Judas: Díí, ngaⁿ'a di 'tíicā.

²⁶ Taachí 'iiⁿ'yāⁿ s'uuⁿ nge'e yā, Jesús miiⁿ sta'á yā pan ní ca'á yā gracias Ndyuūs cáávā pan miiⁿ. Ní n'deé yā pan ní ca'a yā discípulos yeⁿ'e yā. Ní caⁿ'a yā: Cuta'á nī, che'e nī pan caati tan'dúú^{cā} cuerpo yeⁿ'é 'tíicā.

²⁷ Ní Jesús sta'á yā taza ndúú^{cū} jugo yeⁿ'e uvas ní ca'á yā gracias Ndyuūs cáávā nuūⁿnīⁿ uvas miiⁿ, ní ca'a yā discípulos yeⁿ'e yā. Ní caⁿ'a yā: Nducyaaca ndís'tiī, cu'u nī nuūⁿnīⁿ uvas yeⁿ'e taza 'cūū, ²⁸ ti jugo nuūⁿnīⁿ uvas miiⁿ ní tan'dúú^{cā} yuūuⁿ yeⁿ'é ní yeⁿ'é compromiso chi ngai yeⁿ'é. Yuūú yeⁿ'é chi cungéé cáávā 'yaaⁿ n'dai 'iiⁿ'yāⁿ, 'tíicā. Yuūúⁿ yeⁿ'é chííⁿ chi nch'eēcú nuuⁿndi yeⁿ'e nducyaaca 'iiⁿ'yāⁿ.

²⁹ 'Úú ní ngaⁿ'á ngíí ndís'tiī chí 'āā ntéé cu'ú jugo nuūⁿnīⁿ yeⁿ'é uvas na iⁿ'yeeⁿdí 'cūū ndii nguuvi chí cu'ú ndúú^{cū} ndís'tiī naachi Chiidá ngaⁿ'a ntiīⁿnyúⁿ yā.

Jesús ngaⁿ'a yā Pedro miiⁿ chí cuééⁿdútu sa chí nguééⁿ'diichi sa Jesús

(Mr. 14.26-31; Lc. 22.31-34; Jn. 13.36-38)

³⁰ Taachí ch'iinu chiita yā 'áámá canción yeⁿ'é Ndyuūs nan'dáa yā va'āī ní cueⁿ'é yā na yiicū chí nguuvi Olivos. ³¹ Tuu'mi ní Jesús caⁿ'a yā chii yā discípulos: Nducyáácá ndís'tiī cuuví 'cuináaⁿ nī yeⁿ'e 'úú maaⁿnguínū. Caati ngaⁿ'a naachi canéé nguūⁿ na libro yeⁿ'é Dendyuūs 'túúcā: 'Úú Ndyuūs 'nuúca'ai ní 'caaⁿ'núⁿ saⁿ'ā chí idiiⁿ sa cuidado 'iiti cuūchī, ní 'iiti s'eeⁿ ní caⁿ'á 'múúⁿ caⁿ'á miiⁿ tī ní cuuví ndai tī. ³² Taachí 'úú nduuchí nguaaⁿ tináⁿ'ā, caⁿ'á vmnaaⁿ yeⁿ'e ndís'tiī na yáⁿ'āa Galilea.

³³ Tuu'mi ní Pedro miiⁿ ní nan'guεεcútaⁿ'a sa ní caⁿ'a sa chii sa Jesús: 'Áará chí nducyaaca yā cuuví 'cuinaaⁿ yā cáávā n'diī 'úú nguéé cuuví 'cuinaaⁿ mar 'aamá naaⁿ.

³⁴ Tuu'mi ní Jesús caⁿ'a yā chii yā Pedro: Cuaacu níⁿ'nyúⁿ ngaⁿ'á ngiiⁿ dii chí maaⁿnguínū taachi 'āā cuéé 'cuaī túsaⁿ'ā, dii ní 'āā 'iinū cuuvi cueeⁿdiitū di yeⁿ'e 'úú chí nguéé in'diichi di 'úú.

³⁵ Naati Pedro miiⁿ caⁿ'a sa: Ndúúti chí canéé chí 'cuūví nduucú nī maestro ní 'cuūví. Nguéé caaⁿ'máⁿ chí nguéé n'diichí n'diī. Ní nducyaaca discípulos ní 'tiicá ntúūⁿ caⁿ'a yā.

Jesús ngaⁿ'angua'á yā na jardín chí nguuvi Getsemani

(Mr. 14.32-42; Lc. 22.39-46)

³⁶ Tuu'mi ní ndaā Jesús ndúúcū discípulos yeⁿ'é yā na 'áámá cuaaⁿ chí nguuvi Getsemani ní caⁿ'a yā chii yā discípulos yeⁿ'e yā: 'Cuεεté nī 'muuⁿ. 'Úú ní caⁿ'a niiⁿ'nuúⁿ miiⁿ ní caaⁿ'maⁿ'ngua'á.

37 Jesús miiⁿ cuen^e yā ndúúcū Pedro ndúúcū nduu 'uuvi saⁿā daiya Zebedeo. Tuu'mi ní Jesús s'neeⁿ ndaachi yiinú yā. 38 Ní caⁿ'a yā chii yā 'iiⁿ'yāⁿ s'uuⁿ: Alma yeⁿ'é ní nééné ndaachí yiinú chi ya'āi chí 'cuūví. 'Cuεεtinée nī 'muuⁿ ní 'cuεeti nduuchí nī nduucú.

39 Jesús ní cuen^e'é yā ta 'lííⁿ cuááⁿ vmnaaⁿ. Candi-itin'dii yā ní caⁿ'angua'a yā ní caⁿ'a yā: N'dií Chiidá, ndúúti chi cuuvi, nguée^é diíⁿ nī chí 'cueenú cuuvi prueba 'cūū naati nguée^é cuuvi tan'dúúcā chí 'úú neⁿ'é naati tan'dúúcā chí n'dií neⁿ'é nī.

40 Tuu'mí nūuⁿ ndaá yā naachi snée^é discípulos yeⁿ'e yā ní ndaāca yā 'iiⁿ'yāⁿ chí stiyaadú yā. Ní caⁿ'a yā chii yā Pedro: ¿'Áá 'tíicā nguée^é íchéé dí chí induūchi dí nduucú 'áámá hora? 41 Ndís'tiī ní candéε nī cuidado ní caaⁿ'maⁿngua'á nī níicú nguée^é diíⁿ nī nuuⁿndi. Cuaacu níⁿnyúⁿ espíritu yeⁿ'e nī neⁿ'e diiⁿ n'daacā naati cuerpo yeⁿ'é nī 'āā dūūvā.

42 Jesús cheⁿ'e chí ndii 'úúví cuuvi ní caⁿ'angua'á yā ní caⁿ'a yā: N'dií Chiidá, ndúúti chí neⁿ'é nī, diíⁿ nī chí nguée^é 'cueenú cuuvi prueba 'cuu chí n'daācā tuu'mi ní 'tíicā diíⁿ nī, naati cuuvi tan'dúúcā chí neⁿ'e nī.

43 Jesús nndaa ntuuⁿ yā táámá vmnéⁿ'ēe naachi snée^é discípulos yeⁿ'é yā ní ndaaca ntúuⁿ yā 'iiⁿ'yāⁿ stiyaadú yā ti 'iiⁿ'yāⁿ s'eeⁿ 'āā ntée^é ichεε yā nduutináaⁿ yā chí yaāⁿnnáaⁿ yā. 44 Jesús miiⁿ ní nguée^é yaa'vi yā discípulos ní s'neeⁿ yā 'iiⁿ'yāⁿ chí stiyaadú yā. Ní cuen^e'e ntúuⁿ yā ní caⁿ'angua'á ntúuⁿ yā ndii chí ndiiⁿ 'íinú cuuvi ní caⁿ'a ntuuⁿ yā tan'dúúcā chí 'āā ngaⁿ'a yā. 45 Cuayiivi ní ndaa ntuuⁿ yā nanááⁿ discípulos ní cáⁿ'a yā chí yā discípulos: 'Cuεetiyaadú nī ní ntaavi'tuunúúⁿ nī.

Cuin'diichí nī tī 'āā ndaā hora yeⁿ'e 'úú chí Saⁿ'ā chi Daiya Dendyuūs. 'Iiⁿ'yāⁿ nca'a yā 'úú tá'a saⁿ'ā s'eeⁿ chi véé nuuⁿndi yeⁿ'e sā. ⁴⁶ Nducueeⁿ ndís'tiī ní cúⁿ'u yú. 'Āā cuchii niiⁿnuúⁿ saⁿ'ā chi nca'a 'úú.

Sta'á yā Jesús ní candéε yā 'iiⁿ'yāⁿ presos
(Mr. 14.43-50; Lc. 22.47-53; Jn. 18.2-11)

⁴⁷ 'Naaⁿ chí Jesús indeé yā, ndaā Judas miiⁿ, 'áámá saⁿ'ā yeⁿ'ē ndu'u ndiichúúví discípulos. Ní nééné 'yaaⁿ 'iiⁿ'yāⁿ ndaá yā ndúúⁿcū Judas miiⁿ ndúúⁿcū machetes 'uūvī lados 'caāiⁿ ndúúⁿcū yáⁿ'á. Chiiduú n'gεεtε ndúúⁿcū 'iiⁿ'yāⁿ ndiicúⁿ s'eeⁿ chí ngaⁿ'a ntiiⁿnyuⁿ yeⁿ'e yaācū dichó'lo yā 'iiⁿ'yāⁿ s'eeⁿ. ⁴⁸ Judas miiⁿ chí nca'a sá Jesús 'iiⁿ'yāⁿ s'eeⁿ, ca'a sa 'áámá seña ní 'túúⁿcā caⁿ'a sa: 'Iiⁿ'yāⁿ chí 'úú chí'neeⁿ cheendí, 'iiⁿ'yāⁿ miiⁿ chí 'iiⁿ'yāⁿ chí cuta'a nī chí preso yā.

⁴⁹ Tuu'mi ní Judas miiⁿ ní ndaa sa nanááⁿ Jesús miiⁿ ní caⁿ'a sa: Tavacho'onoó nī, n'diī Maestro. Ní 'neeⁿ cheendi sá Jesús. ⁵⁰ Jesús miiⁿ ní caⁿ'a yā chii yā Judas: Díí, amigo yeⁿ'é, ¿de'ε cáávā chí cuchii dí? Tuu'mi ní 'iiⁿ'yāⁿ s'eeⁿ ní ndaa yā nanááⁿ Jesús miiⁿ ní sta'á yā Jesús ní candéε yā 'iiⁿ'yāⁿ preso.

⁵¹ Naati 'áámá saⁿ'ā chí canéé sá ndúúⁿcū Jesús miiⁿ ní tun'dáa sa machete 'uūvī lados 'caāiⁿ ná chεεtī vaacu ní 'nuūcá'ai sa 'áámá mozo yeⁿ'ē chiiduú ch'εεtε ca ní ch'iica sa veēⁿ mozo miiⁿ. ⁵² Tuu'mi ní Jesús caⁿ'a yā chii yā saⁿ'ā: 'Nuūⁿ di machete 'uūvī lados 'caāiⁿ yeⁿ'ē di vaacu. Nducyaaca 'iiⁿ'yāⁿ chí ita'á yā machete 'uūvī lados 'caāiⁿ ní ndúúⁿcū machete 'uūvī lados 'caāiⁿ 'cuūvī. ⁵³ ¿'Áá nguéé déénú dí chí 'úú cuuví caaⁿ'maⁿnguā'á ní caacá Chiidá ní miⁿnínyúⁿ

miⁿniiⁿnyuⁿ cho'ó yā nanááⁿ 'úú taanduu ngo'oó ndiichúúví taāⁿ ángeles ní chiidá cuuvi diíⁿ yā?
 54 Naati maaⁿ ní nduuti chi diíⁿ chuu ¿táácā cuuvi cúúnú ca'a naachi canéé nguūⁿ na libro yeⁿ'é Ndyuūs, chi canéé chí cuuvi 'tíicā?

55 Hora miiⁿ Jesús caⁿ'a yā chii yā 'iiⁿ'yāⁿ s'eeⁿ: ¿De'ē cúúví chí can'daa nī ndúúⁿcū machetes 'uūví lados 'caāiⁿ ndúúⁿcū yáⁿ'á s'eeⁿ tan'dúúⁿcā chi 'úú 'iiⁿ'yāⁿ chi duucu 'úú chi sta'á nī 'úú? Nguuvi nguuvi ch'iindí ndúúⁿcū ndís'tiī na yaācū templo ní ngi'cueeⁿ ndís'tiī ní nguéé sta'á nī 'úú.

56 Tanducuéⁿ'ē chuū cuuví ní cúúnú ca'a yeⁿ'ē chi canéé nguūⁿ na libro yeⁿ'é Ndyuūs cáāvā profetas ndii cuááⁿ vmnaaⁿ. Tuu'mi ní nducyaaca discípulos s'néeⁿ yā Jesús miiⁿ ní chéenu yā.

Jesús nanááⁿ 'iiⁿntyéⁿ'ē yeⁿ'e yaācū templo

(Mr. 14.53-65; Lc. 22.54-55, 63-71; Jn. 18.12-14, 19-24)

57 'Iiⁿ'yāⁿ chi sta'á yā Jesús miiⁿ candεε yā 'iiⁿ'yāⁿ miiⁿ nanááⁿ chiiduú ch'εεté ca chí nguuvi Caifás. Míiⁿ nduuvídáámá maestros yeⁿ'e ley ndúúⁿcū 'iiⁿ'yāⁿ ndiicúū s'eeⁿ chi ngaⁿ'a ntiiⁿnyúⁿ yā yeⁿ'e yaācū. 58 Pedro miiⁿ cueⁿ'e ntúuⁿ sa ní n'dáa yaⁿ'ai sa cuaaⁿ dáámí Jesús ndíi chuva'āi yeⁿ'ē va'ai ch'εεte yeⁿ'ē chiiduú ch'εεte cá. Ní ndaa sa na patio ní ch'iindí sa ndúúⁿcū policías chi diíⁿ yā cuidado yeⁿ'e va'āi miiⁿ. Pedro neⁿ'e sa snaaⁿ sa táácā chi diíⁿ yā ndúúⁿcū Jesús miiⁿ.

59 Chiiduú n'gεεté ndúúⁿcū 'iiⁿ'yāⁿ ndiicúū s'eeⁿ chí ngaⁿ'a ntiiⁿnyuⁿ yā yeⁿ'e yaācū ndúúⁿcū nducyaaca 'iiⁿ'yāⁿ chí ngaⁿ'a ntiiⁿnyuⁿ yā in'nuúⁿ yā 'áámá testigo chi nguéé ngaⁿ'a cuaacu yeⁿ'ē

Jesús miiⁿ. Ní 'íícú cuuvi nca'a yā Jesús miiⁿ chí 'cuuvi yā. ⁶⁰ Nguéé ndaaca yā mar 'áámá naaⁿ taācā chí 'caaⁿnuⁿ yā Jesús miiⁿ. 'Áará chí neené 'yaaⁿ 'iiⁿyāⁿ caⁿ'a yā nduudu yaadi yeⁿ'e Jesús miiⁿ. Cuayiivi miiⁿ ní ndaa ntúūⁿ tanaaⁿ 'uūvī testigos chí ngaⁿ'a yā nduudu yaadi. ⁶¹ Testigos ní caⁿ'a yā: Sáⁿ'a 'cūū ní caⁿ'a sa: 'Úú ní cuuvi diíⁿ chuū. Natuūví yáacū templo 'cūū chí yeⁿ'é Ndyuūs naati chεετī 'iīnū nguuvi nadan'daí.

⁶² Chiiduú ch'εετε cá miiⁿ ní ncueeⁿ yā ní caⁿ'a yā chíi yā Jesús: ¿'Áá nguéé nan'guεεcútaⁿ'a nī mar 'áámá nduudu yeⁿ'e de'ē chí ngaⁿ'a 'íís'tiī yeⁿ'e nī?

⁶³ Naati Jesús nguéé de'ē vεε caⁿ'a yā. Tuu'mi ní chiiduú ch'εετε cá miiⁿ caⁿ'a yā: 'Úú ní n'gaí, “por Ndyuūs chí canduuchí”. Cuuvi nī nús'luu ndúúti chí n'diī chí Cristo, Daiya Ndyuūs chí cánduuchi.

⁶⁴ Jesús miiⁿ ní caⁿ'a yā chíi yā chiiduú ch'εετε cá miiⁿ: 'Úú tan'dúúcā chí n'dīī ngaⁿ'a nī. Ngaⁿ'á ca ngiū ndís'tiī, chí ndii maaⁿ snaaⁿ nī Saⁿ'á chí Daiya Ndyuūs 'cuūndī sa lado yeⁿ'e honor yeⁿ'é Ndyuūs chí v'éé tanducuéⁿ'ē poder yeⁿ'é yā ní ndaa sa na meēeⁿ yeⁿ'ē nanguuvi.

⁶⁵ Tuu'mi ní chiiduú ch'εετε cá miiⁿ chíín'cuún yā catecai yā ní caⁿ'a yā: Sáⁿ'a 'cūū ní ngaⁿ'ā sa contra yeⁿ'é Ndyuūs. ¿De'ē ca diīⁿ yú testigos chí in'nuuⁿ yú? Cuin'dííchí nī. Maaⁿ ní ndís'tiī ní n'giindiveéⁿ nī táácā ngaⁿ'a sa contra yeⁿ'e Ndyuūs. ⁶⁶ ¿De'ē nadacádíínuuⁿ ndís'tiī? 'Iiⁿ'yāⁿ s'eeⁿ ní nan'guεεcútaⁿ'a yā ní caⁿ'a yā: V'éé nuuⁿndi yeⁿ'e sa chí canéé chí 'cuūvī sa.

⁶⁷ Tuu'mi ní ca'a nee daiⁿ yā naaⁿ Jesús miiⁿ ní ch'eⁿ'é yā Jesús. Ní n'gaadi yā nduutináaⁿ sa

ndúúcū tiinūuⁿ. Ní tanáⁿ'a yā ch'eⁿ'é yā 'iiⁿ'yāⁿ ndúúcū ta'á yā. ⁶⁸ 'Iiⁿ'yāⁿ s'eeⁿ ní caⁿ'a yā: N'dii chi Cristo, cuuví nī nús'uu, ¿du'ū chí ch'eⁿ'é n'dií?

Pedro miiⁿ ní ngaⁿ'a sa chí nguéé n'diichi sa Jesús miiⁿ

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro miiⁿ ní vεε sa na patio yeⁿ'e va'āi ch'εετε chiiduú ch'εετε cá ní ndaa niiⁿnuúⁿ 'áámá táⁿ'ā chí canéé caadi 'iiyū. Ní táⁿ'ā miiⁿ ní caⁿ'ā tá chíi tá Pedro miiⁿ: Dīi ntúūⁿ ni canee di ndúúcū Jesús yeⁿ'e yáⁿ'āa Galilea.

⁷⁰ Naati Pedro miiⁿ ní chééⁿdiitu sa nanááⁿ 'iiⁿ'yāⁿ s'eeⁿ ní caⁿ'a sa: Nguεε deenú chí ngaⁿ'ā di.

⁷¹ Ní taachí ndaā Pedro miiⁿ cheendi va'āi yeⁿ'e patio miiⁿ, táámá táⁿ'ā chí canéé caadi 'iiyu n'diichi ntuūⁿ tá saⁿ'ā miiⁿ ní caⁿ'a tá chíi tá 'iiⁿ'yāⁿ chí snéé miiⁿ: 'Tiicá ntúūⁿ sáⁿ'a 'cūū ní canee sa ndúúcū Jesús yeⁿ'e yáāⁿ Nazaret.

⁷² Pedro miiⁿ ní cheeⁿdiitu ntúūⁿ sa, ndíi túúnú 'caī sa, “por Ndyuūs”. Ní caⁿ'a sa: 'Úú ní nguéé in'diichí sáⁿ'a 'cūū.

⁷³ Cuayiivi 'tεε 'téé ní 'iiⁿ'yāⁿ chí snéé yā cuaaⁿ na niiⁿnuúⁿ miiⁿ ndaa yā nanááⁿ Pedro miiⁿ. Ní caⁿ'a yā chíi yā Pedro: Cuaacu nííⁿnyúⁿ dii ntúūⁿ ní cachiica dí ndúúcū 'iiⁿ'yāⁿ s'eeⁿ ti tan'dúúcā chí ngaⁿ'a di ní n'giⁿ'i di yeⁿ'e di chí dii ní nguaaⁿ 'iiⁿ'yāⁿ s'eeⁿ.

⁷⁴ Tuu'mi ní Pedro miiⁿ ní tucá'a sa caⁿ'a taaⁿ sa, ní 'caī sa, “por Ndyuūs”, ní caⁿ'a sa chíi sa 'iiⁿ'yāⁿ miiⁿ: Nguéé in'diichí sáⁿ'a 'cūū. Tuu'mí nūuⁿ 'caī tusáⁿ'ā. ⁷⁵ Tuu'mi nūuⁿ ní Pedro miiⁿ ní n'gaācū sa nduudu yeⁿ'é Jesús taachí caⁿ'a yā 'túúcā: Taachi 'āā cuéé 'cuaī tusáⁿ'ā, 'āā cheeⁿdiitū di 'iinū cuuvi

chi nguée n'diichi di 'úú. Ní Pedro miiⁿ ní can'daa sa na lugar 'cūū ní chεεcu taaví sa ti ya'ai staava yeⁿe sa.

27

Jesús nanááⁿ Pilato

(Mr. 15.1; Lc. 23.1-2; Jn. 18.28-32)

¹ Taachí 'āā chīδεεεε, nducyáácá chiiduú n'gεεεε ndúúcu 'iiⁿyāⁿ ndiicūú chí ngaⁿ'a ntiiⁿnyuⁿ yeⁿe yaācū nduuvidaamá yā chí ndeé yā taācā diíⁿ yā ndúúcu Jesús miiⁿ ní nca'a yā 'iiⁿyāⁿ chí 'cuūvi yā.

² Ní n'dééchiichí yā Jesús miiⁿ ní candéε yā ní nca'a yā Jesús miiⁿ Poncio Pilato, 'iiⁿyāⁿ gobernador.

Judas miiⁿ ch'ū sa

³ Tuu'mi ní Judas miiⁿ, saⁿ'a chí nca'a Jesús miiⁿ, taachí n'diichí sa chí Jesús miiⁿ chí yā condenado chí 'cuuvi yā, ndaacadaamá sá yeⁿe nuuⁿndi chí diíⁿ sa. Ní cheⁿ'e sa nanááⁿ chiiduú n'gεεé ndúúcu 'iiⁿyāⁿ ndiicūú chí ngaⁿ'a ntiiⁿnyuⁿ yeⁿe yaācū ní nca'a sa ndu'ū ndiicu ndíichí caadi 'diiⁿnguεε 'iiⁿyāⁿ s'eeⁿ. ⁴ Ní caⁿ'a sa chí sa 'iiⁿyāⁿ s'eeⁿ: 'Úú ní diíⁿ 'áámá nuuⁿndi. Ncā'á 'áámá 'iiⁿyāⁿ chí nguée nuuⁿndi yeⁿe yā. 'Iiⁿyāⁿ s'eeⁿ caⁿ'a yā: ¿Dé'ē ínneeⁿ nús'uū chíiⁿ? Chuū chí maaⁿ di can'díicu di.

⁵ Tuu'mi ní Judas chingée sa tuūmī miiⁿ chεeti yaācū ní cunaⁿ'a sa. Ní dicuái yaacu sa maaⁿ sa. Ní Judas ní ch'ū sa.

⁶ Chiiduú n'gεεé n'guáaⁿ yā tuūmī ní caⁿ'a yā: Na ley miiⁿ ní ngaⁿ'ā chí nguée 'cuii yú túúmi 'cūū na caja yeⁿe ofrendas yeⁿe yaācū, ti túúmi 'cūū ní túumī yeⁿ'ē yuūúⁿ yeⁿe 'aama 'iiⁿyāⁿ.

7 Ch'iinu chuū ní nduuvidaama yā chi cáí yā 'áámá táán yáⁿāa ndúúcū tuūmī chí cuuvi panteón cáávā 'iiⁿyāⁿ chi snúún yúúní. Miiⁿya yaⁿāa chi nguuvi Alfarero chi neⁿe caaⁿmaⁿ yáⁿāa yeⁿe chi 'iiⁿyāⁿ din'dái 'cuūtíí cueēe. 8 Chíⁿ chí yáⁿāa chí panteón cánéé chí dúúchí ndíí máán, Yáⁿāa yeⁿe Yuūuⁿ. 9 'Tíicā ní cuunúū ca'a chi profeta Jeremías caⁿa yā chuū ndii cuáán vmnaaⁿ taachí dinguún yā na libro yeⁿé Ndyuūs 'tíicā: Ní sta'á yā ndu'ū ndiicu ndííchí caadi 'diiⁿnguεε. Tuūmī miiⁿ ní saⁿā s'eeⁿ canéé yiinu sa chí ca'a sa Judas cucáávā chí ch'iīⁿnūⁿ sa Cristo. 10 Ní ca'a yā tuūmī miiⁿ yeⁿe yáⁿāa chí nguuvi Alfarero, tan'dúúcā Señor yeⁿe yú caⁿa yā chii yā 'úú.

Pilato intínguuneeⁿ yā Jesús

(Mr. 15.2-5; Lc. 23.3-5; Jn. 18.33-38)

11 Jesús chééndii yā nanáán gobernador Pilato ní gobernador íntínguuneeⁿ yā 'iiⁿyāⁿ ní caⁿa yā chii yā 'iiⁿyāⁿ: ¿Áá díí chí Rey yeⁿe 'iiⁿyāⁿ Israel chí judíos? Jesús caⁿa yā chii yā gobernador: N'diī ngaⁿa cuaacú nī ti 'tíicā.

12 Chiiduú n'gεεté ndúúcū 'iiⁿyāⁿ ndiicúū chí ngaⁿa ntiiⁿnyúⁿ yā yeⁿe yaācū caⁿa yā chí véé nuuⁿndi yeⁿe Jesús naati Jesús miiⁿ ní nguéé nan'guεεcútaⁿa yā mar 'áámá nduudu. 13 Tuu'mi ní Pilato miiⁿ caⁿa yā chii yā Jesús: ¿Áá nguéé n'giindiveeⁿ di tanducuéⁿe chí ngaⁿa yā yeⁿē dí?

14 Naati Jesús miiⁿ nguéé nan'guεεcútaⁿa yā mar 'áámá nduudu. Tuu'mi ní gobernador miiⁿ cheⁿe yiinu taavi yā yeⁿe Jesús ní nguéé déenu yā táacā nadacádíinuⁿ yā yeⁿē.

Jesús canéé chí 'cuūvi yā

(Mr. 15.6-20; Lc. 23.13-25; Jn. 18.38-19.16)

15 Maaⁿ ní ngúúví 'viicu miiⁿ véeé 'áámá costum-bre chí gobernador miiⁿ canéé chí ín'dééchí yā 'áámá saⁿ'ā chí canúuⁿ sa vácūū 'viicu yeⁿe pascua 'aama saⁿ'ā chí preso sa chí 'iiⁿ'yāⁿ Israel neⁿe yā. 16 Ní canúuⁿ 'aama saⁿ'ā vácūū chí nguuvi Barrabás. Nducyáácá 'iiⁿ'yāⁿ ní déénu yā táácā idiiⁿ Barrabás miiⁿ. 17 Ní taachi 'iiⁿ'yāⁿ yeⁿ'ē yāān Jerusalén miiⁿ nduuvidaamá yā, gobernador Pilato miiⁿ ní caⁿ'a yā chíi yā 'iiⁿ'yāⁿ s'eeⁿ: ¿Du'ū neⁿe nī chí 'úú n'dééchií? ¿'Áá neⁿe nī Barrabás o Jesús chí nguuvi Cristo chí 'úú caⁿ'á libre 'iiⁿ'yāⁿ?

18 Pilato miiⁿ ní deenu yā chí cáávā vaadī ngueee 'iiⁿ'yāⁿ s'eeⁿ nca'a yā Jesús chí preso yā.

19 Taachí Pilato miiⁿ ní vεε yā na silla yeⁿe juez miiⁿ, n'daataá yeⁿe yā ní dichó'o tá 'áámá 'iiⁿ'yāⁿ chí caⁿ'a yā chíi yā Pilato miiⁿ nduudú 'cūū: Nguéé dε'ē vεε dííⁿ nī ndúúcu saⁿ'ā n'dáí 'cūū tī taachí cyaadú nééné n'deēe ch'eenú chíi taachí ch'iínú cáávā sáⁿ'a 'tīī.

20 Naati chiiduú n'gεεε ndúúcu 'iiⁿ'yāⁿ ndiicūú chí ngaⁿ'a ntiiⁿnyúⁿ yā yeⁿe yaácū nééné n'deēe caⁿ'a yā chíi yā 'iiⁿ'yāⁿ yeⁿ'e yāān Jerusalén miiⁿ chí caaⁿ'maⁿ yā chí Pilato miiⁿ n'dééchií yā Barrabás miiⁿ ní 'cuūvi Jesús miiⁿ. 21 Gobernador miiⁿ caⁿ'a yā chíi yā 'iiⁿ'yāⁿ s'eeⁿ: ¿Naachí na 'uuvi yā ní chéé yā chí neⁿe nī chí n'dééchií? 'Iiⁿ'yāⁿ s'eeⁿ ní caⁿ'a yā: Barrabás.

22 Pilato miiⁿ ní caⁿ'a yā chíi yā 'iiⁿ'yāⁿ s'eeⁿ: ¿Dε'ē dííⁿ ndúúcu Jesús chí nguuvi yā Cristo? Nducyaaaca yā nan'guεεcútaⁿ'a yā ní 'cai yā: Cu'nééⁿnga'á yā.

23 Gobernador miiⁿ caⁿ'a yā chii yā 'iiⁿ'yāⁿ s'een: ¿De'ē nuuⁿndi yeⁿ'e yā vεε? Naati 'iiⁿ'yāⁿ s'een ní n'gái yiicú yā ní caⁿ'a yā: Cu'nééⁿnga'á yā.

24 Taachi Pilato miiⁿ n'diichí yā chi nguéé de'ē vεε chi diiⁿ yā ndúúcū 'iiⁿ'yāⁿ ti yuudu n'dái ca n'gai yā, tuu'mi ní sta'á yā nuūⁿnīⁿ ní naaⁿnu yā ta'a yā nanááⁿ nducyaaca 'iiⁿ'yāⁿ yeⁿ'e yáāⁿ Jerusalén miiⁿ. Ní ngaⁿ'a yā: Limpia canéé 'úú yeⁿ'e asunto 'cūū. 'Úú ní nguéé nuuⁿndi yeⁿ'é chi 'cuūvī sáⁿ'a 'cūū ti n'dai sa. Ndís'tiī deenu nī táácā diiⁿ nī ndúúcu sa.

25 Nducyaaca 'iiⁿ'yāⁿ nan'guεεcútaⁿ'a yā ní caⁿ'a yā: Yuuúⁿ yeⁿ'e sáⁿ'a 'cūū 'āā cūnee dáámí rá 'nū ndúúcū daiya 'nū.

26 Tuu'mi ní Pilato miiⁿ ní n'dεēchii yā Barrabás miiⁿ ní caⁿ'a ntiiⁿnyuⁿ yā chi soldados ch'en'é yā Jesús. Ch'íínú ch'en'e yā ní nca'a Pilato miiⁿ Jesús miiⁿ 'iiⁿ'yāⁿ chi cu'neeⁿnga'á yā 'iiⁿ'yāⁿ.

27 Tuu'mi ní soldados romanos yeⁿ'e gobernador can'dée sa Jesús na vaacuyáāⁿ yeⁿ'e gobernador ní nducyáácá soldados nduuvídaama sa nanááⁿ Jesús miiⁿ. 28 Ní diví sa catecaī vmaāⁿ Jesús ní s'nuuⁿ sa tíínūuⁿ morado cuá'āa Jesús miiⁿ. 29 Ní s'nuuⁿ sa tiiⁿ Jesús 'áámá corona chi ndeenyú ndúúcū yaaⁿ. Ní sn'duuⁿ sa 'áámá taaⁿ ndúú ná ta'ā cuaacú Jesús. Tuu'mi ní chííntii'ya sa nanááⁿ Jesús miiⁿ ní ch'íínnyuⁿneeⁿ sa 'iiⁿ'yāⁿ. Ní caⁿ'a sa: Cūnduuchí nī n'diī Rey yeⁿ'e 'iiⁿ'yāⁿ yeⁿ'e Israel.

30 Ní ca'a nee daiⁿ sa cuerpo yeⁿ'e Jesús ní sta'a sa 'áámá tááⁿ ndúú chí ndεε sa ní ch'en'e sa tiiⁿ Jesús.

31 Ch'íínú ch'íínnyuⁿneeⁿ sa Jesús miiⁿ ní ndiví sa tíínūuⁿ yā chi morado cuá'āa ní chí'nuuⁿ sa catecaī yā. Ní candεε sa Jesús chi cu'nééⁿnga'a sa 'iiⁿ'yāⁿ.

*S'néé'nga'á yā Jesús miiⁿ ní ch'ti yā
(Mr. 15.21-32; Lc. 23.26-43; Jn. 19.17-27)*

³² Taachí can'daa yā ní cueⁿe yā na yúúⁿi naachi cu'néé'nga'á yā ndaaca yā 'áámá saⁿā yeⁿe yáāⁿ Cirene chí nguuvi sa Simón. Ní a fuerza soldados di'cuiitu sa Simón 'cūū chí candée sa cruz yeⁿe Jesús.

³³ Ní taachi ndaá yā na táámá lado yeⁿe yáāⁿ Jerusalén lugar chi nguuvi Gólgota chí neⁿe caaⁿmaⁿ, Lugar yeⁿe 'Iini Nga'ai Tiīⁿ, ³⁴ saⁿā ca'a sa Jesús vinagre ndístaⁿa ndúú^cū nuuⁿníⁿ yeⁿe yáatā yaāa cáāvā chi nguεε cueenu cá cuuvi Jesús chí chí'i Jesús miiⁿ. Taachí Jesús n'diichineeⁿ yā, nguéeⁿ 'cuuⁿ yā chí'i yā.

³⁵ Taachí 'āā s'neeⁿnga'a sa Jesús, soldados ní tun'dáa sa suertes na catecai Jesús miiⁿ chí ca'a sa 'áámá sa nduū^cū taama sa. Ní 'iicu cúúnúú ca'a tan'dúú^cā chí caⁿ'a profeta ndiī cuááⁿ vmnaaⁿ ní canéé nguúⁿ na libro yeⁿe Ndyuūs 'túú^cā: Tun'daá yā suerte na catecai Jesús miiⁿ ní nca'á yā nguaaⁿ 'iiⁿyāⁿ s'eeⁿ. ³⁶ Miiⁿ ch'εētεε soldados ní diiⁿ sa cuidado 'iiⁿyāⁿ chí s'néé'nga'a. ³⁷ Ní 'áámá nduudu naaⁿ tíⁿ cruz miiⁿ chí canéé nguūⁿ 'túú^cā: Jesús miiⁿ chí Rey yeⁿe 'iiⁿyāⁿ yeⁿe ndaata Israel. Ní nduudu miiⁿ ngaⁿ'ā de'ε cáāvā chí ch'iī Jesús miiⁿ.

³⁸ Tuu'mi ní miiⁿ ntúūⁿ s'neeⁿnga'á yā ndúú^cū Jesús miiⁿ 'uū^vi chí duucu, 'áámá ní lado ta cuaacú yā, taama ní lado tá 'cuae yā. ³⁹ 'Iiⁿyāⁿ chí cho'ó yā naachi canee cruz miiⁿ ch'iiⁿnyuⁿneeⁿ yā Jesús miiⁿ. Ní idiⁿnúⁿ'u yā tíⁿ yā. ⁴⁰ Ní caⁿ'a yā: N'diī chí ngaⁿ'á nī chí maáⁿ nī cuuvi nada'tuū^vi nī yaācū

templo ní chεētī 'iīnū nguuvi nadan'dái nī, nadin-guá'n'āī maá'n nī maa'n. Ndúúti chí Daiya Dendyuūs n'diī, nch'éé'n nī ye'n'ē na cruz.

41 'Tiicá ntúū'n chiiduú n'gεεεε ndúúcu 'ii'yā'n fariseos chí dingúu'n yā ní ngi'cuee'n ley, ndúúcu 'ii'yā'n ndiicúū chí nga'n'a ntii'nyú'n yā ye'n'e yaācū templo ch'í'nyu'nee'n yā Jesús mii'n ní nga'n'a yā ye'n'e yā: 42 Taná'n'ā 'ii'yā'n ní nadinguá'n'ai yā naati nguéé cuuvi maa'n yā nguá'n'ai yā. Ndúúti chí 'ii'yā'n mii'n ní Rey ye'n'e 'ii'yā'n Israel maa'n ní nch'éé'n yā ye'n'e na cruz ní cu'téenu 'nū 'ii'yā'n mii'n. 43 Jesús mii'n ní i'téenu yā Ndyuūs. Maa'n ní Ndyuūs nadinguá'n'ai yā 'ii'yā'n nduuti chí cuaacu chí 'cuaá'n yā 'ii'yā'n. 'Ii'yā'n nga'n'á yā 'tíicā ti Jesús nga'n'a yā: 'Úú ní daiya Dendyuūs 'úú.

44 'Tiicá ntúū'n ch'iī'nyu'nee'n chí duucu s'ee'n chi s'néé'nga'a sa dáámá ndúúcu Jesús.

Jesús ch'ī yā

(Mr. 15.33-41; Lc. 23.44-49; Jn. 19.28-30)

45 Ndíí ma'n'a nguuvi mii'n ndíí taanduū n'gεεεcu 'iīnu chiīnū chíí maā'i'n núú'mán i'n'yee'ndī. 46 'Āā tááanduū n'gεεεcu 'iīnu, Jesús 'caī yiicú yā: Elí, Elí, ¿lama sabactani? Nduudu hebreo 'cūū ní ne'n'ē caa'n'ma'n Ndyuūs ye'n'é, Ndyuūs ye'n'é, ¿de'ε cuuvi chí s'neé'n nī 'úú damaá'n?

47 N'duuvi 'ii'yā'n chí snée yā 'mii'n taachí ch'iīndiveé'n yā chí ca'n'a Jesús mii'n ní ca'n'a yā: Sán'a 'cūū n'gaī sa profeta Elías.

48 Hora míí'n nūu'n 'áámá chéé 'ii'yā'n s'ee'n ché'n'e yā ngeenu yā sta'a yā 'áámá esponja ní di'caāndá yā ndúúcu vinagre ní s'nee'n yā esponja mii'n na 'áámá táá'n ndúú ní ca'a yā chí chí'i Jesús mii'n. 49 Taná'n'a

yā ní ngaⁿ'a yā: 'Āā canee ra yā. N'diichi yú ¿'áá chií Elías miiⁿ nadinguáⁿ'ai yā 'iiⁿ'yāⁿ?

⁵⁰ Naati Jesús miiⁿ 'caī ntúuⁿ yā taama vmnéⁿ'ēe ní maaⁿ yā nca'a yā espíritu yeⁿ'e yā na ta'a Ndyuūs ní ch'īi yā. ⁵¹ Hora míiⁿ nūuⁿ chi ch'īi Jesús, cortina yeⁿ'e yaācū templo s'teeⁿ naavtáⁿ'ā ndii cuaaⁿ 'niiⁿ'nuúⁿ ndíi cuááⁿ ndiiyā. Ní n'nuⁿ'u yáⁿ'āa ní tuūu ní índee. ⁵² Tuu'mi ní yáinyāⁿ s'eeⁿ ní nguaaⁿ ní nééné 'yaaⁿ cuerpos yeⁿ'e 'iiⁿ'yāⁿ chi n'díi chi i'téenu yā Ndyuūs ndii cuááⁿ vmnaaⁿ nan'dáa yā chεeti yaīnyāⁿ s'eeⁿ. ⁵³ Ní 'iiⁿ'yāⁿ s'uuⁿ chi 'āā n'dii miiⁿ taachi 'āā nduuchi Jesús miiⁿ yeⁿ'ē nguaaⁿ tináⁿ'ā 'iiⁿ'yāⁿ s'uuⁿ ní nan'daa yā chεeti yaīnyāⁿ s'eeⁿ ní cueⁿ'e yā cachiica yā na yāā Jerusalén chi Ndyuūs dεεve yā. Ní 'yaaⁿ n'dái 'iiⁿ'yāⁿ chinaáⁿ yā 'iiⁿ'yāⁿ chi 'āā n'dii.

⁵⁴ Saⁿ'a capitán ndúúcū soldados chi snée yā ndúúcu yā ní díiⁿ yā cuidado yeⁿ'e cuerpo yeⁿ'e Jesús taachi s'neeⁿ yā na cruz. Soldados miiⁿ, taachi n'diichí yā chi n'nuⁿ'u yáⁿ'āa ndúúcū dendu'ū chí chií, neené di'va'á yā ní caⁿ'a yā: Cuaacu níiⁿ'nyúⁿ, sáⁿ'a 'cūū ní Daiya Dendyuūs saⁿ'ā.

⁵⁵ 'Yaaⁿ n'dái n'daataá snée yaⁿ'ai yā ní n'gíinu yā tanducuén'ē chi chó'ōo yeⁿ'e Jesús. N'daataá s'eeⁿ cachiica yā ndúúcū Jesús ndii na yáⁿ'āa yeⁿ'e Galilea ní dichíi'vε yā Jesús miiⁿ. ⁵⁶ Ní nguaaⁿ n'daataá s'eeⁿ, miiⁿ canée ta María Magdalena ndúúcū María chi chεecu Jacobo ndúúcū José. Ní canée ntúuⁿ tá chεecuú da'cáiyā yeⁿ'e sáⁿ'ā Zebedeo.

*Ch'iichí yā cuerpo yeⁿe Jesús chεeti yáinyāⁿ
(Mr. 15.42-47; Lc. 23.50-56; Jn. 19.38-42)*

⁵⁷ Taachí chiinu nguuvi miiⁿ ndaā 'áámá saⁿā chi nguuvi José chi yeⁿē yāāⁿ Arimatea. Saⁿā miiⁿ ní 'cuiica sa ní discípulo yeⁿe Jesús. ⁵⁸ Sáⁿa 'cūū ní cheⁿe sa nanááⁿ Pilato miiⁿ ní chiica sa cuerpo yeⁿe Jesús miiⁿ. Tuu'mi ní Pilato caⁿa ntiiⁿnyúⁿ yā chí caⁿa capitán yeⁿe soldados chi ca'á yā cuerpo yeⁿe Jesús miiⁿ José miiⁿ. ⁵⁹ Tuu'mi ní José sta'ā sa cuerpo yeⁿe Jesús ní ch'εēcū sa 'áámá sávana δεενε tan'dúúcā chi costumbre yeⁿe 'iiⁿyāⁿ s'eeⁿ. ⁶⁰ Ní s'nuūⁿ sa cuerpo yeⁿe Jesús na 'áámá yáinyāⁿ yeⁿe maaⁿ sa chí ngai chi maaⁿ sa níⁿnuⁿ sa na 'aama yaava. Ch'íínú ch'iichi sa cuerpo yeⁿe Jesús, s'neeⁿ sa 'áámá tuūu chi nééné ch'εεε naachí níndaa yā yeⁿe cheendi yaīnyāⁿ miiⁿ. Ní cunáⁿa sa. ⁶¹ Mííⁿ véé María Magdalena ndúúcū táámá María niiⁿnuúⁿ ná yainyāⁿ.

Soldados ní idiíⁿ yā cuidado yáinyāⁿ miiⁿ

⁶² Chó'ōo nguuvi chi in'nuúⁿ yā yeⁿe 'viicu yeⁿe pascua ní chidεενε táámá nguuvi chi sábadó ní chiiduú n'gεεté ndúúcū 'iiⁿyāⁿ fariseos ní nduuvidaamá yā ní cheⁿe yā nanááⁿ Pilato miiⁿ. ⁶³ Ní caⁿa yā chii yā Pilato: N'diī Pilato, n'gaacú 'nū chí saⁿā chí n'diī chí chinnche'ei sa taachí canee sa in'yeeⁿdí 'cūū ní caⁿa sa 'túúcā: 'Cuíinū 'iinu nguuvi ní nduūchí nguaaⁿ tináⁿā. ⁶⁴ Maaⁿ ní dichó'o nī soldados chí diíⁿ yā cuidado yáinyāⁿ miiⁿ ndíí 'cuiinu 'iīnū nguuvi. ¿'Áátī ndaá discípulos yeⁿe yā n'gaan ní diíⁿ iduucú yā cuerpo yeⁿe Jesús? Ní caaⁿmaⁿ yā cuuvi yā 'iiⁿyāⁿ chí sáⁿā miiⁿ ní nanduuchi sá

yeⁿe nguaaⁿ tináⁿā. Ní cunnkáā ca nduudu yaadi miiⁿ nguéé ti chi 'āā chó'ōo.

⁶⁵ Pilato miiⁿ ní caⁿ'a yā chii yā 'iiⁿ'yāⁿ s'eeⁿ: 'Ingaā 'áámá taaⁿ soldados. Cueⁿ'e nī ní diiⁿ nī cuidado yáinyāⁿ miiⁿ tan'dúúcā chi déenu nī chi n'daācā.

⁶⁶ Tuu'mi ní 'iiⁿ'yāⁿ s'eeⁿ ní cheⁿ'e yā yáinyāⁿ miiⁿ ní diiⁿ yā cuidado yáinyāⁿ miiⁿ. S'neeⁿ yā 'áámá sello na tuūu ch'εεté ní s'neeⁿ yā soldados chí diiⁿ sa cuidado yáinyāⁿ miiⁿ.

28

*Jesús nduuchi yā yeⁿ'ē nguaaⁿ tináⁿā
(Mr. 16.1-8; Lc. 24.1-12; Jn. 20.1-10)*

¹ Chó'ōo nguuvi sábado chi ntaavi'tuunúúⁿ yā ní chidεεεε táámá nguuvi chi domingo, nguuvi chí ngaⁿ'a yú chí nguuvi vmnááⁿ vmnaaⁿ yeⁿ'e ndεεtē, ní tá María Magdalena ndúúcū taama tá María cheⁿ'e ta n'diichī tá na yaīnyāⁿ yeⁿ'e Jesús. ² Ní nééné díitūu nuⁿ'u yáⁿ'āa ti 'aama ángel yeⁿ'e Señor Ndyuūs chiiya yā yeⁿ'ē va'ai chεεti nguuvi. Ní taachi ndaa yā, divíi yā tuūu ch'εεεε miiⁿ yeⁿ'e cheendi yaīnyāⁿ ní ch'iindi yā vmnaaⁿ yeⁿ'e tuūú miiⁿ. ³ Angel miiⁿ tan'dúúcā chí inááⁿ 'cuai 'tíicā máaⁿ yā chí dεεεε yā. Ní catecai yā ní cuéé tan'duucā yaāⁿ. ⁴ Soldados chí idiⁿ yā cuidado yáinyāⁿ miiⁿ in'dúúví yā chí 'va'a yā. Ní nduuví yā tan'dúúcā chí ch'īi yā. ⁵ Naati ángel miiⁿ caⁿ'a yā chii yā n'daataá s'eeⁿ: Nguéé 'va'a ndís'tiī; ti 'úú ní deenú ti in'nuúⁿ nī Jesús chí cā'neeⁿnga'a. ⁶ 'Āā ntéé 'iiⁿ'yāⁿ miiⁿ ti nduuchi yā yeⁿ'ē nguaaⁿ tináⁿā tan'dúúcā chí caⁿ'a yā. Cuchíi nī ní n'diichí

nī naachí cānuuⁿ cuerpo yeⁿe Señor miiⁿ. ⁷ Cuayivi ní ngaⁿ'a ángel chii yā n'daataá s'eeⁿ: Cuinaⁿ'a núuⁿ nī maāⁿnchēēté ní caaⁿ'máⁿ nī cuuvi nī discípulos yeⁿe yā chí nduuchi Jesús miiⁿ yeⁿe nguaaⁿ tináⁿ'ā. Cuin'diichí nī. Jesús miiⁿ caⁿ'a yā vmnááⁿ ndís'tiī na yáⁿ'āa Galilea. Míiⁿ snaaⁿ nī 'iiⁿ'yāⁿ. Chūū chí ngaⁿ'á ngii ndís'tiī.

⁸ Tuu'mi ní n'daata s'ééⁿ nan'dáa yā chεεti yáinyāⁿ miiⁿ ní dii'yá yā chii ní duuvi yeenú yā. N'daata s'ééⁿ ní cueⁿ'e yā ngéenū yā ní caⁿ'a yā chii yā discípulos yeⁿe Jesús tan'dúúcā chí n'diichí yā.

⁹ Tuu'mi ní taachi cueⁿ'é yā chi yaa'ví yā discípulos cuin'diichí nī, Jesús miiⁿ ndaá yā chí ndaacá yā n'daata s'eeⁿ ní caⁿ'a yā: Tavacho'onoó nī ndís'tiī n'daata s'eeⁿ. Ní n'daata s'eeⁿ ní ndáá niiⁿnúⁿ yā Jesús miiⁿ ní túmaⁿ'a yā ca'a Jesús miiⁿ ní s'téenu yā 'iiⁿ'yāⁿ. ¹⁰ Tuu'mi ní Jesús caⁿ'a yā chii yā n'daataá s'ééⁿ: Nguéé 'va'a nī. Cuéⁿ'e nī cuuví nī hermanos yeⁿ'é chí n'diichí nī 'úú. Ní hermanos caⁿ'a yā na yáⁿ'āa Galilea ní miiⁿ snaáⁿ yā 'úú.

Soldados ngaⁿ'a yā ngii yā chiiduú n'gεεε s'eeⁿ tan'dúúcā chí chí

¹¹ Nchó'ōo n'daata s'uuⁿ cunaⁿ'á yā ní n'duuvi soldados chi diíⁿ yā cuidado yeⁿe yáinyāⁿ chen'é yā na yáāⁿ Jerusalén ní caⁿ'a yā chii yā chiiduú n'gεεε yeⁿ'é tánducueⁿ'ē chí chí. ¹² Chiiduú n'gεεε nadidaamá yā ndúúcū 'iiⁿ'yāⁿ ndíícuū chí ngaⁿ'a ntiinnyuⁿ yeⁿ'e yaācū. Ní nduuidaamá yā ní nééné n'deēe túumī ca'a yā soldados. ¹³ Ní caⁿ'a yā chii yā soldados: Ndís'tiī ní 'túúcā caaⁿ'maⁿ nī: Taachi yaaⁿ stiyaadú 'nū discípulos yeⁿ'e Jesús ndaá yā ní diduucú yā cuerpo yeⁿ'e Jesús. ¹⁴ Ní

nduuti chi gobernador 'caandíveén yā chíín chí ndís'tiī caa'maⁿ nī, nús'uu yaa'vi neeⁿ 'nū 'ii'yāⁿ ní nguaⁿāī ndís'tiī.

¹⁵ Soldados ní sta'á yā tuūmī miiⁿ ní diíⁿ yā tan'dúúcā chi chiiduú n'gεεε caⁿ'á yā chii yā soldados. Chíín chí ndii maaⁿ ní 'ii'yāⁿ yeⁿ'e ndaataá Israel ngaⁿ'á yā 'tíicā.

Jesús idichó'o yā discípulos yeⁿ'e yā

(Mr. 16.14-18; Lc. 24.36-49; Jn. 20.19-23)

¹⁶ Ndu'ū ndiicháámá discípulos cueⁿ'é yā na yáⁿ'āa Galilea ní ndaá yā ná yiicū naachí Jesús miiⁿ dichó'o yā 'ii'yāⁿ s'eeⁿ. ¹⁷ Taachí discípulos n'diichí yā Jesús miiⁿ, s'téenu yā 'ii'yāⁿ 'áará chí náⁿ'a yā ní 'uūvi vaanicádiinūⁿ yeⁿ'e yā. ¹⁸ Jesús ní ndaa niiⁿnúⁿ yā ní yaa'vi yā discípulos ní caⁿ'a yā: Chiidá ní tee yā 'úú nducueⁿ'e poder chí caaⁿ'maⁿ ntiiⁿnyúⁿ na va'āī chεeti nguuvu ndúúcū na iⁿ'yeeⁿdí 'cūū. ¹⁹ Maaⁿ ní cueⁿ'e nī ni ca'cueéⁿ nī nuuⁿmaⁿ naciones, ní cuuvi nī discípulos yeⁿ'é. 'Ii'yāⁿ chi i'téenu yā nduudu cuaacu yeⁿ'é, ndís'tiī cuεεdínuūⁿnī nī 'ii'yāⁿ miiⁿ ndúúcū chi duuchi Ndyuūs Chiida yú, ndúúcū Daiya yā, ndúúcū Espíritu N'dai yeⁿ'é Ndyuūs. ²⁰ Cá'cueeⁿ nī 'ii'yāⁿ s'eeⁿ chí diíⁿ yā tanducueⁿ'ē dendu'ū chi 'úú ngaⁿ'á ngií ndís'tiī. Ní cadíínuuⁿ nī chi 'úú ní caneé ndúúcū ndís'tiī nducueⁿ'ē tiempo ndíí ntuví iⁿ'yeeⁿdí. 'Tíicā cuuvi.

**Nduudu n'dai ye^{n'}e Ndyuūs ye^{n'}e cuicateco
ye^{n'}e Tepeuxila
New Testament in Cuicatec, Tepeuxila
(MX:cux:Cuicatec, Tepeuxila)**

copyright © 1974 Wycliffe Bible Translators, Inc.

Language: Cuicatec, Tepeuxila

Translation by: Wycliffe Bible Translators, Inc.

Cuicateco, Tepeuxila [cux], Mexico

Copyright Information

© 1974, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Tepeuxila

© 1974, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

28b090dc-326e-56c7-994e-5d3354d1d54f